



SC. SUP. 6. PL. 4.









PHILOSOPHIA
A D
USUM SCHOLÆ
ACCOMMODATA.

*Auctore M^o. GUILLELMO DAGOUMER ,
Philosophia Professore in Universitate
Studii Parisiensis.*

Opus ab ipso reformatum , variisque Tractatibus
auctum.

TOMUS SEXTUS.


PHYSICA PARTICULARIS.



LUGDUNI,

Sumptibus FRATRUM DUPLAIN,
viâ Mercatoriâ.

M. DCC. LVII.
CUM PRIVILEGIO REGIS.





APPROBATIO CENSORIS REGII.

JUSSU Illustrissimi Galliarum Cancellarii legi *Philosophiam ad usum Scholæ accommodaram, Editio aucta, ab Autore M. G. DAGOUMER, Philosophia Professore, & Antiquo Rectore universi Studii Parisiensis &c. Datum Parisiis, die decimâ mensis Novembris 1752.*

G. GERMAIN.



PRIVILEGE DU ROI.

LOUIS, PAR LA GRACE DE DIEU, ROI DE FRANCE ET DE NAVARRE; A nos amés & féaux Conseillers les gens tenant nos Cours de Parlement, Maîtres des Requêtes ordinaires de notre Hôtel, grand Conseil, Prévôt de Paris, Baillifs, Sénéchaux, leurs Lieutenants civils, & autres nos Justiciers qu'il appartiendra: SALUT. Nos amés les Freres DUPLAIN, Libraires à Lyon, Nous ont fait représenter qu'ils desireroient faire imprimer & donner au public un Ouvrage qui a pour titre, *Philosophia ad usum Scholæ accommodata, Autore DAGOUMER*, s'il nous plaisoit leur accorder nos Lettres de Privilège pour ce nécessaires. A CES CAUSES, voulant favorablement traiter les Exposants, Nous leur avons permis & permettons par ces Présentes, de faire imprimer ledit Ouvrage en un ou plusieurs Volumes, & autant de fois que bon leur semblera, & de le vendre, faire vendre & débiter par tout notre Royaume pendant le tems de dix années consecutives, à compter du jour de la date des Présentes. Faisons défenses à tous Imprimeurs, Libraires & autres personnes, de quelque qualité & condition qu'elles soient, d'en introduire d'impressions étrangères dans

aucuns lieux de notre obéissance ; comme aussi d'imprimer, faire imprimer, vendre, faire vendre, débiter, ni contrefaire ledit ouvrage, ni d'en faire aucuns extraits, sous quelques prétextes que ce soit, d'augmentations, corrections, changements, ou autres, sans la permission expresse & par écrit desdits Exposants, ou de ceux qui auront droit d'eux, à peine de confiscation des Exemplaires contrefaits, de trois mille livres d'amende contre chacun des contrevenants, dont un tiers à Nous, un tiers à l'Hôtel-Dieu de Paris, l'autre tiers auxdits Exposants, ou à ceux qui auront droit d'eux, & de tous depens, dommages & intérêts ; à la charge que ces Présentes seront enrégistrées tout au long sur le Registre de la Communauté des Libraires & Imprimeurs de Paris, dans trois mois de la date d'icelles, que l'impression sera faite dans notre Royaume & non ailleurs, en bon papier & beaux caractères, conformément à la feuille imprimée, & attachée pour modèle sous le contrescel des Présentes ; que les Impétrants se conformeront en tout aux Réglements de la Librairie ; qu'ayant de l'exposer en vente, le M. S. qui aura servi de copie à l'impression dudit Ouvrage sera remis dans le même état où l'approbation y aura été donnée, es mains de notre très-cher & féal Chevalier, Chancelier de France, le Sieur de Lamoignon ; qu'il en sera ensuite remis deux Exemplaires dans notre Bibliothèque publique, un dans celle de notre Château du Louvre, & un dans celle de notre très-cher & féal Chevalier, Chancelier de France, le Sieur de Lamoignon, & un dans celle de notre très-cher & féal Chevalier, Garde des Sceaux de France, le Sieur de Machault, Commandeur des nos Ordres ; le tout à peine de nullité des Présentes, du contenu desquelles vous mandons & enjoignons de faire jouir lesdits Exposants ou ayants cause, pleinement & paisiblement, sans souffrir qu'il leur soit fait aucuns troubles ou empêchements. Voulons que la copie des Présentes, qui sera imprimée tout au long au commencement ou à la fin dudit Ouvrage, soit renue pour dûment signifiée, & qu'aux copies collationnées par l'un de nos amis & féaux Conseillers Secrétaires, soit ajoutée comme à l'original. Com-

mandons au premier notre Huissier ou Sergent sur ce requis, de faire pour l'exécution d'icelles tous actes requis & nécessaires, sans demander autre permission, & nonobstant clameur de Haro, Charte Normande & lettres à ce contraires: Car tel est notre plaisir. DONNE' à Versailles, le neuvième jour du mois de Décembre, l'an de grace mil sept cent cinquante deux, & de notre Règne le trente-huitième.

Par le ROI en son Conseil.

Signé SAINSON, avec Paraphe.

Certifié véritable & conforme à l'Original, enregistré le 12. Decembre 1752. sur le Registre XIII. n. 81. fol. 54. par nous Syndic & Adjoins de la Librairie & Imprimerie de Paris. Fait en notre Chambre Royale & Syndicale, le 18. Fevrier 1757.

P. G. LE MERCIER, Syndic.

ESTIENNE, Adjoins.

SAVOYE, Adjoins.



INDEX

PHYSICÆ PARTICULARIS TITULORUM.

D E COSMOGRAPHIA. pag. 1	
Quid sit mundus.	3
An sit mundus & cur sit.	5
Utrum mundus creatus fuerit ab aeterno.	6
Utrum mundus potuerit creari ab aeterno.	8
Quâ tempestate mundus fuerit productus.	10
A quo tempore mundus fuerit productus.	11
Qualis sit mundus.	13
BREVIS INSTITUTIO ASTRONOMI-	
CA juxta hypotheses Ptolemæi, Copernici	
& Tychoonis.	14
De Sphæra.	16
De Sphæra cœlesti.	17
De partibus Sphære.	18
De circulis terrestribus.	27
DE PHŒNOMENIS PER SPHÆRAM	
EXPLICANDIS. De motibus Syde-	
rum.	35
De Luna Phasibus.	37
De Solis & Luna Eclipsibus.	38
De triplici Sphæra positu varii, que pro ejus	
varietate Phænomenis.	41

Index.

De Crepusculis.	45
De <u>variis</u> mundi systematibus.	46
De Phenomenis.	47
De systemate Ptolemaei.	49
Systema Platonium.	63
Systema Aegyptiorum.	64
Systema Tychoicum.	ibid.
Systema Copernicanum.	67
Utrum hoc systema satisficiat Astronomia.	72
An satisficiat mechanicis Legibus.	87
Objectiones contra systema Copernicanum.	88
Systema Copernicanum explicatum à Cartesio.	100
Critica Cartesiani systematis.	110
Nostri sententia de Principiis physicis.	112
Quotuplex sit mundus.	117
DE CORPORE COELESTI. Quid sit Cælum.	126
Cur sit.	127
<u>Quales</u> sint Cæli.	128
De Syderibus. Quid sint stellæ fixæ.	131
<u>Quales</u> sint stellæ fixæ.	133
De Causâ scintillationis syderum.	134
<u>Quot</u> sint stellæ fixæ.	136
De Sole.	137
De maculis solaribus.	138
Quæ sit macularum solarium natura.	139
<u>Qualis</u> sit Sol.	140
De Viâ lacteâ.	142
De Planetis.	143
De Cometis.	150

Index.

<i>De loco Cometarum.</i>	151
<i>De naturâ Cometarum.</i>	153
<i>De Cometarum origine.</i>	161
<i>De motu Cometarum.</i>	162
<i>De corpore sublunari.*</i>	ibid.
<i>De corpore simplici.</i>	163
<i>De igne.</i>	ibid.
<i>De lumine.</i>	164
<i>De naturâ luminis.</i>	ibid.
<i>Nostra sententia.</i>	167
<i>De propagatione luminis.</i>	187
<i>De reflexione luminis , ubi de Dioptricâ</i>	
<i> & Catoptricâ.</i>	189
<i>De primâ suppositione seu hypothesi.</i>	192
<i>Affertur ratio Cartesii.</i>	193
<i>De secundâ suppositione Catoptrices.</i>	195
<i>De tertiâ.</i>	ibid.
<i>De quartâ.</i>	197
<i>De refractione luminis.</i>	ibid.
<i>Priorum Opinio.</i>	201
<i>Affertur ratio Cartesii.</i>	204
<i>De Vitris.</i>	208
<i>De Coloribus.</i>	209
<i>Quid sit Color.</i>	ibid.
<i>Quotuplex sit Color.</i>	222
<i>A quo sit Color fugax & mutabilis.</i>	224
<i>Quomodo Color verus & apprens</i>	<i>differe-</i>
<i> rant.</i>	225
<i>Quinam Colores sint primitivi.</i>	228
<i>Quæ sit Colorum dispositio mechanica.</i>	229
<i>De Calore.</i>	235

Index.

<i>Quid sit calor.</i>	<u>235</u>
<i>Quotuplex sit calor.</i>	<u>246</u>
<i>De frigore.</i>	<u>249</u>
<i>De siccitate.</i>	<u>252</u>
<i>De fluiditate.</i>	<u>254</u>
<i>De levitate.</i>	<u>262</u>
<i>De aere.</i>	<u>266</u>
<i>De liquiditate.</i>	<u>267</u>
<i>Explicantur phænomena circa liquores.</i>	<u>268</u>
<i>De ipsâ aeris liquiditate.</i>	<u>272</u>
<i>De ratione diaphani.</i>	<u>273</u>
<i>De vi elasticâ.</i>	<u>279</u>
<i>De vi elasticâ aëris.</i>	<u>285</u>
<i>De vi elasticâ calybis.</i>	<u>286</u>
<i>De lasrymâ Batavicâ.</i>	<u>290</u>
<i>De raritate, rarefactione, densitate & condensatione.</i>	<u>298</u>
<i>De gravitate aëris.</i>	<u>306</u>
<i>Quæ sit causa suspensionis & ascensûs gravium.</i>	<u>313</u>
<i>De aquâ.</i>	<u>340</u>
<i>De mari.</i>	<u>343</u>
<i>De salsugine maris.</i>	<u>347</u>
<i>De motibus maris.</i>	<u>353</u>
<i>De motu maris ab ortu in occasum.</i>	<u>354</u>
<i>De motu reciproco.</i>	<u>355</u>
<i>Quæ sit causa æstûs maritimi reciproci.</i>	<u>358</u>
<i>De motibus maris specialibus.</i>	<u>368</u>
<i>De fontium origine.</i>	<u>370</u>
<i>De quibusdam fluviorum proprietatibus.</i>	<u>376</u>
<i>De aquis mineralibus & thermis.</i>	<u>378</u>

Index.

<i>De Terrâ.</i>	381
<i>De gravitate.</i>	383
<i>De Causâ motûs gravium.</i>	385
<i>Opinio Peripateticorum.</i>	387
<i>Opinio Gassendi.</i>	389
<i>Opinio Cartesii.</i>	391
<i>Opinio nostra de Cartesiano systemate.</i>	394
<i>Sententia Varignonii.</i>	395
<i>Opinio nostra.</i>	396
<i>De gravium descensu in planis inclinatis.</i>	398
<i>De acceleratione gravium.</i>	401
<i>De accelerationis proportionem.</i>	402
<i>Sententia Galilæi.</i>	406
<i>De motu Pendulorum.</i>	411
<i>De gravibus quæ cum aliis gravibus librantur.</i>	414
<i>De gravibus liquidis quæ cum aliis liquidis vibrantur.</i>	419
<i>De descensu solidorum quæ cum aliis gravibus librantur.</i>	426
<i>De variis machinarum speciebus quibus gravia librantur.</i>	428
<i>De Veste.</i>	ibid.
<i>De axe in Peritrochio fuculâ & ergatâ.</i>	437
<i>De Trochleâ.</i>	440
<i>Rota dentata.</i>	441
<i>Cuneus.</i>	442
<i>De corporis mixto.</i>	443
<i>De balitibus.</i>	444
<i>De ignitis impressionibus.</i>	445
<i>De fulmine.</i>	449

Index.

<i>De iride.</i>	<u>456</u>
<i>De halone , phareliis , nubium colori-</i> <i>bus , &c.</i>	<u>460</u>
<i>De nubibus.</i>	<u>462</u>
<i>De nive.</i>	<u>465</u>
<i>De pluviâ.</i>	<u>468</u>
<i>De grandine.</i>	<u>471</u>
<i>De rore, brumâ, sudo, mannâ Calabricâ.</i>	<u>472</u>
<i>De Calore subterraneo.</i>	<u>473</u>
<i>De Ventis.</i>	<u>475</u>
<i>De Ventorum origine.</i>	<i>ibid.</i>
<i>Præcipua Ventorum species.</i>	<u>478</u>
<i>De Ventorum proprietatibus.</i>	<u>480</u>
<i>De mixtis perfectis.</i>	<u>483</u>
<i>De mixtis perfectis inanimatorum.</i>	<i>ibid.</i>
<i>De salibus.</i>	<u>485</u>
<i>De speciebus salis.</i>	<u>486</u>
<i>De sulphure.</i>	<u>488</u>
<i>De spiritibus.</i>	<u>490</u>
<i>De mineralibus.</i>	<u>491</u>
<i>De gemmis.</i>	<u>494</u>
<i>De lapide magnetico.</i>	<u>495</u>
<i>De vi directivâ magnetis.</i>	<u>497</u>
<i>De vi magnetis attracti.</i>	<u>510</u>
<i>De vi communicativâ magnetis.</i>	<u>516</u>
<i>De quibusdam aliis attractivis.</i>	<u>519</u>
<i>De metallis.</i>	<u>520</u>
<i>De origine metallorum.</i>	<u>521</u>
<i>Nostra sententia de naturâ metallorum.</i>	<u>524</u>
<i>De ferro.</i>	<u>525</u>
<i>De plumbo.</i>	<u>526</u>

Index.

<i>De stanno.</i>	528
<i>De hydrargyro.</i>	ibid.
<i>De cupro.</i>	530
<i>De argento.</i>	531
<i>De auro.</i>	ibid.
<i>Appendix de duritie.</i>	532
<i>De mixtis perfectis animatis.</i>	533
<i>De plantis.</i>	535
<i>Quid sint planta.</i>	536
<i>De plantarum ortu & transformatione.</i>	544
<i>De nutritione plantarum.</i>	554
<i>De viribus plantarum.</i>	560
<i>De morbis & interitu plantarum.</i>	561
<i>De brutis animantibus.</i>	562
<i>Quid sint bellua.</i>	ibid.
<i>Quid sit anima belluarum.</i>	571
<i>Quotuplex sit anima belluarum.</i>	586
<i>De insectis.</i>	589
<i>De primâ insectorum classe.</i>	590
<i>De secundâ insectorum classe.</i>	593
<i>De tertiâ insectorum classe.</i>	595
<i>De quartâ insectorum classe.</i>	598

Finis Indicis Titulorum Physicæ
particularis.

PHILOSOPHIA



PHILOSOPHIA

AD USUM SCHOLÆ

ACCOMMODATA.



PHYSICA PARTICULARIS.



SECRETIORA naturæ mysteria
vobis revelamus, ut ejus Au-
ctori debitus exhibeatur honos.
Sit itaque, ut primùm dispo-
sitio totius Universi innotescat,

DE COSMOGRAPHIA.

Cosmographia idem sonat ac descriptio
mundi : porrò si fidem oculis nostris de-
mus, aliisque sensuum testimoniis, hanc
ejus imaginem fingemus postea exami-
nandam & illustrandam. Nos homi-
nes, in hac infinitâ entium vastitate col-

Tom. VI.

A

locati, non sine admirationis sensu contemplamur partem illam mundi in quâ nascimur & movemur; atque in eâ sede constituti, quæ sursùm sunt, quæ deorsùm, quæque nos circumstant non sine aliquo cognoscendi desiderio intuemur.

1^o. quidem apparet terra, solidum illud corpus, quod calcamus pedibus; fluminibus, rivulis, fontibus irrigatum; mari divisum, rupibus ac montibus asperum; arboribus, herbis, floribus ornatum; animalium ferax est mater, in cujus visceribus varia fossilium genera, mineralia, metalla, ipsæ divitiæ: ex aquâ & terrâ globus conflatur terraqueus, cui circumfusus aër ubicumque incumbit, & ut maria plena piscibus, ità in aëre volucres liberè feruntur, venti proflant, pensiles volitant nubes spiritu procellarum gravidæ; inde micant fulgura, & audiuntur fragores horrifoni: mox spissâ caligine obscuratur, mox luce totus perfunditur; tuncque aspectu libero, ad ea quæ sursùm sunt, apparet cæruleus color in modum fornicis suspensus ad eam altitudinem, quam nemo definire possit.

Ut horum omnium notitiam possimus consequi, priùs agendum de mundo, deinde elementa sphæræ proponenda, ut varia Philosophorum systemata examini subjiciamus.

Quid sit Mundus.

Quidam voluerunt mundum esse ingens quoddam animal ; imò assignant ipsi partes aliquas homogeneas cum nostris : terra est veluti pes ; venæ sunt fluvii & mare ; ossa lapides, caput cœlum ; oculi, sol & luna.

Quod spectat ad partes assignatas, dico hoc crassam significare ignorationem eorum quæ in mundo sunt : scilicet luna ejusdem est conditionis cum terrâ, sic alii planetæ : deinde stellæ fixæ sunt totidem soles sæpius majores sole nostro : hinc si crederemus illis Auctoribus, mundus non haberet ossa nisi in pede, nec venas : hæc igitur mitto.

Difficultas est utrùm corpora reverà sentiant ; porro si sentiunt, mundus est reverà animal : animal enim à sensatione constituitur ; atque parum interest an habeat pedes, an oculos, &c.

Dico corpora non sentire ; nam si corpora sentirent, maximè humana : atqui corpus humanum non sentit ; scilicet excitetur sensatio caloris in manu dextrâ, frigoris in sinistrâ, excitetur sensatio hujusce coloris, sensatio alterius, excitetur sensatio soni, v. g. modulationis. Profectò si corpus sentiat, quia oculi, au-

res, manus sunt totidem substantiæ distinctæ, distinctas habebunt sensationes: quapropter oculi sentientes non essent conscii manuum quæ sentiunt, sic manus oculorum: atqui tamen ex intimo conscientiæ sensu conscii sumus illarum sensationum: ergo præter corpus in nobis debet esse alia substantia quæ illas patiatur sensationes; proindeque corpus humanum non sentit, adeoque cætera corpora non sentiunt.

Quamobrem mundus est *ordinata compages rerum materialium*; in quâ definitione non fit mentio de animâ rationali; quippè licet sit unita substantialiter corpori, non est tamen propriè de hoc mundo, sed ad Deum ipsum ordinata est: hinc cum Christo dicere potest, *regnum meum non est de hoc mundo*; aut si dicatur quòd sit hujusce universi aliqua pars, eo sensu dici debet, quòd ita facta est, ut ad ejus numerum sint in corpore nostro certi motus, quia facta est, ut præsit avibus cœli, piscibus maris, & animalibus terræ.

Compages ista *bene ordinata est*: nec enim à malo genio fuit disposita, ut contendebant veteres hæretici. Quippè tum materia, tum motus à Deo facta sunt, quod arguit mirabilis partium concentus, elegans harmonia, structura excellens quæ deprehenduntur vel ab eo qui oculos in

cœlum conjiciet vel ad terram defiget. In cœlis mirabitur immensos illos orbes, constantes syderum motus, nubes volatiles, &c. in terrâ varia plantarum genera, innumerabilem animalium multitudinem, &c. ex quibus concludet, illud esse opus Architecti sapientissimi.

An sit mundus & cur sit.

Mundum existere nemo seriò dubitare potest; si rationes quærat, legat quæ à nobis scripta sunt.

Mundum fuisse productum patet, tum ex eo quòd materia fuerit creata, tum ex eo quòd motus à solo Deo produci possit.

Causa finalis orbis universi primaria est Dei gloria: quippè Deus omnia propter semetipsum operatus est, ut sua manifestaret attributa: invisibilia enim Dei per ea quæ facta sunt intellecta conspiciuntur.

Causa secundaria sunt electi, quos ab æterno prædestinavit Deus ante mundi constitutionem, & ad quorum salutem infallibiliter habendam ordinatæ sunt ipsæ causæ naturales.

Causa exemplaris sunt ideæ divinæ, ad quas respiciebat Deus dùm fundabat terram: hinc dicitur fundasse cœlos in intellectu: hinc sapientia Dei comes in omnibus operibus ejus.

Causa materialis est ipsa materia.

Causa formalis est ipsa dispositio partium materiæ.

Quæritur hîc utrùm mundus creatus fuerit ab æterno, deinde utrùm potuerit creari, tertio à quo tempore fuerit productus, denique quânam tempestate. Sit ergo :

Utrùm mundus creatus fuerit ab æterno.

Partem affirmativam tenuit Aristoteles; sed contrà sit

PROPOSITIO.

Mundus non fuit creatus ab æterno.

Pr. Nam si foret æternus, haberetur traditione nullum posse assignari mundi initium, videlicet habuissent homines quodd nullus fuisset primus homo: porro non modò Moyse initium mundi supposuit, sed omnes Paganorum historiæ idem supponunt.

Et certè si homines essent ab æterno, rerum gestarum annales & aliqua monumenta testarentur indefinitam saltem hominum durationem: constat quippè ex appetitu singulis insito homines immortalitatis desiderio excitatos, quantum

in se est, efficere ut perpetuam suâ memoriam relinquant: huc tendit historia, tendunt sepulchra, epitaphia, trophæa, pyramides, statuæ, &c. Atqui nulli annales, nulla monumenta testantur indefinitam hanc hominûm durationem, imò nulla unquam fuerunt ex quibus id colligi potuerit: scilicet disceptatio fuit inter Epicureos ex unâ parte & cæteros Philosophos ex alterâ de mundi æternitate. Epicurei contendebant natum fuisse de novo mundum; cæteri autem æternam aut indefinitam saltem durationem mundo tribuebant: certè si fuisset monumentum aliquod hujusce veteris originis, ab adversariis allatum fuisset: porrò nullum allatum legitur, & reverà nullum erat: scilicet, excepto Moyse, meræ fabulæ apud scriptores ante Trojani belli tempora.

Denique si mundus esset æternus, cùm ab æterno fuisset hominum industria, ab æterno excogitasset, proindeque artes omnes essent æternæ; porrò habemus omnes artium inventores, novimus artium illarum epocham, & nulla jam est quæ non fuerit inventa ab Adami temporibus. Scilicet nùm elapsa fuisset æternitas sine inventione Architecturæ, sine cultu tritici & vitis: tamen hæc ab Adami temporibus inventa sunt.

Dices 1º. Opus Deo dignum debuit

A iv

creari ab æterno : mundus est Deo dignus : ergo, &c.

Dist. maj. Dignum Deo, id est, Deum perficiens, C. dignum Deo, id est, manifestans dignitatem Dei, N.

Dices 2°. Tempus non potest incipere.

Negatur. Nam nomine temporis intelligitur duratio, quæ initium habuit & finem est habitura. Reverà est æterna duratio, sed illa non dicitur tempus.

Utrum Mundus potuerit creari ab æterno.

Nonnulli inter Christianos, qui cum Scripturis docuerunt mundum in tempore productum fuisse, docent ipsum ab æterno potuisse creari : alii verò fatentur quidem ipsum potuisse priùs & priùs produci, sed negant æternitatem ipsi potuisse competere. Pro quibus sit

PROPOSITIO.

Mundus non potuit creari ab æterno.

Pr. 1°. Ex Patribus. Tertulliano, qui æternitatem dixit Dei censum, & iis omnibus qui disputaverunt contrà Arianos : ii quippè, putà Athanasius, Basilius, Ambrosius, Augustinus, ex illis verbis, *origo ejus à diebus æternitatis*, concludebant Filium

non esse creaturam. Sic ipse Lactantius, Nicanis Patribus antiquior, ratiocinabatur lib. 2. divinarum instit. cap. 8.

Hinc Arius ipse negabat Filium Dei semper fuisse: ideò, inquit Epistolâ ad Eusebium Nicomediensem, ne fateri cogamur esse propriè Deum, Patri coæqualem: quamobrem cùm Ariani molliores distinguere conati sunt in Concilio Ariminensi inter sempiternum & increatum, vestigiis sui Patriarchæ non insistebant, sed insidiosâ quâdam subtilitate fucum Catholicis facere volebant, ut habet Hieronymus in Dialogo contra Luciferianos.

Pr. 2^o. Ratione. Quod creatur producit ex nihilo suū & ex nihilo subjecti: atqui nihil potest ab æterno produci ex nihilo suū & ex nihilo subjecti: nam si aliquid ab æterno produci posset ex nihilo suū & ex nihilo subjecti, in eodem instanti nihilum suū & nihilum subjecti possent esse simul cum aliquo suū & aliquo subjecti: porro impossibile est idem simul esse & non esse; ergo nihil potest ab æterno creari.

Dices: ubi causa habet ab æterno virtutem creandi, nihil prohibet effectum æternum esse: sed Deus habet ab æterno virtutem creandi: ergo, &c.

Dist. maj. Nihil prohibet ex parte causæ producentis, C. Ex parte effectûs produ-

cendi, N. Porro mundus non debuit esse æternus, quia prius debuit non esse quàm esse.

Dices iterum : quandocumque Deus est, operari potest : atqui Deus est ab æterno : ergo potest operari ab æterno.

Concedo totum, nulla videlicet est impotentia in Deo : est igitur in ipso potentia ab æterno, sed ut in tempore producat.

Quâ tempestate Mundus fuerit productus.

Quidam volunt initium habuisse mense Septembri circà æquinoctium, quia observant fuisse fructus : alii volunt mense Martio, quia mensis iste ab Hebræis semper primus habitus est : tum quia Jesus Christus pro nobis mortuus est illo mense : porro volunt conveniens fuisse, ut Christus eâ diè, eâ horâ mortuus fuerit, quâ Adamum creavit.

Sed neutra pars suam demonstrat opinionem : non prima quidem, tum quia ut Adam non productus est infans, sed vir perfectus, ità plantæ productæ sunt cum suis fructibus, quocumque tempore facta fuerit productio : tum quia non erat tempestatum inæqualitas in illo terrestri Paradiso in quo nascituri erant perpetuò fructus.

Nec etiam secunda, quia initium temporum potuerunt immutare Hebræi, ut immutavêre Græci, Romani : nimirum ye-

risimile est primos homines non instituisse menses, hancque institutionem natam fuisse ex hominum industriâ.

Quoad convenientiam inter Christi mortem & Adæ peccatum, quoad diem & horam, nihil certi asseri potest.

A quo tempore Mundus fuerit productus.

Hæc quæstio ad Chronologiam pertinet potius quàm ad Physicam. Scilicet ipsi Catholici inter se disputant de Calculo temporum à creatione mundi ad nostram ætatem: alii sequuntur 70 Interpretes, alii sequuntur textum Hebraicum. Utur est, Sit

PROPOSITIO.

Mundus fuit conditus eo tempore quod assignat Moyses, nec fuerunt Praadamita.

Pr. Scilicet fides debet adhiberi Moyfi potius quàm alteri scriptori: primò quia Moyses est inter scriptores antiquior. 2º. Quia videtur sincerus & candidus quò maxime distat ab aliis qui fabulas narrant, ut exordium atque genesim suæ gentis habeant: sic ipse Livius, qui inter cæteros candidior videtur, dùm fatetur Remum & Romulum suam debere originem stu-

A vi

pro ac meretrici, fatetur ipsam à Marte Deo compressam, vitia gentis reticet, exhibet virtutes: at verò Moyſes & alii ſcriptores canonici veritatem nudè propoſuerunt, veritate potiùs reguntur quàm politicâ in ſuis narrationibus. Judas ex Thamar ſuſcipit filios, Moyſes fraudem narrat proavi ſui Levi, turpitudinem & invidiam Aaronis fratris ſui nec-non Mariæ ſororis, gentem univerſam idololatriæ ream exhibet, populum vocat duræ cervicis.

Dices: annales fuerunt apud Ægyptios quibus major antiquitas aſſerta erat Ægyptiis; ſunt & apud Sinas hiſtoriæ, quæ ultrà decem ſæculorum millia anteverunt Adami tempora: ergo Moſi credendum non eſt.

Fuerunt, fateor, annales illi à ſacerdotibus Ægyptiis conſcripti, ſed nullo monumento confirmati ſunt. Sunt & apud Sinas tales hiſtoriæ; ſed apud doctiſſimos vel illarum regionum illæ hiſtoriæ non habentur veræ niſi ad tempora diluvii, & quæ antecedunt tempus illud, habentur ut fabulæ aniles, & deliria ſeu ſigmenta ab aliquibus excogitata.

Instabis: ratio temporum accuratè obſervatur in illis hiſtoriis; Eclipſes cujuſlibet anni numerantur: ergo hæc fictitia non ſunt.

Hoc argumento nihil conficiunt Præadamitæ: enimverò quemadmodum futuræ eclipses numerari possunt per decem sæculorum millia, licèt jam defineret orbis, ità posito præsentì rerum ordine, præteritæ eclipses recenferi possunt vel à sæculorum millionibus, licèt non fuerit mundus per illa tempora. 2^o. Vocatis ad examen illis eclipsibus, deprehendit Cassinus plures ex illis falsas esse, neque evenire potuisse. 3^o. Multa in iisdem annalibus leguntur, ex quibus facilè conjici potest eos esse non ità pridem conscriptos. Credamus igitur Moyfi, qui antiquitate, ingenuitate, rationibus, miraculis alios vincit & superat; Moyfi, qui fuit Poëta egregius, perfectus Philosophus, accuratus Geometer, universalis historiæ Scriptor, & cujus Chronologia ea omnia complectitur, quæ certa leguntur apud antiquiores Historicos.

Qualis sit Mundus.

Proprietates mundi veniunt à partium dispositione; præcipuarum autem hujusce universi partium dispositio dicitur systema. At antequàm varia Philosophorum systemata proponamus, sit



**BREVIS INSTITUTIO
ASTRONOMICA,
JUXTA HYPOTHESES**

PTOLEMÆI, COPERNICI ET TYCHONIS.

Astronomia ea est scientia quæ occupatur in contemplandis & dimetiendis syderum motibus, magnitudine, distantia, positu & ordine.

Duas habet partes; prior sphaeram cœlestem explicabit, posterior verò varias de mundi compage hypotheses exponet.

Priusquàm autem ulteriùs progrediamur, operæ pretium est ut proponatur generalis dispositio partium mundi, qualis vulgò exponi solet juxtà mentem Ptolemæi, præmittanturque nonnullæ notiones circà circulum & angulos. Dispositionem hanc exhibet fig. 8. tab. 5.

I N S T I T U T I O.

In hoc systemate orbis medius terræque globum exhibet: sequens spatium ad cœlum usque lunæ aërem, sphaeram-

que igneam, quam admittit Aristoteles : succedit cœlum Lunæ, tum cœlum Mercurii, deinde Veneris, postea cœli Solis, Martis, Jovis & Saturni : tum firmamentum, stellarum sedes : deinde primum mobile, cœlum empyreum, omnium supremum, quod sit beatorum sedes : verum hîc nulla erit illius consideratio.

Inter firmamentum & primum mobile admiserunt nonnulli antiqui cœlos duos, ab illis dictos crystallinos ; verum juxta Recentiorum observationes nulla est cœlorum illorum utilitas.

Ut autem hujusce dispositionis intelligas causam, observa septem numerari planetas (nempe Lunam, Mercurium, Venerem, solem, Martem, Jovem & Saturnum) dictos sydera errantia, ex eo nempe quod non eundem semper servant in motu tenorem ; sed deprehendantur modò congregi, modò digredi, modò accedere, tum ad se invicem, tum ad terram, modò recedere, modò in austrum ferri, modò in boream. Hinc fit ut singulis assignari debeant orbés singuli, alii aliis superiores, prout illa sydera minùs aut magis distant à terrâ, sicut designantur suprâ dictâ figurâ.

Cùm autem stellæ fixæ appareant eundem semper inter se situm servare, eundemque in motu tenorem, hinc una iis assignatur sedes, nempe firmamentum.

Quisnam sit usus primi mobilis intelligetur ex dicendis.

DE SPHÆRA.

Orbis universus oculis apparet ut globus; quem ut exponeret, finxit Archimedes machinam aliquam quam vocant sphæram armillarem, (tab. 4. fig. 1.) ex eo quòd ex pluribus circulis, velut ex armillis constet. Sphæra autem definitur, *corpus solidum unâ superficie comprehensum, in cuius medio punctum est quod dicitur centrum, à quo linea recta ducta ad circumferentiam sunt æquales.*

Sunt in sphærâ diametri; diameter autem est linea recta, quæ ab unâ parte circumferentiæ transit per centrum ad aliam circumferentiæ partem: ut in circulo *a, b, c, d*, linea *a, e, c*. (tab. 4. fig. 2.)

Semidiameter ejus media pars, aliter radius, est linea recta ducta à centro ad circumferentiam, ut linea *e, b*.

Diameter circà quem sphæra volvitur, est *axis*, cujus duæ extremitates poli dicuntur, quia iis veluti immotis, tota sphæra innixa volvitur.

Sunt in sphærâ circuli: *circulus est figura plana, qua ità sub curvâ continetur, ut à centro linea recta ducta ad peripheriam sint æquales.* Peripheria dividitur in 360 par-

tes, quæ dicuntur gradus: ergo semicirculus, qui diametro *a e c* & mediâ parte peripheriæ *a b c*, continetur, continet 180 gradus, & quadrans 90. Quilibet gradus dividitur in 60 minuta prima: quodlibet minutum primum in 60 minuta secunda, quodlibet secundum in 60 tertia, & sic deinceps.

Circuli alii concentrici, alii excentrici: concentrici habent idem centrum: excentrici verò habent centra diversa: alii sunt paralleli, qui ubique distant æqualiter à se invicem: alii minimè paralleli, qui sese interfecant, aut saltem inæqualiter distant; alii majores, qui sphæram dividunt in partes æquales; alii minores, qui ipsam secant in partes inæquales.

DE SPHÆRA COELESTI.

Circà sphæram cœlestem multa occurrunt explicanda, nempe syderum motus, ortus & occasus, eclipfes, variæ phases lunæ, unde fiat ut aliqua sydera nunquam occidant respectu nostrî, alia verò nunquam suprà horisontem nostrum assurgant, ac præcipuè quonam modo sol faciat varias anni tempestates, modò accedendo ad boream, modò recedendo ad austrum; similiterque quonam modo luna, Mercurius, Venus, Mars, Jupiter,

& Saturnus, hos solis accessus & recessus imitentur variis temporibus.

De Partibus Sphæra.

Tres præcipuæ distingui universim debent in sphærâ nostrâ artificiali, nempe axis, Poli & circuli: distinguuntur insuper in circulis puncta quædam cardinalia dicta.

De Axe & Polis Sphæra artificialis.

Suppono globum illum in medio sphæræ quâ utimur positum, repræsentare terraqueum globum, quem sphæricum esse, aut saltem sphæroïdalem, probant Physici, ex eo quod progredientibus à boreâ ad austrum vel è contrâ, aliæ & aliæ cœli partes hinc occultentur, inde verò aspectabiles fiant; progredientibus ad ortum sydera priùs oriantur, progredientibus verò ad occasum tardiùs.

Axis est ferrea virgula per mediam sphæram traducta, quæ utrinque in duo puncta definit.

Poli sunt illa duo puncta super quibus tota volvitur machina.

Nota autem terraqueum globum non sustentari ullo axe, qualis exhibetur in sphærâ nostrâ; intelligi tamen debere lineam sic traductam in mundo, quæ utrinque ad

primum usque mobile protendatur, designatque in duo puncta quæ dicuntur poli seu cardines mundi, super quibus concipitur volvi tota mundi machina singulis diebus, nempe viginti-quatuor horarum spatio circumcircà.

Polorum alter dicitur boreus seu arcticus, ille nempe qui horisonti nostro supereminet; alter verò australis seu antarticus, qui sub horisonte nostro delitescit.

De Circulis Sphæra.

Nostra sphæra artificialis ex decem tantum circulis constat, quorum sex majores sunt, nempe Horison, Meridianus, Æquator, Zodiacus, & Coluri duo: quatuor verò minores, nempe duo Tropici & Polares duo.

De Horisonte.

Horison seu finitor sic dicitur, quia finit seu terminat aspectum nostrum, est extremus sphærae nostræ circulus qui cæteros ambit.

Dividit sphæram in duo hemispheria, alterum superius, alterum inferius.

Repræsentat eum imaginarium mundi circulum in quo nobis circumquaque aspicientibus apparet quasi cœli & terræ conjunctio.

Distingui solet duplex, alter sensibilis dictus, plano suo ductus per terræ superficiem, alter dictus rationalis, per centrum terræ ductus, qui quidem à sensibili distat semidiametro terræ.

Quia autem terraqueus globus comparatè ad cœlum se habet instar puncti (sicut conjici potest, vel ex eo solo quòd dimidia semper cœli pars nobis conspicua sit) idèò utrumque horisontem possumus quasi unicum considerare.

Cogitari potest ipsius axis, cujus duæ extremitates seu poli, sunt puncta duo, quæ arabicè dicuntur *Zenith* & *Nadir*: *Zenith* Z est punctum verticale, quod vertici nostro imminet. *Nadir* N verò est punctum vertici oppositum, quod nostris pedibus ex adverso subjicitur.

Ufus illius est definire ortus & occasus syderum; oriri namque dicuntur sydera ubi suprà horisontem assurgunt: occidere verò ubi infrà ipsum delabuntur.

Nota 1^o. autem hunc circulum unicum esse atque immobilem in sphærâ nostrâ artificiali, considerari tamen debere tanquam mutabilem, pro locorum diversitate; quia enim ejus poli sunt *Zenith* & *Nadir*, & quia mutatis polis, mutari debet circulus, clarum est ipsum diversum esse pro locorum varietate, utpote quorum varia sunt *Zenith* & *Nadir*.

Verum ut eam horisontis mutabilitatem intelligas, satis est quod sphaera in ordine ad ipsum mutari possit; perinde enim est siue ipse mutetur circa sphaeram, siue sphaera in ipso.

Nota 2^o. Quod quando horison secat æquatorem in angulos rectos, qualis est horison populorum qui degunt sub lineâ, tunc videntur stellæ omnes quotidie oriri & occidere; quando horison & æquator sunt paralleli, qualis est horison eorum qui polos incolunt, tunc quotidie videntur fixæ omnes quæ sunt in hac parte: v. g. incolæ poli arctici vident omnes stellas boreales, nullasque cernunt meridionales; & incolæ poli antarctici intuentur omnes meridionales, nullasque conspiciunt septentrionales: conspiciuntur verò in polo arctico planetæ dum arietem ingrediuntur, occidunt verò dum libram subeunt: hinc signa septentrionalia & meridionalia. Denique quando horison secat æquatorem obliquè, qualis est horison noster, tunc ascensio syderum est obliqua; tunc sydera quæ non longius distant à polo arctico quam 48 gradibus & minutis 52, non oriuntur neque occidunt, quia sunt semper suprâ horisontem posita: pariter vicina antarctico nec occidunt, nec oriuntur, quia sunt infrâ horisontem posita. Immobilis est, ut diximus, in sphaerâ



armillari horison H, O, R, L (fig. 1. tab 4.) in quo designantur gradus quos in Zodiaco sol videtur percurrere.

De Meridiano.

Circulus meridianus in sphaerâ nostrâ artificiali ille est qui sustinet extrema axis, horisontemque secatur ad angulos rectos. His designatur litteris H, Z, R, N.

Repræsentat eum circulum quem fingimus duci per polos mundi & per puncta verticalia *Zenith* & *Nadir*.

Ejus poli sunt in intersectionibus horisontis & æquatoris.

Sphaeram dividit in duo hemispheria, alterum orientale: alterum occidentale.

Syderum cursum supra horisontem in duas æquales partes dividit; unde meridianus dicitur, quia ubi sol ad ipsum pervenit, media dies est; arcus autem quem unumquodque sydus ab ortu suo ad ipsum usque describit, appellatur *ascendens*, alter verò nempe ab ipso ad occasum *descendens*.

Dividit similiter syderum cursum infra horisontem; unde ubi sol ad ipsum infra horisontem pervenit, media nox est.

Præterea in ipso designatur elevatio poli, nempe juxta eum ipsius arcum qui continetur horisontem inter & polam.

Unicus est in sphærâ nostrâ : intelligi tamen debet toties variabilis, quoties mutatur situs ortum inter & occasum; conficitur enim ductus per *Zenith* & *Nadir* : hæc autem puncta diversa sunt pro diverso situ ortum inter & occasum.

De Æquatore, Tropici & Polaribus.

Hîc sunt quinque circuli paralleli in sphærâ nostrâ : omnium medius est æquator : duo hinc & inde æquatori viciniore sunt tropici : reliqui duo polis viciniore dicuntur polares.

Æquator sphæram dividit in duo hemisphæria : alterum boreale, alterum australe.

Repræsentat eum in mundo circulum, quem ubi sol diurno motu describit, æquantur noctes diebus, ob æqualem nempe solis moram suprâ & infrâ horizontem. Ubi notabis corpuscula considerare ut partes noctis.

Tropici repræsentant duos in mundo circulos, alterum quem describit sol cùm maximè accedit ad boream, alterum cùm maximè recessit ad austrum.

Hi porrò circuli hinc & inde ab æquatore distant viginti-tribus gradibus cum dimidio : nempe quia sol non pluribus ab æquatore digreditur versùs polos.

Alter tropicus cancri dicitur M. K,

quia tangit eclipticam quâ parte incipit signum cancri : alter verò dicitur tropicus capricorni Q G, tangit enim eclipticam, quâ parte incipit signum capricorni, ob similem nempe rationem ; prior dicitur solstitium æstivum , posterior verò hiemale.

Duo circuli polares sunt minimi , paralleli æquatori ; tantum à polis distant, quantum tropici ab æquatore, nempe viginti-tribus gradibus cum dimidio. Unus dicitur arcticus S F V à polo , sive borealis : alter antarcticus X I Y, sive australis.

Eos repræsentant cœli circulos quos poli Zodiaci (de quo postea) diurno motu describunt.

Horum quinque circulorum poli iidem sunt ac poli mundi seu primi mobilis : circulorum enim parallelorum iidem sunt poli.

De Coluris.

Coluri sunt duo majores circuli qui se invicem perpendiculariter secant in polis mundi , ac proinde qui æquatorem , tropicos & polares dividunt in quatuor partes æquales.

Designant in sphærâ quatuor puncta cardinalia : nempe principium Arietis , principium Libræ , principium Cancrî & principium Capricorni. Horum puncto-
rum

rum duo priora dicuntur æquinoctialia, ex eo nempe quòd, ubi sol in iis existit, æquantur noctes diebus. Posteriora duo dicuntur solstitialia, ex eo nempe quòd ubi sol ad ea pervenit, non progreditur ulteriùs versùs polos, sed regreditur versùs æquatorem, ut meliùs intelligetur ex dicendis de Zodiaco. Alter igitur colorum dicitur colorus æquinoctiorum F G I K, qui per polos & puncta æquinoctialia transit, & colorus solstitialium B C Æ N, qui per polos & puncta solstitialia progreditur: hic ergo ad designanda solstitia, ille ad indicanda æquinoctia excogitatus.

De Zodiaco.

Nota concavam firmamenti superficiem arbitrariâ designatione ab Astronomis divisam fuisse in certas stellarum congeries, quæ signa cœlestia seu constellationes vocant.

Harum autem constellationum duodecim sunt quæ in firmamento eundem constituunt circulum quem in spherâ nostrâ exhibet Zodiacus; ille nempe latus circulus secans obliquè æquatorem in duas partes, quarum altera ad Septentrionem porrigitur, altera ad austrum: unde pars una septentrionalis, altera meridionalis:

Tom. VI.

B

dividitur ratione longitudinis in duodecim partes quæ sunt totidem constellationes, quæ quia nomen habent (saltem plurimæ) ab animalibus, inde circulus ille vocatus est Zodiacus à voce græcâ.

Hæ porro duodecim constellationes his versibus expimi solent :

Sunt aries, taurus, gemini, cancer, leo, virgo.
Libraque, scorpius, arcitenens, caper, amphora, pisces.

Quia verò illa duodecim signa integrum circulum constituunt, & quia aliunde omnis circulus dividitur in trecentos sexaginta gradus, hinc unicuique Zodiaci signo tribuuntur triginta gradus; duodecies enim triginta gradus efficiunt 360; circulus autem 360 gradus complectitur.

Repræsentatur ille circulus cum aliquâ fatis notabili latitudine, sed mediâ insignitus lineâ, eclipticâ dictâ. Sol nunquam ab eclipticâ deflectit; cæteri verò planetæ nunc in boream, nunc in austrum ab illâ deflectunt; alii quidem magis, alii verò minus; quamobrem huic circulo tribuitur ea latitudo, quæ illas planetarum declinationes complectatur, nempe latitudo octo graduum hinc & inde ab eclipticâ.

Poli hujus circuli iidem non sunt ac poli mundi, sed ab iis distant viginti-

tribus gradibus cum dimidio, quantum nempe Zodiacus ab æquatore deflectit: dum autem tota volvitur machina, illi poli suo motu describunt circulos polares: hi porrò poli sunt duo puncta coluri solstitiorum & designantur litteris S & X.

Uusus Zodiaci est ut per ipsum explicetur annuus planetarum motus, sicut postea declarabitur.

De Circulis terrestribus.

Circuli cœlestes ad globum telluris intelligendum translati sunt à Geographis: suus enim est terræ æquator, quem vulgò lineam dicunt, quique æquatori cœlesti subjicitur suus meridianus; sui sunt tropici, sui circuli polares, qui circulis cœlestibus subjiciuntur.

Tropici & circuli polares hunc habent usum ut terra dividatur in quinque partes, quas Veteres dixere Zonas; una est torrida, duæ sunt temperatæ, duæ frigidæ.

Zona torrida jacet inter utrumque tropicum, & ideò complectitur gradus 47. Sic dicitur quia radiis solaribus ad perpendicularum subjicitur.

Qui degunt sub Zonâ torridâ vix experiuntur aliquam dierum & noctium diversitatem, & sphaeram rectam habent sub lineâ; hinc primò arcus diurni & arcus

nocturni sunt æquales, id est, tamdiù sol est infra horisontem quamdiù suprà: hinc 2^o. æstas duplex sub lineâ, quia bis unoquoque anno sol lineæ respondet ad perpendiculum: hinc ejus incolæ *Ascii* dicuntur, id est, sine umbrâ, quandò sol eorum capiti imminet ad perpendiculum. At quandò sol respondet signis septentrionalibus, umbram meridianam versùs austrum; quandò respondet meridionalibus, eandem versùs Septentrionem spargunt: hinc *Amphiscii* vocantur, id est, umbram utrinque projicientes.

Zonæ temperatæ jacent tropicos inter & circulos polares: una est septentrionalis, quam nos incolimus, alia meridionalis: unaquæque continet 43 gradus: qui Zonas temperatas incolunt, noctium & dierum diversitatem experiuntur, & quidem eò majorem quò longiùs à lineâ æquinoctiali digrediuntur: qui incolunt temperatam septentrionalem circà meridiem, umbram projiciunt versùs Septentrionem: qui verò degunt in meridionali, projiciunt ipsam in Austrum; hinc dicuntur *Heteroscii*, id est, umbram spargentes ex unâ tantùm parte, sed oppositâ.

Duæ Zonæ frigidæ à circulis polaribus extenduntur ad polos, & occupant singulæ 23 gradus & 30 ferè minuta: majorem verò dierum & noctium diversitatem ex-

periuntur, qui ipsas incolunt; ità ut sub polo dies sit continuus sex mensium; nox proinde continua sex mensium: hinc incolæ appellantur *Periscii*, id est, umbras circà se successivè dispergentes in orbem.

Veteres existimabant Zonam torridam ab æstu & effervescentiâ solis, frigidas verò ob nimium frigus esse inhabitabiles; sed error iste turpissimus fuit emendatus: nautæ nostri salvi & incolumes ab uno polo ad alium fermè polum navigârunt: cognitæ sunt plagæ, tum sub æquatore, tum circà polos, quæ suos habent incolas: sed de his postea.

Meridianus terrestris est circulus major transiens pariter per polos, & secans terram in duas partes æquales, quarum una orientalis est & altera occidentalis; cum è contrario æquator terram dispescit in duas partes, septentrionalem, & meridionalem.

Unus est æquator; sed plurimi designantur meridiani: primum inter eos fixum & permanentem ponunt Geographæ nostrates, cum Ptolomæo, in Insulâ ferri, quæ inter Canarias maximè occidentalis est.

Ex illorum circulorum intelligentiâ præsertim pendent navigandi ars & scientia Geographiæ; nec enim sine eorum notiâ possunt cognosci locorum situs.

Scilicet longitudo loci terrestris petitur à

primo meridiano, progrediendo ab occasu in ortum, ità ut progressio fiat usquedum regrediatur ad eandem insulam; latitudo verò petitur ab æquatore: igitur longitudo est distantia loci à primo meridiano mensurata arcu æquatoris; latitudo verò est distantia loci ab æquatore versùs polum mensurata arcu meridiàni.

Hinc urbs aliqua dicitur habere majorem vel minorem longitudinem, quò magis vel minùs distat à meridiano; hinc terræ omnes, quæ sunt sub primo meridiano, dicuntur nullam habere longitudinem. Hinc urbs dicitur habere majorem vel minorem latitudinem quò magis vel minùs distat ab æquatore; hinc qui degunt sub lineâ nullam habent latitudinem; maximam habent, qui longissimè ab æquatore sub ipsis polis versantur. Denique locus ille neque longitudinem, neque latitudinem habet, qui punctum est in quo primus meridianus secat æquatorem.

Ex his latitudo loci est ipsa poli elevatio: nam respectu eorum qui aliquam habent latitudinem, id est, qui ab æquatore digrediuntur, unus polus attollitur, alter deprimitur: quapropter qui sub lineâ nullam habent latitudinem, ii utrumque polum in horisonte positum conspiciunt.

Ex his facillimè in tabulis geographicis desumi possunt & longitudo loci, putà

à primo meridiano secundum arcum æquatoris, & latitudo ab æquatore secundum arcum meridiani : verum ut fierent tabulæ geographicae, debuerunt prius stabiliri locorum longitudes & latitudes. Hinc duæ quæstiones; prima, quomodo potuerit inveniri longitudo loci, sive terrestris sive maritimi; secunda, quomodo potuerit latitudo seu elevatio poli definiri : utrumque sic explico.

Vel quæritur longitudo loci remotioris à primo meridiano, vel loci propioris; si quærat longitudo loci remotioris, veteres usi sunt eclipsibus lunæ, ut illam definirent: scilicet horis singulis gradus 15 describuntur in diurno mundi motu, ut antea dictum fuit; v. g. si sol sit in meridiano Parisiensi, erit hora à meridie prima respectu loci occidentalis, qui pariter gradibus 15 distabit: hinc si quis ab occidente in orientem iter faciat, quoties gradus 15 pererrat, toties ipsi sol oritur citius unâ horâ, quam oriatur loco à quo discessit. Hinc cum attingit locum 180 gradibus distantem, ipsi meridies est, media verò nox eidem loco, à quo discessit; unde si alterum hemisphærium emensus revertatur ad locum undè profectus est, uno die antevertit eos populos ad quos reversus est; & diem, quem dominicum vocant, dicit diem lunæ: è contrariò

B iv

judicandum de eo qui iter faceret ab oriente versùs occidentem.

His positis, ex eclipsi lunæ certò judicabant de loci longitudine: eodem temporis instanti conspiciatur eclipsis in variis locis, Parisiis sit media nox, si in alio loco numeretur hora decima, erit ille locus occidentaliter 30 gradibus. Si in alio appelletur secunda matutina, locus erit orientaliter secundùm 30 gradus.

Verùm quia eclipses lunæ sunt minùs frequentes, quia aliunde nubium interpositu observari persæpe non possunt, incommoda sanè fuit hæc via detegendæ longitudinis: Recentiores igitur aliam tentaverunt longè commodiorem: vidit oculatissimus Cassinus immersiones satellitum Jovis in umbram, ac emersiones ex umbrâ esse ità frequentes, ut singulis ferè diebus possint conspici; eorum cursus numeravit, monuitquæ observatores alios ut satellites interrogarent tanquam certissimos navigationum duces, & signa quibus locorum longitudo posset accuratè definiri: hinc observationibus factis apud Sinenses, Indos, & in aliis locis, collatis cum iis quæ factæ sunt in Observatorio Parisiensi, emendatæ sunt tabulæ geographicæ, & urbes regionesque ad sua loca revocatæ. Has tabulas excudi curavit clarissimus Geographa & eruditissimus Historicus Dominus *de Lisle*.

Quòd si quærat^{ur} longitudo loci propioris, vel æstimatione, itinerariis videlicet, vel geometricâ triangulorum resolutione, situs loci determinandus est.

Quod spectat ad latitudinem potest inveniri multis modis, quos inter hæc via facilior: scilicet 1°. inveniatur linea meridiana, hoc modo: erigatur in plano horisontali A B (tab. 5. fig. 1.) stylus C D: sic infigatur plano extremitas E C, ut extremitas D perpendiculariter imminet puncto E: ex eo tanquam centro ducatur manè circulus F G H, cujus peripheria transeat per extremitatem umbræ F factam à stylo: decrescet umbra ante meridiem, sed à meridie augebitur ea proportionem quâ fuit imminuta; ita ut fiat extremitate umbræ arcus F I H: ducatur verò à centro E linea K G secans arcum in partes æquales; ita ut umbra crescens & umbra imminuta fuerint æquales, hæc linea erit meridiana; quæ si dividatur ab aliâ L M ad angulos rectos, intelligentur meridies, ortus, septentrio & occasus: atque ut certior has in hacce praxi duci potest, præter arcum F G H, arcus alter N O P, nam linea media inter illas intersectiones N & P erit meridiana.

2°. Ponatur quadrans circuli in lineâ meridianâ A B: (tab. 4. fig. 4.) Si stella
B v

polaris conspecta in circulo meridiano per foramina dioptræ deprehendatur attolli suprâ horisontem in Q gradibus 46 & 29 minutis, itâ ut post horas 12 videatur attolli secundum 51 gradus & minuta 19 in R, erit inferior polo versùs Q, superior verò versùs R; polus igitur erit in centro circuli, quem describit stella A; diameter verò hujusce circuli est 4 grad. & 50 min. & semi-diameter 2 grad. minut. 25. hos adde minori altitudini stellæ, vel detrahe à majori altitudine; elevatio poli erit 48 grad. & 54.

Ex circulis terrestribus intelligi potest populos alios esse, qui sint *antipodes*, alios qui sint *antaci*, alios qui sint *periaci*.

Periâci æstatem & hyemem patiuntur eodem tempore, eadem dierum & noctium incrementa: nox tamen & dies diversis adsunt temporibus illis populis, si locos viciniore polo non incolant. Hi verò sunt sub eodem circulo parallelo æquatori & sub oppositis partibus ejusdem meridiani.

Antâci temporibus oppositis patiuntur hyemem & æstatem; eodem verò tempore iis adsunt meridies & media nox; proindeque sunt sub eodem meridiano in eodem hemispherio. At sub parallelis hinc inde remotis ab æquatore.

Antipodes, diem, noctem, æstatem,

hyemem, opposita patiuntur; sunt sub locis è diametro oppositis sibi obfistentes vestigiis contrariis.

*DE PHOENOMENIS PER SPHÆRAM
EXPLICANDIS.*

Explicatis sphæræ partibus, superest ut ope illius machinæ explicentur syderum motus, phases, eclipses, variæ apparentiæ pro vario sphæræ situ, crepuscula.

De Motibus Syderum.

Syderum motus duplex est, diurnus & annuus.

Diurnus motus ille est quo sydera singulis diebus terraqueum globum circumlustrant, procedendo nempe ab ortu ad occasum: qui quidem motus omnibus syderibus communis est spatio 24 horarum circumcircà.

Annuus motus dicitur ille quem singuli planetæ habent juxtà Zodiacum, procedendo nempe ab occasu ad ortum: luna quidem intrà mensem; sol intrà annum: Mars intrà annos duos: Jupiter intrà annos duodecim: Saturnus denique intrà annos triginta. Veneris autem & Mercurii specialis est ratio, sicut ostendetur ubi de variis mundi systematibus.

Explicatur diurnus omnium^{*} syderum motus: dicendo nempe illum ex eo pendere quòd primi mobilis motu intrà viginti-quatuor horas abripiuntur, tum firmamentum cui affixæ sunt stellæ, tum omnes planetarum orbes seu cœli.

Explicatur autem annuus planetarum motus: dicendo nempe quòd dùm cujusbet planetæ orbis seu cœlum, simul cum toto primi mobilis primique firmamenti motu fertur dictum ab ortu ad occasum, interim quilibet planeta proprio lentoque motu in orbe seu cœlo suo ab occasu in ortum regreditur juxtà zodiacum. Contipe igitur sphaeram nostram volvi circa suum axem ab ortu ad occasum: tùm finge planetas tanquam totidem animalcula quæ, dùm machina ab ortu in occasum ea abripit, proprio motu ab occasu versùs ortum regrediuntur in zodiaco juxtà prædictam annuorum motuum proportionem. Hoc modo facilè concipies annuos planetarum motus.

Hinc autem intelligi facilè potest quonam modo sol varias anni tempestates faciat; scilicèt dum ipse annuo motu suo unum ferè zodiaci gradum unoquoque die percurrit, reperitur successivè in variis zodiaci signis; verno quidem tempore percurrento arietem, taurum & geminos; æstate cancrum, leonem & vir-

ginem : autumnò libram , scorpion & sagittarium : hyeme , capricornum , aquarium & pisces. Quia autem ob zodiaci obliquitatem sex ex illis signis ad polum arcticum accedunt, cætera ad antarcticum, hinc fit ut sol modò unum terræ polum illuminet , modò alterum. Eodem autem modo judicandum est de cæteris planetis juxtà supradictam annuorum motuum proportionem.

De Lunæ Phasibus.

Notandum est dimidiam semper lunæ partem à sole illuminari, nisi tamen ipsa eclipsim patiatur : quamobrem variæ illius phases ex eo tantum pendent quòd ipsa magis aut minus obvertat nobis suū hemispherium à sole illuminatum. Quia enim luna motu suo annuo longè velocius zodiacum percurrit quàm sol (sol namque unicum circitur gradum dictim conficit in zodiaco, luna verò tredecim gradus & amplius) hinc fit ut ipsa singulis diebus magis ac magis removeatur à conjunctione cum sole, donec omninò ei opponatur, ac postea ad ipsum accedat : unde fit ut ejus hemispherium nobis obversum, modò minus, modò magis à sole illuminetur. Has phases oculis exponit fig. 2. tab. 14.

Ubi luna interponitur nos inter & solem (putà si sol supponatur in A, luna in B, terra in C) (fig. 2. tab. 14.) quia tunc lunæ hemispherium à sole illuminatum, nullâ suâ parte obvertitur nobis, tunc luna dicitur silens seu nova. Ubi verò ejus hemispherium à sole illuminatum incipit ex parte nobis obverti (ut si luna existat in D) tunc luna dicitur falcata; ubi ejus hemispherium à sole illuminatum dimidiâ suâ parte obvertitur nobis (ut si luna existat in E) tunc dicitur dimidiata seu quadrata, seu bissecta. Ubi ejus hemispherium nobis obversum paulò magis quàm dimidiâ suâ parte illuminatum à sole (ut si luna existat in F) luna dicitur gibbosa; ubi ejus hemispherium nobis obversum totaliter illuminatur (nempe ubi terra lunam inter & solem interponitur (ut si luna existat in G) tunc ipsa dicitur plena; postea verò rursus dicitur gibbosa, bissecta, falcata nempe in punctis H, I, K.

De Solis & Lunæ Eclipsibus.

Contingit eclipsis solis ubi luna ipsum inter & terram (fig. 3. tab. 4.) interposita ejus lumen præripit terræ, seu, quod idem est, ubi terra incurrit in umbram lunæ; contingit verò eclipsis lunæ, ubi terra

ipsam inter & solem interposita solis lumen ei præripit, seu (quod idem est) ubi luna incurrit in umbram terræ.

Eclipsis igitur lunæ est defectus luminis in lunâ ob umbram terræ: eclipsis verò solis est defectus luminis in terrâ ob umbram lunæ: quamobrem hæc meliùs diceretur eclipsis terræ quàm eclipsis solis.

Porro eclipsis solis non nisi in novilunio contingit, nempe quia eo solo tempore solem inter & terram luna interponitur. Eclipsis verò lunæ non nisi in plenilunio; nempe quia eo solo tempore terra lunam inter & solem interponitur. At cur non contingunt eclipses solares in omni novilunio, nec lunares in omni plenilunio? hoc ut intelligas,

Nota solem, ut diximus, nunquam ab eclipticâ deflectere, lunam verò ab ipsâ modò in boream, modò in austrum deflectere, sicque describere in Zodiaco circulum, qui eclipticam obliquè secat in duobus oppositis punctis, quæ vocantur nodi; alter ascendens dictus, qui & caput draconis dicitur, quo ex austro in boream; alter descendens dictus (qui & cauda draconis dicitur) quo ex boreâ in austrum transit luna secando eclipticam.

Non igitur contingit eclipsis lunæ in omni plenilunio, quia luna ubi deflectit ab eclipticâ, umbra terræ se subducit,

neque etiam contingit eclipsis solis in omni novilunio: quia, dum luna sic deflectit, terra ejus umbræ subducitur. Quamobrem nulla unquam contingit sive solis sive lunæ, nisi luna tempore sive novilunii sive plenilunii existat in aliquo è suprâ dictis nodis, aut saltem proximè.

Observa autem nodos illos non esse fixos, sed sensim congregi in antecedentia zodiaci signa tribus circiter minutis singulis diebus, adeò ut totam eclipticam percurrant intrâ novemdecim annos. Sole manente in eodem situ, eò major est eclipsis, sive solis sive lunæ, quò luna vicinior est terræ; nimirum quia luna tunc majore umbrâ terram tegit, aut in majorem umbram terræ incurrit: suppositâ autem lunâ in certâ distantîâ à terrâ, quò sol vicinior est terræ, eò minor est eclipsis, ob oppositam nempe rationem. Hoc autem facile concipies si animadvertas quòd cum sol sit longè major sive lunâ sive terrâ, harum umbræ desinunt in modum coni, eoque brevius finiuntur quò sol vicinior est.

Porro eclipsis lunæ potest esse totalis: nimirum quia, cum terra sit longè major lunâ, fieri potest ut tota luna incurrat in umbram terræ: eclipsis verò solis potest quidem esse totalis respectu alicujus regionis terræ, v. g. respectu Galliæ, ob eandem nempe rationem; sed non

potest esse totalis respectu totius terræ : quia cum luna sit longè minor tum sole, tum terrâ, ipsa non potest totam terram suâ umbrâ obtegere ; imò fieri potest (ob illam nempe rationem) ut eclipsis solis sit totalis respectu alicujus regionis terræ, partialis respectu alterius : in aliâ verò regione nulla sit.

Distinguendum autem est umbram inter & penumbram. Umbra dicitur ubi nihil luminis cernitur, penumbra verò ubi lumen ab unâ parte solis recipitur, non autem ab alterâ ; hoc totum declaratur figuris 3. 4. quarum prior exhibet eclipsim solis, posterior verò eclipsim lunæ, utramque cum penumbris : ubi etiam videre est quonam modo umbræ sive lunæ, sive terræ, desinant in modum coni, ex eo nempe quòd sol iis longè major sit.

*De triplici Sphæra Positu variisque pro ejus
varietate Phænomenis.*

Sphæra distinguitur triplex, recta, parallela & obliqua.

Recta dicitur ubi æquator incumbit vertici, polique inexistunt horisonti. Dicitur autem recta, quia in eâ æquator horisontem secatur ad angulos rectos, oriunturque & occidunt sydera ad angulos rectos respectu plani horisontis.

Parallela dicitur ubi alteruter è polis incumbit verticî; diciturque parallela, quia in eâ moventur sydera motu diurno parallelo horisonti: in ipsâ æquator & horison idem sunt.

Obliqua dicitur, ubi neque poli neque æquator incumbunt verticî; sed alter è polis suprâ horisontem eminet, alter verò infrâ delitescit. Dicitur obliqua, quia in eâ æquator horisontem obliquè secatur, moventurque sydera proinde motu diurno respectu horisontis.

In sphærâ rectâ omnia sydera oriuntur & occidunt: in hâc namque poli inexistunt horisonti; omnia autem sydera circâ polos volvuntur.

In sphærâ parallêllâ nullæ stellæ fixæ oriuntur aut occidunt, sed aliæ semper horisonti supererminent, aliæ verò semper infrâ ipsum delitescunt. In hâc quippè æquator & horison idem sunt: moventur autem sydera motu diurno parallelo æquatori; at stellæ fixæ quæ ab æquatore versùs unum polum constitutæ sunt, nunquam versùs alterum polum divagantur, nisi tamen sermo sit de eo lento motu, de quo dicetur postea. Planetæ verò in sphærâ boreali parallêllâ oriuntur ubi motu suo annuo ingrediuntur arietem, occiduntque ubi ingrediuntur libram; in australi è contrâ. Quippè in sphærâ pa-

rallelâ boreali sex borealia Zodiaci signa semper horisontâ supereminet, sex australia sub horisonte semper delitescunt; contrâ vero in sphærâ parallelâ australi.

In sphærâ obliquâ alia sydera oriuntur & occidunt, alia verò nunquam oriuntur nec occidunt; atque ex his aliqua sub horisonte semper delitescunt, ut respectu nostrî, ea quæ sunt vicina polo antarctico; aliqua verò semper super horisontem sunt: ut respectu nostrî ea quæ sunt vicina polo arctico: putà quæ ab ipso non pluribus distant gradibus quàm quadraginta & octo cum quinquaginta duobus minutis, quæ est elevatio poli Parisiis.

In sphærâ rectâ perpetuum est æquinoxium, quia horison in duas æquales partes secat omnes parallelos quos sol motu diurno describit.

In sphærâ parallelâ dies est sex mensium, noxque totidem; nimirum quia media Zodiaci pars horisonti semper supereminet, altera medietas sub eo semper delitescit.

In sphærâ obliquâ reperitur dierum noctiumque inæqualitas pro variis anni tempestatibus; quæ quidem inæqualitas varia est pro variâ elevatione poli suprâ horisontem. Scilicet quò magis acceditur ad alterutrum polum, eò longior est maximus anni dies; ità ut in aliquibus re-

gionibus, seu potiùs climatibus, sit tredecim, quatuordecim, quindecim horarum; Parisiis sexdecim: in aliis regionibus magis & magis borealibus ad polarem usque circulum terræ, septemdecim, octodecim, novemdecim, viginti, 21, 22, 23: ultrà circulum polarem plurium quàm 24 horarum, adeòque plurium dierum nostrorum, plurium hebdomadarum, & plurium mensium. Denique sub polo sex mensium: ratio est, quia quò magis acceditur ad alterutrum polum, eò magis inæquales sunt parallelorum arcus quos horison dividit; atque ultrà polarem terræ circulum horison non ampliùs secat aliquos è parallelis quos sol diurno motu describit: sub polo nullos secat, ut potè quia concidit cum æquatore.

In quâlibet porrò sphærâ dimidiam anni partem dies habet, dimidiam nox. Ratio est, quia horison Zodiacum in duas partes æquales secat.

Unde inferes, quòd quò longiores sunt per æstatem dies, eò sunt per hyemem breviores, sicut facilè intelliges, si attendas ad diurnos & nocturnos arcus pro vario sphæræ positu.

De Crepusculis.

Crepusculi nomine eam intelligimus quasi dubiam lucem quæ aut solis ortum antecedit, aut ejus occasum subsequitur.

Causa hujusce dubiæ lucis est atmosphæra (illud nempe aëreum spatium ad quod attolluntur vapores & exhalationes circa terraqueum globum) in quâ radii solis obliquè incidentes refranguntur, ac fortè etiam partim reflectuntur, sicque ad nos pertingunt.

Initium crepusculi matutini ac finis vespertini contingunt ubi sol est in decimo-octavo gradu infrà horisontem, numerando nempe gradus in majore circulo per Zenith & Nadir ducto; quamobrem obliquitas sphæræ plurimùm confert ut crepusculum sit diuturnius: quò enim magis obliqua est sphæra, eò major est arcus quem sol æstate describit dùm à decimo-octavo gradu ad horisontem accedit, aut ab horisonte ad decimum-octavum gradum descendit, numerando nempe gradus, ut mox dictum est, in majore circulo per Zenith & Nadir ducto.

Atque hinc intelliges quare Parisiis à 15^a die Junii ad 25., circumcircuità, mediâ etiam nocte observetur crepusculum aëre existente sereno: nempe quia eo tempore

sol non descendit octodecim gradus infra horisontem: quippè cum elevatio poli Parisiis sit quàm proximè quadraginta novem graduum, atque aliunde sol supradicto tempore ab æquatore versùs polum nostrum deflectat viginti-tribus gradibus cum dimidio, sol sub horisontem parisinum descendit duntaxat septemdecim gradibus cum dimidio. Porro licèt crepusculum Parisiis (idem sit judicium de quocumque alio loco boreali, in quo obliqua est sphæra) longissimum sit, ubi sol maximè accedit ad tropicum canceri, non idèò brevissimum est ubi sol maximè accedit ad tropicum capricorni; sed Parisiis brevissimum est circà octavam Martii diem ac primam Octobris, cum longiùs sit mense Decembri; cujus rei ratio reddetur ex sphærâ.

Cætera quæ ad sphæram pertinent intelligentur ex sequenti tractatu.

De variis Mundi Systematibus.

Systema est suppositio dispositionis partium mundi, juxta quam omnia phænomena explicari commodè possent.

Inquirendæ autem illius dispositionis occasionem fecit motuum varietas quæ in syderibus deprehenditur, ex quâ phænomena de quibus priùs disserendum est.

De Phænomenis.

Quæ occasionem fecerunt inquirendæ dispositionis syderum.

Phænomena de quibus hîc agitur desumuntur ab annuo planetarum motu juxtâ Zodiaci signa; quamobrem in posterum attendendum erit ad solum Zodiacum planetasque per ipsum aberrantes.

Circâ lunam observatum fuit eam apparere majorem & velociorem in conjunctione & oppositione (hoc est in novilunio & plenilunio) minorem verò & tardioram in quadraturis.

Circâ Mercurium & Venerem observatum fuit, 1o. illos planetas esse quasi solis assèclas, Mercuriumque unico tantum circiter Zodiaci signo à sole digredi: Venerem, unico circiter signo cum dimidio: secundò ipsos aliquandò solem antecedere, aliquandò verò ipsum subsequi; aliquandò sole superiores esse, aliquandò inferiores & tertio eos eandem pati phases quas patitur luna. Quartò eos esse aliquandò directos, aliquandò stationarios, aliquandò retrogrados; hoc est, aliquandò moveri (motu scilicet annuo dicto) juxtâ seriem signorum, v. g. ab ariete in taurum: aliquandò nec progredi nec regredi: aliquandò moveri con-

trà seriem signorum, v. g. à tauro in arietem.

Circà superiores planetas, Martem nempe, Jovem & Saturnum, observatum fuit primò eos non esse (sicut Mercurium & Venerem) soli alligatos, sed ab eo ità digredi, ut totis aliquandò sex signis ab ipso distent: secundò eos interdum directos esse, interdum retrogrados, interdum stationarios, sicut Mercurium & Venerem. Tertiò eos non esse retrogrados nisi in oppositione ad solem. Quartò eos in eadem oppositione esse aspectu maximos ac terræ viciniore. Quintò arcum retrogradationis esse eò breviorē quò planeta superior est: septem nempe graduum in Saturno: in Jove decem; in Marte, omnium infimo, longè plurium.

Hæc porrò phænomena desumuntur ex solis planetis, non autem ex stellis fixis; hæ namque apparent eundem semper inter se situm servare, neque alium habere motum quàm diurnum; moventur tamen aut saltem videntur moveri (sicut & planetæ) secundum seriem signorum (nunc enim arietis stellæ eum tenent locum, quem ante bis mille annos tenebant stellæ tauri, hæ locum stellarum sequentis signi & sic consequenter) sed ità lentè ut non nisi intrà viginti-quinque annorum millia circulum absolvere debeant.

His

His igitur phœnomenis explicandis inventæ sunt variæ hypotheser. Misa autem quaestione, an sphaeræ cœlestes sint solidæ an non, triplicem hypothesim exponam, primam Ptolemæi, secundam Copernici, tertiam Tychonis.

Hæ porro hypotheser explicantur ope circularum, quorum alii sunt concentrici, alii excentrici, alii epicycli. Concentrici dicuntur quorum idem est centrum, quales exhibentur fig. 8. tab. 5. Excentrici quorum distincta sunt centra, quales exhibentur fig. 2. Epicyclus est circulus cujus centrum volvitur juxta peripheriam alterius circuli, qualis exhibetur fig. 3. P. N. R. F.

DE SYSTEMATE PTOLEMÆI.

Supponit Ptolemæus terram manere immotam in mundi medio, omnia proinde sydera circa ipsam volvi motu diurno, ac planetas motu insuper annuo juxta signa Zodiaci.

Terram igitur collocat in centro mundi, tum lunam gyros agentem suos proximè circa terram; tum Mercurium: tum Venerem, tum Solem, Martem, Jovem & Saturnum, tum firmamentum: denique primum mobile; eo scilicet ordine

quem indicat generale mundi schema traditum (fig. 8. tab. 5.)

Supponit autem rursus omnes planetas, quantum est de se, moveri motu semper æquabili ac regulari, omnesque proinde irregularitates quæ à nobis circa eorum motus deprehenduntur esse tantum apparentes, nempe ob excentricorum & epicyclorum varietatem.

In eo autem erravit Ptolemæus quod solem non statuerit tanquam centrum annuorum motuum Mercurii & Veneris.

Antiquiores, ut explicarent motum duplicem planetarum, diurnum ab ortu in occasum secundum planum æquatoris, communem omnibus, & proprium ab occasu in ortum, quo feruntur inæqualibus temporum intervallis secundum planum Zodiaci, statuerunt planetas motum hunc proprium habere à motu cœli proprii, quo rapiuntur; & ideò tot cœli quot planetæ; quod quidem alii retinuerunt: at contendebant motum diurnum oriri à firmamento, quod appellabant primum mobile.

Verum cum observasset Hipparchus ipfas fixas pariter progredi motu lentiore ab occasu in ortum, cum illud certò constitisset Ptolomæo & definiisset hunc motum peragi spatio 36000 annorum, posuit suprà firmamentum primum mobile,

quod spatio 24. horarum cœlos omnes inferiores abriperet.

Præterea fuit ab Alphonsinis observata quædam irregularitas in motu fixarum, quam ut explicarent, finxerunt primum crystallinum, cui tribuerunt motum librationis reciprocæ ab oriente in occidentem, & ab occidente in orientem circa polos eclipticæ; ita ut arcus librationis sit 2 graduum & min. ferme 29. Enimvero dum libratio est ab occidente in orientem, quia tunc amica est cum motu firmamenti, motus ille adjuvatur: at dum libratio fit versus occidentem, tunc quia inimica est motui firmamenti, motus ille retardatur: hinc regularitas est in motu fixarum.

Iidem observârunt variationem in obliquitate eclipticæ respectu æquatoris, quod ut explicarent, secundum crystallinum supposuerunt, quod haberet motum librationis à meridie versus septentrionem & à septentrione versus meridiem circa puncta æquinoctialia: quæ quidem libratio perficitur per 2998 ferme annos: hinc ergo cœli undecim, qui omnes Empyreo clauduntur.

Præter cœlos illos undecim, quos plerumque excentricos faciunt, admittunt Ptolemaïci Epicyclos, ut satisfaciant apparentiis omnibus: v. g. ut explicent apo-

gæum & perigæum planetarum : Apogæum verò est locus aſtri remotior à terrâ : Perigæum verò est locus aſtri terræ propior.

Epicyclus est globus diaphanus, cui affixus est planeta, cujus motu planeta fit aliquandò directus, ſtationarius & retrogradus : tunc planeta directus est, ut diximus, quandò videtur ferri ab occidente in orientem : tunc planeta ſtationarius est, quandò per aliquot dies videtur respondere eidem parti cœli : denique tunc est retrogradus quandò ferri videtur ab oriente in occidentem.

His poſitis, apparentias omnes explicant Ptolemaici. 1^o. Sol Ptolemæi temporibus videbatur apogæus ſub quinto geminorum gradu (videtur jam circà ſeptimum ferè gradum cancri) id est, apogæus est in parte ſeptentrionali, perigæus verò in parte meridionali, nimirum olim circà quintum Sagittarii, nunc circà gradum fermè ſeptimum Capricorni ; ità ut in parte ſeptentrionali plures ſint diurnæ révolutions, quàm in parte meridionali.

Rem ſic explicant fig. 2. tab. 5. A ſit terra occupans centrum firmamenti, quod ſignis Zodiaci deſignatur : C D E F ſit cœlum ſolis, cujus centrum ſit B ; arcus C D E erit major arcu E F C ; ergo diutiùs ſol morabitur in ſignis ſeptentrionalibus, quàm in meridionalibus : ergo

versus punctum D erit apogæus in geminis, & versus punctum F erit perigæus in Sagittario; vel si centrum sit G, erit apogæus in cancro versus H & perigæus in capricorno versus I: igitur diameter solis spectantibus è terrâ minor apparet in parte septentrionali, & præsertim versus æstatem, quàm in parte meridionali, præsertim versus hyemem.

2°. Facile exponunt dierum & noctium, tempestatumque affectiones respectu quarumlibet terræ partium: nam describat sol eclipticam per lineas spirales; ità ut unoquoque die secundum unum ferè gradum promoveatur, erunt æquinoctia circà 21. diem Martii vernum, & autumnale circà 23. Septembris: erit solstitium æstivum circà 22. Junii diem; hyemale verò circà 23. Decembris.

Hinc 1°. Qui lineam æquinoctialem incolunt perpetuo gaudent æquinoctio; horison enim secat æquatorem in angulos rectos.

Hinc 2°. Qui digrediuntur à lineâ, polum habent unum erectum supra horisonem; & ideò inæqualitas dierum & noctium oritur: dies quippè eò longior habitantibus temperatam septentrionalem, quò magis sol accedit ad tropicum cancri, & è contrâ omnium brevissimus, dùm responderet tropico Capricorni; sicque vice versâ.

C iij

Hinc 30. Rectè explicant cur sol unâ fermè horâ tardiùs moveatur quàm stella fixa ab oriente versùs occidentem: en phœnomenon: sit terra T; sit horison A B; sol C occidat simul cum fixâ B, quandò stella die crastinâ occidet, sol erit versùs D (tab. 5. fig. 5.) suprâ horisontem altior uno fermè gradu quàm stella; ità ut post sex menses elapsos, occidente fixâ, sol oriatur versùs E: hoc, inquam, rectè explicant; nam primum mobile pari motu adducit omnia corpora cœlestia ab oriente in occidentem; proindeque & fixas & solem: at cùm ex unâ parte sol non describat circulum perfectum, sed lineam spiralem, quâ die quovis secundùm eclipticam promovetur uno fermè gradu ab occidente in orientem, & ex alterâ lentior sit, & vix sensibilis motus fixarum ab occidente in orientem; ideo sol retinetur suprâ horisontem uno fermè gradu tardiùs quàm fixa.

30. Exponunt observationes astronomicas circà lunam, in eo verò posita sunt I quòd per 24 horas rapiatur ab oriente in occidentem; qui quidem motus communis lunæ & aliis syderibus dicitur oriri à primo mobili. 20. Quòd moveatur ab occidente in orientem per dies fermè 27. ità ut 13 ferè gradibus quolibet die promoveatur, in quo quidem motu varias subit

mutationes : 1^o. conjuncta soli nullatenus conspicitur, deinde crescens, 3^o. quadrata 4^o. plena seu opposita soli; 5^o. iterum quadrata. 6^o. decrescens, usquedum fiat conjuncta : jam verò celerius moveri videtur, tum opposita, tum subito crescens, videtur etiam perigæa : denique nunquam retrogada aut stationaria conspicitur.

Hæc omnia sic patent : Sit terra A : sit cælum lunæ B C D E : sit epicyclus F H I : (tab. 5. fig. 3.) moveatur epicyclus spatio dierum ferme 14 circa suum centrum parte superiore ab oriente in occidentem, parte verò inferiore ab occidente in orientem ; nimirum ab I per H versùs F : luna 2 sit affixa parti inferiori epicycli conjuncta soli : certè motu cæli lunaris rapitur epicyclus ad punctum P per dies ferè 7. Lunaque motu Epicycli ex perigæâ fit apogæa, in quadrato nimirum aspectu : per alios dies 7, Epicyclus rapitur ad punctum N ; atque luna fit iterum perigæa, nec-non opposita soli : per idem tempus epicyclus rapitur ad punctum A, fitque luna & apogæa & quadrata, tandem per alios dies septem. Epicyclus & luna ad eundem locum redeunt, à quo priùs discesserant ; sed cum sol per illud tempus ipse progressus fuerit ab occidente versùs orientem secundum 27 gradus, ut luna fiat conjuncta,

debet adhuc epicyclus per duos dies ipsam rapere.

Hinc 1°. Luna conjuncta soli & opposita semper perigæa; apogæa verò in quadraturis: 2°. videtur celerius moveri tum conjuncta, tum opposita, quàm quadrata, quia opposita & conjuncta est in parte inferiori epicycli, pars inferior epicycli movetur ex hypothesi ab occidente in orientem; cælum pariter lunæ sic rapitur; ergo motus lunæ celerior ab illis amicis determinationibus: at luna in quadraturis posita est in parte superiori epicycli, pars superior movetur ab ortu in occasum: tardior igitur motus lunæ, quia cælum semper rapitur ab occasu in ortum.

Deinde luna nunquam potest conspici retrograda aut stationaria, quia nimia est eius velocitas.

4°. Ut Mercurii & Veneris phenomena explicant, utrumque planetam in cælis distinctis collocant; ita ut motus diurnus quo uterque rapitur ab ortu in occasum spatio 24 horarum sit à primo mobili; motus verò quo Mercurius quatuor mensibus & Venus 19 feruntur ab occasu in ortum, sit à cælis propriis: verùm ut Apogæum & Perigæum, directiones, retrogradationes & stationes habeas, fingunt utrumque planetam esse affixum Epicyclo, qui parte superiore mo-

veatur ab occasu in ortum; parte verò inferiore ab ortu in occasum; atque ut istud pateat, sit exemplum in Venere: idem de Mercurio erit existimandum. A (tab. 5. fig. 6.) sit terra B, C, D cœlum Veneris quod ab occidente in orientem rapitur, putà à B per C versùs D: E F G sit Epicyclus, qui moveatur pariter ab occasu in ortum ab E per F versùs G spatio mensium ferè 19 H sit Venus: denique K L M sit cœlum solis, quod ità movetur, ut N centrum Epicycli immediatè soli subiaceat.

Hoc posito, Venus in Apogæo Epicycli posita conjungetur cum sole; nam linea A N I, à terrâ per ipsam pervenit ad solem; at si deferatur ad punctum 2, tunc videbitur secundùm lineam A P, adeòque fuit directâ, id est, mota ab occasu in ortum celerius quàm sol secundùm arcum I P; dùm verò descendit à puncto 2 ad punctum 3, certè videri debet stationaria, quia per aliquot dies videtur secundùm eandem lineam A P: cùm à puncto 3, venit ad punctum 4. Tunc videtur secundùm lineam A R; adeòque fuit retrograda, id est, mota ab ortu in occasum: quippè punctum R magis est occidentale quàm sol, secundùm arcum I R: at à puncto 4 ad punctum 5 Venus ascendens iterum statio-

C v

naria conspicitur, nimirum per plures dies secundum lineam A R, tumque à puncto ζ redit ad locum à quo discesserat.

Hinc linea D, A, I sit horison; tardiùs occidit Venus quàm sol, si directa sit, id est, si sit magis orientalis; at si sit retrograda, id est, magis occidentalis, priùs occidit.

Idem dici debet de Mercurio, cum hoc discrimine quòd frequentius sit directus, retrogradus & stationarius, quia & minor epicyclus & citius absolvit suum circuitum.

§. Motus Martis, Jovis & Saturni ab oriente in occidentem per 24 est à primo mobili: motus ab occasu in ortum est à motu cœlorum, quo rapiuntur illi planetæ: ita verò rapiuntur ut affixi sint epicyclo, cujus pars superior movetur ab occasu in ortum, pars proinde inferior fertur ab ortu in occasum: ex quibus sequuntur omnia phœnomena quæ spectant illos planetas.

. Ut illud intelligatur, sit terra A: sit cœlum solis B C D (tab. 5. fig. 8.) solem rapiens per annum: sit cœlum Martis 234 rapiens epicyclum per duos ferme annos (proportione servatâ judicandum de Jove & Saturno) sit epicyclus E F G, qui gyret per annos ferme duos circa proprium centrum: sit Mars H affi-

xus Epicyclo : sit cœlum fixarum I K L ; hoc posito explicantur omnia phœnomena.

10. Mars in apogæo videtur celerius moveri : optimè , quia pars superior epicycli movetur ab occasu in ortum : cœlum pariter movetur : ergo determinationibus amicis celerior conspicitur motus.

20. Per menses fermè sex rapiatur Mars à puncto H ad punctum 6, tunc videbitur secundum lineam A 6 P, proindeque descripsisse arcum X, P; adeoque directus, id est, magis progressus secundum arcum X P versus orientem quam fixa X: jam verò cum descendit à puncto 6 ad punctum 7, tunc videri debet stationarius, quia per dies aliquot videtur eidem puncto P firmamenti respondere.

30. Cum versus partem inferiorem epicycli transit à puncto 7 ad punctum 8, jam est retrogradus, id est, repetere videtur occidentem : scilicet in puncto 8 respondet puncto Q, adeoque magis est occidentalis quam stella X secundum arcum X Q: hinc retrogradus major videri debet directo, quia retrogradus non est nisi in parte inferiore epicycli, & non est directus nisi in parte superiore; motus pariter Martis retrogradi tardior, quia si cœlum rapit epicyclum ab occasu in ortum, pars inferior epicycli rapit Martem ab ortu in occasum.

C vi.

4°. Quandò Mars ascendit à puncto 8 ad punctum 9, iterum est stationarius, quia per aliquot dies videtur respondere eidem puncto Q firmamenti.

5°. Quandò Mars à puncto 9 ad priorem locum redit, iterum directus, id est, pergit ab occasu in ortum.

Denique si Mars in parte superiore epicycli fuerit conjunctus soli, erit semper retrogradus, cum soli opponetur; erit quippè semper in parte epicycli inferiore positus: conjunctus est v. g. in H: per annum adducitur epicyclus ad punctum T; Mars adducitur ad punctum R; sol verò per annum orbitam describet, redibitque ad locum à quo discesserat: ergo Mars oppositus soli & retrogradus.

Tunc astra sunt conjuncta, quandò linea recta ducta ab oculis transit per eorum centra: sic Mars in H soli conjunctus est, quia recta A H transit per centra solis & Martis: tunc opposita sunt quandò distant à se invicem secundum mediam cœli partem.

Quæ de Marte dicuntur, dici debent in eodem systemate de Jove & Saturno: hoc excepto quòd, si cœlum Martis moveatur spatio unius anni & 322 dierum, & Epicyclus gyret spatio 2 annorum & 2 mensium aut circiter, cœlum Jovis rotationem non absolvat nisi per annos 11

& 316 dies: epicyclus verò circa proprium centrum rotetur per annum & dies 34. cœlum Saturni nisi per annos 29 & 129 dies, epicyclus per annum & dies 13. cum quadrante.

*REFELLITUR SYSTEMA
PTOLEMAICUM.*

Repugnat legibus mechanicis, observationibus astronomicis, & principiis physicis.

1°. quidem repugnat legibus mechanicis: nam hæc est lex Mechanicæ, ut fiat machina omnium simplicissima, quæ partibus inutilibus & supervacaneis non impediatur, aliàs fieret aliquid frustra, quod fortè in ipsius artefacti perniciem converteretur; porro vix potest dari machina magis composita quàm ptolemaïca, in quâ, neglectâ ratione irradiationum opticarum, tot finguntur cœli, tot epicycli, quot anomalia in syderum motibus deprehenduntur: cui autem bono ingens illa cœlorum multitudo, primum mobile, duo crystallini? cui bono tot epicycli? quæ quidem omnia ad libidinem conficta fatebitur quisquis præjudicia non audiet: ergo &c.

Deinde repugnat observationibus astronomicis: nam 1°. hæc est observatio astro-

nomica, Mercurium & Venerem aliquandò videri sole superiores, ut aliquandò conspiciuntur inferiores: atqui hoc explicari nequit à Ptolemaïcis, apud quos Mercurius & Venus sunt in cœlis positæ infrâ cœlum solis.

2^o. Mars retrogradus sexties major se directo apparet: unde insigne discrimen inter ejus apogæum & perigæum, adeoque ejus distantia à terrâ in Apogæo est triplo major quàm in Perigæo: porro istud infelicitèr explicatur à Ptolemaïcis, quia ad libitum fingunt epicyclos magnitudinis incredibilis, v. g. fingunt epicyclum Martis habere diametrum qui æquet mediam partem distantiae Martis à terrâ.

Denique repugnat principiis physicis. Scilicèt idèd Ptolemaïci præter cœlos planetarum admittunt primum mobile, quia credunt corpori simplici non posse convenire motus secundùm varias determinationes: porro hoc falsum est: scilicèt aqua, dùm currit versùs mare, tendit simul versùs centrum terræ.

His adde duo admitti à Ptolemaïcis quorum unum absurdum & aliud incredibile omninò. 1^o. Absurdum est cœlos esse solidos; soliditatem autem vulgò cœlis tribuunt Ptolemaïci; quomodò, hoc posito, lumen à stellis fixis ad nos usque

perveniet? quomodo cometæ, tum suprà planetas, tum in regione planeticâ poterunt vagari & discurrere?

20. Incredibilis prorsus est ea velocitas, quàm necesse est syderibus primoque mobili tribuere, ad explicandum diurnum syderum motum circà terram; quo quidem admissò, dicendum est stellas fixas singulis arteriæ nostræ pulsibus plurima leucardm millia conficere debere. Porro quis hoc sibi persuaserit?

S Y S T E M A P L A T O N I C U M .

Ptolemaïcum emendavit Plato; cùm enim vidisset Mercurium & Venerem sole superiores, idèd sic disposuit machinam ut terram in centro posuerit, quæ circà suum axem moveatur, quam circumstant aër & ignis, quibus finitimam facit lunam, quam excipit immediatè cœlum solis. Solem sequitur Mercurius, Mercurium Venus, Venerem Mars, Martem Jupiter, & cætera ut in systerate Ptolemaïco.

R E F E L L I T U R .

10. Hæc machina est nimis composita.
20. Non explicat feliciter Martis Apogæum & Perigæum.
30. Si Venus & Mercurius sint ali-

quandò sole superiores, sunt aliquandò inferiores.

SYSTEMA ÆGPTIORUM.

Emendat istud errores aliquos in Ptolemaïco, & Platonico; ponit terram in centro, circà quam luna, circà lunam sol: at circà solem Venus & Mercurius voluntur: postea circà terram Mars, Jupiter, Saturnus, & stellæ fixæ.

REFELLITUR.

Hæc Machina est nimis composita & non explicat apogæum perigæumque Martis.

SYSTEMA TYCHONICUM.

Tycho Brahe, Vir inter Danos nobilis, Ptolemæo & Copernico recentior, cum videret errores in systemate Ptolemaïco, & ex aliâ parte displicere Copernicanum ex eo quòd terræ mobilitatem astrueret, contrà, ut arbitrabatur, Scripturæ auctoritatem, aliud excogitavit. Posuit terram in medio universi immotam, circà quam aqua, aër & ignis, circà quæ luna gyrat motu mienstruo, sol annuo motu, & sphæra fixarum: at circà solem gyran-

Mercurius, Mars, Jupiter & Saturnus.

Illud systema immutavit paululum Vir doctissimus Riccioli, qui cum Tychone voluit solem esse centrum Mercurii, Veneris & Martis; sed docuit terram esse centrum lunæ, solis, Jovis, Saturni & fixarum: hinc systema semi-Tychonicum.

Sit terra A, sit luna C, quæ circa terram movetur per dies 27, sit sol B, cujus orbita 1, (tab. 6. fig. 2.) 2 quam describit per annum: sit orbita Mercurii 3, quæ describitur circa solem per 3 menses, Veneris 4 per menses 8, Martis 5 per annos ferme duos: Jovis 6, Saturni 7, ita ut orbitæ Mercurii & Veneris terram non complectantur; ambiant verò orbitæ aliorum, ex quo fit ut Mars positus in D sit propior terræ quàm sit ipse sol: sit denique cælum fixarum E F G, quod circuitum circa terram absolvit spatium annorum 25920.

Ex his patet illud systema vix differre à Copernicano: nam si deleat orbita solis 1, 2 terra describat circulum H K punctis notatum, tunc planè Copernicanum restituetur, solque occupabit immotus motu translationis centrum magni vorticis, ut constabit ex dicendis.

Præter motus illos fixis & planetis proprios, est quidam motus communis diurnus, quo hæc omnia corpora feruntur

circà terram ab ortu in occasum : sol quidem est instar primi mobilis respectu Mercurii, Veneris, Martis, Jovis & Saturni, in quantum motu suo perniciosissimo ab ortu in occasum, illos planetas secum adducit circà terram secundum planum æquatori parallelum : at difficultas est de causâ quæ sic dictum adducat ipsum solem, lunam & firmamentum ; ideò nonnulli finxerunt suprà firmamentum primum mobile, alii ipsam materiam fluidam totius vorticis hoc motu raptam, rapere pariter cœlestia corpora.

Porro ex hoc motu duplici planetarum, tum circà solem describendo Zodiacum, tum circà terram diurno secundum planum æquatori parallelum, probat Keplerus oriri motum spiritaliter convolutum, quo explicari possunt directiones, stationes & retrogradationes planetarum : sit terra A : orbita solis B C D E : spiralis convolutio sit Jovis F & G : (tab. 6. fig. 3.) Jupiter in I veniat ad 2, directus erit ; descendat ad 3, stationarius est ; ascendat ad 4, retrogradus videbitur ; & sic de aliis.

REFELLITUR.

Repugnat Mechanicæ, in quantum hæc machina non est uniformis : scilicet vides unum corpus solidum quiescens, dum alia

sunt mota : viæ syderum maximè perturbatæ sunt versùs partem D, ubi nimirum orbita Martis circulum solis ingreditur.

Deinde repugnat Physicæ. 1°. Quia nulla affertur ratio physica formatrix hujusce systematis, confictum nempè videtur ut occurratur incommodis, non verò natum ex principiis physicis. 2°. Incredibilis prorsus est velocitas firmamenti, quâ rapiatur fixa diebus singulis ab ortu in occasum. 3°. Vix capì potest quomodo sol possit motu suo diurno circa terram adducere secum planetas ad easdem vias. 4°. Fieri nequit ut corpus solidum positum versùs circumferentiam fluidi, maneat quiescens; scilicet motu fluidi debet abripi: atqui terra corpus est solidum positum versùs circumferentiam vorticis Martis: ergo manere non potest quiescens, sed debet circulariter agi circa solem quemadmodum cæteri planetæ, quorum aliqui sunt ipsâ terrâ majores & forsan solidiores.

SYSTEMA COPERNICANUM.

Hoc systemate plurimum delectantur eruditi omnes; vetustissimum certè debet haberi, quod nimirum Pythagoræ, nec non discipulis placuerit, scilicet Philolao in Italiâ, Aristarcho Samio in Græciâ, sed

oblivioni ferè datum fuit: revixit tamen imperfectè sub Nicolao Cusano Cardinale; donec perfectum & ampliatum fuit à Nicolao Copernico, Canonico Torunenfi, in Poloniâ, hujus defensore subtilissimo, ab anno 1500 ad annum 1530.

Quamquam ex hac unâ parte excultum fuerat illud systema, quatenus inserviebat explicandis phænomenis cœlestibus, erat potiùs figmentum astronomicum, quàm machina physica, nec ullus inter Philosophos satis audax inquisierat principia physica, quibus potuisset consurgere tam vastum artis divinæ opus.

Unus Renatus *Descartes*, cujus ingenium ferè par vastitati orbis, meditatione profundâ, præsens & interiori terræ & planetis & fixis, pinxit eorum corporum conditiones, configurationes, texturas, situs, ordines, & suis rationibus obtinuit ut verisimillimum effecerit, quod à se confictum fuisse & simulatum fatebatur, ut à nobis dicetur posteaquàm brevem imaginem hujusce systematis delineaverimus.

Sol est centrum, si non mundi, saltem hujusce nostri vorticis: (tab. 6. fig. 4.) propè solem constituitur orbita Mercurii: postea orbita Veneris; tum orbita terræ, lunam quasi affecclam secum deferentis: tum orbitæ Martis, Jovis & Saturni: denique

firmamentum, cuius solus Zodiacus in figurâ exhibetur, firmamentum considerari debet ut immotum.

Sol etiam considerari debet ut immotus, hoc sensu quod nunquam exeat de centro, licet fortè circa proprium axem volvatur 27 dierum spatio, ut conjicitur ex motu macularum ejus.

Mercurius concipitur orbitam suam circa solem describere intrâ menses proximè tres: nempe intrâ 88 dies.

Venus, quia orbitam paulò majorem, sic paulò diuturniorem describit; nempe intrâ menses septem cum dimidio, putâ intrâ dies 225. nec refert quod juxta Ptolemæum intrâ novemdecim tantum menses ipsa ad eundem situm redeat in ordine ad terram; quia cum in hoc schemate terra situm inter Planetas mutet, Venus orbitam suam circa solem describit bis & ampliùs, antequàm redeat ad eundem situm in ordine ad terram; quare apparentia perinde semper se habet.

Terra, quia orbitam describit paulò majorem, sic & paulò diuturniorem: scilicet intrâ duodecim menses.

Mars orbitam suam, ut potè adhuc ampliorem, non absolvit nisi annis proximè duobus.

Jupiter suam, ut potè longè majorem, absolvit annis proximè duodecim.

Saturnus suam, omnium maximam, absolvit annis triginta.

Porro terra, Venerem inter & Martem collocata, lunam habet asseclam, quæ circa ipsum motu menstruo circumfertur, simulque cum ipsâ motu annuo circa solem.

Similiter Jupiter, Martem inter & Saturnum collocatus, habet quatuor lunulas asseclas, non nisi telescopio conspicuas, quæ annum ejus motum sequentes, continuè circa ipsum gyraut: proxima quidem, uno die & horis octodecim: proximè succedens tribus diebus cum dimidio: tertia diebus septem & horis quatuor: quarta omnium remotissima diebus sexdecim.

Pari autem ratione Saturnus sic Jovem inter & fixas collocatur, ut obvolvatur annulo suo, habeatque quinque lunulas asseclas eximii tantum Telescopii ope conspicuas.

Copernicus triplicem terræ motum attribuit: annum diurnum & inclinationis.

Annuus telluris motus est illius progressio circa solem (Venerem nempe inter & Martem) juxta Zodiacum.

Diurnus telluris motus est illius revolutio circa proprium axem, (ab occasu nempe in ortum spatium horarum 24) scilicet dum ipsa intra annum percurrit Zo-

diacum, singulis quibusque 24 horis circa proprium axem volvitur, instar trochi.

Motus inclinationis est tantummodo certa supràdictorum motuum modificatio, quæ parallelismus dicitur; in hac nempe hypothefi terra sic movetur circa solem juxta eclipticam, ut polos suos semper servet parallelos polis mundi, non verò polis egypticæ. Per diurnum telluris motum explicantur ortus & occasus syderum, diurnusque omnium motus apparens; nempe sydera oriuntur certæ parti terræ ubi hæc pars incipit illis obverti, occidunt ubi ab iis divertitur. Diurnum motum peragere apparent omnia simul sydera, dum terra ea omnia perlustrat diurnâ revolutione circa proprium axem.

Per annum ejus motum explicatur annuus solis motus juxta signa Zodiaci. Quippè, ubi terra percurrit arietem, necesse est ut sol appareat libram percurrere, dumque ipsa progreditur in taurum, necesse est ut sol appareat progredi in scorpionem; sicque consequenter, sicut intellectu facile est ex inspectione schematis.

Per eundem annum ejus motum explicatur quare Mercurius, Venus, Mars, Jupiter & Saturnus aliquandò majores, aliquandò minores appareant; quare appareant aliquandò directi, aliquandò retrogradi, aliquandò stationarii. Nempe

apparent modò majores modò minores, quia aliquandò sunt viciniore terræ, aliquandò ab ipsâ remotiores, ex eo nimirum quòd terra modò ad ipsos accedat, modò ab ipsis recedat. Facile autem concipies quare sint modò directi, modò retrogradi, modò stationarii, si mox secutura attentè legas.

Per parallelismum explicantur variæ anni tempestates; positâ enim illâ modificatione annui motûs telluris, intelligi facile potest cur modò unus telluris polus, modò alter obvertatur soli, ut ad sensum patebit, si globulum aliquem, quem supponas terram repræsentare, ità circumducas per Zodiacum sphæræ artificialis (in quâ interior globus solem repræsentabit) ut ejus polos semper serves parallelos polis sphæræ, seu sibi semper parallelos. Sed hæc fusiori indigent inquisitione. Sit ergo:

Utrum hoc Systema satisfaciat Astronomia.

Huicce quæstioni optimè respondent Copernicani, quandò præcipuas observationes factas ab Astronomis benè congruere cum hypothesi suâ tam feliciter, quàm ingeniosè probant.

Primum est phænomenon: sol spatio
24 horarum totam terræ superficiem illustrat,

strat, videturque cum omnibus planetis & firmamento moveri ab ortu in occasum, hâc ratione ut partes orientales terræ prius excipiant radios solares, prius planetarum & fixarum habeant conspectum quàm partes occidentales.

Explicatur. Nec soli, nec planetis, nec firmamento tribuamus motum hunc diurnum, cujus in firmamento saltem foret incredibilis velocitas; tribuamus ipsum uni terræ, ità ut moveatur circà suum axem ob occasu in ortum spatio 24 horarum. Tunc rectè intelligetur quomodo eodem spatio terra excipiat solis radios, planetarum & fixarum, prius secundum partes orientales quàm secundum occidentales.

Sit terra A B C D: (tab. 6. fig. 5.) sit firmamentum E F G H: sit homo versùs D cujus Zenith sit H, Nadir F, horison E G, certè huic homini sol oriri videbitur: at intrà sex horas punctum D veniat ad punctum A, Zenith erit E, Nadir G, horison F H, solque videbitur in meridiano & descripsisse arcum E F; scilicèt cum sol videtur ascendere versùs H, v. g. secundum unum gradum ascendere in I, horison erit in puncto 1 & 2: postea intrà sex alias horas transferatur à puncto A ad punctum B, Zenith erit F, Nadir H, horison E G; tumque sol

Tom. VI.

D

videbitur occidens & descripsisse arcum G F E, & tamen ipse homo translatus fuit à puncto D ad punctum B: quod si intrà sex alias horas transferatur à puncto B ad punctum C, Zenith erit G, Nadir ipse sol, horison F H: erit ergo media nox, solque videbitur descripsisse arcum H G F E. Denique si homo à puncto C ad punctum D redeat intrà sex alias horas, sol iterum videbitur oriens; ac proinde descripsisse arcum E H G F ab ortu in occasum.

Secundum. Sol videtur moveri ab occasu in ortum spatio 365 dierum atque horarum fermè sex, ità ut respondens signis septentrionalibus videatur minor, proindeque plures videatur revolutiones diurnas efficere in parte septentrionali, quàm cum respondet signis meridionalibus. (tab. 6, fig. 6.)

Explicatur. Terra ipsa moveatur ab occasu in ortum, sol videbitur illo motu cieri; quod quidem ut pateat, sit orbita terræ A B C D: sit firmamentum E F G H, in quo describantur 12 signa Zodiaci, hâc conditione ut sol sit in puncto I circuli quo fiat excentricus, vel in altero foco ellipsis: unde ducetur recta E G. Quo posito,

1^o. Patet quomodò, terrâ motâ ab occasu in ortum, sol pariter videatur

moveri: nam sit terra in A media inter solem & libram, sol videbitur respondere arietem: terra à librâ per scorpionem, sagittarium, veniat ad capricornum in puncto B, sol videbitur properâsse ab ariete per taurum & geminos ad cancrum: eadem veniat à capricorno per amphoram & pisces ad arietem in puncto C, sol videbitur raptus à cancro per leonem & virginem ad libram: pergat terra ab ariete per taurum & geminos ad cancrum in puncto D, sol videbitur motus à librâ per scorpionem & sagittarium ad Capricornum: denique terra moveatur à cancro per leonem & virginem ad libram in puncto A, sol videbitur translatus à capricorno per amphoram & pisces ad arietem; sicque motu annuo describet apparenter Zodiacum.

2°. Patet quomodò sol debeat videri major respondens signis meridionalibus; minor verò respondens septentrionalibus: enimverò cùm terra describit arcum A B C, sol respondet signis septentrionalibus: quandò verò describit arcum C D A, respondet sol meridionalibus: porrò remotior est à terrâ, cùm describitur arcus A B C; ergo sol videri debet minor, cùm respondet signis septentrionalibus: propior autem est terræ cùm describitur arcus C D A, ergo sol videri

D ij

debet major cùm respondet meridionalibus.

Denique plures videtur sol conficere revolutiones diurnas in parte septentrionali; pauciores verò in meridionali; nam arcus A B C major est, & arcus C D A minor est: porro cùm terra describit arcum A B C, sol videtur esse in parte septentrionali; cùm describit arcum C D A, sol videtur esse in meridionali: ergo plures videtur conficere revolutiones diurnas in parte septentrionali, quàm in meridionali.

Tertium. Dierum & noctium inæqualitates respectu eorum qui à lineâ digrediuntur, nec-non tempestatum vicissitudines, veris, æstatis, autumnii & hyemis.

Explicatur mirâ subtilitate ex diurno & annuo terræ motu, ità ut ex sphaëris artificialibus Copernicanis illud oculis constet; scilicet ità moveatur terra, ut in quavis orbitæ parte axem suum semper teneat sibi parallelum, ut videre est in terrâ positâ in partibus A B C D; certè terra ità disponetur in A, ut radius à sole veniat perpendiculariter ad æquatorem 1, 2, & poli: tum arcticus S, tum antarcticus M, eodem modo se habebunt ad solem; inde quia sol respondet arieti, erit æquinoctium vernum: terra eadem ità disponetur in B, ut radius à sole veniat perpendiculariter ad tropicum terrestrem

cancrī 3, 4, & polus arcticus erit magis inclinatus versus solem, quam antarcticus; atque adeò sole respondente cancro, erit solstitium æstivum: terra ità disponetur in C, ut radius à sole perpendiculariter veniat ad æquatorem terrestrem, & poli tum arcticus, tum antarcticus iterum eodem modo se habebunt ad solem; inde quia sol respondet libræ, erit æquinoctium autumnale: denique terra ità disponetur in D ut radius à sole veniat perpendiculariter ad tropicum terrestrem capricorni 5, 6, & polus antarcticus erit magis inclinatus versus solem quam arcticus; atque adeò, sole respondente capricorno, erit solstitium hybernium.

Dices: eadem stellæ verticales videntur respondere eidem regioni terræ & esse ejusdem magnitudinis: atqui si terra sic in orbitâ gyret, eadem stellæ verticales non debent apparere nec debent videri ejusdem esse magnitudinis; scilicet axis terrestris productus ad firmamentum diversas firmamenti partes attingit, putà K & L: eadem regio aliquandò propior, remotior est aliquandò ab eadem stellâ: ergo &c.

Dist. min. Eadem stellæ verticales non debent apparere, nec debent videri ejusdem esse magnitudinis, si orbita terræ habeat rationem sensibilem cum distantia

firmamenti à terrâ, C. si non habeat rationem sensibilem N. Porro quemadmodum Ptolemaïci docent stellas verticales easdem apparere homini posito in diversis locis terræ; quia terra se habet instar puncti ad firmamentum propter nimiam distantiam, ita Copernicani volunt easdem stellas verticales apparere eidem regioni terræ posite in diversis orbitæ partibus; quia non modò terra, sed etiam orbita terræ nullam habet rationem sensibilem cum distantia firmamenti à terrâ; igitur quod à Ptolemaïcis asseritur de terrâ, illud idem à Copernicanis asseritur de circulo quem terra describit; ut autem illud asseratur, sufficit quòd distantia fixarum à terrâ major definiatur à Copernico quàm à Ptolemaeo; nihil verò obstat quominus definiatur major; imò in Cartesiano systemate sic definiri debet: nempe in hac hypothese stellæ fixæ sunt totidem soles, qui occupant centra totidem majorum vorticum: porro in nostro vortice longè major est Regio à Saturno ad extremitatem vorticis, quàm ab eodem Saturno ad solem: hinc si erigeretur cylindrus supra orbitam terrestrem, qui pertingeret ad firmamentum, ejus extremitas fieret insensibilis, id est, in apicem insensibilem videretur desinere; sic positi inter arbores recto & longo ordine positas, quæ no-

bis sunt propiores conspiciamus distantes; quæ verò remotissimæ sunt, contiguæ apparent, ita ut, cum accedimus, videantur veluti à se invicem recedere.

■ Instabis: major est distantia terræ positæ in signo cancri à terrâ positâ in signo capricorni, quàm sit distantia regionis temperatæ septentrionalis à regione temperatâ meridionali; atqui tamen licet terra non habeat rationem sensibilem cum distantia firmamenti, non sunt eadem stellæ verticales duabus illis regionibus: ergo licet orbita terrestris nullam haberet rationem sensibilem cum distantia firmamenti, tamen non debent esse eadem stellæ verticales eidem regioni terræ, modò positæ in signo cancri, modò positæ in signo capricorni.

Dist. min. Licet terra non habeat rationem sensibilem cum distantia firmamenti, non sunt eadem stellæ verticales duabus illis regionibus, quia radii visuales sunt divergentes, C. & radii visuales sunt paralleli, N.

Itaque tum in systemate Ptolemaïco tum in Copernicano, non sunt eadem stellæ verticales respectu regionis temperatæ septentrionalis & respectu temperatæ meridionalis: scilicet radii visuales, secundum quos conspicitur firmamentum, sunt divergentes: tuncque quò major est di-

stantia, eò magis dissitæ sunt partes ad quas tendunt: attamen sunt eadem stellæ verticales respectu ejusdem regionis terræ, sive terra posita sit in signo cancri, sive in signo capricorni, sive alibi: quia mirum radii visuales, secundum quos firmamentum conspicitur, sunt inter se paralleli, ut videre est; tunc enim cylindrus erectus suprà orbitam terræ ad firmamentum desineret in apicem insensilem.

Quartum phænomenon. Motus tardissimus fixarum ab occasu in ortum, quo juxtà Ptolemæum fixa per annos 100 videtur uno gradu promoveri versùs ortum, juxtà Tychonem per annos 70, ità ut revolutio integra perfici debeat per annos Julianos 25806: cui phænomeno additur variatio obliquitatis eclipticæ.

Nonnulli è Copernicanis variationem hanc negant & irregularitatem negant; sed ipsam rejiciunt vel in incuriam observatorum, vel in fallaciam refractionum, quæ ab antiquis Astronomis neglectæ penitus fuerunt: at hoc responsum gratis datum videtur aliis.

Quapropter sic explicatur. Terra non ità accurate parallelismum axis servat dum movetur circà solem, quin axis aliquatenus vacillet; unde poli variis firmamenti partibus respondent & ad ipsum producti describerent per annos 100 ab ortu in

occasum unum ferè gradum circuli, cuius polus esset ipsius eclipticæ polus: quo posito, intersectiones eclipticæ & æquatoris seu puncta æquinoctialia, ab ortu in occasum pariter transferuntur: hinc motus præcessionis æquinoctiorum juxta Copernicum: ex motu verò reali hujusce præcessionis sequitur apparens motus fixarum ab occasu in ortum: tunc enim ejusdem stellæ distantia à punctis æquinoctialibus videri debet mutata versùs ortum. Sit terra A B C D: (tab. 7. fig. 2.) sit axis E F ad firmamentum productus: sit æquator G H, in cujus extremitate H sit fixa, quæ proinde est sine longitudine: quippè longitudo fixarum est earum distantia ab intersectionibus eclipticæ & æquatoris: sit ecliptica E G F H, quæ secetur ab æquatore in puncto H: certè si axis terræ ita vacillet, ut linea E F mutetur in lineam I K, æquator G H mutabitur in lineam L M: ergo versùs occasum extremitas H progressa est secundùm arcum H M æqualem arcui E I: ergo fixa H immota, videri debet progressa versùs ortum secundùm arcum M H.

Jam verò quia hæc vacillatio regularis non est, ut optimè intelligitur ex eo quòd in fluido rotetur vortex terrestris, ideò motus ille apparens fixarum non est regularis, ideò modò 100 anni, modò

70 postulantur &c. ideò pariter variari debet declinatio eclipticæ apparentis, si nimirum, vacillante terrâ, axis ejus modò magis, modò minùs inclinetur in eclipticæ plano.

Quintum. Mercurius & Venus conspiciuntur modò sole superiores, modò inferiores, imò easdem fermè phases patiuntur, quas luna patitur: quod quidem in Mercurio vix deprehenditur, quia radiis solaribus ferè semper immergitur est, sed clarè conspicitur in Venere,

Explicatur mirâ facilitate à Copernicanis, dùm supponunt Venerem & Mercurium moveri circà solem in orbitis spiritalibus: sit enim terra A, (tab. 7. fig. 3.) sit ejus orbita B C D: sit sol B, sit orbita Veneris G F M I L: certè Venus discedens à puncto G versùs F debet maxima apparere, quia paulatim versùs orientem digrediens à sole partem suam inferiorem ferè integram & soli & terræ obvertit: at posita versùs M ad solem accedens falcata conspici debet, paulatimque imminuitur, quia pars illustrata paulatim à nobis avertitur; sic pariter crescens videtur, cùm descendit à puncto I versùs L in occasum, paulatimque augetur, quia pars illustrata paulatim nobis obvertitur.

Hinc patet Mercurium & Venerem

conspici non posse distantes à sole nisi secundum semidiametrum circulorum quos circa solem describunt.

Sextum. Mercurius videtur moveri circa solem per menses quatuor ab occasu in ortum.

Explicatur. Quia terra simul fertur eodem motu per annum; ideò Mercurius licet orbitam suam descripserit tribus mensibus, non videtur suam rotationem absolvisse, nisi 4. elapsis; unde ab unâ conjunctione ad aliam conjunctionem fit integra revolutio & prætereà tertiam orbitæ partem emetitur. Sit sol veluti in centro: Mercurius sit in F, terra in A, conjunctus erit: dum per mensem fertur ab F in G, terra transibit ex A in B: (tab. 7. fig. 4.) per alterum mensem Mercurius gyret à G in H, terra veniet ex B in C: redeat Mercurius ex H ad F, en integra revolutio facta in rei veritate; sed conspicua non est, quia cum terra per tres menses pariter transierit ex A in D, Mercurius nondum est conjunctus: unde per mensem raptus ex F in G, terra verò translata in E, fit tunc conjunctus, adeoque revolutio facta videtur.

Septimum. Venus videtur moveri circa solem ab occasu in ortum per menses fermè 19.

Explicatur. Quia terra simul fertur eo-

D vj

dem motu per annum; ideò Venus, licèt orbitam suam descripserit per menses 7, aut circiter, non videtur suum circum emensa, nisi post menses fermè 19: unde ab unâ conjunctione ad aliam conjunctionem fiunt duæ revolutiones integræ cum mediâ. Nimirum si per sex menses terra transferatur ex A in C, Venus transferetur ex I versùs M: (tab. 7. fig. 3.) ergo videbitur emensa arcum G M. Si terra per alios sex menses redeat ad punctum A, Venus rapi debet ex M versùs F: ergo videbitur emensa arcum I L F: denique si per alios sex menses terra iterum ex A per B pergat in C, Venus ex F per M perveniet ad G: ergo iterum conjuncta: ergo videbitur rotationem suam absolvisse.

Octavum. Mercurius & Venus videntur modò directi, modò retrogradi, modò stationarii.

Explicatur. Hæc profectò realia non sunt; meræ sunt apparentiæ, quæ oriuntur ex eo quòd terra moveatur tardiùs ab occasu in ortum, quàm Mercurius & Venus: si supponamus semel hæc tria corpora inæqualiter rapi in ellipsi, unumquodque in suâ circà solem: nemo est qui non agnoscat Mercurium & Venerem citiùs raptos debere videri spectantibus è terrâ modò directos, modò sta-

tionarios, modò retrogrados, ità ut illud frequentius in Mercurio observetur, quia orbitam citius absolvit: neque eò loci afferam figuras quæ proponi solent, ut illud explicetur, in quibus videlicet non observatur proportio quæ servari debet inter motum terræ & motum illorum planetarum circà solem: ut enim istud Physici assequantur, Mercurium ità disponunt in orbitâ, ut modò citius, modò tardiùs ferri debeat.

Nonum. Mars, Jupiter & Saturnus videntur pariter modò directi, modò stationarii, modò retrogradi.

Explicatur. Hæc realia pariter non sunt, sed meræ apparentiæ, ex eo quòd globus terraqueus citius moveatur circà solem quàm Mars, Jupiter & Saturnus: atque hoc est unum discrimen quòd retrogradationes Martis videri debeant majores retrogradationibus Jovis, retrogradationes Jovis majores retrogradationibus Saturni, quia Mars nobis propior est quàm Jupiter, Jupiter quàm Saturnus: hinc Mars ob eandem rationem debet perigæus habere amplitudinem sensibilem majorem, quàm sit sensibilis amplitudo Jovis Perigæi, & Jupiter Perigæus majorem debet habere quàm Saturnus, quia non est tam sensile discrimen inter Saturnum Apogæum & Saturnum

Perigæum propter majorem distantiam, quàm sit inter Jovem Apogæum & Jovem Perigæum; non est tam sensile discrimen inter Apogæum Jovis & Perigæum, quàm sit inter Apogæum Martis & Perigæum, quia propior est Mars.

Ex solâ Copernicanæ sphæræ inspectione patet quomodò discrimen inter illud Apogæum & Perigæum Martis sit adeò sensile: scilicèt cum terra posita sit longè à centro vorticis, patet ipsam fieri propiorem Marti, & aliquandò ab ipso remotiorem.

Decimum. Luna movetur celerius in oppositionibus & conjunctionibus quàm in quadraturis.

Explicatur. Vortex terrestris, in quo continetur luna, sit ellipticus, putà A & B (tab. 7. fig. 3.) hoc patebit: scilicèt in ellipsi duæ sunt diametri, major & minor: luna sit in minore diametro vorticis terrestris circà conjunctiones & oppositiones: sit in majore circà quadratos aspectus, moveri debet velocius in minore diametro, quàm in majore; quia, ut observatum est, fluidum velocius currit per canalem angustiores, quàm per capaciorem; ergo &c.

Undecimum. Aliquandò luna propior est nobis posita in majore diametro vorticis terrestris, aliquandò remotior est posita in minore diametro.

Explicatur. In vortice terrestri elliptico luna posita non describit circà terram perfectam ellipsim: nimirum & in minore diametro potest videri & apogæa & perigæa, pariter in majore: si quandò describat ellipsim CD , erit propior terræ in majore diametro CD vorticis terrestris quàm in minore *e f.*

An satisfaciat mechanicis Legibus.

Hâc parte Systema Copernicanum cætera antecellit. Machina est omnium simplicissima, nullis partibus supervacaneis, inutilibus, impedita; omnia solis fermè apparentiis & irradiationibus opticis exponuntur: brevitati consulit & maximam servat uniformitatem: soles omnes sunt totidem vorticum centra. Planetæ omnes gyrent circà soles illos: nonnulli suos habent satellites: ex diurno motu terræ immobilitas planetarum & fixarum ab ortu in occasum astruitur; neque necesse est ut incredibili velocitate fixæ præsertim moveantur; tolluntur epicycli, rejicitur cœlorum soliditas, eorumque numerosa multitudo: sol circinatus non est cum solidis corporibus in cœlo vagabundus: terra apta quæ moveatur, non est in centro immota; eadem de stellis fixis statuuntur, quæ in sole observantur: eadem de

planetis conjiciuntur, quæ in globo teraqueoprehenduntur. Hæc omnia maximam probabilitatem systemati Copernicano conciliant; nec enim is sum qui existimem cum clarissimo *Parent* (a) ea posse conficere demonstrationem metaphysico-geometricam, ut ipse loquitur in eruditorum diario.

OBJECTIONES

Contrà Systema Copernicanum.

Quidam volunt mundum sic à Deo fuisse dispositum qualis à Copernico proponitur; alii propter auctoritatem Scripturæ negant posse admitti ut thesim, sed ad summam admitti posse ut hypothesum quæ satisfaciatur omnibus phænomenis.

Hinc illud primum quæri debet, utrùm Scriptura repugnet Copernicanæ hypothesi.

Anticopernicani opponunt 1º. illud Josue: (b) „*Sol, contrà Gabaon ne movearis; & luna contrà vallem Haylon: steteruntque sol & luna . . . stetit itaque sol in medio cæli.*

2º. Illud Eccles. *Oritur sol & occidit, & ad locum suum revertitur, ibique renascens gyrat per meridiem & flectitur ad aquilonem.* „ Et antea: „ *Generatio praterit &*

(a) An. 1700. die lunæ 2. Jan.

(b) C. 10.

generatio advenit ; terra autem in æternum stat.

Copernicani respondent Scripturam loqui populariter & juxta æstimationem eorum ad quos loquitur, præsertim in iis quæ non pertinent ad mores : quod quidem probant ex loco laudato, in quo legitur quòd dies nunquam fuerit similis illi : nam absolute sunt dies longiores, v.g. circa polos : ergo dies nunquam similis illi relative ad Judæos : ergo Scriptura loquebatur relative ad Judæos. Porro Judæi scientiis astronomicis minimè instructi putabant ex apparentiis moveri solem & stare terram : ergo relative ad eos locutus Josue dixit : *Sol, contra Gabaon ne movearis*, & addidit „ *stetit sol* : simili modo consequenter ad apparentias vocavit Moyses solem & lunam duo luminaria magna ; & tamen constat stellas fixas esse absolute luminaria majora quàm lunam, cujus lumen non posset ad nos usque pervenire, imò quæ non posset illustrari à radiis solaribus, si foret in eà altitudine in quâ sunt stellæ fixæ.

Hinc qui Astronomi putant ipsam terram moveri, solem verò stare, si cum aliis hominibus loquantur, si servos interrogent, quærunt an sol sit ortus, an ascenderit suprâ horisontem, an occiderit : alioquin non intelligerentur à servis :

sic Scripturæ, quæ subtilia non docent, sed utilia, quippe siluit Moyſes, ut advertit Auguſtinus, de magnitudine, ſitu, diſtantiâ cœlorum, quia reliquit Deus mundum hunc diſputationibus hominum.

Non modò ſic elevant ſuâ reſponſione difficultatem propoſitam Copernicani, ſed prætereà urgent in ſyſtemate Ptolemaïco diem futurum fuiſſe breviorẽ: nam in illo ſyſtemate duo ſunt motus in ſole, alter diurnus ab oriente in occidentem, qui oritur à primo mobili, alter verò annuus ab occidente in orientem, qui eſt ſoli proprius, quo ſol unoquoque die peragrat unum ferè gradum in zodiaco, ex quo motu ſol retardatur ſuprà noſtrum horizontem per mediam fermè horam. Porro quando Joſue dixit: *Sol, contra Gabaon ne movearis*, impedivit motum ſoli proprium ab occidente in orientem, non verò motum ab oriente in occidentem ortum à primo mobili; ergo citiùs ſol occidiſſet cùm fuiſſet duntaxat impeditus motus retardans ſolem ſuprà noſtrum horizontem.

Quòd autem non fuiſſet impeditus motus ortus à primo mobili ab oriente in occidentem patet, quia ad ſolem tantum dirigitur ſermo, non autem ad primum mobile: patet etiam quia ſi ad primum mobile ſermo pertinuiſſet, non modò ſol,

sed planetæ omnes & fixæ motum cohibuissent; atqui illud filetur ab Auctore sacro: ergo in systemate Ptolemaico res intenta non potuisset evenire.

Respondent Anti-Copernicani non esse privati hominis Scripturas Sacras interpretari, eas esse publicas leges, quæ solâ auctoritate publicâ possint exponi, proindeque Copernicanorum interpretationem non esse admittendam.

Respondent Copernicani Scripturas Sacras non posse quidem exponi à privatis hominibus in iis quæ pertinent ad articulos fidei & ad mores, sed exponi posse in iis quæ nusquam voluit explicare & in quibus loquitur relativè ad apparentias & existimationes hominum: quod confirmant ex eo quòd ab adversariis suis Scripturæ dicantur publicæ leges: porrò leges non sunt circà subtilia, circà ea quæ reliquit disputationibus hominum: sunt leges in articulis fidei & in moribus: ergo privati homines possunt eas interpretari in iis in quibus loquuntur relativè ad apparentias & existimationes hominum: porrò ea quæ dicuntur à Copernicanis esse de illorum numero quæ spectant apparentias, probant ex Psalmo in quo Propheta regius dicit quòd sol in aurorâ egrediatur de cubili suo ut sponsus ornatus, ut gigas ad currendam viam suam:

nam eatenus dicitur gigas quatenus refractione videtur major, eatenus dicitur ornatus ut sponsus egressus de cubili suo, quatenus alludit Propheta regius ad illorum opinionem qui putabant solem quiescere dum occidit & resumere novas vires: ergo potuerunt Copernicani Scripturas in iis interpretari.

Observant præterea errare posse tribunalia quæ de hisce statuunt, ad quod probandum adducunt Zachariam Romanum Pontificem errasse, cum docuit non posse dari antipodas, imò cum vetuit istud scribi & doceri.

Si objicias solem visum fuisse retrogradum temporibus Ezechiae,

Respondent retrogradationem fuisse tantum in radio, non autem in ipso sole: si enim fuisset in sole, fuisset universalis; non fuit autem: enimvero legati missi sunt à Rege Babylonis, ut inquirerent de veritate miraculi.

Hisce non obstantibus, licet Scriptura Sacra non asserat immobilitatem terræ, tamen sic statuo.

PRIMA PROPOSITIO.

*Systema Copernicanum defendi non potest
ut Thesis.*

Pr. Nam ad hoc satis est quòd ignoremus plures vias possibiles secundùm quas mundi partes potuerunt disponi ut evenirent præsentia phænomena: atqui ignoramus plures vias possibiles secundùm quas mundi partes potuerunt disponi ut præsentia evenirent phænomena: nam Deus sapiens simul & omnipotens potuit disponere partes illas variis modis, qui omnes certò attingi non possunt, ità ut asserere non possimus hanc viam potius elegisse quàm istam: ergo systema istud defendi non potest ut Thesis.

SECUNDA PROPOSITIO.

*Systema Copernicanum defendi potest ut
Hypothesis.*

Pr. Nam istud systema defendi potest ut hypothesis, cujus machina est omnium simplicissima, quod satisfacit omnibus observationibus astronomicis, & nihil habet repugnans phænomenis physicis: atqui systema Copernicanum est machina

simplicissima, machina, inquam, in quâ eadem leges sunt pro omnibus planetis, eadem pro omnibus solibus: satisfacit illud systema omnibus observationibus astronomicis, neque repugnat cum principiis physicis: ergo defendi potest ut Hypothesis.

OBJECTIONUM SOLUTIO.

Objicies 1°. Si terra moveretur ab occasu in ortum, aves non possent redire ad suos nidos; quippè dum in aëre suspensæ pergerent versùs occasum, tellus motu vertiginis in orbem circumducta nidos secum adduceret in ortum: præterea motus projectorum, v. g. globi bombardilis, longè faciliior esset versùs orientales plagas, & ictum faceret validiorem quàm versùs occidentales, adjuvante scilicèt terræ vertigine versùs ortum, resistente versùs occasum.

Hæc argumenta ad mulieres & pueros, in quibus non est major difficultas quàm si dicerem muscam majori celeritate moveri à prorâ ad puppim quàm à puppi ad proram: enimverò aër simul cum terrâ abripitur; quod probatum est celebri experimento.

A quinquaginta annis, dum viveret Gasendus, vir eruditissimus, disputabatur quem motum habiturus esset glo-

bus suspensus è superiori Triremis antennâ, si incumbentibus remigibus & triremem ad motum celerrimum incitantibus, dimitteretur in inferius tabulatum. Erat opinio communis fore ut globus in illâ hypothesi longè post triremem in aquam decideret, præterlabente scilicèt trireme, dum interim globus in subiectum tabulatum dimitteretur. Gassendus autem cum paucis asserebat fore ut globus idem punctum decidendo assequeretur, cui perpendiculariter antea respondebat : nec fefellit eventus ; parata quippè Triremis A B, globus C (tab. 8. fig. 1.) suspensus respondens perpendiculariter puncto D subiecti tabulati, dum qui incitatissimo motu Triremis agitabatur resecto fune dimissus, est globus qui duo aut tria minuta secunda in descensu impendit, ità ut interea punctum D motum sit in E. Globus C non descendit per lineam rectam CD, sed per obliquam C F E, atque idem punctum tabulati attigit cui priùs respondebat perpendiculariter.

Hujus eventus facilis est ratio: dum globus pendeat ex C, motâ triremi, motus est ipse aër triremi innixus : hinc globus perpetuo aëris contactu delapsus est in anteriora, & accedente motu deorsum secutus est determinationem complexam ex perpendiculari & horisontali conflu-

tam ; ità tamen ut remigibus visus sit descendere perpendiculariter , quia moti cum trireme & aëre horisontaliter non potuerunt observare quod erat determinationis horisontalis in illà determinatione complexâ , sed tantùm observare potuerunt quod erat determinationis perpendicularis ; visus autem sit hominibus è littore spectantibus describere lineam diagonalem , quia illi non moti cum triremi & aëre potuerunt observare determinationem diagonalem conflatam , tum ex perpendiculari , tum ex horisontali.

Objicies 2a. Sit globus A pendens ex summâ turri & respondens perpendiculariter puncto B , decidat globus , & interim donec terram attigerit , transferatur turris ex A in C & punctum B in D : (tab. 8. fig. 2.) sanè ; si terra moveretur , ut Copernicani volunt , globus A non attingeret punctum B translatum in D : etenim globus cùm dimittitur habet impetum quem habebat pendulus , vi cujus fuisset translatus ex A in C , & idèò arcum A C descripsisset majorem arcu B D ; ergo cadendo debet attingere punctum E , non autem punctum D ; quod experientiæ repugnat.

Tantùm abest ut hæc objectio faciat aliquid contrà Copernicanos , quinimò per eam ingeniosè explicatur eorum systema ; nam dum transfertur turris ex A
in

in C & punctum D in B, globus A non debet tendere ad punctum E, sed ad punctum D. Enimverò dum turris transfertur, aer ipse innixus transfertur; hinc columna quæ est ex A ad C latior est eâ quæ est ex B ad D, & consequenter globus cadere debet versùs D, non autem versùs E, quia si aer superior translatus est ex A in C, aer inferior translatus est ex B in D, non autem in E.

Adde quòd illa turris altitudo, quantumque sit, quia nulla debet æstimari relativè ad terræ diametrum & atmosphæræ aëris, adeò ut licet globus A decidens attingeret punctum E, non autem punctum D, tamen pro insensibili discrimine quod est inter hujusmodi duo puncta, id non potest percipi.

Obicies 3^a. Sit bombardà è parallelo aliquo directà versùs polos, ità ut scopus seu turris C sit in parallelo aliquo minore; supponamus quòd globus bombardilis ut à parallelo A B perveniat ad parallelum C D (tab. 8. fig. 3.) impendat unum momentum, & intereà bombardà transferatur in ortum ex puncto A in punctum B, Globus vi pulveris pyrii transfertur ex parallelo A B ad parallelum C D, & totum habet impetum vertiginis qui competit puncto A, vi cujus potest percurrere arcum A B, aut illi æqualem. Porro arcus

A B major est arcu C D: ergo potest ferri longius ad ortum quàm sit punctum D, & sic bombardà aberrabit à scopo; quod est ridiculum.

Major videtur difficultas, si supponatur aliquis vicinus polo terræ, qui dirigat tormentum à parte G in polum F: etenim dum globus in polum transfertur, determinabitur in suâ progressionem ad sese accommodandum diversis parallelis majoribus & minoribus: impetus namque conceptus in puncto G, (tab. 8. fig. 4.) determinabat globum ad describendum arcum G E, & tamen in singulis punctis suâ progressionis alium impetum concipit, quo determinatur ad describendos arcus minores & minores, juxtâ minores parallelos decrecentes usque ad polum terræ in quo isti paralleli desinunt in unum punctum, cessante jam quolibet motu vertiginis. Ergo si globus ultrâ polum feratur, rursus describet arcus majores & majores, quò magis recedet à polo. Unde igitur globus explosus ad motus tam diversos potest determinari? quod quidem dici debet de avibus per aëra volitantibus, qui diversos etiam parallelos majores & minores suo volatu percurrunt.

Eadem solutio danda huic objectioni, quæ præcedenti data fuit. Enimverò à puncto quo emittitur globus bombardi-

lis ad punctum quod petit, non est sensibile discrimen inter parallelum scopi & parallelum loci à quo emittitur; videlicet propter terræ amplitudinem & differentiam deprehendi non potest: quin imò propter terræ inæqualitatem fieri potest ut parallelus scopi major sit parallelo loci, à quo emittitur globus.

Deinde verò, supposito quòd differentia sit inter illos parallelos, rectè dici potest quomodò globus directus versùs polum describat minores & minores parallelos, atque à polo recedens postea describat majores & majores; nimirum aër innixus terræ, quò magis accedit ad polos, eò tardiùs movetur, & quò magis recedit à polis, eò vehementiùs agitur: itaque globus motu vertiginis describere debet minores & minores parallelos ad polum, atque postea majores: sicque globus nunquam aberrabit à scopo.

Objicies 4^o. Si terra moveretur motu vertiginis, retardaret gravium descensum: nam motus vertiginis tam debet retardare motum gravium quàm motus horisontalis; porrò motus horisontalis illum retardat: scilicet globus bombardilis pulsus horisontaliter per duo minuta secunda manet in aëre, quo tempore debuisset descendere per nonaginta pedes; hoc autem fieri non posset nisi motus horison-

E ij

æalis globi bombardilis retardaret ejus descensum: ergo pariter motus vertiginis ipsum retardaret.

Hoc autem repugnat experientiæ; nam si motus vertiginis retardaret gravium descensum, ubi major est vertigo terræ, ibi magis retardaretur gravium descensus: atqui ubi est major vertigo terræ, non est propterea tardior descensus gravium, v. g. circa æquatorem quàm versùs tropicos & polos.

Nego motum hunc vertiginis retardare descensum gravium: scilicet dum motu proprio grave descendit, motu communi aëris rapitur; unde si versùs æquatorem diagonalis magis accedat ad horisontalem quàm versùs polos, certè motus vertiginis in aëre major est versùs æquatorem.

Objicies 50. Si terra moveretur circa suum centrum, turres & ædificia deberent excuti, ut excutiuntur capilli inhærentes rotæ circulariter agitatæ.

N. Propositionem; nam aër ipse cum terrâ eodem motu abripitur, proindeque nihil est quod resistat telluris motui.

*SYSTEMA COPERNICANUM
explicatum à Cartesio.*

Non modò mundum præsentem supposuit Cartesius constitutum qualis à Co-

pernico instituitur, sed etiam vias aperit simplices quibus potuerit & debuerit nasci. Antequàm rem aggrediatur, postulat ut ea quæ proponit habeantur tantùm ut hypothesès, imò fatetur nonnulla à se assumi quæ constat esse falsa; quibus positis, quatuor postulat quæ jam obiter retulimus & ex quibus concessis videtur sibi hujuscemodi genesim demonstrasse.

10. Postulat ut à Deo creetur materia homogœnea & uniformis, divisibilis quidem & mobilis, sed nondum divisa & mota.

20. Postulat ut illa materia dividatur à Deo in partes ferè inter se æquales, magnitudine mediocres, inter eas ex quibus astra & cœli componuntur, quæ quidem partes non potuerunt esse initio sphæricæ; alioquin deberet admitti vacuum, quod est omninò impossibile.

30. Postulat ut partes illæ moveantur eâ quantitate motûs quam Deus produxit in primâ rerum genesi & quam etiam nunc conservat.

40. Postulat ut omnes illæ partes & singulæ moveantur circâ sua centra, plures verò circâ centrum commune, itâ ut tot sint centra communia quot sunt stellæ fixæ & planetæ.

His quatuor datis, sibi videtur Cartesius explicare posse quomodò fuerit natus

mundus Copernicanus, sive sibi videtur posse facere mundum Copernicano similem: enimverò ut primùm partes illæ agitatz sunt circà sua centra & circà centrum commune, intelligitur angulos illarum partium fractos fuisse, contritos & attritos; inde partes illæ factæ sunt sphæricæ: ramenta verò partium replevere interstitia quæ necessariò concipiuntur inter partes sphæricas, ità ut ramenta illa figuras suas subinde mutarent pro ratione loci occupandi.

En jam duplex materiæ genus, scilicet materia sphærica seu globuli, & ramenta seu materia subtilis nata ex contritione angulorum. Materia subtilis primum est Cartesio elementum, globuli verò secundum: tertium aliquandò nascetur.

Porro dum globuli pergunt circulariter moveri, nasci debet aliud Phænomenon. Nam hæc est naturæ lex: *quidquid circulariter movetur, recedit à centro sui motûs, si potest*: possunt autem globuli recedere à centro sui motûs: enimverò dum sic moventur perpetuò, mutuis frictionibus & collisionibus aliquid ex eis abraditur, proinde fiunt minores; ergo minus spatium occupant: ergo possunt recedere à centro versùs circumferentiam: ergo recedunt.

Animadvertit Cartesius globulos om-

nes non mansisse ejusdem magnitudinis, natos licet ex partibus ferè æqualibus, quia pro variis angulis quibus donabantur illæ partes, major in quibusdam copia fuit abrafa, in aliis minor; sic verò eos globulos à centro recessisse putat, ut centro cujusque vorticis proximi sint minimi & celerius moveantur; v. g. qui positi sunt versùs *d*, *e*, *f*, *g*,; qui verò t. 9. sunt remotiores gradatim sint majores, & tardius moveantur, donec veniatur ad certum terminum, v. g. ad superficiem sphæroïdis *H N Q R*, ultrà quam omnes n. 9. sunt æquales & è contrariò celerius moventur, quo ab eâdem superficie removerentur versùs *M Y*.

Globulos intrà sphæroïdem positos esse æquales inter se & celerius moveri, quò magis à sphæroïde removentur, utile videbatur Cartesio, ut suum systema de cometis, quo contendebat ipsos esse perpetua sydera suprà Saturnum semper posita, quæ ex uno cœlo in aliud cœlum migrant, faciliùs tueretur: hujus verò rationem physicam reddit; quia, cùm vortices non sunt accuratè rotundi, sit ut n. 83. spatium interjectum inter *H* & *M* fiat angustius compressione vorticum circumjacentium, qui non sunt æquales: porrò cùm fluidum corpus transfertur à spatio latiore in angustius, majorem acquirit ve-

locitatem; ergo globuli recedentes à centro versùs circumferentiam, cum transeunt à puncto H versùs M, acquirunt velocitatem; pariter cum transeunt à puncto Q versùs Y.

Globulos denique propiores centro velociùs ferri, & remotiores versùs superficiem sphæroïdis tardiùs rapi, inde probat, quia in centro est materia omnium subtilissima, ut modò videbitur; hæc verò materia est pariter omnium mobiliissima, a.84. ut patebit, quæ motu vertiginis velocissimo abrepta circà proprium centrum, potest abripere secum invicem cœli partem quæ extenditur à punctis *d e f g* ad puncta H N Q R, quæ designant ellipsim, non circulum; abripitur enim hæc cœli pars solo motu circulari hujusce materiæ subtilissimæ: porrò motus hujusce materiæ, licet constituat corpus sphæricum, potentior est versùs eclipticam *e g* quàm versùs polos *d f*; unde puncta H & Q debent magis recedere à centro quàm puncta N & R: quo posito, globuli propiores centro debent velociùs rapi quàm globuli positi versùs sphæroïdem; si velociùs rapiantur, debent esse minores, quia si forent vel majores vel æquales, cum majore velocitate, forent potentiores: ergo superiores evaderent.

Hæc circà globulos recedentes Carte-

fius: verùm cùm sic recedunt à centro, non ideò centrum vacuum manet; adest corpus quod ipsum implere debeat: scilicet & crevit materia primi elementi, cùm globuli perpetuâ detritione fiebant minores, & prætereà globuli minores re-^{n. 54} liquère inter se minora interstitia: ergo major fuit primi elementi copia, quàm necesse erat ad implenda interstitia quæ erant inter globulos: ergo id quod re-^{n. 64} sidui fuit, debuit confluere ad centrum, & ibi constituere solem; & quod in uno vortice contigit, debet pariter in aliis omnibus contingere; sol verò ità constituitur, ut sphæricus fiat; cùm enim magnâ vi globuli nitantur recedere à centro, & retineantur, hinc inde ab aliis globulis circumpositis non aliter quàm lapis à fundâ, fit ut centrum, quod deserunt, fiat sphæricum; proindeque ut in centro soles sint sphærici.

En igitur in centro uniuscujusque vortice sol constitutus à materiâ subtilissimâ & mobilissimâ; en cœli formati à globulis: porro vortices, quocumque modo fuerint moti, ab initio ità debuerunt componi, ut postea motibus maximè consentientibus fuerint agitati: hinc si vortex, cujus centrum est S, feratur ab A per E versus I, vortex cujus centrum est F, debet ferri ab A per E ver-^{n. 65}

n.10. sùs V ; tunc enim magis consentiunt ; si
 f. 1. tertius sit vortex suprà illos duos extans
 t. 10. & ipsis junctus versùs E, ferri debet ab
 f. 1. A per E fursùm versùs , & sic de aliis ;
 imò si supereſt aliqua contrarietas , vorti-
 n.66. ces illi deberent inflecti aliquâ ratione ſe-
 cundùm quam motus eorum consentirent ;
 aliàs naturæ Auctor operis ſui conſerva-
 tionì non conſuluiſſet.

Hinc duorum vorticum poli ſe mutuò
 tangere non poſſunt , quia hoc poſito ,
 ſi in eaſdem partes ferantur , in unum
 n.67. coaleſcent ; ſi in contrarias , ſibi mutuò
 68. repugnabunt : adde quòd ſunt magnitu-
 dine inæquales ; ſi ſunt inæquales , jam
 majorum & minorum ſimiles partes ad
 invicem applicari non poſſunt : proinde-
 que non immeritò ſupponi poteſt eos eſſe
 ità diſpoſitos , ut partes vicinæ eclipticæ
 tangant partes aliorum vorticum vicinas
 polis.

Hinc ſequitur commercium inter vor-
 tices , quo materia primi elementi fluit
 n.69. per partes polis vicinas ad centrum cujuſ-
 que vorticis ex aliis circumjacentibus vor-
 ticibus , & vice verſâ fluit ex quolibet vor-
 tice eadem materia per partes à polis re-
 motas in alios vortices circumjacentes.
 In vortice S ſint A B poli circà quos gy-
 rat : ſit vortex K gyrans circà axem TT :
 ſit vortex O gyrans circà axem YY : ſit

vortex L circà axem ZZ: sit denique vortex C gyrans circà axem MM: certè vortex S tangit duos O & C in ipsorum polis, & alios duos K & L in partibus eorum quæ remotæ sunt à polis: ergo materia debet effluere ex vortice S per polum M ad centrum C, & per polum Y ad centrum O: at ex vortice L per polum B eadem materia venire ad centrum S & ex vortice K debet fluere per polum A ad idem centrum.

Idem, inquit Cartesius, intelligi nequit de globulis: licèt enim & globuli & minutia simul fluèrent per polos B & A ad centrum S, tamen minutia citius venirent ad centrum; tum quia earum agitatio celerior est; tum quia interstitiola quibus fluèrent sunt magis proportionata configurationibus minutiarum quàm globulorum.

Dum materia primi elementi sic accurret ad centrum, debet omnes globulos solem circumjacentes æqualiter undequaque repellere, tum illos in quos directè impingit, tum illos in quos reflectitur obliquè; potest autem hæc materia & effluere per eclipticam ad alios vortices C & O. Habet verò, quamdiu versatur inter globulos, & motum rectum à polis A & B ad solem, à sole ad eclipticam.

E vj

Y M ; & circularem circa polos totī cœlo
A M B Y communem.

- n. 88. His de primo & secundo elemento notatis agit de tertio Cartesius : observat quædam ramenta fuisse minùs divisa & minùs celeriter agitata ; unde facili sibi mutuò adhærere potuerunt ; hæc verò præcipuè sunt in materiâ primi elementi , quæ à polis secundum lineas rectas feruntur ad medium cœli ; tunc enim in exiguas massas congregantur : & cum transeant per interstitia , quæ sunt inter globulos , debent fieri striæ in modum cochlearum intortæ ; ita ut quæ veniunt à polo australi non in easdem partes intortæ sint ac illæ quæ veniunt à polo boreali , sed planè in contrarias : sunt verò tres striæ , ut patet ex spatio quod relinquunt inter se tres globuli , A , B , C.

Illæ massulæ striatæ cum ad solem accesserunt , ob figuras nimis angulosas , molesve nimis magnam , ab aliis minutissimis separatæ sunt , & sibi mutuò faciliè adhærentes , moles aliquandò permagnas componunt ; enī maculæ in solari corpore , quæ & dissolvi & generari possunt , ut exponemus. Dissolvuntur autem vel in purissimam solis substantiam , vel in partes crassiores , quæ versùs cœlum expelluntur ; ex quibus fit moles rarissima ætheri terræ circumfuso non absumilis ,

quæ à sole forsan ad sphæram Mercurii, ^{n. 100.}
vel etiam ultrà se extendit: hîc porrò
æther in immensum crescere non potest,
nam continuâ agitatione globulorum con-
vertitur ipse in materiam primi elementi.

Inter maculas quædam facilè non pos-
sunt solvi, quia sole condensantur & indu-
rantur; unde possunt augeri semper, sic ^{n. 101.}
que possunt stellæ disparere, postea re-
novari; imò si vicini vortices sint for-
tiores & magna striarum copia occurrat,
possunt omninò disparere & mutari sive
in planetas, sive in cometas.

Factâ semel hâc mutatione, jam nihil
impedit quominùs vortex, cujus centrum
occupat, vel planeta, vel cometa, ab ^{n. 115.}
aliis absorbeatur: nam ante maculas sol
quidem sufficienter repellebat globulos
versùs circumferentiam sui vorticis, ut se
tueretur: at cùm maculis obrutus est,
ejus actio sufficiens non est: & quòd ci-
tiùs vel tardiùs absorbeatur, illud tantùm ^{n. 116.}
pendet à situ quem inter alios vortices
obtinet. Jam verò cùm absorbetur, si cor-
pus maculis tectum sit adedò solidum,
ut, priusquàm pervenerit ad terminum,
in quo partes vorticis absorbentis omnium
tardissimè moventur, acquirat agitatio- ^{n. 119.}
nem æqualem agitationi earum partium
inter quas versatur, non ulteriùs descen-
dit, sed ex illo vortice in alios transit;

& est cometa, de quo postea: si corpus minus habeat soliditatis & infra terminum illum descendat, ibi semper manens ad certam distantiam à centro perpetuò circa ipsum rotatur, & est planeta; manet autem in eo loco vorticis in quo æqualis est virtutis cum globulis cœlestibus.

His positis, cogitari potest primum vortices Satellitum Saturni absorptos fuisse à magno vortice Saturni, vortices Satellitum Jovis absorptos fuisse à magno vortice Jovis, vorticem lunarem à terrestri; sed cum tandem, & Saturni, & Jovis, & terræ soles obscurati fuerint, quemadmodum soles Mercurii, Veneris, & Martis, ideò omnes illi absorpti sunt à majore vortice solari, in quo gyrent circa solem nostrum, ita ut soli viciniore sint minus solidi quàm remotiores; celerius autem propiores soli gyrate debent, quia sunt inter globulos celerius agitados.

Hæc Cartesius de universâ mundi dispositione: quædam omissa fuere, quæ resumuntur cum agam speciatim de lumine, de maculis solaribus, &c.

CRITICA

CARTESIANI SYSTEMATIS.

Hucusque doctrina Cartesiana, quæ ingeniosa certè videbitur homini cordato fuit exposita.

Ququam licet notare quæ sunt falsa, quæ sunt dubia, & minùs demonstrata.

1^o. Postulat materiam à Deo creari. Sed quomodò fiet istud, cùm sit ipsa extensio quæ necessaria est?

2^o. Postulat ipsam dividi, sed quomodò fiet istud? quodnam medium erit inter partes divisas? nondum enim sunt ramenta facta: præterea divisio non potest antecedere motum.

3^o. Postulat ut partes illæ omnes moveantur singulæ circa sua centra, plures circa centrum commune: sed non videtur quòd opus istud totum fieri possit sine interjecto spatio; sine vacuo scilicet extensio hæc immobilis erit.

4^o. In illo systemate, in magno vortice corpora solidiora sunt versùs circumferentiam, mole minora sunt propiora centro; res tamen se habet aliter in parvo vortice, putà in nostro, ubi lapides petunt centrum, corpora verò subtiliora circumferentiam.

Denique non satis feliciter explicatur quomodò absorpti fuerint vortices minores à majoribus. Enimverò non concipitur quomodò suâ dilatatione ità potuerint exundare, ut veluti factâ inundatione majores rapuerint minores.

*NOSTRA SENTENTIA**De Principiis physicis.*

Agitur hîc, non de principiis sensibilibus & veluti secundariis, qualia sunt elementa Peripateticorum & principia Chymicorum, sed de iis principiis mechanicis, quæ tamen soli rationi perspicua sunt, juxtà quæ consequenter ad leges physicas potuerit exsurgere machina Copernicana, quam ut possibilem & consentaneam tum astronomicis observationibus, tum rationibus physicis, tum mechanicis legibus proposuimus; sicque maxima lux affertur iis quæ suprâ posita sunt.

1º. Detur materia à Deo producta.

2º. Deus eam producat quantitatem motûs quam primum produxit in primâ rerum geni.

3º. Moveat plurimas materiæ particulas, & quidem rectâ secundum diversas determinationes, imò aliquandò oppositas, modò directè, modò indirectè sibi occurrent; inde collisiones, inde reflexiones, inde in vortices abeant necesse est, id est, in magnam copiam particularum, quarum motus inter se consentiunt, ut circâ centrum commune ferantur; neque necesse est ut illi vortices sint

accuratè rotundi, quia cùm ecliptica unius occurrat polo alterius, vires fuere inæquales, ut videre est versùs Y & M: pariter necesse non est ut omnes sint æquales; sed alii sunt majores, alii minores: eorum verò motus à Deo perpetuò conservari supponitur.

Jam verò quamcumque primùm figuram sortitæ fuerint partes, debuerunt variis collisionibus fieri sphericæ, & proinde debuerunt esse ramenta, seu minutia subtilissimæ, quæ replent interstitia quæ sunt inter globulos; hæc verò ramenta maximam concipiunt velocitatem dum transeunt à patentioribus viis in angustiores meatus; eâdem ratione quâ videmus ex folle, quamvis lentè claudatur, aërem tamen celeriter egredi, propter angustiam viæ per quam transit.

His positis, cum Cartesio contendimus globulos recedentes à centro versùs circumferentiam facere ut minutia subtilissimæ accurrant ad centrum, hâc conditione ut sint gradatim majores à loco propiore centro ad peripheriam usque: illæ verò minutia constituunt in centro solem sphericum; aliàs globuli non recederent quantum possent, quod est absurdum.

Hic centrum geometricum non appellamus: scilicet fieri potest ut in loco à centro vorticis satis distante possit formari

sol, hâc viâ nimirum: cum materia subtilis egredietur ab eclipticâ unius vorticis, putà S per polum M vorticis C & per polum Y vorticis O, (tab. 9.) fit ut materia subtilis vorticis C egredietur ab eclipticâ per polum Z vorticis L; hæc pariter facit ut materia subtilis vorticis L ab eclipticâ egredietur, sed jam non subeat præcisè polum B & polum A, subeat partes vicinas C D, oppositisque determinationibus veniens debet constituere solare corpus, non in centro E, sed in loco S.

Jam verò terra gyret in circulo F G H I, explicatur quomodò sol hyeme perigæus sit, quomodò æstate apogæus. Ex illo continuo accursu materiæ subtilis ad centrum, quæ cum aliâ rapidissimè agitatâ consociatur, intelligitur certè solis actio, quâ partem cœli ad certam usque distantiam transfert, & globulos propellit; sed non modò subtilissima accurrit, veniunt pariter ramenta crassiora eâ ratione, quâ profequitur Cartesius: sunt maculæ, de quibus postea; imò istæ maculæ plures sydus possunt ità obtegere ut fiat planeta; quod exponetur, cum agam de formatione terræ; sicque obscuratis solibus, vortices debuerunt absorberi, ut explicui.

Supponatur jam vortex terrestris ab-

scriptus, (tab. 12. fig. 1.) eodem modo de aliis judicandum; abripietur motu communi vorticis ab occasu in ortum, si vortex sic rapiatur; præterea terra circa suum axem simul cum aëre, æthere, rapi debet pariter ab occasu in ortum; nam si major sit vis magni vorticis ab A versùs B, ab E versùs F, quàm ab A versùs D, ab E versùs H, certè pars planetæ B debet inclinari versùs C, & pars ætheris F versùs G; proinde pars C versùs D, & pars G versùs H; proindeque debet volvi simul cum suo vortice ab occasu in ortum circa suum axem: atqui major est vis materiæ cœlestis magni vorticis ab A versùs B, ab E versùs F, quàm ab A versùs D, ab E versùs H, quia pars superior fortior est parte inferiore; ergo sic explicamus physicè motum, tum annuum terræ circa solem, tum diurnum circa proprium centrum: imò explicari potest cur terra sic mota fervet semper axem suum sibi parallelum; dum enim sic gyrat, concipitur materiam intrà poros ejus contentam continuò exire, & recedere ab axe secundùm plana æquatori parallela; unde necesse est ut alia materia subtilis ingrediatur per partes polis vicinas fluens secundùm axem & lineas axi parallelas, occupatura spatia derelicta: porro cùm ingreditur per illas partes, vias

sibi facit accommodatas, quibus transeat: ergo semper tenet terram sic dispositam ut directè subeat illas vias, quemadmodum magnæ sic tenetur dispositus à vortice materiæ terrestris, ut suos polos convertat versùs mundi polos.

Exponitur præterea cur vortex terrestris, idem sit de aliis judicium, sit ellipticus: nam versùs F & versùs H magis comprimitur æther circumfusus terræ; nam inter solem & D materia cœlestis est in majoribus angustis, quemadmodum à B ad partes superiores, quàm versùs G & E. Hinc vortex lunaris absorptus à vortice terrestri moveri debet secundum ellipsim, ut dicetur postea.

Dum sic rotantur planetæ circà astrum, moveri debent secundum eclipticam; nam corpora circulariter agitata, quantum in se est, majores describunt circulos; ecliptica verò major est circulus vorticis: at debuerunt alii magis, alii minùs, ab eclipticâ recedere; nam si fuissent positi omnes sub hoc circulo, occlusissent vias materiæ cœlesti, adeoque paulisper debuerunt disjici: potuerunt autem disjici aliquatenùs versùs polos propter alias rationes physicas; videmus quotidie corpora innatantia currenti fluvio propelli versùs littora, si paulò fortius à dextrâ premantur, vel à sinistrâ.

QUOTUPLEX SIT MUNDUS.

Ut fiat satis huic quæstioni, explicari debet quid intelligatur nomine mundi.

1^o. Si hoc nomine intelligatur universitas rerum corporearum secum invicem connexarum, scimus unum esse mundum resultantem ex iis omnibus saltem quæ cadunt sub sensus. An possint esse aliæ rerum corporearum universitates spatiis disjunctæ à se invicem, hoc certum est esse posse; an sint reverà, dubito, quia fortè universitas præsens rerum corporearum infinita est, quia licèt finita sit, Deus potuit producere vel non producere alias: an produxerit quis novit? nemo consiliarius Domini est, nemo ingressus est in ejus potentias.

2^o. Si nomine mundi terra intelligatur hominibus habitata, jam Scholastici ferè omnes volunt unicum esse mundum, putà terram nostram; quod quidem si non feliciter probant ex ratione, putant illud se assequi ex Scripturâ & traditione; cùm Deus; inquit, loquitur de mundo, loquitur semper in singulari, putà: Sic Deus dilexit mundum, &c.

Quidam inter Veteres suspicati fuerunt planetas esse terras, non modò habitabiles; sed etiam habitatas; quam opinionem

nostris temporibus redivivam fecerunt viri ingenio excellentes, præsertim clarissimus *Hugenius* libro de eâ re scripto, in quo vel incolarum mores inquit, locorum habitudines, situs, aspectus, conditionem ferè demonstrat.

Sic Scriptor elegans & plenus urbanitatis celeberrimus *de Fontenelles* in libro qui gallicè inscribitur *de la pluralité des mondes*, censuit non modò planetas hujusce nostri vorticis esse terras habitatas, verùm etiam stellas fixas esse totidem soles, qui occupant centra totidem vorticum, & circà soles singulos, quemadmodùm circà nostrum, gyrare planetas qui pariter sint terræ habitatæ.

Occasionem sic sentiendi dederat *Cartesius*, à quo hujusce doctrinæ fundamenta sumpta sunt; unde tam eruditè quàm ingeniosè Auctor (a) libri *le voyage du Monde de Descartes*, supposuit *Cartesium* intentum producendo mundo huicce nostro simili, in quo planetæ forent ejusdem conditionis, omnes cum terrâ nostrâ, stellæ omnes cum sole nostro.

Mitto opus inscriptum *Voyage dans la Lune*, Auctore *Cirano de Bergerac*, in quo præter fabulas & malè digestam philosophandi methodum, præter scommata,

(a) P. Daniel Jef.

ineptias & turpitudines, nihil reperitur quod sit succi solidi & exquisiti saporis, elegans nihil, nihil venustum, nihil verosimile & naturæ legibus conforme, sed ratio audax & obscœna, quæ unos Theatri italici spectatores & auditores possit delectare. His positis, sit

PRIMA PROPOSITIO.

Planeta omnes sunt terra habitabiles, nec-non ipsi Satellites qui circa eos rapiuntur.

Pr. Nam planetæ sunt corpora opaca & aspera; opaca quidem, quia lumen ex se non emittunt, sed reflectunt, ut probabitur agendo de singulis; aspera verò, quia videntur ex omni parte, nec sunt instar speculorum: hæc autem corpora opaca & aspera sunt ejusdem conditionis cum terrâ nostrâ quæ est habitabilis: ergo planetæ sunt terræ habitabiles.

Dices: Mercurius habitari nequit præ nimio calore, Saturnus præ nimio frigore, nec-non ejus satellites.

Sic olim Veteres Zonam torridam ab æstu inhabitabilem, glaciales verò ab imbribus atris incultas volebant; sed ista veniunt à præjudicatis opinionibus, & expositâ qualitatum naturâ caloris præsertim & frigoris, patebit quàm vanæ

sint illæ objectiones; interim adversarii observent eos qui sub Zonâ torridâ degunt frigore corripì in nostris regionibus, vel per dies illos quibus aëre calidissimo fere enecati, corpora nostra aqua committimus: observent multa, Deo disponente, posse reperiri, quibus & nimius calor & nimium frigus impedian- tur: sic sub Zonâ torridâ ventus perpetuò regnat, cadunt frequentes pluviae, noctes semper æquales sunt diebus, terra suppeditat fructus varios, quibus æstus sanguinis sedari possit; observant à solo motu non pendere calorem, ipsum non esse qualitatem absolutam, sed respectivam; pendere etiam à configuratione partium fluidi circumstantis & à diversis poris & meatibus, quibus corpora nostra eribrantur, ut videbimus: his observatis, intelligent certè & Mercurium & Saturnum nec-non alios planetas esse habitabiles, aut saltem nihil ex hac parte obstare quominus suos habeant incolas.

At, inquires, ne loquamur de illis qui sunt à nobis remotiores, certè luna non est terra habitabilis; nam si foret terra habitabilis, suam haberet atmosphæram, in illâ atmosphærà attollerentur vapores, vapores illi lunari corpori lumen aliquandò furriperent, nempe cùm in spississimas nubes congregarentur, adedque lumen ad
nos

nos reflecterent; hæc tamen in lunâ non deprehenduntur, licet satis accuratè observetur, ope telescopii, cujus longitudo sit 50 pedum.

Dari vel non dari atmosphæram circâ lunam disputant inter se Philosophi; existimo ego aliquam dari, sed eam suspicor esse brevissimam, seu minoris altitudinis; etiam relativè ad corpus lunare, quàm nostra sit: existimo quosdam vapores attolli, sed ad minorem altitudinem; quippè subito ad lunam redeunt, dum alii ultra pergunt ad formationem cometarum.

SECUNDA PROPOSITIO.

Probabilius est stellas fixas occupare centra totidem vorticum.

Pr. Sunt enim corpora de se lucida ejusdemque conditionis cum sole nostro, ut probabitur, magnitudinis fortè majoris, adeoque nisi sint centra vorticum circâ quæ alii planetæ gyrent, videntur inutilia; occupant autem centra vorticum ut possint suam figuram rotundam servare & agere in quamlibet circumferentiæ partem.

TERTIA PROPOSITIO.

Probabilius est gyrare Planetas in singulis illis vorticibus circà soles illos.

Propositio hæc corollarium est præcedentis: nam si stellæ fixæ sunt soles totidem majorum vorticum quorum centra occupant, certè videtur inde sequi esse debere planetas in illis vorticibus, qui rapiantur circà soles illos, quemadmodum in nostro vortice planetæ rapiuntur circà solem nostrum; scilicet sunt ejusdem energiæ, ejusdem virtutis, & forsan majoris quàm sit sol ipse noster; sunt enim corpora vastissima, non modò in systemate Copernicano, sed etiam in Ptolemaico, ità ut sol in eadem distantia positus vix à nobis videretur; possunt proinde inservire nutritioni, generationi, corruptioni & aliis; igitur ne virtus illa suo frustretur effectui; probabilior nostra traditur propositio.

At, inquires, stellæ fixæ sine non carebunt, licet circà ipsas planetæ perpetuà vertigine non rapiantur, quia debent dici propter nos conditæ ut essent in signa & tempora, ut exinde infinitam Dei virtutem possemus agnoscere & venerari.

Reverà propter nos conditæ sunt, ut

essent in signa & tempora, ut infinitam Dei virtutem possemus agnoscere & venerari. Sed ex unâ parte non minùs poterit homo eandem virtutem intelligere & glorificare, si planetæ gyrent circà fixas, ut gyrent in nostro vortice circà solem, & ex alterâ, si non volvantur circà hæc sydera, virtus quâ possunt inservire vegetationi, nutritioni, generationi &c. frustrabitur hoc effectu. Factus reverà homo est ut præesset volatilibus cœli, piscibus maris & bestiis terræ: eorum omnium Rex constitutus est à magnifico & liberali Conditore; sed dominium illud ultrà non extenditur, & forsan est aliqua superbia si putet hæc cœlestia sibi soli nata fuisse; si putet de jure suo detrahi dum aliæ ponuntur creaturæ, ad quas hæc dona specialius pertineant.

QUARTA PROPOSITIO.

Probabilius est omnes Planetas esse terras habitatas.

Pr. Nam Dei sapientia nihil facit frustra: porro cui bono corpora hujusce molis quæ frequentius æquant molem terræ, si non superent? nam si dicas lunam factam fuisse ut lumen esset noctis, quid dices de Saturno ejusque satellitibus, qui

nōn possunt conspici nisi telescopio ; quid de Mercurio, radiis solaribus ferè semper immerso ? Profectò hæc facta non sunt in nostram utilitatem, quia nullius sunt utilitatis respectu nostrî : ergo sunt terræ habitatæ ab incolis suis.

Hinc habemus signa certissima esse in lunâ maria, terras, scopulos & montes ; maria designantur à maculis quæ sunt partes rariores : scopuli verò designantur ab aliis maculis fugacibus & mutabilibus quæ telescopio attinguntur : nam si luna plena sit, non conspiciuntur ejusmodi maculæ, quia sol ex opposito respicit lunam, & ideò nullæ fiunt umbræ à scopulis & montibus : at si luna sit crescens, apparent maculæ quæ porriguntur ab occidente in orientem ; è contrariò luna si sit decrescens, apparent maculæ quæ porriguntur ab oriente in occidentem propter varios cœli aspectus & eminentias scopulorum & montium qui sunt in lunâ. Denique terræ designantur partibus albicantibus, quia vegetiùs lumen reflectunt. Quod de lunâ dicimus, proportionè servatâ judicari debet de aliis planetis.

OBJECTIONUM SOLUTIO.

Objicies 1^o. Omnes homines sunt filii Adam : sed si planetæ forent terræ habi-

tatæ, omnes homines non essent filii Adam : ergo , &c.

Dist. maj. Omnes homines qui hanc terram incolunt , C. Omnes , includendo eos qui alios incolunt planetas , N.

Objicies 20. Apostoli docuerunt omnes gentes & annuntiaverunt Evangelium omnibus hominibus.

Dist. Omnes gentes quæ incolunt hanc terram , C. Omnes gentes, includendo aliorum planetarum incolas , N.

Quapropter cum Scriptura data tantum fuerit in gratiam hominum qui nostram terram incolunt , ideò loquitur duntaxat de iis quæ spectant ad incolas hujusce terræ , siletque de aliis , adeòque quoties loquitur de hominibus , de gentibus , de mundo , loquitur de iis propter quos data est.

Deinde miror Scripturas Sacras adeò perperam adduci , cum agitur de rebus philosophicis , quas Deus reliquit disputationibus hominum : eadem afferebantur testimonia , cum ante ducentos annos disputabatur utrum essent antipodes ; mansit tamen ipsa integra Scripturæ veritas , & visi sunt oculis antipodés ; quamquam potiori jure laudari poterat , cum agebatur de antipodibus , quàm cum agitur de incolis planetarum : scilicet aperte Scriptura loquitur de hominibus hujusce terræ

incolis, nec ullam facere intendit mentionem de aliis; neque asserit eos existere, neque negat; unde non minùs vera foret, si novis instrumentis opticis possent deprehendi illi homines.

DE CORPORE COELESTI.

Mundus iste generatim dividitur in regionem cœlestem & sublunarem.

Regio cœlestis extenditur à lunâ ad fixas, sublunaris verò à lunâ ad terram inclusivè.

In regione cœlesti continentur cœlum & sydus.

Quid sit Cœlum.

Definitur à Sto. Thomâ corpus sublime, diaphanum, non lucens, sed luci pervium in quo sydera continentur suasque circuitiones peragunt.

Sed si sol & stellæ fixæ non moveantur ab ortu in occasum spatio 24 horarum, quomodo sydera suas peragunt circuitiones, mallem ergo dicere: in quo sydera suas circuitiones peragere videntur.

Cur sit.

Finis est Dei gloria : cœli enarrant gloriam Dei.

Causa efficiens Deus : in principio creavit Deus cœlum & terram.

Constant ex materiâ & formâ.

D. Thomas vult materiam cœlestem non esse ejusdem speciei cum sublunari.

Sed immeritò : nam materia eadem est in corporibus omnibus, differunt ea duntaxat penès partium mechanicam dispositionem.

Dices : Materia cœlestis est incorruptibilis, non verò sublunaris.

N. Secundam partem ; scilicèt quævis materia substantia est, materia ergo incorruptibilis est : ergo si quæ sit incorruptibilitas, venit à mechanicâ partium dispositione.

Præterea in cœlis ipsis est corruptibilitas, in iis sunt terræ, est in ipso sole, in fixis : in iis crescunt cometæ & corumpuntur.

Quærent quæ sit forma materiæ cœlestis, an sit vivens, an sentiens, an ratiocinans ?

Sed ridiculæ quæstiunculæ, mundus non est animal, cœli nec vivunt, nec sentiunt, nec ratiocinantur.

Sed cœli sunt globulorum congeries majorum & minorum, inter quos globulos spatiola replentur minutiis & ramentis: hinc planetæ in cœlis fluitare possunt & suas cum iis peragere circuitiones.

Quapropter cœli non sunt solidi, ut Ptolemæici docent; scilicet in hâc hypothesei mechanicè explicari nequit motus planetarum, nec exponi potest motus cometarum, qui quoquoersum circumferuntur motu vago & incerto, modò superiores, modò inferiores, ut patet ex diversitate paralaxis.

Quales sint Cœli.

Sub hoc titulo agunt 10. Physici de figurâ cœlorum.

Omnes ferè Scholastici inter Peripateticos docent Empyreum esse quadratum ratione superficiiei exterioris. 1º. Quia in Apocalypsi Civitas Dei dicitur in quadro posita: egregia sanè Scripturæ interpretatio! quasi verò non significetur his verbis immutabilitas statûs beatorum. 2º. Empyreum, inquiunt, est tranquilla sedes Beatorum quæ subverti non possit: ergo sedes debet esse firma, ergo debet esse quadrata, cum hæc figura sit ad motum maximè inepta.

Quis non rideat tam exile & jejunum ratiocinium; quasi verò Beatorum gloria pendeat à sede motâ vel immotâ.

20. Agunt de motu. Quidam putant moveri cœlum per proprias formas.

Sed rusticè admodum: rideres si quis diceret hominem ambulare à propriâ formâ, aves volare à propriâ formâ, &c. non explicatâ mirabili organorum suppellectili & partium dispositione vi cujus hæc aguntur corpora & moventur.

Alii docent cœlos moveri ab angelis sive ab intelligentiis.

Hi muliebriter omninò discurrunt, atque sine ullâ eruditione.

Si quis interrogatus de motu gravium, de motu magnetis, aut maris æstu reciproco, responderet gravia, magnetem per angelos moveri & æstum reciprocum ab angelis procurari, quis risum posset cohibere? ergo recurri debet ad principium mechanicum.

Rem ego explico. Postquàm creavit Deus materiam, produxit in illis materiæ partibus certam quantitatem motûs quam etiamnùm conservat: porrò, ut rectè explicat Dominus *Gadroys* libro gallicè inscripto *le Systême du Monde*, c. 2. quæst. 3. partes singulas movit secundùm lineas rectas; & in hoc discrepamus à Cartesio, qui voluit eas moveri secundùm lineas

circulares: sed dum occurrunt sibi corpora, & variis determinationibus moventur, coguntur tandem describere lineam quæ proximè accedat ad circularem, sicque ferè circulariter agitatae sunt partes omnes materiae, factique vortices in quorum centro sit suus sol, circa quem vertuntur partes sphaericae seu minutissimi globuli, inter quos sunt ramenta seu minutiae. Porro globuli abripiunt motu suo planetas, id est, corpora terrestria conflata ex partibus ramosis atque striatis: cum autem celerius feratur materia sphaerica parte superiore quam parte inferiore, idèò planeta, dum orbitam describit circa solem, debet & continuò gyrare circa centrum suum, quin imò fieri debet circa planetam parvus vortex, ex eo quòd planeta tantà velocitate non feratur quantà globuli, & ex eo quòd superficies planetarum non sit perfectè sphaerica, sed potius sit aspera. Sit sol in centro, globuli gyrent circa solem. Sit terra (eodem modo judicetur de aliis) fiet circa terram parvus vortex, ex eo quòd terra non feratur tantà velocitate quam globuli, & ex eo quòd sit aspera.

Ex his sequitur coelos agitari secundum dispositiones mechanicas. Sequitur coelum esse ubique unius ejusdemque naturae homogeneum & esse unicum. Dici

tamen potest quòd sit una regio in quâ sunt planetæ, inde cœlum planetarium; alia regio omnium vorticum, extrâ vorticem magnum in quo sumus, quæ vocatur firmamentum.

DE SYDERIBUS.

Sydera alia dicuntur stellæ fixæ, alia dicuntur planetæ, alia denique cometæ.

Quid sint Stella fixa.

Plurimi inter Antiquos, qui cœlos admitterebant solidos, putabant quasdam esse partes magis condensatas, tanquam nodos in ligno, quæ proinde lumen fortius reflectebant, & inde eas fixas nominabant.

Refellitur certè hæc propositio, si constet fixas proprio lumine coruscare, nec posse ab alio fonte excipere lumen quo illustrantur; porro hoc facile probatur: enimverò si lumen ab alio fonte exciperent, maximè à sole: atqui lumen fixarum à sole non potest proficisci: nam si lumen istud à sole traheretur, Saturnus, multò vicinior soli quàm sint stellæ fixæ, deberet apparere splendidior stellis etiam rutilantissimis, quæ appellantur primæ magnitudinis: atqui longè major est splendor illarum fixarum quàm Saturni, .Jo.

vis; ergo fixæ non mutuantur à sole lumen quo coruscant, sed proprio fulgent.

Deinde hoc discrimen est inter planetas & fixas, quòd planetæ globulos suos exactè rotundos & circinnatos objiciant velut bullulæ quædam undique lumine perfusæ appareant orbiculares; fixæ verò peripheriâ circulari nequaquam terminatæ conspiciantur, sed veluti fulgores radios circumcircà vibrantes & scintillantes: ergo fixæ propriâ luce fulgent & instar flammæ accenduntur.

Quapropter non aliud est inter fixas & solem discrimen nisi quòd fixæ sint centra aliorum vorticum & in majore distantia, sol autem propius ad nos accedat sitque centrum nostri vorticis; proindeque si sol esset in distantia æquali cum fixis, non aliter videretur quàm fixa.

Dices: Venus plus lucet quàm fixæ, nec tamen Venus coruscat propriâ luce, nec est ejusdem naturæ cum sole: ergo non debet dici fixas propriâ luce fulgere & esse ejusdem naturæ cum sole.

N. consequentiam. Disparitas est, quia fixæ versantur in maximâ à sole distantia & à terrâ videntur sub angulo minimo: at Venus minimam habet à sole distantiam & sub angulo majore conspicitur.

Quales sint Stella fixæ.

Aliæ sunt aliis sublimiores, ut vel ipso visu patet, proindeque non sunt in eadem cœli superficie constitutæ.

Quædam aliquandò videntur extingui, aliquandò mole majores, aliquandò minores, aliquandò renascuntur. Sic stella quæ anno 1600. apparuit in cygni pectore ut stella tertii ordinis paulatim imminuta tandem oculis subducta est, donec anno 1655. visa est à Cassino, tuncque paulatim aucta lumine pervenit per quinquennium ad magnitudinem stellarum tertii ordinis, & postea sensim fuit imminuta.

Aliam Pater Antelmus Cartusianus observavit propè cygni caput anno 1670. quæ per tres menses apparuit ut stella tertii ordinis, sed paulatim extincta fuit, donec anno 1672. conspecta est ab eodem, & perducta ad prædictam magnitudinem, paulatim evanuit.

Placet hæc exponere ex principiis priùs positis: stellæ sunt vorticum centra; porro vortices aliis vicinis compressi aliquandò attolluntur, aliquandò deprimuntur: ergo stellæ fiunt aliquandò superiores, tuncque nos latent, aliquandò propiores, tuncque conspiciuntur.

Scintillant stellæ nec-non planetæ quidam: ideò sit

De Causâ Scintillationis Syderum.

Aristoteles & cum eo Cardanus existimat idè sydera scintillare, quia visus ad longinqua titubat.

Refelluntur 1^o. Hoc posito, Mars, Jupiter & Saturnus deberent magis scintillare quàm Venus, quia magis distant: atqui non magis scintillant; ergo, &c.

Denique hæc ratio omninò non satisfacit, nam ampliùs quæri potest cur visus noster ad longinqua titubet; hoc autem non explicatur ab Aristotele, nec à Cardano.

Quidam causam scintillationis repetunt à motu vaporum irrequieto qui inter oculum & astra interjiciuntur: nam aliquandò sydera vaporem vincunt, aliquandò non vincunt, idèdque aliquandò motum debiliorem in oculo, aliquandò fortiorem efficiunt, idèdque sydera scintillant: hinc major est scintillatio syderum propè horisontem quàm in aliquâ altitudine suprà horisontem, quia propè horisontem major est vaporum copia, idèdque major luminis inæqualitas.

Hi Philosophi tanquam principium certum supponunt scintillare sydera quandò motus luminis in oculo modò fortior est, modò debilior.

Præterea fatemur motum vaporum posse variare scintillationem, sed primam causam scintillationis negamus esse hunc vaporum motum: alioquin Luna, Mars, Jupiter & Saturnus scintillarent.

Deinde per illos vapores non explicatur cur sydera cœlo frigido & sereno magis scintillent. Sit ergo

PROPOSITIO.

Scintillationis causa est sensibilis inæqualitas vibrationum luminis.

Hæc inæqualitas accidit quòd partes lucidi corporis orbiculari motu & concitatissimo agitatæ sic concutiant vicinas partes perspicui corporis per quod lumen diffunditur ut vicissim reperiuntur, atque ubi hujusmodi reciprocatio sensibilis est, inde oritur scintillatio: nam eatenus scintillatio deprehenditur in syderibus, quatenus visu percipitur vibrationum lucis quædam interruptio; micat scilicet stellæ radius, feritque oculos validius & statim quasi obtusâ acie languet: hoc autem explicatur per motum reciprocum quo partes insensiles lucidi corporis vicinas partes corporis diaphani percutiunt, & reperiuntur: ergo hæc est scintillationis causa.

Et certè hoc posito motu reciproco, explicantur observationes omnes quæ ad scintillationem pertinent.

1°. Luna, Mars, Jupiter, Saturnus & sydera, quæ nebulosa dicuntur, non scintillant, quia luna propior est ut sit sensibilis inæqualitas.

2°. Alia remotiora sunt, ut percussio-
num & repercussionum vices seu recipro-
cationes possint esse sensiles.

3°. Corpora lucidissima non scintillant nisi eminè posita, quia tunc percussio-
num & repercussionum vices non sunt sensiles nisi in magnâ distantia.

4°. Sydera magis scintillant in hori-
sonte quàm altiùs evecta suprâ horison-
tem; quia apparentes diametri stellarum
augentur propter vaporum refractiones.

Denique sydera quædam prolixiùs vel
breviùs, quædam acutiùs, alia tardiùs
celeriùsve scintillant, quòd diversimodè
lumen emittant pro diversâ partium con-
formatione; quod quidem contingit in
sonoris, quæ pro variâ partium confor-
matione acutos vel graves sonos emittunt,
& diversimodè undulatos.

Quot sint Stella fixa.

Astronomi, ut ordinem ponerent inter
fixas, distribuerunt eas in varias constella-

tiones; constellatio verò est fixarum congeries: ex illis constellationibus aliæ sunt septentrionales, aliæ meridionales, aliæ sunt zodiaci quæ sunt duodecim; aries, taurus, &c. unaquæque 30 gradus occupat.

Distribuerunt etiam eas ratione magnitudinis: quædam sunt primæ, quædam secundæ, ad numerum septenarium, qui complectitur stellas nebulosas.

Inter stellas numerari debent sol & via lactea. Sit itaque

DE SOLE.

De Motu diurno & annuo solis actum est, atque constittit utrumque refundi debere in motum diurnum terræ circà proprium centrum & motum annum circà solem.

Sol excitat lumen & calorem. Quomodo excitet, en difficultas.

Cartesius putavit solem esse ingentem acervum materiæ subtilioris quæ fluxit ad centrum, dum globuli attritione facti sunt minores: unde si sol non habet motum translationis, motum habet vertiginis, ità ut solis singulæ partes moveantur circà centrum commune, quo motu vim faciunt ut recedant à centro; idèdque premunt circumstantes globulos & materiam inter globulos subtilem: quâ

pressionē rectā & imperturbatā explicat lumen esse à sole: imò ex reflexionibus & refractionibus radiorum nasci debet motus expansivus & perturbatus, idè- que calor.

Hæc ingeniosè & meo quidem iudicio verè dicuntur.

Quamquam Recentior subtilissimus lumen & calorem haberi posse sine sole existimavit, etiamsi centrum foret vacuum, si nimirum globuli circulariter agitati vim faciant ut recedant à centro.

Adhuc ingeniosè, & inde explicari potest quomodò in genesi lux producta fuit ante solem; sed non debet idè negari existentia solis, tum quia impressio luminis refertur ad corpus, tum quia ex maculis solaribus evidentius patebit solem existere.

Ex his sequitur quòd sol sit verus ignis nostro purior, cujus partes omnes sunt igneæ & subtilissimæ, cum in igne nostro sint partes crassiores, sulphureæ, nitrosæ, bituminosæ, &c.

De Maculis solaribus.

Observantur maculæ in sole, quas Astro- nomi dixere solares.

Quidam voluerunt eas non adhærere corpori solari, sed esse in ipso aëre circumstante solare corpus.

Ineptè: Nam si forent in aëre, non in ipso sole, viderentur eodem tempore ab Astronomis distantibus per longa locorum intervalla respondere variis solis partibus: atqui videntur respondere iisdem, ergo &c.

2°. Eamdem insistant viam & æquabili motu feruntur.

Quæ sit Macularum solarium Natura.

Atrum colorem præ se ferunt maculæ solares; aliæ sunt magis vel minùs subnigræ: quæ sunt magis atræ diutius permanent; una visa est anno 1677. per tres revolutiones, aliquandò frequentius cernuntur, aliquandò rariùs.

Quidam voluerunt eas non esse nisi crassos vapores, quos cœli calor altius evehit; sed immeritò, nam vapores illi ad solem usque non veniunt: porrò maculæ de quibus loquimur corpori solari adhærescunt.

Non desunt qui velint eas esse pabuli solaris reliquias, & quasi cineres superstites ex hoc pabulo, sed verba sunt ista.

Meliùs Cartesius docuit esse particulas striatas, quæ per polos secundùm lineas axi parallelas fluunt à vicinis vorticibus ad centrum: quæ quidem particulæ non possunt ultrà progredi, abreptæ motu vertiginis qui est in solari corpore; ut spuma

supernatat liquori effervescenti ad ignem, sic illæ particulæ soli supernatant usque- dum à materiâ subtilissimâ dissolvantur & aliæ exsurgant maculæ ex aliarum particularum affluxu : ergo sunt in ipsis cœlis generationes & corruptiones.

Qualis sit Sol.

Proprietates præcipuæ sunt lumen ejus, calor, moles, distantia à terrâ & eclipsis.

De lumine & calore dicetur ubi de igne.

Sol est longè major lunâ, imò ipsâ terrâ : distantia à terrâ maxima est ; utrumque colligitur, tum ex eclipsi, tum ex paralaxi.

Paralaxis (tab. 14. fig. 5.) est differentia veri & apparentis loci : hæc autem eò minor est quò astrum sublimius est. Si sit terra A, locus spectatori sit I, luna sit B, sol sit C ; qui existeret in centro A, lunam & solem cerneret sub stellâ D tanquam in vero loco : at verò si spectetur in I, cernetur luna sub stellâ F & depressior quàm reverà sit. At sol videtur sub stellâ E, proinde minor est paralaxis solis quàm sit paralaxis lunæ, quia minor est arcus DE quàm arcus DF ; ideò magis distat sol quàm luna.

Eclipsis venit ex interpositione corporis opaci solem inter & lunam, quâ fit ut radiis solaribus fraudemur. (f. 3. t. 14.)

V. g. sit sol intrà partes A & B, luna intrà partes C & D, erit eclipsis integra in sole iis qui habitant partes terræ E; quæ quidem eclipsis intrà pauca momenta integra non erit, quia cùm luna celerrimè moveatur, citiùs nobis aperiet aliquam solis partem.

Eclipsis erit secundùm mediam solis partem iis qui habitant partem terræ G, nulla autem erit iis qui habitant partes I. Ubi observare licet lunam facere non posse ut universa terra simul & secundùm omnes suas partes radiis solaribus fraudetur, quia luna minor est sole & terrâ.

Minorem esse terrâ constat; sit enim terra solem inter & lunam, fiet umbra definens in conum: ergo umbra minor ipsâ terrâ; luna tamen diutiùs tota erit in umbrâ terræ. Sit sol A, (fig. 4. tab. 14.) terra B, luna C.

Cùm corpus opacum Bejusdem est magnitudinis cum lucido A, umbra quæ est à corpore opaco æqualiter ubique lata est.

Si corpus opacum sit majus lucido, umbra augebitur secundùm latitudinem.

Denique si corpus opacum B minus sit lucido A, umbra decrescit & desinit in punctum.

Ex eclipsi & paralaxi solis moles ejus tanta est, ut ipsius diameter sit centies major diametro terræ, superficies ejus

decies millies major sit superficie terræ, & solidum sit millies mille majus.

DE VIA LACTEA.

Cœlo sereno, conspicitur pars quædam subalba in longum porrecta. & albicans atque bisulca; hunc tramitem, quem nostri rustici dicunt *le chemin de S. Jacques*, videre Veteres, & ex illis aliqui docuerunt hanc viam non esse nisi partem cœli densiorem quæ posset radios reflectere: at ex quo inventum est telescopium deprehensum fuit ab Astronomis, quod ne suspicari quidem poterant Veteres, nimirum hanc viam esse stellarum congeriem innumerabilem; nec illa sententia à vero videri debet abhorrens, tum quia plures stellæ subobscuræ formantur ex coacervatâ stellarum multitudine, v. g. subobscura stella quæ cernitur in capite orionis, si telescopio observetur, stellas plures tam distinctè effert ut numerari possint, tum quia stellæ lucidissimæ ex multis minoribus stellis coalescunt, v. g. stella prima arietis: alia quæ est ad caput castoris, nec-non alia quæ superior est in fronte scorpii, ex lucidissimis stellulis conflantur.

Ergo aliæ cœli partēs subalbæ non sunt nisi stellarum congeries.

DE PLANETIS.

Planetæ à Ptolemaïcis numerantur septem; Saturnus, Jupiter, Mars, Sol, Venus, Mercurius, & Luna: sed ex illo numero solem expungunt Copernicani, tum quia sol non est sydus errans, sed est immotus in centro vorticis: tum quia nomine planetæ intelligunt corpus opacum & asperum: porro ex dictis sol non est tale corpus.

Quamquam non imminuunt planetarum numerum: nam terra ab ipsis reponitur inter planetas, refunduntque motum solis tum diurnum, tum annum, in ipsam terram.

Imò augetur ab ipsis hic numerus, docent enim quatuor Satellites Jovis & quinque Saturni esse totidem planetas, qui se habent ad Jovem & Saturnum, ut luna se habet ad terram.

De Saturno.

Saturnus longius à nobis distat: colore plumbeus est, & ipsius tristis color: inde homines tristes & melancholici dicuntur ab Astronomis Saturno subiacere: inde plumbum à Chymistis Saturnus dicitur, ideòque sal extractus è plumbo dicitur sal Saturni.

Formas induit varias Saturnus hoc ordine: A, B, C, D. (fig. 6. tab. 14.) Varietas hæc venit ab annulo.

Clarissimus *Huigens* varietatem hanc explicuit.

Saturnus terrâ major polos habet, æquatorem & zonam torridam. Ad certam distantiam est materia quædam opaca reflectens lumen, disposita in modum annuli, tenuis quidem, sed lati; quippè qui continuatus per centrum Saturni transiret: porro cum illius annuli planum ita dispositum est ut contiguatum per terræ centrum transiret, tum sub oculos non cadit: hinc in illo situ videtur omninò globosus sine annulo, ut in figurâ D. At si planum annuli ab æquatore declinet, prout magis vel minùs declinabit, videbitur ut in figuris A, B, C.

Saturnus movetur circà solem in orbitâ per 30 annos, ut fatentur Astronomi, sed præterea movetur motu vertiginis circà proprium centrum.

Fasciæ quædam in Saturni globo fuerunt observatæ: veniunt à partibus rarioribus seu minùs compactis.

Sunt ipsius quinque Satellites. Primus visus est à Cassino anno 1684. gyrat circà Saturnum per unum diem, horas viginti cum unâ, & per minuta 15.

Alter observatus est per idem fermè
tempus;

tempus; gyrat per duos dies, horas 17, minuta 43.

Tertius ab eodem observatus fuerat Anno 1672. Volvitur spatio dierum 4, horarum 12, minutorum 27. Saturno vicinior est, in conjunctionibus videri non potest, unde alternis tantum diebus cernitur.

Quartus ab Hugenio observatus est. Periodum absolvit per dies 16 & horas 23.

Quintus à Cassino deprehensus est Anno 1671 exeunte Octobri & ineunte Novembri. Revolvitur per 30 dies: videtur in maximâ digressionem occidentali, quia hæc pars Satellitis lumen magis reflectit: non videtur in orientali, quia hæc pars Satellitis non reflectit lumen adeò vegetum.

In sententiâ Cartesii illi Satellites erant minores stellæ, centra minorum vorticum; sed propter nimiam ramentorum copiam, quæ per polos egressa ad centra pervenerunt secundum lineas axi parallelas, illæ stellæ factæ sunt planetæ, idè minores illi vortices absorpti sunt à majoribus; sic quinque Satellitum vortices absorpti sunt à vortice Saturni, qui major est. Quatuor Satellitum Jovis vortices absorpti sunt à vortice Jovis, vortex lunaris est absorptus à vortice terrestri: sed illi omnes unâ cum vorticibus Martis, Veneris & Mercurii absorpti sunt à vortice solis in

quo continentur, suasque circuitiones absolvunt.

De Jove.

Jupiter, Saturno inferior, superior est aliis: in conjunctione cum sole est à terrâ remotior, & videtur duplo minor quàm in oppositione. Absolvit circuitum in ellipfi spatio annorum 12.

Fasciæ sunt in ipsius Globo aliquandò plures, aliquandò pauciores. Modò una in plures dividitur, modò plures in unam coeunt; eorum motus propè centrum Jovis fit celerior. Ergo Jupiter volvitur circà centrum suum.

Galilæus circà Jovem observavit Anno 1610 quatuor Satellites qui circà ipsum gyraunt, ut totidem lunulæ eo modo quo luna circà terram rotatur.

1^{us}. suam periodum conficit intrà unum diem, horas 18 & minuta 22.

2^{us}. intrà tres dies, horas 13, minuta 14.

3^{us}. intrà undecim dies, 3 horas & minuta 42.

4^{us}. per dies 16, horas 3 & minuta 12.

Quòd si tam scrupulosè minuta recensamus, non est existimandum in eà opinione versari nos, quòd credamus corpora cœlestia suos geometricè observare motus: scilicèt ipse Cassinus expertus est

Anno 1690 unum ex illis Satellitibus absolvisse cursum citius septem minutis.

Satellites illi patiuntur eclipses. Tres priores quatuor patiuntur in unâquâque circumvolutione. Porro ex eclipsibus locorum longitudes definitæ sunt: imò ex immersionibus & emersionibus Clarissimus Romer, Danorum Regis Consiliarius, successionem luminis doctissime ostendit.

De Marte.

Mars annis ferè duobus volvitur circà solem: maximum habet Apogæum in quo septiès minor videtur cùm est in primo Leonis gradu, Perigæum verò cùm est in primo Aquarii gradu.

Mars multò minor est Venere, & vix major Mercurio: hinc Cartesius ut explicaret cur sit superior terrâ, Venere & Mercurio, supponit ipsum esse magis solidum.

Ipsius facies tota est maculis conspersa: unde si solidior sit terrâ, Venere & Mercurio, vel ipsæ maculæ non sunt nisi à majori asperitate in quantum fit umbra major: vel sunt à partibus rarioribus, sed in superficie positæ, ità ut partes interiores sint magis compactæ. Ex illis maculis constat Martem agi circà proprium centrum spatio 24 horarum.

Eclipses patitur, de quibus consule Astronomos.

De Venere & Mercurio.

De iis plurima scripsêre Cassinus & Picardus, quos, si vacat, legite.

De Lunâ.

Nobis propior est aliis : imò cum suo vortice continetur in vortice terrestri, gyratque circà terram ; & simul cum terrâ volvitur circà solem.

Luna aliquandò tota patitur eclipses, aliquandò secundùm partem. Hinc colligitur lunam esse terrâ minorem : nam umbra facta à terrâ minor est ipsâ terrâ ; tamen luna tota est in hâc umbrâ patiens eclipsim per aliquod tempus.

Sunt in lunâ maculæ quædam ipsis oculis conspicuæ, quæ putantur exhibere lunæ vultum, & sic vulgò depingitur. Quædam autem exiliores non videntur nisi tubo optico.

Quæ videntur oculis sunt ex partibus rarioribus, quæ non ità validè reflectunt lumen quàm partes duriores & densiores : hinc supponunt globum lunarem conflare ex terrâ & aquis, supponunt esse in eâ maria, lacus, fluvios & continentia : continentia validiùs debent lumen reflectere, majoremque radiorum copiam : at verò

maria, lacus & fluvii* nec ità validè reflectunt lumen, nec tantam radiorum copiam: plures enim radii intrà aquas admittuntur & refranguntur, nec reflectuntur.

Maculæ quæ tubo optico conspiciuntur exiliores & nigræ, probant lunam esse corpus asperum rupibus, scopulis & montibus. Videntur enim illæ maculæ esse totidem umbræ factæ à scopulis, ut antea probatum fuit.

Ex illis maculis probabile fit lunam moveri circa proprium axem.

Luna cum sole constituta est, ut esset mensura temporis; hinc ex mense synodico duodeciès repetito efficitur annus lunaris constans idèd 354 diebus, horis 8 & minutis 40, ità ut minor existat anno solari diebus 11 vel circiter, ubi tertio quoque anno intercalati dies illi efficiunt annum 13 mensium lunarium. Cùm dies aliquot abundant qui ex certis annis accrescunt, ità ut post 19 annorum circum septiès intercalare oporteat & tunc anni lunares solaribus satis accuratè adæquentur. Hic est cyclus aureus à Methone Atheniensi excogitatus; itaque si Anno 1703 novilunium acciderit die quâlibet determinatâ, v. g. die Martii primâ, certè Anno 1722. incurret in eundem prorsus diem: sed tamen unâ ferè horâ cum Semisse antevertet, quod discrimen negligi

non debet. Hinc quia neglectum fuerat à tempore Nicænæ Synodi novilunia quadriduò anticipabant, & cùm in martyrologiis consueto more novilunium legebatur, jam quartus dies penè effluxerat: sed ista emendavit Gregorius XIII. Rom. Ponr. Qui plura circà hanc Calendarii emendationem scire voluerit, legat historiam quam D. Blondel hâc de re publici Juris fecit.

DE COMETIS.

Cometæ videntur esse corpora lucida, sed alii magis fulgent, alii minùs, alii igneum, alii subobscurum dant lumen. (fig. 7. 8. tab. 4.) Non sunt unius magnitudinis, alii majores, alii minores. Non sunt unius figuræ, alii criniti, alii barbati, alii caudati: aliquandò caput sine ornamento, aliquandò radii sine capite.

Criniti dicuntur quos radii æqualiter ambiunt in omnem partem.

Barbati dicuntur qui radios emittunt in partem anteriorem.

Caudati denique qui posticos habent radios.

Incertus est eorum motus, quia licèt circà terram ferantur omnes ab ortu ad occasum spatio 24 horarum, habent tamen præterea motus sibi proprios: aliqui

versus orientalem plagam, alii versus occidentalem, alii versus diversas cœli partes feruntur.

Licet diversas cœli partes teneant, raro tamen versus mundi polos emergunt. Incertâ moventur velocitate, imò idem ipse cometa aliquandò velocius, aliquandò tardiùs movetur. Incertus est ortus quoad tempus; aliquandò raro visuntur, aliquandò frequentius. Dubia est duratio. Aliquî paucis diebus conspicui sunt, apparent alii per multos menses; atque dum accedunt propius, ad interitum sensim imminuuntur & mole corporis & splendore luminis.

Incertus est locus, aliquandò suprà planetas, aliquandò inter eos, aliquandò infrà consistunt. His positis, sit

De Loco Cometarum.

Aristoteles cum suis docuit cometas omnes versari infrà lunam, ibi oriri, nec non deficere.

Cartesius cum suis asserit omnes stellas aliorum vorticum vagabundas Saturno superiores. Sit

PRIMA PROPOSITIO.

*Cometa quidam sunt Saturno superiores.**Favet Cartesio.*

Pr. Nam corpora quæ sunt in regione planeticâ vel infrâ, paralaxim habent aliquam : atqui visi sunt cometæ qui nullam habuere paralaxim, ut videbitur postea, ergo &c.

SECUNDA PROPOSITIO.

*Cometa omnes non sunt Saturno superiores.**Est contra Cartesium.*

Pr. Nam apparuerunt cometæ in quibus Astronomi sensilem experti sunt paralaxim majorem vel paralaxi lunæ : quippè testatur Regiomontanus, Vir rerum astronomicarum eruditissimus, se observasse Anno 1472 cometam qui paralaxim graduum sex exhiberet. Porro non est verisimile ipsum in re tam sensili fuisse deceptum, nec fides ipsi denegari debet, quia in rebus difficilioribus, etiam ubi de paucorum minutorum intervallo agitur, viris doctrinâ longè inferioribus non denegamus fidem.

Sed fac ipsum errasse nec fuisse omnino accuratum in illâ paralaxi assignandâ, id est, fac tantam non fuisse paralaxim: saltem fuit aliqua, ergo cometæ non sunt Saturno superiores.

Et certè sunt cometæ qui unoquoque die quatuor signa ferè percurrunt motu proprio: porro incredibile est eosdem Saturno fuisse superiores, nam quomodo tanta concipi posset velocitas?

Ergo cometæ oriuntur in diversis cœli regionibus: alii quippè paralaxim habent majorem lunari, hi infrâ lunam, alii minorem, hi inter planetas, alii nullam, hi sunt suprâ Saturnum, & fortè in lymbis vorticum consistunt.

De Naturâ Cometarum.

Quidam quos sequitur Cassinus volunt cometas non esse nisi perpetua sydera; & ut explicent quomodo conspiciuntur & oculis subducuntur, proindeque quomodo consistunt in diversis locis, supponunt describi ab hisce syderibus excentricum qui vel in sinu suo lunam ambiat.

Alii volunt cometas non esse nisi meas apparentias seu phases cœlestes, ut dicetur de iride & pareliis. Alii denique docent cometas esse halitiosa corpora quæ ex vorticum vicinorum halitibus crescunt & efformantur. Sit

PRIMA PROPOSITIO.

Cometa non sunt perpetua Sydera qua hunc circulum excentricum describant.

Pr. Enimverò quænam ratio mechanica hujusce excentricitatis? unde motûs inæqualitas & durationis? unde quidam ardent? quare cauda, barba, crines?

Si respondeas hanc esse syderum illorum naturam, jam in Peripatîsmum recidimus; & qui recurrit ad naturam syderis ut explicet quomodo caudam habeat longam secundum gradus ferè 90, is neque doctior est, neque nos doctiores efficit. Quapropter licet istud non posset physicè & mechanicè explicari, satius foret suam fateri ignorantiam quàm recurrere ad illam excentricitatem & naturam.

SECUNDA PROPOSITIO.

Cometa non sunt mera apparentia seu phasæ.

Pr. Habent enim suum motum distinctum à motu cæterorum syderum & sunt instar corporum subsistentium.

Et verò apparentiæ sunt occasione aliorum corporum, y. g. iris occasione guttarum: porro quænam sunt illa corpora

cœlestia? quorum occasione sunt illæ apparentiæ? hoc quippè unum quarimus.

TERTIA PROPOSITIO.

Cometa omnes sunt halituosa corpora quæ erumpunt ex planetarum vorticibus, putà ex Mercurio, Venere, terrâ, lunâ, Marte, Jove, & Satellitibus, quæ corpora halituosa motu & attritu possunt aliquando inflammari, quaque propter malè coherentem suarum partium texturam radios solis transmittunt per ingentes lacunas & meatus pervios.

Pr. Nam de cometis statui debet illud quod phœnomena & observationes magis indicant & persuadent: atqui phœnomena & observationes persuadent cometas esse hujusmodi halituosa corpora. Nam hæc phœnomena sunt varius cometarum locus, ortus incertus, inæqualis moles, motus incertus, subobscura lux aliquorum, color aliorum, aliorum ardor & fulgor: unde diversitas barbæ, crinium & caudæ: atqui hæc phœnomena persuadent esse hujusmodi halituosa corpora; hoc enim posito, faciliùs intelliguntur omnia.

1º. Posito quòd cometæ sint halituosa hujusmodi corpora, faciliùs exponitur va-

rius locus cometarum. Nam 1^o. Cometæ quidam visi sunt lunâ inferiores, quia frequentes halitus è terrâ, lunâ &c. erumpentes potuerunt simul densari in æthere medio, ità ut ex illis cometarum corpora procrearentur.

2^o. Visi sunt cometæ suprâ lunam in regione planeticâ: quia ex regione Saturni, Jovis, Martis & aliorum planetarum corporibus potuere conflare tenues halitus, qui in medio æthere concrecentes fuerint tandem attritu inflammati, vel sine inflammatione fulserint conceptâ luce.

3^o. Visi sunt cometæ ipso Saturno superiores, quia è vorticibus Satellitum, & aliis fortè superioribus circumquaque agitatissimos halitus in magnâ copiâ erumpere verisimile est: qui quidem halitus in lymbis vorticum concrecere & attritu inflammari potuerunt: ergo posito quòd cometæ sint halitiosa corpora, facillimè intelligitur varius eorum locus.

4^o. Faciliùs intelligitur incertus cometarum ortus, quia nullâ constanti lege, nullo certo temporis intervallo possunt concrecere & inflammari hujusmodi halitus, ut contingit in fulmine & grandine.

5^o. Faciliùs exponitur cometarum inæqualis moles: nam aliquandò major halituum copia concrescit, aliquandò minor: hinc anno ante Christum natum

146 cometa apparuit non minor sole, cum aliquando quidam vix appareant.

6°. Posito quòd sint halituosa corpora, incertus est eorum motus, quia coalescentes huiusmodi halitus in eâ parte majorum vel minorum vorticum, ubi fit eorum commissura, moveri necesse est: porro in variis illis partibus motus est incertus.

7°. Lux eorum sæpiùs est subobscura & tristi lumine fulgent, quia malè compacti halitus vividum lumen non concipiunt, vel quia cometæ haberent atmosphæram quæ sit crassior.

8°. Ex eo quòd cometæ sint halituosa corpora, non lucent purè, sed colorem aliquem oculis objiciunt, alii igneum, alii flavum, nonnulli argenteum, quidam fuscum, quidam nigrum prætulerunt; quod quidem ingeniosè admodum in nostrâ sententiâ exponitur: videlicet radii solares dum incidunt in corpora halituosa, tum refractiones, tum reflectiones & quidem diversas patiuntur: porro, ut dicitur infra, varii colores exsurgunt ex variis refractionibus & reflectionibus luminis. Id patet in nubibus, quæ cum sint halituosa corpora, varios colores nubis exhibent.

9°. Benè explicatur quomodo quidam ardescant. Scilicet halitus concrecentes possunt esse sulphurei, nitrosi, qui proinde

vel minimo attritu possunt inflammari. Id dici potest de cometâ qui tempore Mithridatis per dies 77 irâ luxit, ut fulgore suo nitorem solis vinceret & cœlum omne flagrare videretur. Idem dici potest de cometis omnibus, qui videntur, instar luminis ingentis, lati maximè & longi; talis est cometa observatus à Cassino Anno 1683. die 18^a. Martii; talis est cometa qui tertiam cœli partem occupabat, referente Aristotele lib. 1. Meteorum, cap. 6. illud autem cometæ genus in solâ nostrâ sententiâ explicari potest. Incredibile quippè est cometas illos esse perpetua sydera, describentia excentricos: sed quid probabilius dici potest quàm eos consari ex halitibus sulphureis, nitrosis, bituminosis, non benè compactis, qui proinde vel minimo attritu inflammentur, quique aliquandiù durant, quia pabulum de novo accedit.

E contrariò visi sunt alij sine ignitione fulgentes: nam illi halitus potuerunt benè compingi, & cùm non essent partes igneæ & sulphureæ, flammam non conceperunt; diutiùs verò illi permanent & radios solis fortius reflectunt: hinc aut magis accedunt ad structuram planeticam, aut se habent instar vitrorum & aquæ, quæ radios repellunt.

Denique posito quòd cometæ sint ha-

lituosa corpora, quidam possunt videri barbati, quidam criniti, quidam caudati: imò videri possunt capita sine caudis, & caudæ sine capite: quæ quidem cum in aliorum sententiâ vix possunt exponi, in nostrâ facillimè exponuntur: cometæ scilicet, ut dictum est, constantur ex partibus halituosæ materiæ coherrentibus quidem, sed malè compactis; partium illarum tenuitas & raritas constituit corpus cometarum ità luci pervium ut radiis solaribus facîle penetretur instar raræ nubis & malè compactæ; hoc enim partium nexus malè coherentes postulat, quo posito, jam aliqua causa utcumque assignari potest caudæ, barbæ, capillitii & capitis cometarum.

1°. Si corpus planetæ halitus habeat ità compactos, ut non sit facîle luci pervium, dabitur cometæ caput sine barbâ, caudâ & capillitio.

2°. Si materia halituosa sit maximè rara, tunc datur cauda sine capite.

3°. Quòd si cometæ corpus ità se habeat, ut lumen aliquatenus reflectat & aliquatenus per lacunas liberum permittat transitum radiis solaribus, tunc aut cometa crinitus est, aut caudatus, aut barbatus.

Cometa crinitus erit toto ornatus capillitio quandò radii circumstant æqualiter sydereum corpus quoquoersum: tunc autem illud advenit quandò cometa so-

lem habet veluti oppositum, ut videre est in fig. A. (fig. 7. tab. 14.)

Tunc cometa barbatus est quandò ità obliquus est solis aspectus, ut radii emittantur in partem anteriorem.

Tunc cometa caudatus est quandò obliquus est solis radius & efficit ut radii sint postici. Sit cometa caudatus E. (fig. 8.)

Si aliquandò instar veru acuminentur caudæ & minuantur, illud oritur quia pars extrema caudæ longiùs distat à nobis, ideòque plures è radiis solaribus versùs extremitatem non sunt sensiles; vel quia radii sensim debilitantur & tandem evanescunt, vel quia extremitas caudæ radiis sydereis aliunde exortis extinguitur.

Si caudæ incurventur propè finem & paululùm inflectantur, illud oritur vel quia radii versùs finem in aliquo medio heterogeneo refranguntur, vel quia ex unâ parte sæpiùs quàm ex aliâ debilitati radii inæqualiter evanescunt; si denique visus est cometa cujus caudam linea quædam nigra discriminabat in duas partes à principio ad finem, hinc est fortè quia radii solares aliquam cometæ partem crassiores penetrare non potuerunt, cùm laterales hinc inde fuerint penetratæ; hoc enim posito, necesse est nigram maculam in longum porrectam duas partes discriminare.

De Cometarum Origine.

Ex his quæ de naturâ cometarum modò fuere statuta, facilia videntur quæ spectant ad eorum originem, videlicet facile concipimus in singulis vorticibus majoribus vel minoribus continuâ vertigine corpuscula crassiora à centro ad circumferentiam pelli & aliquandò concreescere potuisse variis in locis.

Hâc viâ non tantùm explicari potest origo cometarum, sed etiam dici posset quomodò Saturni ac Jovis Satellites concreescere potuerunt, & de novo prodire; proindeque quomodò possint prodire de novo Satellites alii etiam circâ alios planetas: quippè ex vorticibus planetarum perpetui halitus exhalant; halitus illi potuere firmitatem quam jam tenent & conservant pressione materiæ subtilis & concatenatione partium suarum accipere: his partibus aliæ potuere adjungi, sicque Satellites de novo prodire potuerunt, imò perire possunt sensim sine sensu dissolutione partium: nam quemadmodùm in mari & fluminibus insulæ quædam novæ fiunt, veteres minuuntur & pereunt, ità in eo fluido subtilissimo possunt durissima fieri corpora, quæ cùm ad certam molem perveniunt, certum motum concipiunt

vel ignescunt, vel sine ignitione fulgorem, vel lumen reflectunt, vel circumvolvuntur, vel diù permanent, vel denique citò pereunt.

De Motu Cometarum.

Motus in cometis diurnus videtur esse ab ortu in occasum, sed est duntaxat apparens in opinione Copernicanâ, atque in positivam terræ vertiginem rejicitur, quâ terra circâ suum axem ab occasu in ortum reipsâ volvitur.

Quod spectat ad motum cometarum ab occasu in ortum, maximè incertus est: aliquandò hanc habent determinationem, aliquandò illam: aliquandò minor est agitatio, aliquandò velocior, ut apparet in nubibus: quia nimirum in illis locis in quibus concresecunt cometae motus est valdè incertus, quanquàm frequentius; dum primò apparet cometa, celerius movetur, & versus finem tardè procedit.

De Corpore sublunari.

Loquimur de corporibus sublunaribus quæ propriè sunt nostri vorticis; ea porro vulgò dividuntur in simplicia & mixta.

De Corpora simplici.

Corpus simplex dicitur elementum ; elementa verò sunt principia compositionis , de quibus dictum est in *Physicâ generali*.

Principia veluti metaphysica compositionis omnium corporum naturalium sunt materia & forma ab Aristotele allata : sed præterea ad explicanda phœnomena quaruntur mechanica ; ea verò sunt vel sensilia, ut quinque elementa Chymistarum & quatuor elementa Galenicorum, ignis, aër, aqua, terra, quæ sunt mixta satis crassa ; alia sunt insensilia. Democritus attulit atomos, rejectæ sunt : ergo recurrimus ad materiam subtilem sive minutias indefinitæ parvitatæ variarumque configurationum, ad globulos & ad materiam striatam.

Ququam non recedam à methodo quæ vulgò servari solebat in scholis. Agam de quatuor elementis Peripateticorum, & occasione, datâ qualitates iis inexistentes mechanicè exponam.

DE IGNE.

Ignis primùm apud Peripateticos tenet locum, & quidem suprâ atmosphæram

aëris in concavo lunæ: hic est juxtà ipsos locus naturalis in quo solo ignis potest quiescere, ad quem perpetuò tendit. Inde noster ignis fursùm erigitur, ut ad patriam suam revertatur & natalem focum.

Dicebatur ab illis elementum calidissimum, scilicet ut octo, & insigniter siccum: at alias possidet qualitates satis insignes: est lucidum, calidum, siccum, fluidum & leve. Hinc si semel constet quid sint affectiones illæ, natura ignis innotescet. Quapropter sit

DE LUMINE.

Si oculos habeas benè dispositos & jam attendas, lumen conspicitur, cujus definitionem si quæras, vix doctissimus respondere poterit quid omninò sit.

Propagatur lumen, reflectitur, refrangitur, de quibus agendum.

De Naturâ Luminis.

Qui se discipulos Aristotelis profitentur docent lumen non esse nisi quamdam qualitatem corporis lucidi quæ profluat à formâ hujusce corporis substantiali, quæque inhæreat corpori lucido, ità tamen ut continuâ productione usquequâque diffusa per diaphanum cui similiter in-

hæret, possit propagari, imò aliquandò reflecti & refrangi.

Docuit Epicurus lumen non esse nisi flumen substantiale corporis lucidi, v. g. putavit à corpore lucido manare continuò plurimas partes easque lucidas, quæ cùm ad oculum perveniunt, excitant in ipso sensationem luminis.

Denique voluerunt alii lumen impulsu cujusdam subtilis & æthereæ substantiæ contineri. Sit

PRIMA PROPOSITIO.

Lumen non est qualitas corporis lucidi.

Pr. Nam hæc opinio non reddit nos doctiores, quia res physicas spectat, nullâ habitâ ratione affectionum mechanicarum à quibus pendet natura luminis.

Et certè lumen non debet dici illud quo posito nunquam explicari potest quomodò fiat ejus diffusio, reflectio & refractionis: atqui si lumen dicitur qualitas lucidi corporis, non potest explicari quomodò fiat ejus diffusio, &c. quomodò enim concipietur diffusio qualitatis, quomodò qualitas reflectetur, quomodò refrangetur? sed ista postea.

SECUNDA PROPOSITIO.

Lumen non debet dici effluvium substantiale corporis lucidi.

Pr. Nam non debet dici simpliciter illud quo posito certa phœnomena non ità faciliè explicantur, maximè verò si sit alia via facilior quàm hæc phœnomena explicari possint: atqui si lumen dicitur effluvium substantiale corporis lucidi, quædam phœnomena difficiliùs exponuntur, & aliunde superest via facilior ad illa explicanda: nam cum sol in horisonte nostro apparet, fit diffusio luminis saltem in hemispherio terræ. A flammulâ lux spargitur circumquaquequæ tanquàm à centro versùs circumferentiam: porrò quis concipiat quòd à sole sufficiens diffusio partium materiæ solaris fiat, ut illa sit in quâvis aëris parte: licèt enim aliqua corpuscula solis à sole exeant & ad nos perveniant, nemo tamen credidit ea exire in sufficiente copiâ, ut in quovis aëris puncto sint, in quibus tamen lumen est: ergo, &c.

Quod autem supersit via facilior ad explicanda luminis phœnomena, patebit.

NOSTRA SENTENTIA.

Quatuor in lumine, idem dicas de quavis qualitate sensili, sonis, coloribus, odoribus, saporibus, distingui debent: est enim aliquid quod se tenet ex parte objecti, aliquid ex parte medii, aliquid ex parte organi seu sensus externi: v. g. oculi, & aliquid ex parte animæ.

Itaque lumen vel spectatur in corpore quod dicitur lucidum, vel spectatur in medio diaphano quod dicitur illuminatum, vel spectatur in oculo, vel denique spectatur in animâ.

Lumen in animâ est specialis animæ sensatio orta ex sensili & speciali corporis affectione, propter unionem quæ est inter animam & corpus.

Lumen in corpore lucido est quædam corporis qualitas consistens in mechanicâ dispositione partium hujusce corporis, vi cujus organum visus ita percellitur, ut fiat in eâ specialis impressio, de quâ antea.

Lumen in medio diaphano est quædam corporis diaphani qualitas consistens in dispositione mechanicâ partium corporis diaphani, vi cujus liber est transitus ad movendum oculum, unde fit ut in animâ excitetur specialis sensatio.

Lumen in oculo est quædam qualitas

oculi consistens formaliter in dispositionibus mechanicis oculi quibus nervus opticus certo modo commotus movet certâ ratione cerebrum vel membranam, quo motu excitatur in animâ specialis sensatio.

Non disputabo de lumine ut est in animâ. Sanè hæc sensatio clarior quàm ut verbis possit explicari, hocque sensu nihil est lumine clarius.

1°. Quæro quænam sit dispositio mechanica corporis quâ vulgò dicitur lucidum. 2°. Quæro quænam sit dispositio requisita in corpore diaphano, ut sit illuminatum. 3°. Quid requiratur in oculo, ut lumen habeat.

PRIMA PROPOSITIO.

Corpus lucidum illud est cujus partes subtilissima vehementius agitata materiam ætheream circumstantem ità premunt & pulsant, ut recto radio motus incurrat in fibrillas nervi optici & membrana coroidis.

Pr. Nam in eo consistit ratio lucidi corporis quòd est mechanica dispositio aptissima ad explicanda phœnomena quæ spectant corpora lucida: atqui mechanica dispositio jam allata est omnium aptissima
ad

ad explicanda phœnomena quæ spectant corpora lucida : quatuor enim in illâ dispositione mechanicâ ponimus.

1^{um}. est partes lucidi corporis esse in maximo motu positas. 2^{um}. est partes illas esse tenuissimas & subtilissimas. 3^{um}. est materiam aliquam subtilissimam circa corpus lucidum diffusam vehementius agitari per partes lucidi corporis. 4^{um}. est materiam subtilissimam agitaram recto radio incurrere in fibrillas nervi optici & membranæ coroidis : atqui hæc quatuor deprehendimus in corporibus lucidis ut lucida sunt.

10. quidem partes corporis lucidi maximo motu præditæ sunt, ut patet ex pluribus experimentis ; v. g. ignis habet partes ita agitatae ; ut durissima corpora in partes minutissimas & insensiles comminuat : sol pariter partes habet ita agitatae , ut uno momento oculos perstringat , ut ferrum liquet , silicem comminuat , si radii solares speculo ustorio colligantur.

Hinc quæ de se non sunt lucida , si commoveantur , lucida fiunt , v. g. aqua maris tempestate commota fulget. Si sit afriictus rudis, Adamas Regis magnæ Britanniae radiat instar lampadis ; si digito prematur , scintillat : imò cum duro corpore fuit afriictus , majorem spargit lucem,

quam diutiùs retinet aquis vel immerfus.

Præterea si succutiatur hydragirus in tenebris, radios emittit: si felis dorsum averso pilo frices in tenebris, dat scintillas: si filex collidat calybem, lux nascitur. Denique si ligna putrescant, quia partes suas habent agitaras à materiâ subtili, lucent. Si lampyris, gallicè *ver luisant*, digito teneatur in caudâ, non emittit radios, quia motus caudæ impeditur: sed si relinquatur sibi, iterùm radios emittit.

Est insigne phœnomenon circà Phosphoros quod sine grandi piaculo omitti non potest eò loci.

Phosphoros idem est ac lucifer: alium naturalem distinguunt, alium artificialem: inter naturales recensent lignum putridum, Lampyridem, oculos felis, imò referri debent quædam carnes ovium, quæ cùm herbis nutritæ fuerint, quæ volatilibus abundant, carnes ipsæ lumen emittunt.

Inter artificiales sunt multi qui sunt omnes ex sulphureis, v. g. ex urinâ, lapide bononiensi simul concretâ: alii sunt sicci, alii sunt liquidi. Rationem parandi utriusque phosphori dedere plures: sed ut methodus fuisset securior, utinam antea iidem Auctores executioni mandassent sua præcepta: scilicet ingenuè dicam à paucis hominibus hanc artem teneri.

1°. Phosphorus in tenebris lucet præ-

sertim quando tempus maximè incalescit; ratio est quia ipsius partes sunt in majori motu quàm cùm frigescit.

2°. Si phosphorus solidus prematur super papyrum, papyrus ignescit, nam per illam contritionem partes in majore motu ponuntur. Hinc si litteræ phosphoro exarentur, tunc in tenebris lucida apparebit Scriptura.

3°. Phosphorus siccus servatur in mediis aquis, consumitur extrà aquam, & fumus sensilis videtur, quia partes sulphureæ aquâ cohibentur.

4°. Si phosphorus sit in amphorâ hermeticè clausâ, non lucet donec aperiatur amphora, quia amphorâ hermeticè clausâ, partes phosphori non sunt sufficienter agitatae: quamobrem sicut ignis excitatur ab aëre, ità lumen phosphori.

Phosphorus siccus fit liquidus si essentia cinnamomi (*essence de canelle*) aspergatur ità ut innatet.

2°. Partes lucidi corporis vehementiùs agitatae sunt subtilissimæ & tenuissimæ.

1°. Quia non movent nisi organum quod est subtilissimum, putà oculum. 2°. Quia experientia probat partes lucidorum esse necessariò subtilissimas. 3°. Quia partes corporis lucidi debent rectà propellere & celeriter materiam subtilissimam circumstantem, ut per foramen vel ad retinam

aut coroiden oculi perveniant radii quibus imagines infinitorum quasi objectorum in illâ depingantur: porrò partes quæ materiam hanc subtilissimam propellere debent ipsæ sunt subtilissimæ: ergo partes lucidi corporis vehementius agitatae subtilissimæ sunt.

3°. Materia quæ circa corpus lucidum diffusa est & vehementius agitatur à partibus subtilissimis lucidi corporis, ipsa subtilissima est. 1°. Quia lumen in medio diaphano seu perspicuo nihil aliud est quàm tenuissimæ cujusdam materiæ vehementior agitatio. 2°. Quia materia quæ inservit ad sonos subtilis est, & tamen materia quæ inservit ad lumen est subtilior, ut patet tum ex eo quòd luminis sensatio potius habeatur quàm soni, tum ex eo quòd dum ex machinâ pneumaticâ extrusus est aër crassior, jam imminuatur sonus: quippè felis vix auditur; reperitur tamen materia luminis, quia objecta inclusa conspiciuntur.

Denique partes illæ debent ità premere, ut recto radio motus fiat in fibrillas nervi optici & in coroiden: videlicet lumen in oculo nil aliud est quàm nervi optici aut coroidis rectus & imperturbatus pulsus, ortus à corpore lucido, interpositus æthereæ substantiæ per medium diaphanum diffusæ.

SECUNDA PROPOSITIO.

Illud corpus diaphanum actu continet lumen, in quo est. ætherea cujusdam substantiæ vehementior impulsus radiatim proficiscens à corpore lucido trans corpus diaphanum.

Pr. Est enim actu jam in aëre lumen, quia ætherea quædam substantia vehementius impellitur rectà à partibus corporis solaris versùs oculum : nam lumen in corpore diaphano est illa dispositio mechanica quâ facilius explicantur luminis phœnomena : atqui rectus materiæ cœlestis impulsus à corpore lucido tanquàm à centro ad circumferentiam radiis imperturbatis diffusus, est dispositio mechanica, quâ facilius explicantur lucis phœnomena; nam, ut vidimus, corpus eatenus lucet, quatenus habet partes subtilissimas vehementius agitata, & eatenus in animâ fit sensatio lucis, quatenus anima pulsatur vehementer à corpore lucido, ut experiuntur ii qui clausis oculis cernunt solem meridianum & æstivum, aut qui apertis oculis solis fulgore perstringuntur: unde si pluries illud fiat, fit ut visio debilitetur, quia ætherea substantia perniciosissimè agitata plures oculi fibrillas frangit: porro motus à corpore lucido præ-

H iij

fectus non potest derivari in organum corporeum nisi interposito corporis quod & vehementissimè possit agitari : sed corpus quod vehementissimè potest agitari à partibus lucidi corporis non potest esse nisi materia cœlestis, quæ facillimè poros diaphani pervadere possit, ut probatum est ex machinâ pneumaticâ, ex quâ potest excludi aër inserviens sonis ; non potest autem excludi æther inserviens luminis : ergo lumen in corpore diaphano est cœlestis cujusdam substantiæ vehementior impulsus radiatim proficiens à corpore lucido trans corpus diaphanum.

TERTIA PROPOSITIO.

Oculus lumen habet actu cùm materia subtilissima per medium diaphanum radiis imperturbatis impulsâ incurrit in oculi perspicuam substantiam, & ita materiam pariter subtilissimam quæ in oculo continetur imperturbatis etiam radiis impellit usque ad oculi fundum.

Pr. Nam lumen in oculo est illa dispositio mechanica quæ est aptissima ad explicanda luminis phœnomena, ut lumen est in oculo : atqui nulla potest afferri aptior dispositio mechanica quàm quæ modò data est ; nam ut explicetur lumen in oculo

contineri, statui debet motus ille qui proficiscitur à corpore lucido, quique interposito materiæ subtilissimæ in corpore diaphano pervenit usque ad intimum oculum: atqui hoc fieri non potest nisi in oculo pariter sit materia subtilissima, quæ motum per interjectam oculi substantiam deferat ad nervum opticum & membranas; ergo materia subtilissima existens in oculo est aptior dispositio, ut oculus contineat actu lumen.

Et certè ut lumen in oculo contineatur actu, ità nervus opticus & organum immediatum commoveri debent, ut depingantur imagines corporum lucidorum, repræsententur situs & ordo partium cum magnitudinum proportionem: atqui si materia subtilissima in oculo residens non moveretur radiis imperturbatis, sed ageretur ordinatè, tunc non essent imagines depictæ, situs & ordo partium, nec non magnitudinum proportio, non servarentur, ut contingit si digitis oculos contorqueas: ergo &c.

Denique si materia illa distinctis & imperturbatis radiis non deberet moveri, cur mira illa oculorum structura? cur humores tam diversi? quo fine tot tunicæ, nisi ut radii distincti & imperturbati colligantur in oculi fundo, certo modo moveatur nervus opticus, certâ ratione com-

moveatur organum immediatum, quo posito est in animâ nostrâ peculiaris sensatio luminis.

Non exponam impræsentiarum oculi structuram, nec dicam quomodò radii ab objecto proficiscentes refringantur cùm diversas per oculi partes transeunt, nec etiam in quânam parte oculi depingatur imago, nec denique phænomena recensabo quæcumque spectant ad visionem: hæc omnia commodiùs tractantur ubi de Anatomia.

Lucidum itaque corpus aut constat partibus primi elementi, aut partes habet tenues à primo elemento ita agitatae ut percutiant undequaque materiam distinctis & imperturbatis radiis. Itaque recordemur non alio sensu lumen esse in igne nisi quia partes habet ita motas, ut materiam circumstantem premat: quæ materia premit materiam subtilissimam in oculo contentam; recordemur aërem esse illuminatum eo sensu quòd materia subtilissima in illius poris delitescens sit radiis imperturbatis agitata.

OBJECTIONUM SOLUTIO.

Objicies 1°. Si lumen in corpore lucido consisteret in vehementi motu partium materiæ subtilissimæ hujusce corpo-

ris, plura phænomena non possent explicari; v. g. flammula videtur nocte ab homine distante vel 50 passibus: porro non potest concipi quomodo hæc flammula partes habeat ita agitatas, ut possit movere totam materiam subtilem contentam in globo æthereo cujus semidiameter sit 50 passuum. Hæc objectio facta est Cartesio à doctissimo Morino & legitur in Epist. Cartesii.

N. min. Videlicet hanc flammulam non posse habere sufficientem vim, ut totam materiam subtilem in globo prædicto vel majore moveat: enimverò, inquit Cartesius epist. ad eundem Morinum, nonne si supponatur scyphus qui perveniat ad terræ centrum aquâ plenum, nonne, inquit, si vel una aquæ guttula infundatur per foramen, hæc guttula coget totam aquam moveri? Ergo quidni hæc flammula possit habere vim prædictam? nam materia subtilissima quæ hanc ambit liquor est fluidissimus & continuus, proindeque rectà poterit à flammâ moveri.

Instabis: supponamus ventum vehementissimum motu contrario motui flammulæ agitare materiam subtilissimam, sanè flammula in hypothesi nostrâ non poterit apparere lucida; sed illud est contrà experientiam.

Huic difficultati fecit satis Cartesius;

H v

enimverò licèt sit ventus vehemens agi-
tatus motu contrario motui materiæ sub-
tilissimæ à flammulâ agitatz, illud tamen
impedire non potest quominus motus à
flammulâ factus perveniat ad oculos:
quemadmodum si lapis projiceretur in
currente fluvio, describerentur circà lapi-
dem varii orbes etiam contrà currentem.

Deinde adverte vehiculum luminis esse
materiam omnium subtilissimam: mate-
riam verò subjectam vento esse respectu
materiæ lucidæ satis crassam & admittere
intrà se poros meatusque patentes qui-
bus sine ullâ oppositione fluere potest ma-
teria lucida; idèdque quantâcumque agi-
tatione rapiatur aër, non impeditur tamen
motus luminis.

Instabis: si flammula materiam subti-
lissimam circumstantem premeret eâ ratio-
ne quâ aquæ guttula premit totam aquæ
massam in syphonibus contentam, sanè
non tantùm flammula lucida appareret
homini distanti 50 passibus, verùm etiam
50 leucis & amplius, sicque nullæ essent
stellæ invisibiles, quia nunquàm debili-
taretur actio luminis, sicut non debili-
tatur actio guttulæ, sive syphon sit major,
sive sit minor, certè aqua sine debilita-
tione semper impellitur: atqui est contrà
experientiam quòd lumen flammulæ non
debilitetur, quippè flammula ad certam

distantiam nullatenus videtur : igitur hæc omnia faciunt contrà nostram sententiam.

Dist. maj. Si premeret eâdem ratione cæteris paribus , C. imparibus , N.

Porrò reverà actio luminis, v. g. flammulæ, debilitatur, nec tamen actio guttulæ agentis in molem aquæ juxtà exempla priùs laudata debilitatur, sed cætera non sunt paria : enimverò aquæ guttula agit in molem aquæ quæ majus spatium occupat : at flammula est quasi centrum respondens circumferentiæ, atque adeò fit actionis flammulæ expansio versùs circumferentiam, & consequenter ejus actio debilitari debet, sicut debilitaretur actio ipsius aquæ, si ageret in molem amplio-rem & latiore.

Objicies 2^o. Si ut esset luminis sententia, radii deberent esse imperturbati, sequitur quòd cùm duo luminaria opposita accenduntur, minor esse debeat lux : atquæ absurdum est & contrà experientiam consequens, enimverò si in cubiculo duæ accendantur candelæ, oculus in medio positus videbit clariùs quàm si accendatur unica : ergo hæc sententia nulla est.

N. maj. Nam ad hoc satis est quòd radii duarum lampadum sese non perturbant : porò licèt veniant ex partibus oppositis, sese non perturbant, quod quidem non accidit tantum respectu radiorum lu-

H vj

minis, sed etiam respectu sonorum, quorum materia crassior est quàm materia luminis: unde quia constat varios sonos sine perturbatione venire ad aures, ità faciliùs intelligetur quomodò radii sine perturbatione veniant ad oculos.

Objicies 30. Lumen corpora solidissima penetrat, ut crySTALLUM, vitrum, adamantem &c. Sæpe magna lucis copia in spatium contrahitur angustissimum ità ut per foramen exiguum transeat & postea diffundatur in spatium amplissimum, ut videre est in vitro quod plurimas habet facies & ex alià parte planum est: verùm hæc omnia intelligi non possunt, si mechanica dispositio ad lumen requisita consistat in motu materiæ ætheræ, alioqui foret corporum penetratio.

N. min. Tantùm enim abest ut phœnomēna quæ objiciuntur conciliari non possint cum motu materiæ ætheræ: quinimò sublatà dispositione mechanicā nequaquam possunt intelligi. Quippè phœnomēna quæ objiciuntur intelligi non possunt sine motu locali, quia nihil absurdius est, Viroque Philosopho magis indignum, quàm istos omnes effectus tribuere meris qualitatibus seclusâ affectione mechanicâ: porro motus localis non potest esse eò loci nisi in aliquâ substantiâ corporeâ, nemo enim intelligit qua-

litteratam patheticam moveri: porrò illa substantia corporea in quâ est motus localis constituens lumen non potest esse crassa, ut adversarii consentient, debet igitur esse subtilissima, quo posito phœnomena sic exponi possunt non ineptè.

1^o. Quædam corpora solidissima pervadit lumen; in iis verò sunt insensiles meatus & pori qui non perturbant materiæ æthereæ motum & impulsum, ut amplius exponetur.

2^o. Lumen latè diffusum in exiguum foramen contrahi potest, & contractum diffundi: sunt enim regulæ quibus fit ut radii se colligant & ità diffundant: proponuntur cùm agemus de reflexione & refractione radiorum; imò quod ad expansionem radiorum spectat, illud exposuimus: scilicet quodlibet punctum lucidi corporis radiat in orbem & est quasi centrum alicujus vorticis, ex quo, si lumen per exiguum foramen exeat, diffunditur.

Ratio autem cur radii sic per foramen exeuntes diffundantur, est quia radii contracti sese non penetrant, nec se perturbant.

3^o. Quidem non se penetrant, nam in uno physico & sensibili puncto loci contineri possunt infiniti propemodam radii; quod non ità videbitur incredibile, si advertamus quot ejusmodi radii contineantur in angustiis illis partibus globo

solis vicinioribus. Nam radii omnes in unum collecti, qui per angustissimum foramen transeunt & divaricantur, non efficiunt lumen adeò incensum quàm illud quod ex radiis solem proximè ambientibus efficitur: plures sunt radii in physicis & sensilibus loci punctis propè solem sine ullâ penetratione, quàm in angustissimo foramine ad quod radii ex multis corporibus proficiscentes confluent. Sic sine ullâ penetratione radii per uerè foramen in aliquod punctum retinæ aut corôidis effluent, effinguntque objectorum imagines ex quibus situs, distantia, magnitudo, configuratio cognoscuntur: vel ut plures motus sonorum sine ullâ penetratione per exigua aurium foramina confluent ad idem punctum.

20. Radii se non penetrant in angustiore locum redacti, quia, ut dictum est, in uno physico & sensibili puncto loci sunt infinita spatiola & meatus per quos radii possint fluere imperturbati; quòd si fiat aliquorum radiorum perturbatio & collisio, tunc debilior cedit fortiori: quod nedum experientiæ repugnat, quinimò ipsâ confirmatur experientiâ: sic sol præripit lumen syderibus, ideò fax sole lucente apparet pallida, neque dubium est quòd si duo soles simul apparerent, unus alteri caliginem offunderet: sic pariter ful-

gura per noctem tenebrosam clariùs micant & vividius perstringunt oculos quàm per diem lucidum : sic soni per noctem faciliùs audiuntur, quia minor est aëris perturbatio occasione aliorum corporum, &c.

Objicies 4o. Non debet admitti sententia quâ plurima phœnomena non explicantur : porro si lumen dicitur consistere in motu partium subtilissimarum corporis lucidi plurima phœnomena explicari non possunt. 1o. Explicari non potest quodnam sit discrimen inter lumen, calorem, &c. Deinde explicari non potest cur motus luminis ducat nos ad originem à quâ procedit, motus verò soni & caloris non ità nos similiter ducant : quapropter aut necesse est nostram fateamur ignorantiam, aut ea rejici debent in qualitates occultas.

1o. Transeat major : nam quod est apertum negari non debet, quia ex eo sequitur aliquid obscurum quod capi non potest : porro nihil magis apertum quàm lumen in corpore lucido esse partes hujusce corporis tenuissimas motu vehementissimo agitas, ut probatum est : ergo illud negari non deberet, licet quædam phœnomena non possent exponi : sufficit quòd nostra sententia nihil dicat repugnans illis phœnomenis.

2o. N. min. Nam 1o. non sine fun-

damento statueretur calorem esse à motu orbiculari valido & perturbato, sonum esse à motu undulato, reciproco, non ità vehementi : 20. lumen esse à motu celeri vibrato & imperturbato.

20. Calores & soni nos ad originem suam ducunt, scilicet mediante calore approximamus ad calida, mediante sono ad sonora : reverà si sonus percutiatur, manemus ancipites ; ità pariter si lumen repercutiatur, convertimur versùs corpus reflectens : quanquàm non ità certò calida & sonora ducunt nos ad originem quàm lucida, quia luminis motus vibratus est : sicut homo cœcus baculo suo utitur & tentat quâ viâ procedere debeat, ità ut agnoscat mediante baculo causam offensionis : sic per radium vibratum ducimur ad originem lucidi : porrò alii motus vibrati non sunt, non sunt adeò breves, denique specialis oculi dispositio, situs & motus quo radii tangunt nervos multum conferunt ad illud phœnomenon : sed illa fusiùs postea.

Objicies 50. Si lumen consisteret in materiâ subtilissimâ vehementiùs agitâtâ quæque transire debeat per aërem radiis imperturbatis sequeretur fore tenebras cum tempore sereno ventis maximis & pugnantibus agitur aër. Contra experientiam consequens, ergo & antecedens.

Huic objectioni factum est satis & absolute negari debet major. Nam hæc vehemens agitatio aëris non impedit quominus radiis imperturbatis propagetur lumen, sicut si lapis projiciatur in currentem fluvium, non impeditur à corrente quominus fiant circa punctum projectionis tanquam circa centrum orbes qui undulatione fiant majores & majores: sed est ratio mechanica efficacior quàm istud persuadetur de lumine: enimverò materia quàm propagatur lumen longè subtilior est ipso aëre, cujus materia relaxivè ad ætheream crassior est: unde in aëre patentes debent concipi meatus & canaliculi per quos hæc materia fluida sine ullâ perturbatione fluit, licèt rapiatur aër determinatione oppositâ determinationi æthereæ substantiæ. Patentes illos meatus in aëre ad libitum non fingi persuasum habebit qui experimentis constantissimis detegit vias esse huicce materiæ per ipsas trabes, per medios lapides, sed reverà interruptas; unde dum egreditur ab illis corporibus, non excitat ampliùs lumen.

Denique motus vibratus luminis facit ut quantumvis agitetur aër radii veniant imperturbati ad oculos: sic aër agitetur in timpano à determinatione & agitatione possibilibus, si foramine occluso percutias unam pelliculam, ex alterâ parte sentietur ictus.

Objicies 6^o. Lumen in corpore solido est quid simile sensationi luminis excitatæ in animâ, quippè nemo dat quod non habet : ergo non consistit in materiâ subtilissimâ motu celeri & vibrato agitâtâ.

N. ant. Et ad probationem primò retorqueo argumentum : nemo dat quod non habet ; sed gladius dat dolorem : ergo gladius habet dolorem ; quod certè absurdum est.

2^o. Objectum propriè non dat animæ sensationem luminis, quemadmodum gladius est occasio cur excitetur in animâ sensatio doloris ; sic radius est occasio cur excitetur sensatio luminis : reverà ut anima distinguat objecta ad conservationem sui corporis, refert ad objecta quæ sunt occasiones sensationum formas similes sensationibus , quemadmodum impressiones suas omnes refert ad partes organicas singularium impressionum , ut noscat quænam partes sint organa sensationum : sed non magis formæ illæ similes sensationibus sunt in corporibus extrà nos cogitantes positis quàm sensus intimi, & aliæ impressiones in partibus organicis quàm dolor in digito ; imò in tibiâ lignèâ , amor in corde , perceptio & imaginatio in partibus capitis : quamobrem quæcumque sunt qualitates sensiles & patheticæ non sunt in corporibus , nec pertinent

ad corpora: sunt bona nostræ animæ, quæ immediatè largimur corporibus & liberaliter: ità sanè lumen solis meum est, colores mei sunt, sic odores, sic sapes, &c. Infelix ergo homo, qui hisce omnibus perfectior, quærit & sectatur avidiùs hæc objecta quæ non sunt nisi sui principii cogitantis affectiones.

Objicies 7^o. Si lumen consisteret in impulsu æthereæ substantiæ, nunquam posset in instanti diffundi: atqui tamen experientiâ compertum est lumen in instanti diffundi ad quamlibet distantiam; ergo lumen non debet explicari per impulsam materiæ æthereæ.

1^o. Sunt qui majorem negant: nam putant inter oculum & solem materiam subtilissimam ità esse contiguam sibi ut nulla permittantur vacuola; proindeque quo instanti materia premitur à sole, premit fundum oculi eâ ratione quasi foret baculus à sole ad oculos nostros.

2^o. N. min. Scilicèt propagatur lumen cum successione: quapropter sit

De Propagatione Luminis.

Propagatur lumen & diffunditur, vibratur ratio recto, ut patet in umbris & depictis imaginibus, in oculi fundo. Diffunditur circumquaque, quia lucida

lucent in orbem : imminuitur in propagatione, quia quò major est corporis illuminati distantia à lucido, etiam à sole, eò debiliori luce aspergitur.

Est in lumine conjunctio, tum quia propè centrum lucidi corporis radii sunt magis conjuncti quàm versùs circumferentiam. Sic conjunguntur radii in speculis ustoriiis, sic faces plures simul accensæ magis illustrent objecta corporea.

Est aliquandò oppositio in radiis, tuncque fulgor unius corporis fulgorem vincit alterius : est aliquandò concordia; sic plures faces sibi non nocent.

Est denique celeritas, quæ tanta est ut plures voluerint instantaneo nisu à corpore lucido ad oculum excitari sensationem luminis in animâ. Sic Cartesius qui rem explicuit exemplo baculi quo cæcus utitur, exemplo aquæ infusæ in syphonibus.

Attamen illud & rationi & experientiae contrarium est. Rationi quidem, quia perficitur lumen pressione materiæ subtilis : porrò partes hujusce materiæ eam non habent continuitatem quam habet baculus, partes non sunt ità inter se colligatæ.

Et certè debilitatur lumen : porrò hæc debilitatio arguit propagationem esse successivam : quippè si foret instantanea, qualis foret in baculo, tantus foret nisu in extremitate unâ tangente oculum, quantus

foret in extremitate tangente solem, quod est experientiæ contrarium & debilitationi.

*De Reflexione Luminis, ubi de Dioptricâ
& Catoptricâ.*

Voces sacras huic scientiæ primò exponimus.

1°. Reflexio luminis est luminis reditus versùs planum parallelum plano in quo incidit, sive illa plana sint realia, sive sint imaginaria: aliter definiri potest: progressio luminis in anteriorem partem spatii quam respicit corpus opacum, secundùm eam superficiem quam corpori lucido objicit.

2°. Corpus radiorum dicitur illud quod lumen vel colores emittit per medium diaphanum: lumen & colores vocantur radii; si emittat lumen dicitur lucidum; si emittat colores dicitur coloratum.

3°. Corpus speculare est quodlibet corpus opacum sensibiliter politum. Porro vel est planum, vel est convexum, vel est concavum: concavum & convexum, vel est sphæricum, vel cylindricum, vel conicum, vel pyramidale, vel ellipticum, vel parabolicum, vel hyperbolicum, &c.

4°. Linea incidentiæ ea est secundùm quam radius rectus in superficiem corporis specularis incidit, ut linea A B. (fig. 9. 10. 11. tab. 14.)

50. Punctum incidentiæ & punctum reflexionis idem est: nempe id in quo linea incidentiæ terminatur, & à quo linea reflexionis incipit, ut punctum B.

60. Linea perpendicularis seu orthogonaliter erecta in puncto incidentiæ dividens lineam incidentiæ & lineam reflexionis, est linea K B M perpendicularis plano C D tangenti, & speculum convexum F B G, & concavum H B I & denotanti speculum planum D B C (fig. 10. 11.) hæc perpendicularis in speculis sphericis, tam concavis quàm convexis, semper transit per centrum.

70. Superficies reflexionis dicitur illa superficies imaginaria suprâ speculum erecta, terminatâ lineâ perpendiculari & catheto reflexionis.

80. Cathetus reflexionis est linea quæ ducitur à puncto à quo terminatur reflexio, & quidem normaliter ad planum designans speculum planum, & tam speculum convexum F B G, quàm concavum H B I. Talis est linea E C.

90. Cathetus incidentiæ est linea quæ ex puncto corporis radiantis ducitur normaliter ad planum & denotans speculum planum, & tangens speculum convexum nec-non concavum in puncto incidentiæ. Talis est linea recta A D.

10. Superficies incidentiæ est superficies

imaginaria suprà speculum erecta , terminatâ catheto incidentiæ & lineâ perpendiculari.

110. Angulus incidentiæ is est quem subtendit cathetus incidentiæ, is est quem linea incidentiæ A B constituit cum lineâ rectâ D B, ut angulus A B D , & A B F in speculo concavo. (fig. 9. 10. 11.)

120. Angulus reflexionis is est quem subtendit Cathetus reflexionis, is est quem constituit linea reflexionis B E cum lineâ rectâ B C, ut angulus E B C & E B G in speculo concavo.

130. Angulus incidentiæ constituitur & lineâ incidentiæ & catheto & lineâ rectâ plani.

140. Triangulus reflexionis is est qui continetur & lineâ reflexionis & Catheto, & lineâ rectâ plani.

150. Imago dicitur forma objecti : apparet intrâ aut extrâ speculum.

160. Locus imaginis est locus ubi apparet imago.

170. Ex perpendiculari & lineis incidentiæ atque reflexionis fiunt anguli duo acuti qui dicuntur inclinationes radii, ut angulus A B K & angulus E B K.

Discrimen est aliquod in modo quo hæc specula objecta exhibent. Scilicet imago in speculo plano æqualis est objecto, & corpus ultrâ speculum tantum

apparet quantum est citrà. Sit corpus A. Sit punctum incidentiæ B versùs oculum E. Imago apparebit versùs H. (fig. 9.)

In convexis non ità se res habet : radii extrinsecùs dissipantur, intrà speculum magis arctantur, citiùs coeunt : hinc imago rei angustior est, nec longè ab extimâ superficie removetur.

Res aliter se habet in concavis, in quibus radii multi multùm ad se accedunt, & plures in oculum illabuntur : hinc imago est magis explicata ; hinc non tantùm summa objecti fastigia, ut in speculis convexis, sed partes objectorum laterales & devexæ exhibentur ; ideòque species objectorum major apparet.

Quæ spectant ad catoptricam integris voluminibus vix possunt comprehendì : solas hypothesès hîc complectar ex quibus pendet.

De primâ Suppositione seu Hypothesi.

Anguli incidentiæ & reflexionis sunt æquales : hæc hypothesis est fundamentalis omnium à quibus Catoptrica pendet. Alii alias dederunt rationes quibus eam probarent.

Afferunt

Affertur Ratio Cartesii.

Suam dedit rationem Cartesius, quæ sanè ingeniosa est; hæc autem ratio sic ferè proponitur: quandò corpus movetur secundùm diagonalem alicujus parallelogrammi, distingui debent duæ determinationes ex quibus resultat diagonalis, alia secundùm horizontalem *D B*, alia secundùm perpendicularem *A D*. (fig. 9.) Porro si pila secundùm determinationem diagonalem moveatur versùs planum *C D* in puncto *B*, tunc planum resistit quidem determinationi perpendiculari deorsùm, sed non resistit aut determinationi perpendiculari sursùm & horizontali; imò adjuvat determinationem perpendicularem sursùm: ergo quia motus pilæ spectatur ut non imminutus, adeòque pila resilire debet, non quidem versùs perpendicularem, quia planum non nocuit determinationi horizontali quæ permanet: non etiam secundùm horizontalem, quia licèt planum impediat perpendicularem deorsùm, non impedit perpendicularem sursùm, imò adjuvat: ergo pila progreditur secundùm diagonalem alterius parallelogrammi omninò æqualis parallelogrammo in quo continetur linea incidentiæ.

Et certè, inquit Cartesius, describa-

Tom. VI.

I

tur circulus à puncto B. Circulus tanget puncta ubi horisontalis & perpendicularis faciunt angulum, linea incidentiæ incipit à puncto A, terminatur in puncto B, in quo incipit linea reflexionis: porro motus non est imminutus; ergo eodem tempore fieri debet reflexio; ergo fieri debet secundum lineam B E, (fig. 9.) nempe in eâ parte in quâ horisontalis & perpendicularis faciunt angulum & tangunt circulum.

Sic reflexionem ingeniosè explicuit Cartesius, & hæc expositio in admirationem rapuit omnes Philosophos: scilicet res exemplo pilæ lusoriæ sensibilis fiebat, cum antea qualitatibus Peripateticis nihil intelligeretur.

Egomet laudavi Cartesium, quamquam nec omninò satisfacit, si propius rem intueamur: reverà radius reflectitur instar pilæ lusoriæ, reverà planum non resistit determinationi horisontali, cum determinatio horisontalis sola est simplex: at quandò horisontalis conjuncta est cum perpendiculari in diagonali, rationem physicam non affert Cartesius cur planum resistendo perpendiculari deorsum non resistat horisontali: hæc tamen ratio physica queritur; nec enim nobis sufficit demonstratio mathematica quæ non habet rationem plani & eorum omnium quæ

pilam circumstant: ergo Cartesius physicè non probat angulos incidentiæ & reflexionis esse æquales.

Et certè quomodò probaretur istud physicè, cùm, si res physicè examinetur, iidem anguli non sint æquales? nimirum debilitatur radius, ergo motus imminuitur: ergò modò hæc determinatio magis debilitatur, modò minùs, pro conditione fluidi per quod transit radius: ergo physicè angulus reflexionis non fit æqualis angulo incidentiæ.

De Secundâ Suppositione Catoptrices.

Talis est: radii incidentiæ & reflexionis, punctum objecti visibilis, punctum incidentiæ, punctum oculi, sunt in eodem plano.

Constat certissimâ experientiâ: pendet ex primâ suppositione, quæ cùm non potuerit physicè demonstrari, ergo nec ista.

De Tertiâ.

Locus imaginis, seu locus in quo videtur objectum per reflexionem, est in catheto incidentiæ. Sit speculum planum C B D, corpus videndum A, oculus videns E, locus imaginis erit in lineâ E B H, ideòque corpus videndum unicar-

rectam lineam cum suâ imagine constituet, ideò locus imaginis erit in catheto incidentiæ, scilicet in H. (fig. 9.)

Explicatur phœnomenon. Debet exhibere objectum quasi existens in eo loco in quo necesse est objectum apparere, habitâ ratione modi quo per oculum intermedium judicare possumus de situ & distantia rerum visibilium: atqui habitâ ratione modi quo per oculum intermedium judicare possumus de situ & distantia rerum visibilium, necesse est imaginem apparere in catheto incidentiæ; enimverò illud accedere necesse est, si oculus eodem modo afficiatur & eodem modo recipiat radios objecti visibilis ac si reverà objectum esset in catheto incidentiæ: atqui oculus eodem modo afficitur & radios excipit ac si objectum esset in catheto incidentiæ: siquidem, ut oculus eodem modo afficiatur, duo requiruntur: 1^o. Requiritur quòd anguli reflexionis sint æquales angulis incidentiæ, & radii reflexi sequantur conditionem radiorum incidentium. 2^o. Requiritur quòd motum istius celerem & vibratum semper dirigamus per conceptum & cogitationem, quasi fieret per radium directum, licet fiat per reflexum: atqui hæc duo non desunt; siquidem experiëntiâ constat angulos incidentiæ & reflexionis esse æquales,

& radios reflexos similes esse incidentibus : experiētiā etiam notum est motum pressionis celerem & vibratum semper referri in partem obversam , quasi foret directus , nisi aliunde imaginatio corrigatur , aut potius animæ relatio ad extrā : quod quidem idē accidit , quia est in omnibus naturalis cogitatio motum à puncto ad punctum fieri debere secundum lineam rectam : ergo intuens oculus imaginem reflexam per speculum eodem modo afficitur ac si imago esset reverā in Catheto incidentiæ , & consequenter locus imaginis apparebit semper in Catheto incidentiæ.

De Quartâ.

Speculum quovis modo figuratum radios à quolibet speculi puncto in quod incidunt reflectit secundum lineas rectas , quia anguli reflexionis & incidentiæ sunt æquales.

De Refractione Luminis.

Refractio est deviatio luminis à viā rectā , cū lumen propagatur à diaphano in aliud.

Datur refractio. Corpus (f. 12. t. 14.) positum in vase non videatur ab oculo

dum vas aquâ destituitur : videbimur tamen, si aqua in vase ponatur. Ut illud explicetur, sit vas $ABC S$ aquâ plenum, cujus centrum sit D , circulus verticalis $AEBI$ describatur rectus ad superficiem aquæ: radius à sole F veniat ad punctum D per lineam rectam, & incurrat oblique in superficiem aquæ. Hæc cum sit luminis capax, permittit radium ultra propagari; ipse verò radius aquam permeabit, non quidem in directum secundum lineam DG , sed secundum lineam refractam DH , ita ut in puncto D fiat angulus HDI ; ergo refractionis in puncto D .

Radius incidens est linea recta secundum quam in primo medio propagatur lumen, ut radius FD .

Radius refractus est linea secundum quam lumen producitur in secundo medio diaphano; ut radius DH .

Punctum refractionis illud est in quo radius incidens & refractus angulum faciunt, ut punctum D : aliter dicitur punctum incidentiæ.

Axis incidentiæ est linea cum primo medio existens, ducta normaliter ad communem utriusque diaphani superficiem, ut linea ED .

Axis refractionis est linea in secundo diaphano existens, quæ recta est ad communem utriusque diaphani superficiem, ut linea $D-I$.

Superficies refractionis est planum per radios incidentiæ & refractionis ductum. Talis est superficies ad communem utriusque mediæ diaphani superficiem recta, nempe superficies circuli F A H in quâ inveniuntur radius incidentiæ F D, & radius refractionis D H.

Angulus incidentiæ is est qui fit à radio incidente, & superficie communi utriusque diaphani, qualis est angulus F, D, B.

Angulus refractus is est qui fit à radio refracto & axe refractionis, ut angulus H, D, I.

Angulus refractionis is est qui fit à radio refracto, & radio incidentiæ producto secundum lineam rectam intra secundum medium diaphanum, ut angulus G, D, H.

Angulus inclinationis is est qui fit à radio incidentiæ & axe incidentiæ, ut angulus F, D, E.

Duplex refraction, alia ad perpendicularem, alia à perpendiculari.

Refraction à perpendiculari est ea vi cujus radius refractus magis recedit ab axe refractionis, qualis est refraction radii exeuntis ab aquâ in aërem in vase, de quo prius.

Refraction ad perpendicularem ea est vi cujus radius refractus magis accedit

ad axem refractionis quàm radius incidentiæ ultrà productus, v. g. refractionis radii transeuntis ab aëre in aquam.

Ex his experimentis constat etiam refractionem fieri ad perpendicularem cum transit radius à medio rariore in medium densius, v. g. cum transit ab aëre in aquam, aut ab aqua per crystallum.

Fit autem refractionis à perpendiculari cum radius transit à medio densiori in rarius, v. g. à crystallo in aquam, aut ab aqua in aërem. Hinc si lumen in eodem medio propagetur nulla erit refractionis, siue radius obliquè incidat, siue perpendiculariter: at verò fit refractionis, si per diversa media propagetur lumen obliquè incidens, nam si perpendiculariter incidat nulla est profectò refractionis, ut constat experientiâ.

Ad refractiones maximè attendere debent qui ortus interitusque syderum volunt definire, qui molem, distantiam & locum volunt concludere: enimverò fit ex refractionibus ut sol infra horisontem positus videatur aliquandò supra & jam ortus. Sic aliquandò est eclipsis lunæ occidentis, adhuc tamen positæ supra nostrum horisontem, sol ipse supra horisontem videtur oriens; quomodò ergo luna in umbrâ terræ, nisi quia sol reverà positus est infra horisontem, sed apparet

suprà propter refractiones. Eâ ratione quâ nummus in vase non visus videbitur, si vas aquâ repleatur propter refractionem radiorum, & quemadmodum fundum vasis videtur quasi attolli & minus depressum. Ità hemispherium inferius videtur quasi abbreviatum.

Ex his sol oriens major videtur, sol verò meridianus minor, quia major est obliquitas in radiis solis orientis quàm in radiis solis meridiani: hinc à Psalterio Regio sol matutinus dicitur quasi gigas paratus ad currendam viam suam, ubi manifestè Scriptura loquitur de sole secundum apparentiam, non secundum veritatem; neque enim in se major est manè, sed tantum sic videtur propter refractiones majores quando radii sunt magis obliqui.

Hæc sunt phænomena certissima, sed quænam est eorum ratio physica?

Qui meris qualitatibus delectantur Peripatetici hîc iterum silere coguntur.

Duplex est Physicorum opinio petita ex mechanicis, ut hæc phænomena explicantur.

PRIORUM OPINIO.

Quidam existimant lumen nihil aliud esse quàm tenuissimum quoddam corpus

cujus radii subtilissimi sine unione & co-
hærentiâ partium, instar tenuissimi pul-
visculi, diffunduntur; conjuncti tamen &
inter se compacti sunt, quantum summa
eorum tenuitas pati potest. Hinc fit ut
dum lucis radius obliquè incidit in pla-
num diaphanum, partes quæ poros ido-
neos non invenerint reflectantur, aliæ
quæ fuerint nactæ poros idoneos perva-
dant diaphanum corpus, retinentes quan-
tum possunt partium suarum cohærentiam.
Itaque eo ferè modo radius luminis à me-
dio rariori in densius occurrit, quâque
copiâ verticaliter irruens in planum ob-
liquè objectum crebris foraminibus pertu-
sum, foramina pervadit, partes aquæ
incurrentes in solidas plani partes refle-
ctuntur: quæ verò nactæ sunt, foramina
permeant & continuitatem retinent; de-
viant tamen à recto tramite: licet autem
aliquæ partes rectà transire possint sine
ullâ deviatione, quia tamen propter ob-
liquitatem pororum partes omnes eo mo-
do transitum habere non possunt, ne-
cessè est refrangi & deviare: sic, inquit,
pars radii directum habet aditum; sed
quia radius totalis, hoc est, radii simul
omnes inter se conjuncti, eam directio-
nem servare non possunt, coguntur om-
nes refrangi ad perpendicularem: videli-
cet lumen velocius movetur in corpore

riori, v. g. in aëre quàm in densiori, putà in aquà, ex eo quòd in densiori corpore pori sint minores & arctiores, & consequenter in hujusmodi poris magis attenuetur lumen, & majorem habeat superficiem relativè ad suam molem: quamobrem si intelligatur radius aliquis ità incidens obliquè in superficiem diaphani densioris, ut una ejus pars nacta porum sibi conformem priùs illum subeat, & propter hoc tardiùs moveatur, dum interim alia ejusdem radii pars cum illà cohærens in aëre libero velociùs defertur, necesse est reflexionem radii totalis immutari.

Patet istud supponendo radium A B C D, qui aliquam determinatam habeat latitudinem & partium cohærentiam, quique ab aëre incidat obliquè in superficiem aquæ E F. Pars B propter obliquitatem incidentiæ priùs tanget aquæ superficiem quàm pars A; sed quia tardiùs movetur lumen in aquà quàm in aëre, eo quòd in aëre supponantur pori latiores quàm in aquà, necesse erit mutari incidentiæ inclinationem, ità ut radius extrà aquam & in aquà non sit directus secundùm lineam C I, sed refractus secundùm lineam C L: unde radius extrà aquam diverget à perpendiculari, & in aquà accedet ad perpendicularem.

I vj

Affertur Ratio Cartesii.

Cartesius viam oppositam sumpsit ut idem phænomenon exponeret: motus corporis obliquè incidentis, inquit ille, componitur ex duplici motu; alio perpendiculari seu verticali, altero horisontali, ut explicuimus dando determinationum leges: porro si corpus aliquod obliquè incadat in planum permeabile, aliquatenus obsistens motui verticali, nullatenus autem horisontali; debet profectò mutari inclinatio incidentiæ corporis recedendo à perpendiculari & accedendo ad horisontalem: è contrariò, si planum permeabile determinationem verticalem augeat obsistendo aliquatenus horisontali, debet mutari inclinatio incidentiæ corporis accedendo ad perpendicularem, & recedendo ab horisontali: porro dum lumen obliquè incidit à corpore rariori, putà ab aëre in corpus densius, putà in aquam, transit per planum permeabile, quod determinationem perpendicularem adjuvat: cum autem transit à densiori in corpus rarius, transit per planum permeabile, quod verticali determinationi nocet, nullatenus autem horisontali.

Ut illud probet Cartesius, vult lumen facilius fluere in corpore densiori, putà in

aquâ, quàm in corpore rariore, putà in aëre: porro nihil non tentat vir sagax ut persuadeat lumen moveri faciliùs in denfiore corpore diaphano quàm in rariore: hoc autem repetit ex dispositione mechanicâ tum aquæ, tum aëris: videlicet fatetur reverà poros aquæ & meatus esse angustiores poris ipsius aëris: fatetur prætereà plures esse meatus in aëre quàm in aquâ: sed contendit poros aquæ esse magis constantes, magis terfos & politos; aër enim est corpus molle, fibrosum & villosum: porro lumen quod constat pressione globulorum faciliùs movetur per polos terfos & politos nec-non constantes, quàm per poros multis villis & pilis impeditos, sicut faciliùs globi eburnei moventur in tabulato nudo & lævi, quàm cum villoso panno sternitur: quia pili & fibræ adhærescentes globulis motum eorum retardant. Igitur, concludunt Cartesiani, habetur ex dispositione mechanicâ lumen faciliùs fluere in aquâ quàm in aëre: ergo aqua motum perpendicularem adjuvat; aër verò nocet motui verticali; proindeque dum lumen transit ab aëre in aquam, refractione fieri debet ad perpendicularem, & cum transit ab aquâ in aërem, refractione fieri debet à perpendiculari.

Hæc est Recentiorum doctrina, circa quam sit

PRIMA PROPOSITIO.

Non probatur lumen facilius vel difficilius moveri in aquâ quàm in aëre.

Pr. Nam hoc nullâ probatur ratione sine quâ Cartesius suam demonstret sententiam, neque alii vicissim: atqui verum consequens, ut patebit ex objectionibus.

Dices cum prioribus: Lumen in aquâ difficilius movetur, si pori sint & meatus in aquâ strictiores quàm in aëre: atqui verum consequens.

N. maj. Nam ex eo quòd pori sint strictiores sequitur quidem quòd non sit tanta luminis copia in aquâ quanta est in aëre; sed non sequitur quòd lumen in aquâ difficilius moveatur, quia nimirum illi pori possunt supponi magis tersi & politi, suntque magis constantes; quapropter si nummus in aquis non videatur æquè clarè ac in aëre, non inde sequitur lumen difficilius moveri in aquis, sed id unum sequitur, pauciores radios ad nummum venire in aquis, pauciores reflecti, quia pauciores sunt meatus & plures sunt partes solidæ aquarum.

Dices cum Cartesio: Lumen movetur facilius in aquis, si pori aquarum sint magis tersi & politi nec-non constantes, pori

verò aëris sint pilis & villis impediti, quia partes aëris sunt villosæ; atqui verum consequens.

N. maj. Nam licet meatus aquæ forent magis terfi & leves, quod à Cartesio sufficienter non probatur, certè in principiis Cartesii non sequitur lumen facilius moveri in aquis quàm in aëre, quia lumen intelligitur solâ pressione globulorum in principiis Cartesii: atqui pressio globulorum tam facilis est in aëre quàm in aquâ, nec enim villi & pili aëris possunt hanc imminuere pressionem: ergo lumen non probatur moveri facilius in aquis quàm in aëre.

SECUNDA PROPOSITIO.

Phænomenon refractionis non demonstratur mechanicè.

Pr. Nam ut mechanicè demonstraretur, deberent certò intelligi mechanicæ affectiones superficierum aëris & aquæ, intelligi quinam sint meatus in illis corporibus: atqui licet ista possimus conjicere, certò tamen non intelliguntur, sunt enim insensilia: ergo mechanicè non demonstratur, licet certum sit ipsum aliquâ mechanicâ fieri.

DE VITRIS.

Vitra lumen reflectunt, si apponatur ex unâ parte corpus opacum, putà argentum vivum, alioqui lumen refrangunt: alia sunt regularia, quæ superficies habent regulares, alia è contrariò irregularia, quorum sunt infinitæ species.

Regularia quorum est frequentior usus in dioptricis instrumentis, vel sunt omninò plana, vel sunt omninò convexa, vel sunt omninò concava; hæc autem tria possunt simul misceri. Hinc plano-convexa, plano-concava, convexo-plana, convexo-concava, concavo-plana, concavo-convexa.

Inter vitra convexa nullum est cujus usus sit major in dioptricâ quàm illud quod à figurâ dicitur lens; nimirum imitatur crySTALLINUM oculi, in medio protuberat, & circà marginem deprimitur.

Vitra convexa congregant radios, concava verò dissipant; & idè vitra convexa dicuntur convergentia, concava verò divergentia.

Ex eorum notione profecta sunt vitra quibus adjuvatur visio, putà microscopia & telescopia: hæc autem vitæ humanæ commoda, quibus oculi quasi refarciuntur, explicare conetur Physicus.

DE COLORIBUS.

Si credamus animæ nostræ testimoniis, continuè judicabimus inesse corporibus certam quamdam qualitatem quæ genericè color dicitur, specificè albedo, nigredo, &c. Porro hujusce testimonii sensus adeò efficax est, & ità dominatur unicuique, ut vix homo possit obtinere à semetipso dubium de tali qualitate: atque nemo est qui primò non obstupescat, si audiat hanc suasionem non esse nisi præjudicium quod cum lacte nutricum sumimus, non esse nisi opinionem animalem quæ sit animæ turpiter delusæ figmentum.

Hoc tamen in Physicâ certum est; quod ut constet, sit

Quid sit Color.

Vel consideratur in corpore quod dicitur coloratum, vel in medio diaphano, vel in oculo, vel in animâ.

Color in animâ nihil aliud est quàm specialis animæ sensatio orta ex tali modificatione sui corporis, quo sensu nihil clariùs est colore. Disputamus de coloribus prout sunt in colorato, in diaphano & in oculo. Sit itaque

PRIMA PROPOSITIO.

Color in corpore colorato non est nisi specialis partium externarum configuratio apta ad lumen certâ quâdam ratione reflectendum, ut excitetur in animâ sensatio coloris.

Pr. Nam color in corpore colorato est mechanica dispositio, quâ positâ, intelligitur coloratum; qualitates nimirum Peripateticæ nihil explicant & nimis redolent ignorantiam: atqui partium externarum configuratio quæ sit apta ad lumen certâ ratione reflectendum est mechanica dispositio, vi cujus corpus dici potest coloratum: tunc enim corpus coloratum intelligitur, quando aptum est ad excitandam in nobis cogitantibus sensationem colorum adhibitâ præsentia corporis lucentis: atqui specialis configuratio partium externarum constituit corpus aptum ad excitandam sensationem coloris, adhibitâ præsentia corporis lucentis: tunc enim lumen certâ ratione reflexum ostendit oculi fundum & excitat sensum coloris in animâ: ergo specialis configuratio partium externarum corporis est mechanica dispositio per quam corpus visibile dici potest coloratum.

Et certè illud est dispositio mechanica per quam corpus dici potest coloratum cujus solius mutatione mutantur colores: atqui solâ mutatione configurationum & sitûs in partibus externis corporis mutantur colores, ut multis constat experimentis. Conteratur arenula rubra quæ fluit in Clepsidris, dabit colorem candidum: si conteras arenulam albam, induet subcinericium colorem; si atramentum commoveatur, in spumam abit candidam; vinum Aurelianense, si per arenulas trajiciatur, de suo colore deperdit. Filum araneum soli expositum, levi agitatum vento varios exprimit colores, quia commotione superficies mutatur, modò concava, modò convexa, tuncque fiunt reflexiones & refractiones radiorum diversæ, proindeque varii sunt colores.

Idem ad stuporem patebit evidentiùs ex mixtione liquorum, ut experimentis patebit.

Ergo ex solâ luminis refractione & reflexione varii resultant colores, ut videre est in iride, in prismatico triangulari, in globo vitreo aquâ pleno & aliis, de quibus postea: hinc si corpus alium habeat situm, vel alio modo à sole respiciatur, alios induit colores. V. g. sole oriente aut occidente vitra fenestrarum dant igneos, rubros, nubes solem circumstantes, mox

albæ, mox subrubræ, mox nigræ: hinc si manum opponas foli approximatis digitis, color carneus quàm maximè vividus splendescet inter digitos.

SECUNDA PROPOSITIO.

Color in medio diaphano est lumen certâ ratione transiens & liberum habens transitum per poros corporis diaphani.

Pr. Nam color in diaphano illud est quo faciliùs possunt intelligi phœnomena quæ spectant ad colorem prout est in medio diaphano: atqui ista phœnomena meliùs intelliguntur, si dicamus colorem prout est in medio diaphano non esse nisi lumen certâ ratione transiens per medium diaphanum: hoc enim posito, intelliguntur adesse colores adhibitâ præsentiâ corporis lucentis & deferri per medium: sublata verò præsentiâ corporis lucentis, evanescere intelliguntur: faciliùs colores intelliguntur non posse deferri nisi per medium transparens, mutari per interposita corpora diaphana diversimodè configurata: v. g. color mutatur per interpositum vitrum alio colore tinctum, mutatur per aquæ guttas interpositas, ut patet in iride, in bullis aqueis fontium in altum sublatis, ut patet in globulis roris dum sub

exortum solis virentia cernuntur prati
gramina : ergo color in medio diaphano
nihil aliud quàm lumen certâ ratione
transiens per medium diaphanum : hinc
si flavâ bili oculi humores tingantur , ut
patet in iâtericis , lumen certâ ratione
transiens per humores itâ modificatur , ut
excitetur in animâ sensatio coloris flavi
& objecta quæcumque flava videantur.

TERTIA PROPOSITIO.

*Color in organo nihil aliud est quàm varia
impulsio facta in oculi fundo secundum va-
rios radios reflexos & refractos.*

Hæc propositio satis patet. Nec enim
possunt esse in animâ variæ colorum sen-
sationes nisi propter varietatem impulsûs.
Hinc ut antea iâtericus omnia videt fla-
va , hinc varii colores excitantur à vitris
diversimodè tinctis ; hinc qui solem ocu-
lis conspexerit si postea deflectat oculos
ad terram, clara non est visio sed obscura :
hinc si oculus ictu valido feriat , exci-
tatur color igneus in animâ , & extra
nos videntur ignescentes flammulæ : hinc
etiam somniando , si modò feriat or-
ganum immediatum, videntur colores cu-
jussibet generis : ergo color in oculo de-
bet intelligi ex solo impulsu facto in
oculi fundo.

Hinc 1°. Idem objectum visum à duobus hominibus non videtur sub eadem coloris ratione, licet ab iisdem eadem voce dicatur coloratum, v. g. rubrum: nam fortè non est eadem mechanica dispositio oculorum, non est eadem dispositio medii, seu radii reflectuntur diversimodè in diversas partes: sicut idem cibus variè gustatur à pluribus hominibus; cum hoc tamen discrimine quòd in saporibus differentia sit magis sensibilis quàm in coloribus, quia saporum sensationes excitantur partibus sapidis maximè sensilibus: at verò sensationes colorum excitantur partibus insensilibus.

Hinc 20. Omnes qualitates sensiles in organis nihil aliud sunt quàm impulsus varii organorum; quapropter quilibet sensus verè tactus est: sed ista alibi.

OBJECTIONUM SOLUTIO.

Objicies 10. Datur color in Eucharistiâ ex parte objecti, putà albedo panis: atqui non datur in Eucharistiâ configuratio partium externarum panis apta ad lumen certâ ratione reflectendum: ergo color ex partè objecti non consistit in mechanicâ dispositione partium externarum aptâ ad lumen reflectendum.

Antequam huic argumento respondeam,

hæc certa sint: primum, ex intimo sensu easdem esse impressiones in nobis cogitantibus post consecrationem quæ erant antè, proindeque juxtà leges unionis easdem esse animæ relationes. Secundum. Auctoritate Scripturarum, sanctorum Patrum, Conciliorum, nec-non perpetuâ traditione Ecclesiæ tum græcæ, tum latinæ, nullum superesse panem in Eucharistiâ verâ conversione & transsubstantiatione panis in corpus Christi Domini; unde minor argumenti fide certa est.

Sed utrum ex parte objecti sit idem color panis post consecrationem, qui erat ante consecrationem, difficultas est.

Qui Peripateticorum doctrinam sectantur, in quâ admittuntur qualitates quædam realiter distinctæ à suis substantiis, saltem divinitus ab iis separabiles, qui colorem admittunt ut accidens absolutum, ii certè possunt post consecrationem admittere colorem ut quamdam entitatem separatam à substantiâ panis: sed illi dicere nequeunt colorem ex parte objecti consistere in dispositione mechanicâ partium externarum aptâ ad reflectendum lumen: alioquin cum admittunt colorem ex parte objecti in Eucharistiâ, admitterent consequenter panem: unde quia Wiclefus admittebat esse post consecrationem verum colorem panis, eundem

qui erat ante consecrationem, damnatus est cùm dixit accidentia non manere sine subiecto; hoc enim erat Wiclefi ratiocinium: est post consecrationem idem color panis qui erat ante consecrationem; sed accidentia non manent sine subiecto: ergo idem est subiectum: ergo idem panis, ergo nulla conversio, nulla transsubstantiatio: sed, ut advertit Eminentiſſimus Cardinalis de Alliaco, anathema Concilii Constantiensis non cadit in eos qui negarent dari accidentia vel divinitus separabilia à substantiis, qui non admitterent in corporibus qualitates sensiles ab ipsis distinctas, qui dicerent non manere in Eucharistiâ eundem colorem panis.

Verùm cùm sint eadem impressiones, cùm sint eadem testimonia, quomodo excitantur illæ impressiones, si non maneat color ex parte objecti? En difficultas.

Ut solvatur, quidam dicunt Christum ipsum præsentem in Eucharistiâ absolutâ suâ potentiâ facere ut maneant eadem impressiones quas consequantur eadem animæ relationes & testimonia. Hoc autem fieri posse nemo dubitare potest: scilicet eatenus sunt in nobis cogitantibus impressiones quas consequantur relationes & animæ testimonia, quatenus Deus pro summo suo jure instituit hanc legem: unde si Deus voluit ut occasione Eucharistiæ

ristia eadem permanerent impressiones cum iisdem relationibus certè potuit : potuit, inquam, velle quia cum in hocce venerabili Sacramento Christum semetipsum obtulerit tanquam cibum & potum Sanctorum, idèd potuit facere ut forent semper panis & vini impressiones quæ sunt vulgaria alimenta corporis nostri : nam sicut pane & vino saginatur corpus nostrum, ità anima verè in Eucharistià de Deo saginatur, ut habet Tertullianus.

Alii dicunt, superficiem aëris proximè ambientis hostiam, posse reflectere radios luminis ad oculum, Deo quidem volente, eo modo quo priùs reflectebantur à pane & vino : unde eadem in aëre & oculis affectio ; proindeque eadem in animà sensatio cum iisdem relationibus excitatur post consecrationem, quæ ante.

Denique alii volunt consecratione hostiæ quamlibet moleculam panis & vini ultimò sensilem converti in Christi corpus organisatum, ità ut illa corpusculæ teneant inter se dispositionem quam tenebant moleculæ panis & vini ultimò sensiles. Docent consequenter Christi corpus reflectere radios ad oculum eadem ratione quàm priùs reflectebantur à moleculis ultimò sensilibus panis & vini ; proindeque easdem esse impressiones cum iisdem relationibus. Hinc apud illos color in Eu-

charistiâ non est quidem dispositio mechanica partium externarum panis & vini seu molecularum ultimò sensilium panis & vini, sed est dispositio mechanica illorum corpusculorum quæ inter se tenent eandem dispositionem, quam tenebant priùs molculæ panis & vini ultimò sensiles: quæ quidem opinio maximè consona est cum principiis physicis: nec ideò tamen proponitur tanquam certa. Hoc constat eandem esse impressiones, eandem relationes ex intimo sensu: constat auctoritate Christi dicentis *hoc est corpus meum*, ipsum esse in Eucharistiâ præsentem contrà Calvinistas, & constat contrà Lutheranos veram esse conversionem panis & vini in corpus & sanguinem Christi; hæc constant traditione universali & continuâ tum ante hæreses de venerabili Sacramento natas, tum post schismata exorta. Sed quomodò maneant eadem impressiones, eadem relationes factâ conversione quis hoc poterit definire? nimirum sapientia Dei potens facere ea quæ promisit, novit mille & mille vias nobis prorsus incognitas quibus uri potest: unde si nos in nostris tenebris positi possimus tamen vias quasdam possibiles assignare quibus hoc ipsum Deus possit exequi, quare jam contumaces sumus? quare non credimus ei apud quem

nullum verbum impossibile est: Itaque si qua sit difficultas de modo quo fiant impressiones, licitum sit Philosophis salvâ & incolumi fide nostrâ afferre viam, quam ratio possibilem esse suadet, ut fratribus nostris errantibus tollatur lapis offensionis, ut sapientia Catholicorum non habeatur ut stultitia, sed possit aliquatenus cum fide nostrâ conciliari ratio.

Objicies 20. Si color in objecto colorato consisteret in configuratione partium externarum quatenus apta ad reflectendum lumen, quamdiu foret configuratio partium tamdiu existeret color: atqui istud falsum est, siquidem evanescunt colores absente corpore lucido.

Dist. maj. Tamdiu existeret color ex parte objecti C. Ex parte medii, oculi & animæ N. Atqui tunc non existit color dist. min. ex parte oculi, medii & animæ C. Ex parte objecti N.

Itaque si modo annihilaretur anima manentibus sole, aëre & oculo, foret lumen ex parte solis, aëris, oculi, non animæ. Si simul cum animâ destrueretur oculus, foret lumen ex parte solis & aëris: si sol non vibraret radios & tamen idem motus foret in oculo, foret in oculo lumen, foret in animâ: denique si sole non existente foret idem motus in materiâ æthereâ lux esset in aëre, sic primo

die cùm dixit Deus: fiat lux, & facta est lux.

Objicies 3°. Si color ex parte objecti consisteret in configuratione partium externarum, mutatâ configuratione illarum partium mutaretur color: sed illud experientiæ repugnat: nam v. g. duo marmora exquisitè lævigentur non idèò exhibebunt eundem colorem, in uno erit albedo, in altero nigredo.

Dist. min. Mutatâ configuratione partium sensilium non mutatur C. Insensilium N. Proindeque color non est configuratio partium sensilium, sed est configuratio insensilium.

Itaque partes duplicis sunt generis, sensiles & insensiles: porro color ex parte objecti non consistit in configuratione partium externarum sensilium, sed consistit in configuratione partium externarum insensilium, proindeque mutatâ configuratione partium externarum sensilium, reverà non mutatur color, sed mutatâ configuratione partium insensilium mutatur color ex parte objecti, ut antea multis experimentis probatum est. Jam verò partes marmorum albi & nigri insensiles esse diversimodè dispositas patet ope microscopii.

Objicies 4°. Si color ex parte objecti nihil aliud esset quàm certa configuratio partium externarum vel insensilium non

posset explicari quomodo tot sensationes diversæ colorum sint in nobis ad præsentiam objectorum v. g. sensationes albedinis, nigredinis & aliæ innumeræ: sed non debemus amplecti sententiam quâ positâ phænomena non explicantur: ergo, &c.

N. maj. Enimverò partes insensiles corporum possunt esse infinitis modis positæ: itaque lumen infinitis modis reflectere & refrangere possunt: ergo infinitis modis tangi potest oculi fundum: ergo infinitæ colorum sensationes ex infinitudine configurationum haberi possunt sicut infinitæ sonorum sensationes habentur ex variis modis quibus nervus auditorius pulsatur.

Et certè nonne clariùs & faciliùs infinitæ colorum sensationes intelliguntur ex variis infinitisque modis quibus disponuntur corpora, reflectuntur & refranguntur radii quàm ex infinitis qualitativis physicis quæ sint ipsæ colores inexistentes corporibus à quibus perpetuò fluant sine ullâ imminutione ex parte objecti tanquam species impressæ objectorum? nonne magis elucescit sapientia & ars summa Conditoris in hacce mechanicâ agendi ratione quam assignamus? nonne, inquam, magis elucescit quàm in illis aridis & jejunis qualitativis, quarum essentia nequit intelligi, causa productrix assignari, existentia determinari, propago

concipi, virtus explicari? quid enim amabo vos species quæ sit albedo in albo corpore? quomodo hæc species tangit animam? quomodo pervenit ad oculum? quomodo fluit per medium diaphanum, & in ipso transit invisibilis ab uno corpore ad aliud? quomodo reflectitur & refrangitur? hæc sunt quæ nunquam à commentatoribus indagata, nunquam fuerunt exposita: sunt igitur commentitiæ voces quæ nihil declarant, sed quibus crassa & supina ignorantia tegitur, & malletm audire rusticum qui ultrò fateretur à se non capi quomodo objectum album videatur, quàm commentatorem alto supercilio & vocibus insolitis vociferantem illud oriri à specie quâdam Physicâ visibili, quæ sit albedo objecto inexistentis, aliasque voces quibus illarum specierum effluxum grandiloquus & graviter sonans non explicare quidem, sed loqui conaretur.

Quotuplex sit Color.

Colorum infinitæ species. Sunt tamen quædam generales divisiones ad quas revocantur omnes. Color alter dicitur fixus, alter fugax, alter verus, alter apparens, alter primitivus, alter secundarius.

Color fixus is est qui oritur ex dispositione objecti colorati difficile mobili ab

objecto, ut nigredo marmoris, corvi, &c.

Fugax is est qui oritur ex dispositione partium corporis colorati facile mobili, ut colores in collo columbarum, in ampullis ex aquâ & sapone formatis: differunt quòd partium dispositio una sit difficilè mobilis, alia verò facilè mobilis: erit tamen quæstio à quo sit color fugax & mutabilis.

Color verus dicitur ille qui oritur ex dispositione objecti minimè mutatâ per medium & oculum, ut nigredo in marmore: apparens autem dicitur ille qui non oritur simpliciter ex ipsâ objecti dispositione, sed oritur ex interpositu alterius corporis: sic interposito prismatis multis coloribus pingitur corpus sine mutatione suâ. Difficultas tamen erit quomodò colores veri & apparentes differant.

Color primitivus dicitur qui ab alio colore non derivatur: ille verò derivatus est & secundarius, qui ex pluribus aliis ortum habet permixtis & temperatis; unde quæstio quinam colores dici possint primitivi: denique quæ debeat esse dispositio mechanica partium corporis albi & corporis nigri: ubi sese offerunt plura naturæ miracula, circâ quæ vide Clarissimos *Boylium* & *Mariotte*, utrumque de coloribus disputantem.

A quo sit Color fugax & mutabilis.

Est, ut jam dictum est, à dispositione mutabili objecti proindeque à diversâ refractione: nam ab eo repeti debet quo posito berè intelligitur cur varientur colorum sensationes in animâ nostrâ: atqui dispositio partium objecti si sit facile mutabilis, tunc rectè intelligitur quomodò in animâ nostrâ varientur colorum sensationes: enimverò posito quòd dispositio partium objecti sit facile mutabilis, sequitur quòd facile mutantur tum refractione, tum reflexio luminis; & ex eo quòd ista duo facile mutantur, rectè sequitur quòd facile mutari possit commotio oculi; proindeque quòd in animâ facile mutantur colorum sensationes: ergo color fugax est à dispositione partium facile mutabili.

Hinc nihil est in quo sit color fugax & mutabilis, quòd non habeat dispositionem partium facile mutabilem: v. g. nubes plurimæ, colla columbarum, in quibus sunt plures plumulæ quæ pro vario situ variè reflectunt & refrangunt radios: idem patet in ampullis ex aquâ sapone impressâ formatis. Idem patet in filis tenuissimis araneorum soli expositis; quia ventus vel levis convexitates & con-

cavitates efficit in illis corporibus, & alias configurationes. Idem patet in calcis pelliculâ, idem in cupri laminâ igni admotâ quorum corporum partes insensiles motibus insensilibus agitantur.

Est quædam methodus quâ mutari possunt colores & in alios converti; sed ista tam diligenter exposuere Clariss. *Boyllius* & *Mariotte* in suis libris de coloribus, ut nihil addi possit.

Quomodo Color verus & apparens differant.

Si colores spectentur ex parte animæ, nullum est discrimen inter veros & apparentes: scilicet color sumptus ex parte animæ est ipsa sensatio interior concepta: porro color non dicitur verus vel apparens, ex eo quod sint sensationes colorum diversæ, sed quod color verus veniat ab ipsâ dispositione objecti colorati non mutatâ, vel per medium, vel per oculum; veniat autem apparens mutatione hujusce dispositionis; quod medio vel oculo aliter reflectantur & refringantur radii.

Ut autem excitentur in animâ colorum sensationes, neque necesse est absolute ut objectum coloratum extra nos positum agat, neque necesse est ut medium radios admittat: imò necesse non est ut

oculus commoveatur, sed sufficit ut organum immediatum eâ ratione commoveatur quâ commoveretur si objectum coloratum ageret per medium in ipsum oculum: hinc inter somniandum absente sole, neque illustrante aërem, neque agente in oculos, excitantur in animâ nostrâ variae sensationes colorum (idem dicas de aliis sensationibus odorum, sonorum, saporum, de passionibus doloris, gaudii, caloris) quas consequuntur relationes & testimonia quibus impressiones ipsas referimus ad partes organicas; quid autem simile sensationibus & ideis ad objecta quæ ideò putantur extrâ nos posita, & in nos agentia, licet tamen absentia sint, licet non agant neque afficiant organa externa; quod quidem infinitis experimentis confirmari posset, ut patet ubi de sensationibus. Hinc certè hæc omnia, quia organum immediatum & internum illarum sensationum, putà membranæ, capitis & nervi, commoventur, si forent præsentia objecta, si agerent in organa externa: hinc tam insolita & stupenda somnia; hinc deliria in iis qui febri ardente laborant, in quantum sanguis, perturbatè & intempestivè agitur, tanto nisu commovet nervorum fibrillas & membranarum, ut excitet in organis internis & immediatis motus illos qui sunt occasiones sensationum.

Si immotis oculis ista fiant in nobis; certè absente colorato nec illustrato medio; si commoveatur oculus, quâ ratione commoveretur à colorato præsente & illustrante medium, erit etiam in animâ sensatio prorsus eadem: hinc si oculus pugno percutiatur, excitatur in animâ sensatio lucis & ardentium flammularum, absentibus tamen flammulis.

Hinc etiam absente tali colorato, si medium ita mutet reflexionem & refractionem radiorum ut oculos afficiat & determinet, quâ ratione afficerentur præsente tali colorato, certè excitabitur in animâ sensatio qualis excitaretur si præsens foret tale coloratum: hinc interposito vitri rubri objecta rubra conspiciuntur, cærulei cærulea: hinc si flava bilis per medios oculi humores fluat, objecta flava conspiciuntur.

Hinc, pro diversâ dispositione mediorum, objecta diversa videntur. Hinc baculus rectus aquis immersus mediâ suâ parte fractus apparet, quia ipsi radii transeuntes ab aquis in aërem franguntur: hinc si medium faciat ut radii tangent diversas oculi partes, & coëant in diversis partibus, tunc objectum unum videbitur pro diversis partibus, binum; triplex, quadruplex &c. ut patet interposito vitrorum, quorum sunt plurimæ fa-

cies; unde si oculi digito contorqueantur, objectum binum conspicietur, ut exponetur: unde aliquandò qui vinum plùs æquò hausit, videt objecta bina, aliquandò ampliora & magis extensa: inde qui per aliquod tempus circulariter agitati sunt vident ambientia corpora pariter agitata circulariter: inde pavimenta videntur aliquandò attolli, tectum verò deprimi, si perturbatis humoribus oculi concutiantur & radii perturbentur.

Itaque color verus & color apparens differunt ex parte objecti quod dicitur coloratum, in quantum color verus pendet ex ipsâ dispositione objecti, unde mutatâ objecti dispositione, mutatur color verus: at verò apparens non venit ex ipsâ objecti dispositione.

Quinam Colores sint primitivi.

Albedo & nigredo habentur vulgò ut primitivi colores, ità ut alii omnes ex illis duobus emanare putentur.

Hamelius, Auctor veteris & novæ Philosophiæ, hanc Thesim in dubium revocat, quia, inquit, si propriè loqui volumus, nec albedo inter colores, nec nigredo numerari debent: scilicèt nigredinem dicit esse solam privationem luminis, albedinem verò non esse nisi vivi-

dam luminis reflexionem, quæ lumen non modificat sed integrum & illæsum relinquit.

Volumus profectò propriè loqui, nec tamen placet Hamelii sententia: numeramus quippè albedinem & nigredinem inter colores; nigredinem quidem, quia nigredo non est mera luminis privatio, ut dicetur postea; albedinem verò, quia non est ipsum lumen integrum & illæsum.

Itaque albedo & nigredo sunt primigenii colores, scilicet alii omnes non sunt nisi medii inter duas illas species: omnes resultant ex variâ modificatione illorum colorum temperatâ & mixtâ.

Qua sit Colorum Dispositio mechanica.

Quia albedo & nigredo sunt primi generis colores, fusiùs agam de mechanicâ dispositione quibus constituuntur.

Hactenùs constitit nobis ex variâ reflexione & refractione radiorum oriri in animâ nostrâ varias colorum sensationes: porrò inter colores nullus est qui magis accedat ad lumen quàm albedo, neque tamen est ipsum lumen, sed levior & minima lucis mutatio. Porrò ut corpus sit album, proindeque minima sit luminis mutatio, duo videntur requisita: primum est ut radios luminis ferè omnes

reflektat, alterum est ut indiscriminatim versùs partem quamlibet radios illos re-percutiat; videtur enim corpus album ex omni parte: porrò ut indiscriminatim re-percutiat radios in omnem partem, non debet esse corpus politum & tersum qualia sunt specula, quæ radios re-percutiunt duntaxat versùs unam partem: sed debet esse corpus asperum; & illud patet ipsâ experientiâ: v. g. aurifaber ut argentum albescat, ipsum reponit aliquandiu in aquâ calidissimâ certâ salis quantitate affectâ, quæ duo certè sunt corrosiva, & possunt argenti superficiem facere asperam: quòd si velit argentum albedine privare, lapide sanguineo fricat argentum, tunc enim lapis durus & levis ipsum argentum levigat; quo facto, albedo præripitur argento.

Ex quibus sequitur rem eò magis esse albam quò superficiem habet magis asperam, quò fortius radios re-percutiet in omnem partem: hinc nix est quàm maximè alba, quia, ut ipso visu constat, sed clarius microscopio, ipsius superficies tota aspera est, tota quasi parvis rupibus interrupta, ità ut non sint nisi vertices, cacumina & pyramides in ipsius substantiâ.

Color niger è contrariò est mutatio luminis maxima; ideoque corpus nigrum

maximè debet immutare lumen; quod quidem præstabit, si vix reflectat radios, aut si reflectat eos tam debiliter ut minimam faciant in oculi fundo impressionem: itaque corpus nigrum illud est cujus occurso lumen de suo motu maximè deperdit: porro lumen non potest de suo motu deperdere nisi tantum communicet quantum deperdit: ergo corpus nigrum illud est cujus partes sunt breves & tenues; nam partes illæ faciliè commoveri possunt à lumine, ideòque lumen earum occurso faciliè deperdit motum.

Hâc positâ dispositione mechanicâ corporis nigri, quæcumque phænomena rectè explicantur: 1^o. Flamma ex ligno carbonem facit nigrum: ratio est quia partes flammæ sunt quasi cunei acutissimi & cuspidales, quasi gladioli qui dividunt partes ligni & secant, ideòque breves illas & tenues faciunt: hinc lumen, dum cadit in illas partes, frangitur in ipsis aut saltem eas faciliè commovet: si commoveret, communicat motum; si communicet, deperdit; si deperdat, non ita validè reflectitur ad oculum, ideò debilis est oculi commotio: ergo debet esse in animâ sensatio nigredinis, & carbo debet videri niger.

Illud adeò constans est ut si partes interiores carbonis non fuerint factæ bre-

ves & tenues, quia flammæ cuspidēs ad eas nondum pervenerunt, tunc non sunt nigræ; hinc quædam carbonis partes quæ satis dividi non potuerunt, quia sunt nimis terrestres, fiunt quasi albicantes in superficie carbonis inflammati, & desinunt in cineres: plures autem sunt partes illæ albicantes, si carbo fiat ex ligno diutius in aquis posito, quia nimirum sales dissoluti sunt, & sulphura liquata sunt.

2°. Corpora nigra cæteris paribus minus gravitant quàm alba. Ratio est quia cum corpus nigrum partes suas habeat breves magis & interruptas, album autem habeat suas magis colligatas, certè sub eodem volumine corpora alba continent majorem copiam suæ materiæ quàm nigra.

3°. Ope speculi ustorii facilè nigra inflammantur, vix autem alba; unde si papyrum in quâ sint littæræ majusculæ objicias tali speculo, tunc inflammabuntur littæræ; & reliqua sine inflammatione manebunt: ratio est quia corpora nigra partes habent breves interruptas, alba verò colligatas; porrò partes illæ breves faciliùs commoveri possunt & simul cum igneis partibus agitari, proindeque ignescere.

4°. Panni nigri sunt calidiores quàm

albi, quia plures radii solares veluti extinguuntur in panno nigro, & transeuntes inter partes breves calefaciunt corpus; unde nigra tot radios non reflectunt quot alba.

Hinc intelligitur cur corpora nigra non resistant tamdiu quàm alba, cur facilius dividantur: quippè partes illæ breves & interruptæ constituentes corpora nigra faciliè possunt separari, ideòque faciliè cedunt.

Hinc etiam intelligitur cur fatigetur oculus diutius intuens corpora alba, semetipsum autem restituat si nigra intueatur; nam tot radios non reflectunt nigra, imò quos reflectunt sunt debiles, unde non est tam vehemens in oculi fundo impulsus.

Hinc intelligitur cur si domum intuearis cujus sint apertæ fenestræ, excitetur nigredinis sensatio in foramine fenestræ, quia omnes radii qui subeunt per fenestram non exeunt è cubiculo & reflectuntur versùs oculum.

Dices: plurimi sunt lapides albi qui suas habent partes breves & tenues quæ faciliè dividi possunt; dum è contrariò datur quidam lapis niger habens partes quæ vix separari possint.

Respondeo, lapides illos nigros esse magis terfos & politos quàm albos; unde quia non est eadem partium asperitas in nigris quæ est in albis, mirum non est

quodd nigri videantur : præterea hi lapides nigri plurimos habent poros quibus radii solares transeundo refrangi possunt ; unde quæ sit ab ipsis reflexio debiliior est : quodd autem poros habeant plures quibus radii transeant , patet quia est in illis quædam diaphaneitas ; unde licet partes eorum sint duriores , tamen & propter levitatem & propter transparentiam nigrum excitare debent colorem : imò si minor sit profunditas eorum lapidum , jam non apparent nigri , sed pellucidi ; deinde in poris illorum lapidum sunt plures partes salinæ ex quibus durities & sulphuræ , quæ collisione inflammantur.

Ex dictis de albedine & nigredine sequitur alios colores , prout magis vel minus accedunt ad albedinem & nigredinem , magis vel minus participare ex dispositione alborum & nigrorum , & resultare ex viâ luminis non quidem directâ , sed magis vel minus concavâ aut convexâ , ex partibus perturbatis & diversimodè commotis ; ideò si lumen transeat per prisma vitreum , ita ut radii declinent à viâ rectâ , tunc objectum videbitur partim cæruleum , partim flavum.

DE CALORE.

Cùm nostris credimus præjudiciis, tribuimus objectis, putà igni; certam qualitatem peripateticam quã sit ipse formaliter calidus; & eã petulantia id asseritur, ut vulgus irrideat eos qui nolunt ignem esse formaliter calidum, licèt fateantur ipsum esse caloriferum, quemadmodùm negant esse dolorosum, licèt sit dolorifer, id est, occasio doloris.

Quid sit Calor.

Calor ex parte animæ est sensatio specialis orta occasione alicujus impulsûs in partibus nostri corporis: hinc somniantes patiuntur sensationes caloris, si fiat ea in nervis & membranis commotio quæ fieri solet dum excitatur sensatio caloris.

Calor ex parte objecti est dispositio mechanica partium corporis sensationem caloris excitantis.

Calor ex parte medii est dispositio mechanica medii specialis, quã transfertur impulsus excitans sensationem caloris.

Calor denique ex parte organi est specialis ille impulsus in partibus organicis: his positis, sit

PRIMA PROPOSITIO.

Ut sit Calor , requiritur aliquis motus.

Pr. Nam in eo consistit calor , quòd reverà deprehenditur in corporibus quæ calida dicuntur , & quo sublato , jam corpora calida non sunt : atqui motus deprehenditur in partibus calidi corporis , & sublato motu , corpora calida non sunt : sic dum crus digito fricatur , calor concipitur , quo cessante motu , non est amplius calor : igitur calor in aliquo motu consistit ; enimverò si partes corporis calidi vehementissimè agitari debeant , calor consistit præsertim in motu : atqui partes corporis calidi vehementissimè agitari debent , v. g. aqua & alii liquores , dum calida sunt , sic moventur ut ebulliant : clavus ferreus malleo percussus calefcit , rotæ currûs vel ignem concipiunt dum celerrimè moventur : globus plumbeus explosus è tormento calorem incipit , manus affrictæ incalescunt : corpus ipsum , si moveatur , incalescit & in sudores abit. Idem constat si ferrâ lignum dividatur , si limâ poliatur , si funes in navibus agitentur qui aliquandò ignescunt : unde aqua marina , si tempestatibus commoveatur , tepefcit , aër africanus scintillat ,

nubes affricte fulgurant; ergo ut sit calor, requiritur motus.

SECUNDA PROPOSITIO.

Corpora actu calida postulant motum expansivum & perturbatum partium insensilium.

Pr. Nam judicari debet in eo calorem consistere, quo posito, intelligitur calor in corpore, & quo sublato tollitur: atqui posito motu partium insensilium expansivo celeri & perturbato, ponitur calor, & illo sublato tollitur: hinc si corpus nostrum prematur & perturbate agitetur à materiâ subtili, jam in animâ nostrâ attendente excitatur sensatio caloris, ut infinitis patet experimentis: sic quia per æstatem aër expansivè & perturbate agitatus commovet partes nostri corporis, est in animâ sensatio caloris: hinc ad præsentiam ignis excitatur calor; hinc si ore patulo auram sumas tunc erit sensatio caloris: at verò si ore contracto exfugatur aura, tunc erit sensatio refrigerans, quia tunc motus non est perturbatus & expansivus, sed rectus: si clavus malleo adigatur in lignum, non ita incalcescet dum penetrabit quàm cum jam adactus contundetur, quia cum clavus penetrat, motus non est tam expansivus

quàm cùm adactus contundetur; ideò calor est in axe rotæ non in circumferentiâ, licèt circumferentiæ partes rapidiùs moveantur. Nempe motus in axe magis est perturbatus & expansivus. Idem patet in ferro limato & plumbo: scilicèt si ferrum limetur, incalescit; si verò plumbum, tantus non concipitur calor à plumbo quantus à ferro. Ratio est quia partes ferri rigidiores sunt, & ideò non abraduntur facilè; ideò motus propter contumacem partium adhæSIONem magis perturbatus est in ferro quàm in plumbo. *Missa facio alia.*

OBJECTIONUM SOLUTIO.

Objicies 1. Liquores nitrosi & acidi multo spiritu abundant, fermentationem promovent adeòque partes habent insensiles in motu vehementissimo positas: atqui tamen non excitant sensationem caloris; ergo, &c.

Dist. maj. Partes habent insensiles in vehementissimo motu positas, non satis perturbato & in se reflexo ut excitetur calor, C. Satis perturbato & in se reflexo, N. Eodem modo distingue consequens. Itaque in liquoribus nitrosis & acidis motus est satis vehemens; sed cùm non sit satis perturbatus, illi liquores soli calo-

rem non procreant, sed si permisceantur cum aliis corporibus quibus perturbatus fiat motus, jam calor procreatur; putà si permisceantur cum salibus alkalinis, v. g. si spiritus nitri affundatur sali fixo, procreatur calor, quia hâc affusione motus fit perturbatus.

Præterea sunt quædam corpora quæ motum habent perturbatum, quæ tamen dum agunt in corpus nostrum non efficiunt in ipso motum hunc perturbatum, & ided calorem non excitant in nobis; quod ut explicetur, haud abs re futurum est si dicatur aliquid à nobis de corporibus prout in nostrum agunt, imò ne aberrem à proposito de ipsis liquoribus.

10. Sunt quædam corpora quæ corpus nostrum statim calefaciunt & postea refrigerant; ità sanè liquores sunt qui habent partes motu vehementissimo & perturbato agitas, quæ calefaciunt subito & postea refrigerant; nam ea calefaciunt quæ motum perturbatum & expansivum eliciunt, & ea refrigerant quæ faciunt ut motus sit perturbatus: porro quidam liquores, quia partes habent vehementissimo & perturbato motu agitas, faciunt ut motus sanguinis sit perturbatus; quia aut secum abripiunt, aut secant plurimos in sanguine liquores viscosos atque stomachi phlegmata quibus confusus & per-

turbatus erat sanguis: hinc si accipias spiritum vini affusum aquæ maximè refrigeratur corpus, quod certè incalesceret, si meram aquam haurires; quippè quæ in ore frigidissima sunt calorem sæpiùs in sanguine procreant, quæque calidissima sunt in ore, ea sæpiùs sanguinem refrigerant; ideo viator defatigatus itinere, etiam æstivo tempore ad ignem accedit, articulos crurum femorumque aspergit aquâ quæ dicitur aqua vitæ: nimirum sunt tunc in poris humores plurimi crassiores & viscosi, qui si remanerent, agerent in nervulos corrodendo, & perturbarent sanguinis motum in venulis arteriolisque; at ope ignis & ardentis aquæ humores attenuati dissipantur.

2º. Observari debet figuram partium maximè inservire ad sensationem efficiendam caloris; sunt enim corpora quædam quorum mechanica configuratio magis apta est ut procreetur in nobis motus perturbatus & confusus: hinc certis temporibus aër frigidior, quia ventus flat ex illâ parte ex quâ veniunt corpuscula, quæ non sunt satis cuspidalia ut motus procreetur perturbatus in partibus insensilibus nostri corporis, licèt tantum non habeant motum quantum alia; calidiora tamen sentiuntur, ut patet in pipere, tabaco, &c.

Obijcies

Objicies 2°. Motus caloris est potius orbicularis quàm perturbatus, ut patet in aquâ fervidiùs ebulliente.

N. Videlicèt ipse motus aquæ ferventis, qui dicitur orbicularis propter circumstantes aquas & aërem, est tamen perturbatus in omnibus suis partibus; ex quo concludere debemus motus in perturbatione esse posse varios, alios instar spirarum, alios instar fulgurationis, alios instar fermentationis, &c. qui possunt omnes sensationem caloris efficere.

Objicies 3°. Motus est varius & perturbatus in corporibus fluidis, v. g. in aquâ, aëre, argento vivo: atqui tamen ista corpora non sunt calida; ergo, &c.

Dist. maj. Non satis vehemens, C. Satis vehemens, N.

Ut intelligatur responsio, sciendum est corpora esse calida & frigida relativè ad nos & absolutè: deinde non sufficit quilibet motus perturbatus ad excitandam sensationem caloris, sed debet esse satis vehemens respectu nostrî: hinc quæ calida sunt respectu unius non sunt respectu alterius, imò unum & idem potest esse calidum & frigidum respectu ejusdem hominis, pro diversâ dispositione corporis; v. g. si diebus æstivis, cùm incalescit corpus, manus ponatur in aquâ extractâ recens è puteo, frigoris sensum intimum

patiemur: at verò si diebus hyemalibus, frigefcente corpore, ponatur manus in aquâ ex eodem puteo recens extractâ, excitabitur potius tepidi caloris sensatio quàm frigoris; neque, ut illud explicetur phœnomenon, debemus recurrere ad antiperistases, & asserere cum Peripateticis qualitatem frigoris per ætatem à qualitate caloris fortiori obsessam sese recipere in loca subterranea, dum per hyemem caloris qualitas vicissim oppugnata à qualitate frigoris sibi insensibilissimâ eadem petit loca: ad has, inquam, vias recurrere non debemus, sunt enim nomina quæ nihil explicant nec nos reddunt doctiores: itaque consequenter ad ea quæ superius posita sunt sic mechanicè solvi potest difficultas.

Sol diebus hyemalibus paucis horis lucet suprâ nostrum horisontem; radii ejus sunt maximè obliqui, ideòque materia subtilissima circumfusa circà nos est in motu minùs perturbato; ipsa minùs perturbat aërem & partes nostri corporis, dum è contrariò in locis subterraneis plurimæ partes minerales terræ, fumi, necnon subterraneus ignis materiam ponunt in motu magis perturbato quàm sint partes nostri corporis; ideò si aqua è puteo recens extracta tangatur, debet potius imprimere sensum caloris quàm frigoris:

at diebus æstivis sol diutius est suprâ nostrum horisontem, tantam non habet in suis radiis obliquitatem, magis perturbat materiam subtilissimam, adeoque aërem, adeoque partes nostri corporis; cum è contrariò aër in locis subterraneis sit minùs perturbatus: hinc cum aqua è puteo recens extracta tangitur, frigoris sensum excitare debet.

Ex his duo liceat inferre. Primum est fieri posse ut duorum hominum tangentium idem corpus unus afficiatur sensatione caloris, alter sensatione frigoris: si corpus quod tangitur à Petro partes habeat subtilissimas in motu positas magis perturbato & vehementi quàm sit in partibus corporis Petri, si perturbet partes Petri, erit caloris occasio in Petro; at verò si habeat partes subtilissimas in motu positas minùs perturbato & vehementi quàm sit in partibus corporis Pauli, si non perturbet partes Pauli, erit occasio frigoris in Paulo: unde si partes duæ diversæ ejusdem Pauli sint diversimodè agitatae, v. g. manus dextra & manus sinistra, poterit esse sensatio frigoris in unâ manu, sensatio caloris in alterâ. Caloris quidem si partes manus perturbentur contactu corporis, frigoris verò si minùs perturbentur: ergo pro diversâ texturâ partium corporis nostri, pro diversâ sanguinis agi-

tatione, corpora diversas excitant sensationes: hinc dum maximè incalescit corpus nostrum diebus æstivis, tunc frigoris sensum in hisce nostris regionibus patiuntur illi qui sub lineâ degere solent.

Alterum est deceptos fuisse Veteres, qui zonas frigidas volebant inhabitabiles propter nimium frigus, & torridam propter nimium calorem: decipi Peripateticos, qui Mercurium dicunt inhabitabilem, quia soli propior est, & Saturnum quia remotior est; nam præterquàm quòd hisce temporibus vidimus eas zonas esse habitatas, certè his positis de calore poterit non esse major caloris sensatio in incolis zonæ torridæ quàm in aliis, & major frigoris sensatio in incolis zonarum frigidarum: nam variarum regionum incolæ partes sui corporis habent diversimodè contextas, cutis & musculi diversis foraminibus cribrata sunt, imò sanguinis substantia est diversimodè affecta: unde fluidum in quo vivimus agit diversimodè in corpora nostra; quæ attemperantur huicce fluido & proportionem sumunt cum ipso; unde qui sani sunt in unâ regione, aliquandò non possunt esse sani in alterâ; quemadmodùm plantæ non vivunt in quibuslibet regionibus, quia pori radicum non sunt proportionati cum quibuslibet succis: pariter pori corporum nostrorum

proportionati non sunt cum quolibet fluido.

Præterea Providentia fecit ut in regionibus nascerentur ea quibus animalia, & vitam servare, & incommoda possint repellere: sic v. g. sub torridâ sunt exquisiti fructus, optimi liquores, quibus possit refrigerari corpus & ardor sanguinis temperati: hinc optandum foret ut unusquisque uteretur alimentis quæ sunt suæ regionis, nimirum assuescit corpus nostrum à primis nativitatæ diebus iis corporibus quæ ipsum circumstant.

Denique calor non est præcisè ex eo quòd soli propiores simus, neque frigus ex eo quòd simus remotiores: nam per æstatem sol nobis est remotior, & per hyemem propior. Præterea in supremâ aëris regione & in mediâ concrescunt nives, grandines quæ in infimâ liquantur: ergo calor & frigus veniunt potiùs ab obliquitate radiorum & à conditione atmosphæræ aëris circumfusæ globo terra-queo.

Itaque nihil absolutè calidum dicatur aut frigidum: nimirum ignis ipse potest videri frigidus, glacies autem comburens: nam si sit homo qui partes habeat suas in motu magis perturbato & vehementi positas quàm sint partes ignis, imò si ignis ita ageret ut ipse non perturbaret

humani corporis partes, certè videretur frigidus: at verò si partes glaciæ perturbentur, quod quidem fit cum partes nitrosæ insinuantur in poros, certè videri debet comburens.

Quotuplex sit Calor.

Celebrem caloris divisionem in potentialem & actualement explicamus: calor potentialis dicitur hæc corporis modificatio quâ corpus admixtum alteri ita fermentescit ut insignis calor concipiatur: sic calx viva dicitur esse potentialiter calida, quia si affundatur aqua, calor insignis concipitur cum ebullitione sensili & manifestâ; sic insignes sunt fermentationes liquorum nitrosorum, dum affunduntur corporibus alkalinis, sulphureis, ut experimentis manifestum fieri potest.

Verùm si nota sint hæc phænomena vel rusticis, non est pariter nota agendi ratio quam servat Natura in iisdem producendis.

Peripatetici grandibus vocibus suis remissam breviter conficiebant: non deficiebat antiperistasis, inerat calci vivæ calida qualitas pacificè vivens ut loci domina: at inest aquæ nativum frigus, aqua est naturale receptaculum & propria frigoris sedes: at inimicitia est essen-

tialis inter calorem & frigus: ergo, ubi primum aqua calci affunditur, exoritur pugna horrida inter duas qualitates, obsidet frigus, obsidetur calor: at ita pugnam sustinet ut frigoris impetum sustineat, omnes vires suas exerit, propellit aqueas partes: hinc fragor, ebullitio, donec victa procumbat; sed ita vincitur ut pereat ipsum frigus ex quo, viribus utriusque collapsis, fiant ex æquo pares, & in tepiditatem abeant.

Hæc magnificè prædicabant Peripatetici, sed his nihil intelligebatur.

Epicurei atomos igneas in calce delitescences, quæ naturâ suâ sunt leves, volatiles, huc illuc cursitantes in calce supponebant: partes illæ, dum aqua infunditur, omnino liberantur à suis vinculis, atque adeò exeuntes agmine veluti factæ, & intrâ partes aqueas huc illuc cursitantes, sic eas commovent, sed quædam ex illis in mediis aquis retinentur, & inde conciliatur aquis calor.

Nec placet nobis hæc Epicureorum opinio quæ dat corpora ex naturâ suâ gravia, levia, volatilia: supponit quippè quod est in quæstione positum.

Alia quæritur ratio: ut intelligatur, sciendum debet quomodo calx fiat. Calx oritur ex lapide albo, cujus partes non sunt tam asperæ, quæque possunt liquari seu ab

humani corporis partes, certè videretur frigidus: at verò si partes glaciæ perturbentur, quod quidem fit cum partes nitrosæ insinuantur in poros, certè videri debet comburens.

Quotuplex sit Calor.

Celebrem caloris divisionem in potentialem & actualement explicamus: calor potentialis dicitur hæc corporis modificatio quâ corpus admixtum alteri ita fermentescit ut insignis calor concipiatur: sic calx viva dicitur esse potentialiter calida, quia si affundatur aqua, calor insignis concipitur cum ebullitione sensili & manifestâ: sic insignes sunt fermentationes liquorum nitrosorum, dum affunduntur corporibus alkalinis, sulphureis, ut experimentis manifestum fieri potest.

Verùm si nota sint hæc phænomena vel rusticis, non est pariter nota agendi ratio quam servat Natura in iisdem producendis.

Peripatetici grandibus vocibus suis remissam breviter conficiebant: non deficiebat antiperistasis, inerat calci vivæ calida qualitas pacificè vivens ut loci domina: at inest aquæ nativum frigus, aqua est naturale receptaculum & propria frigoris sedes: at inimicitia est essen-

tialis inter calorem & frigus: ergo, ubi primum aqua calci affunditur, exoritur pugna horrida inter duas qualitates, obsidet frigus, obsidetur calor: at ita pugnam sustinet ut frigoris impetum sustineat, omnes vires suas exerit, propellit aqueas partes: hinc fragor, ebullitio, donec victa procumbat; sed ita vincitur ut pereat ipsum frigus ex quo, viribus utriusque collapsis, fiant ex æquo pares, & in tepiditatem abeant.

Hæc magnificè prædicabant Peripatetici, sed his nihil intelligebatur.

Epicurei atomos igneas in calce delitescences, quæ naturâ suâ sunt leves, volatiles, huc illuc cursitantes in calce supponebant: partes illæ, dum aqua infunditur, omninò liberantur à suis vinculis, atque adeò exeuntes agmine veluti factæ, & intrâ partes aqueas huc illuc cursitantes, sic eas commovent, sed quædam ex illis in mediis aquis retinentur, & inde conciliatur aquis calor.

Nec placet nobis hæc Epicureorum opinio quæ dat corpora ex naturâ suâ gravia, levia, volatilia: supponit quippè quod est in quæstione positum.

Alia quæritur ratio: ut intelligatur, sciri debet quomodò calx fiat. Calx oritur ex lapide albo, cujus partes non sunt tam asperæ, quæque possunt liquari seu ab

aquâ separari: lapides illi furnis imponuntur, ignis admovetur vehemens, quo diffatur humor, exsiccat lapis qui minùs ponderat & facîle fatiscit in pulverem, partes habens minùs colligatas, & est calx viva.

Porro hoc posito, constat non modò plurimas esse partes ignitas positas in poris & meatibus calcis; sed etiam attenuatas fuisse partes ipsius calcis & plurimas configuratas fuisse instar ignitarum: porro dum affunditur aqua, partes aquæ lubricæ, anguillarum instar, agunt undique in calcem, atque tunc calx sic compressa dissolvitur in partes minutissimas; sed in ipsâ dissolutione partes volatiles, tenues & subtiles commoventur, exeunt, & attolluntur, sicque commotio nascitur, ebullitio & fermentatio: hoc adedò constans est ut si calx viva non sit, id est, si diutiùs fuerit asservata, non sit eadem ebullitio, quia partes volatiles in auras abierunt.

Hoc phænomenon repeti non posse à frigore aquæ, inde constat quòd si calida affundatur, non minor futura sit ebullitio.

Calor actualis est illa corporum modificatio quâ corpus se solo & independentè ab aliis calorem excitat.

DE FRIGORE.

Quia opposita juxta se posita magis elucescunt, ideò jam disputatur de frigore.

Peripatetici frigus qualitatem dixere. Sed ista jam vidimus.

Alii dixerunt frigus esse caloris privationem, sed hoc apertè falsum est; nam frigus ex parte animæ est quædam sensitio positiva, ex parte nostri corpus est specialis impulsus, ex parte objecti quod dicitur frigidum est quædam objecti dispositio positiva.

Hæc objecti positiva dispositio in composita est quod partes insensiles corporis frigidi moveantur, aut motu perturbato, sed minùs vehementi, aut motu qui non sit perturbatus: inde duplex species frigidorum; prima eorum est quæ partes habent in motu perturbato positas, sed minùs vehementi: secunda eorum est quæ partes habent in motu positas, sed minimè perturbato, motu qui mutet determinationem partium corporis calidi.

Frigus suas habet proprietates: condensat dura, dilatat liquida.

Dura condensat, ut patet ex marmoribus, lignis, quæ per maxima frigora coarctantur: hinc, meo quidem judicio, quia materia subtilis delitescens intra poros

illorum corporum & viscera perreptans tantam non habet agitationem tempore frigido quam habet calido: unde partes ipsius crassiores poros non subeunt, sed potius offendunt in partes solidas, & ideò comprimunt illas: at verò dum tempestas calidior est, hæc materia vehementius agitata rapit secum impetu vehementissimo partes suas crassiusculas quæ poros angustiores dilatant. Hinc corpora quorum partes non sunt firmissimè colligatæ & compactæ, v. g. carnes, corrumpuntur.

Hinc explicari potest cur caro diutius integra maneat tempore hyemali quàm æstivo; tunc enim sola materia subtilis facilè repit per poros carnis, nec aër agitated eadem vi partes disgregat, quanta per dies materia subtilis trahens secum partes aëris quarum figuræ & moles non benè conveniunt cum poris carniū, facit ut partes carnis divellantur, transponantur, facit, uno verbò, ut fiat corruptio.

Adeò verum est corruptionem carniū tam subitam esse à partibus aëris crassioris quas rapit secum materia subtilis, ut si caro vel per æstatem ferventissimam asservetur in machinâ pneumaticâ, ex quâ extractus est aër crassior, non subiciat facilè corruptioni, sed per menses plures permaneat sine corruptione. Itaque

non fingimus ad arbitrium partes illas aëris crassioris fluitare in maximo fluido subtili, & esse occasiones corruptionum & generationum, hoc enim non repugnat magis quàm trahere secum plurimas terræ partes, imò arenosas & lapideas.

Quòd si caro salibus aspersa fuerit, diutius conservatur & deffenditur à corruptione, quia partes salis, quæ duræ sunt & rigide, quasi columellæ leves duritiem conciliant carnibus, in quantum partes carniū consociant & quasi catenæ & vincula fasciculos vibrarum secum invicem compingunt, ut patebit ubi de salibus: inde partes aëris crassiores quas rapit secum materia subtilis non possunt subire per poros carniū, qui facti sunt colligatione angustiores.

Inter illas partes quædam sunt magis corrumpentes, putà nitrosæ, sulphuræ, quibus impregnatus est aër, inde corruptio major cùm aër fulgurat.

Quòd frigus dilatat liquida, patet ex aquâ congelatâ & aliis liquoribus: nempe 1°. aqua congelata, si liqueſcat, tantum non occupat spatium quantum prius occupabat. 2°. Tota spongiosa videtur, & quandò frangitur, plures bullæ deprehenduntur: denique aqua congelata innatat aquæ liquidæ.

Phænomeni ratio est quia in aquis &

L. vj

in cæteris liquoribus plurimus est aër ipsi nativus, ut experimentis demonstrari potest: aër iste tempore frigido non ita premitur à materiâ circumstante, & idè vi suâ elasticâ dilatatur, fiunt bullæ, & augetur volumen; idè vitrum & alia vasa in quibus continetur liquor sæpiùs franguntur, idè congelatus liquor debet supranatare.

Hoc phænomenon ab ære in aquis inclusum repetendum esse probari potest ex eo quòd si aqua congelatur, aëre crassiori expurgata, vitra non franguntur.

Liquores multis spiritibus abundantes, & quorum sunt partes tenuiores, difficiliùs congelantur propter irrequietos illorum spirituum motus, & difficiles partium tenuiorum adhæsiones: hinc si vinum Remense congeletur, pars vini magis spirituosâ se recipit in amphoræ medium, mediam inter glaciem, pars est vini robustissima & generosissima, ut ex odoratu & gustu constat.

. DE SICCITATE:

Siccitas ex parte animæ est sensatio quædam orta ex affectione speciali nostri corporis: siccitas autem ex parte objecti est specialis objecti dispositio, cujus contactu est in corpore nostro dispositio quæ

occasio est sensationis siccitatis in animâ nostrâ.

His positis, duo excitantur dubia. Primum: quid corpori nostro convenire debeat ut sit in animâ sensatio siccitatis; alterum: quæ sit dispositio objecti cujus occasione oritur hæc dispositio nostri corporis.

Circâ primum, res est difficilis, quam conjecturis breviter absolvo.

Ex parte nostri corporis humores debent difflari, & cutis suam mollitudinem amittere debet. Hæc propositio videtur constare experienciâ; tum quia quoties cutis mollitudinem amittit suam, siccitatis sensationem patimur, tum quia toties mutatur siccitatis sensatio, quoties humida agunt in corpus nostrum: hinc ignis siccus est, quia difflat humores & tollit carnis mollitudinem: idèd mollitudo carnis est signum humidi temperamenti, ut patet in pueris, in mulieribus, & in viris pinguioribus; asperitas autem cutis & ariditas signum est temperamenti sicci & ut plurimum robusti, ut videre est in agrestibus, in viris militiæ servientibus calore solis exsiccatis.

Ex parte objecti, quod alterum dubium est, siccitas est vis difflandi partes humidiores corporis: sed vix definiri potest in quânam dispositione mechanicâ vis

illa consistere debeat, tum quia corpora quædam exsiccant alia, alia liquefaciunt; unde vis illa relativa est & pendet ab ipsis corporibus in quæ agit: sic ignis exsiccat lutum, liquefacit ceram.

Quanquam hoc certum est, objectum illud partes habere positas in vehementissimo motu, quæ nimirum abripiunt partes nostri corporis motui magis idoneas: sic lutum exsiccat ab igne, sic massa ex quâ fit panis, quia partes aquæ attenuantur & abripiuntur: quod si idem ignis ceram liquefaciat, hinc est quia partes ceræ sunt viscosæ, oleosæ, pinguiorres, & sibi intertextæ aliæ aliis, instar ramulorum sibi mutuò implicatorum. Inde non possunt ita faciliè abripi & dividi nec non attenuari; sed tamen si diutius cera objiciatur igni vehementissimo, diffillantur partes molliores & non remanent nisi fex ceræ.

DE FLUIDITATE.

Fluiditas ex parte animæ est specialis sensatio orta occasione corporum quæ fluida dicuntur, cum nimirum illa corpora successivè agunt in corpus nostrum sine ullâ interruptione.

Quæritur quænam sit mechanica corporum quorum occasione excitatur fluidi-

tatis sensatio; & quia fluidum illud est quod faciliè cadit manibus & dividitur, difficultas est quæ sit Mechanica corporis faciliè cedentis manibus. Sit

PROPOSITIO.

Dispositio mechanica corporis fluidi hæc est quòd ipsius partes sint exigue, quòd figuram habeant quâ motus non impediatur; quòd moveantur à materiâ subtilissimâ.

Pr. Nam in eo posita est Mechanica fluidi, quo posito, corpora faciliè cedunt obviis manibus & dividuntur: atqui posita partium exiguitate, posita figurâ partium, quæ motum non impedit, posito denique motu in illis partibus communicato à materiâ subtilissimâ, intelligitur quomodò corpus faciliè cedat manibus obviis, faciliè dividatur.

1°. quidem partium exiguitas maximè confert ad fluiditatem: nam si partes sint majusculæ, non possunt faciliè moveri: è contrariò pulveres tenuissimi liquorum speciem præbent, ut videre est in arenulâ clepsydrarum: hinc si comminuas solida corpora & dividas, fluida fient: sic ignis metalla dividens ea reddit fluida, sic aquæ fortes divisione partium fluiditatem conciliant solidis corporibus;

hinc corpora viscosa, v. g. ovorum albumina, crebrius agitata, fiunt magis fluida.

Deinde verò figura partium multum confert ad fluiditatem; quippè ratio figuræ facere potest ut partes magis vel minus secum cohæreant: ad fluiditatem autem requiritur in partibus insensilibus parva vel nulla cohæsiō: hinc conjicere licet partes corporis fluidi insensiles ad figuram rotundam cylindricam, & alias leves magis accedere, ex quibus textura resultat, quâ possunt à materiâ subtilissimâ commoveri: porro si hæc textura aliquandò mutetur, corpora ex fluidis fiunt firma; v. g. spiritus urinæ eductus leni calore, postquam diu fermentatus est in vase occluso hermeticè, si jungatur cum spiritu vini purissimo, concrescit in nivis speciem: sic spiritus salis & albumen ovi agitata, si permisceantur, fiunt solidum corpus; ex quo Physici plures probabiliter voluerunt partes duras & stabiles pulli ex albumine ovi formari: ergò figura in partibus multum confert ad fluiditatem corporum.

Denique partes fluidi insensiles debent moveri. Proportio patet experientiâ, v. g. glacies non est fluida, quia non habet partes in motu satis vehementi positas, aut oleum quod gelascit fluidum fiet si

commoveatur : hinc omnia corpora fluida partes habent insensiles in maximo motu positas ; v. g. aqua , ut patet ex eo quod exagitet divellatque saccharum , sales , quanquam vis ejus tandem debilitatur.

Hic non erit inutile observare : 1^o. Motum esse partium insensilium vehementem in liquoribus , licet motus ille non sit oculis conspicuus : sic v. g. acetum impone orbiculo usque ad margines : pone circa margines lapillos quosdam planos ; rapiuntur lapilli ab aceto à margine ad centrum , & quidem lineâ rectâ ; sic aqua regalis dissolvit aurum ipsum , aquæ fortes argentum : unde quæ nostris viribus sunt indivisibilia , ea cedunt liquorum viribus. Nimirum partes insensiles liquorum certâ ratione configuratæ , extremitatibus suis acutiores , in solidorum poros intromittuntur , & vim faciunt singulæ in singulorum pororum latera , qui proinde ampliantur ; unde fit divisio , proindeque dissolutio.

Hinc 2^o. observabis ad illas dissolutiones faciendas à fluidis non tantum requiri motum partium insensilium vehementem , sed etiam quandam veluti proportionem inter partes insensiles fluidi dissolventis & poros corporis dissolvendi ; v. g. aqua regalis eam non habet vim quam aquæ fortes , non est ita corrosiva :

tamen aquæ fortes non possunt aurum dissolvere, quod potest dissolvi ab aquâ regali: aqua vitæ suas habet partes insensiles in majore motu positas quàm aqua communis, & tamen aqua vitæ tam faciliè non dissolvit saccharum quàm aqua communis, quia nimirum pori sacchari sunt patentiores, per quos facillimè partes ardentis aquæ transeunt; divulsionem partium non efficiunt quam procreant partes aquæ: ergo in partibus insensilibus fluidi dissolventis debet esse quædam proportio inter partes illas & poros corporis dissolvendi.

Hinc iidem cibi qui dissolvuntur à ceris animalibus vix ac ne vix quidem ab aliis dissolvi possunt, quia videlicet non est proportio inter poros alimenti dissolvendi & partes insensiles dissolventis, putà salivæ in ore & liquoris stomachalis; sicque de aliis solventibus. Hinc aquæ minerales, quæ sunt quibusdam maximè salubres, quia faciliè fluunt propter dispositionem canalium & configurationem cribrorum & glandularum, sunt aliis maximè noxiæ, quia canalium, cribrorum & glandularum conveniens non est dispositio, configuratio, quia sunt obstructions quibus impeditur fluxus.

Ubi de metallis, dicam cur aqua Regalis dissolvat aurum, non verò aquæ

fortes: sed interim liceat annotare corpora duriora multis foraminibus esse cribrata, per quæ non modò materia subtilis fluit, verùm etiam per quæ extremitates dissolventium insinuantur.

His positis, quærunt Physici à quo sit motus ille in partibus insensilibus corporis fluidi.

Respondet Peripateticus esse à formâ substantiali in fluido residente, quæ sit principium activum motûs & quietis ejus in quo est primò per se & non per accidens: sed ista verba non faciunt nos doctiores.

Respondet Epicureus quasdam esse atomos quæ ingenitam habent sibi determinationem, quâ sic fluunt & se tenent divulsas; sed ista ratio peior est, idque demonstravi tum in *Metaphysicâ*, tum in *Physicâ generali*.

Itaque respondeo cum Cartesianis motum hunc esse à minutis & globulis; cum enim partes fluidorum sint ad motum & quietem indifferentes, non sunt principium sui motûs, sed aliunde motum accipiunt; porrò non possunt ab alio accipere quàm à minutis & globulis, quæ quoquoversum diffusa & celerius agitata inter partes insensiles fluidorum, exagitant illas & commovent, ita ut pro diversitate configurationum sequan-

tur in illis partibus varia phœnomena.

Minutiarum & globulorum existentia oculis quidem non habetur, sed experimentis constitit, & constabit amplius adhibito ratiocinio: undenam autem minutiarum & globuli suum habeant motum, si quæras, ne in infinitum abeat responsio, dico, consequenter ad ea quæ jam dicta sunt, motum esse ab ipso Deo, qui conservat eum in minutiis & in globulis.

OBJECTIONUM SOLUTIO.

Objicies 1°. Si fluiditas oriretur ex motu perturbato, non differret à calore. Absurdum consequens, cum multa liquida sint frigida, ergo, &c.

Dist. maj. Si oriretur ex motu perturbato satis vehementi, quique perturbaret ipsas corporis nostri partes, C. secus, N.

Itaque ut habeatur calor, non sufficit quilibet motus perturbatus, sed debet esse perturbatus, ita ut partes corporis calidi variis percussionibus & repercussionibus sibi occurrant & sese repellant, ita ut ille motus perturbet ipsas corporis nostri partes: patet ex calore concepto circa axem rotæ, patet ex clavo jam adacto qui adhuc contunditur. Hinc figura furnorum debet esse concava, ut aer inclusus agitur repellatur variis collisio-

nibus in unum quasi centrum : porro in fluidis quidem , præcisè ut fluida sunt , sunt reverà partes quarum aliæ perpendiculariter fursùm & deorsùm tendunt ; aliæ sunt horisontales , aliæ vias obliquas infiniti generis percurrunt , sed sibimet non nocent in variis illis determinationibus , adeòque in fluidis , ut fluida sunt , non datur is motus qui requiritur ad calorem.

Objicies 2°. Materia quæ liberum habet transitum per poros corporis non debet illius partes agitare ; sed materia subtilis liberum habet transitum per poros corporis fluidi , qui plurimi sunt & patentiores : ergo non debet agitare partes corporis fluidi.

Dist. maj. Materia quæ secundùm omnes suas partes liberum habet transitum per poros corporis fluidi non debet partes illius agitare , C. Quæ liberum habet transitum secundùm aliquas tantùm partes , N. Porro materia subtilis liberum quidem habet transitum per poros fluidi corporis secundùm aliquas partes ; sed non habet secundùm omnes , & ideò tangit partes insensiles fluidi corporis , quæ cùm inter se cohæsiõnem non habeant , commoventur : inde fluiditas.

DE LEVITATE.

Diximus ignem esse levem : Quæritur quid sit levitas.

Voluere Peripatetici levitatem & gravitatem esse certas corporum proprietates quæ manarent ab eorum propriâ formâ substantiali, quia, inquiunt, lapis amat centrum, ignis autem petit circumferentiam vorticis & tendit ad lunæ concavum; quâ in re ad occulta pro more suo recurrunt mysteria: in re, inquam, mechanicâ & merè naturali; qui quidem explicandi modus non facit nos doctiores, imò veritati repugnat apertè: enimverò nullum corpus habet in se principium motûs, quantitatis motûs & determinationis: porro gravitas & levitas non sunt nisi motus cum suâ determinatione conjunctus.

Quamobrem Epicurei malè ratiocinantur cum levitatem repetunt à naturâ quarundam atomorum quibus placet tendere versùs circumferentiam pro ingenitâ suâ levitate.

Mentem meam sic expono. Corpus in se præcisè nec leve est nec grave, est enim indifferens ad motum & quietem, ad hanc vel illam quantitatem motûs, ad hanc vel illam loci partem: itaque cor-

pus illud leve est quod relictum sibi juxta dispositiones mechanicas hujusce nostri vorticis tendit ab ipsius centro ad circumferentiam; & illud grave est quod juxta easdem dispositiones tendit versum centrum.

Hinc idem corpus leve & grave: leve quidem respectivè ad alia corpora; & in eo sensu ignis gravis à nobis dicitur, nam istà Mechanicà hujusce vorticis recedit à centro versum partes superiores & ad circumferentiam; sed positus in aliquà parte circumferentiæ vorticis, eadem Mechanicà, forsan descenderet, sicque fieret gravis.

Difficultas igitur est quænam sit dispositio mechanica hujusce vorticis quâ fiat ut quædam corpora descendant versum centrum, ascendant autem alia versum circumferentiam, quâ fiat ut idem corpus respectivè ad diversa fluida ascendat vel descendant: de quo quidem phænomeno disputabitur ubi de gravitate corporum.

Hæ sunt præcipuæ affectiones ignis ex quibus ipsius natura pendet, sed variæ ignium species: ignis autem omnium perfectissimus & purissimus est sol, proindeque stellæ fixæ: de iis dictum suprâ. Sed sunt ignes nostri varii pro varietate pabulorum ex quibus generantur.

Quæri potest ex quibus partibus consistent ignes nostri: particulæ terrestres,

cujuscumque sint magnitudinis aut figuræ, cum singulæ seorsim primi elementi motum sequuntur, ignis formam habent; crassiores tamen, si continuè non agitentur, pondere suo deorsum labentes hanc formam spontè exuunt: porrò ignis noster esse nequit sine crassiusculis corporum terrestrium particulis, quibus alatur & renovetur: excitatur ignis noster quatenus expelluntur aliquâ vi globuli cœlestes ab intervallis particularum aliquarum terrestrium, quæ deinde ab invicem disjunctæ in solâ materiâ primi elementi natant, celerrimo ejus motu rapiuntur & quaquaversus impelluntur: conservatur autem quatenus particulæ terrestres satis crassæ & solidæ, ad motum tamen aptæ, ita à materiâ primi elementi impelluntur, ut globulos cœlestes repellant ab illâ materiâ in quâ est ignis, & impediant quominus isti globuli occupent intervalla prius relicta à primo elemento: nam si occuparent, ignem extinguerent: sed requiritur tandem alimentum; nam dum particulæ terrestres impingunt in globulos, non possunt ab illis impediri ne ulteriùs pergant, tuncque egressæ ex loco in quo primum elementum suas exercet vires, ignis formam amittunt & in fenum abeunt.

Ut hæc accuratiùs consideret Cartesius, spectat

ſpectat quomodò ignis ex ſilicibus excutiat; quomodò ex lignis ſiccis naſcatur, quomodò ex collectione radiorum ſolis, quomodò in fulmine & aliis plurimis.

De aliquibus eò loci dicam, cætera datâ occasione proſequar.

1^o. Silices ſunt ſatis duri & rigidi ſimulque ſatis friabiles: quia duri ſunt & rigidi, ſi percutiantur à corpore duro, pori pleni globulis ſecundi elementi ſunt anguſtiores, & ideò globuli exiliunt.

2^o. Quia ſunt friabiles, ictu vel uno compreſſæ particulæ diſſiliunt ab invicem, & innatantes primo elemento ignem componunt.

Si percutias lignum quantum volueris non ideò ita ſcintillabit: nam globuli ſecundi elementi eodem tempore ex ipſius intervallis non diſcedent, ſed nunc ex uno intervallo, nunc ex alio ſucceſſivè: itaque ſatis validè fulcari debet, partesque ipſius diſjungi ut quàm celerrimè à materiâ primi elementi rapiantur: ſic ſi radii ſolis colligantur in unum, ope ſpeculi concavi, ſatis habent virium ad particulas corporum terreſtrium eadem iſtâ celeritate commovendas: unde terreſtres particulæ quæ nondum primo elemento innatant, ſi innatare incipiant & excutiant globulos ſecundi elementi extrâ ſe poſitos, ſtatim excitabitur ignis, adeoque omnis

motus valdè concitatus ad ipsum excitandum sufficit. Quanquam hoc pateat plurimis experimentis, v. g. in guttis aquæ marinæ quandò quædam ipsius partes leves ac frigidæ spiculorum instar vibratæ, vi tempestatis expellunt globulos secundi elementi è suâ viciniâ: v. g. in lignis putridis & piscibus, qui siccitatem acquirunt dum partes fiunt breviores, ita ut meatus fiant tam angusti ut solum primum elementum admittant: tamen requiritur in aliis plurimis quorundam corporum mixtura ad excitandum ignem, ut videbitur ubi de meteoris: porrò inter varia ignis pabula præcipua sunt oleaginosa corpora, v. g. oleum, cera, adeps, &c. sunt nitrosa, sunt spirituosæ, & alia de quibus agetur.

DE AERE.

Aër alterum est elementum Peripateticorum; ab illis dicitur humidissimus & insigniter frigidus; à nobis autem corpus naturale liquidum, diaphanum, elasticum, rarum & grave. Igitur ut natura aëris intelligatur, debemus scire quid sit liquiditas, in quo consistit ratio diaphani, in quo vis elastica, in quo raritas; & tandem agendum de ipsius gravitate.

DE LIQUIDITATE.

Liquiditas, ex parte corporis quod liquidum dicitur, est forma quædam seu dispositio mechanica, quâ tale corpus vocitatur liquidum: porro maximè accedit ad naturam fluidi; & quæcumque de fluido diximus, de liquido dici debent.

10. Partes liquidi corporis, insensiles poni debent in motu satis vehementi: hic autem motus in igne oritur præsertim à materiâ primi elementi; in aëre autem, à materiâ secundi elementi; in aliis corporibus liquidis, ab utroque elemento.

20. Partes corporis liquidi debent proinde esse intercissæ & divulsæ; ideòque debent innatare materiæ subtili sive minutarum, sive globulorum.

30. Partes illæ debent habere exteriorem configurationem quæ sit motui magis accommodata.

Quanquam, ut liquorum naturam melius cognoscamus, juvat eò loci aliqua de liquoribus addere.

Liquores vel sunt macri vel sunt pingues: liquores macri partes habent quæ faciliè separantur ab invicem, ideòque figuram habere videntur quæ levis sit, non aspera: ubi de aquâ, aceto, vino & aliis liquoribus, persequar fusiùs quæ sint liquoris macri proprietates.

M ij

Pingues habent partes quæ difficiliùs separantur, quarum figura irregularis: ubi de oleis, gummi, bituminibus agitur, dicam quid maximè pertineat ad viscositatem partium.

Unum hîc exponam; nempe liquores macros difficilè ligari cum pinguibus, ità ut si per aliquod tempus commorentur simul, fiat quædam commissura quæ facilè desinit, quia mutuò separantur illi liquores & quilibet in suum abit corpus: v. g. si oleum immisceatur aquæ, aceto &c. fit ex agitatione quædam partium confusio, sed agitatione desinente, partes olei simul congregantur & in unum corpus.

Hujus phænomeni ratio est, tum quia partes olei quæ sunt totidem ramuli mutuò implicati, compressæ à materiâ subtili penetrante & diffusâ, debent tandem congregari, tum quia partes illæ diversi ponderis supernatare debent aquis, & idèò congregari.

Explicantur Phænomena circà liquores.

- Cùm aqua infunditur vitreo scypho benè terço, hæc paulatim assurgit circà vitri parietes, idèòque superficies ejus fit concava: quamobrem si duas bullas vitreas ponas in medio scyphi innatantes

aquis, accedent illæ ad margines scyphi; quòd si scyphus non sit tersus, aqua paulatim deprimitur circà scyphi parietes ideòque superficies aquæ fit convexa.

Explicatur. Dum scyphus est benè tersus, aqua immediatè tangit superficiem scyphi, ideòque inter aquam & vitrum non est spatium interjectum, & consequenter vitri poris faciliè adhæret aqua, quæ fortius premitur in medio; proindeque attollitur paululùm versùs margines, ad quos ideò globuli accedere debent: cùm scyphus pinguis est, jam aqua non tangit immediatè superficiem ejus; ideòque aër jacet inter aquam & margines scyphi, proindeque vim suam exerit in partes aquæ ad marginem positas, & facit ut deprimantur.

Secundum sic habet: Si scyphus benè expurgatus plenus sit aquâ, tunc superficies aquæ debet esse ubique plana.

Explicatur. Quia ex omni parte aër premit æqualiter, neque inter scyphi parietes & aquas positæ sunt aëris columnæ.

Tertium sic habet: Si scyphus sit pinguis & plenus aquâ, tunc superficies aquæ fiet convexa.

Explicatur. Quia cùm aqua intimè non adhæreat scyphi parietibus, & columnæ aëris sint inter vitrum & aquam, certè sustinet aquas & ad margines exerit vim

suam, propellitque aquas versùs centrum: quòd si globuli vitrei aquis imponantur, tunc ad centrum accedent.

Ex his patet convexitatem aquæ in illâ hypothesi immeritò repeti à Peripateticis ab amore continuitatis, independenter à mechanicis dispositionibus, cùm ferè nulla sit convexitas in superficie aquarum, si scyphi sint terfi.

Occasione illorum globulorum addi potest: tendunt versùs locum altiore & sibi conjunguntur: at verò si ambo cerei sint & pingues, in locum depressiorem descendunt & sibi conjunguntur. Hinc si unus sit vitreus & alter pinguis, tunc vel ad motum sese impellent quasi forent inimici & infensi.

Ratio est quia circà globulos vitreos aqua attollitur, proindeque locum altiore vitreus petit: at verò aqua premitur circà pingues & cereos: igitur cereus petit locum depressiorem; nec aliqua debet admitti antipathia aut sympathia inter globulos quàm hæc à mechanicis affectionibus profecta.

Ex hoc quòd vasa quæ continent liquores sint vel non sint repurgata, diversa habentur phænomena: nam atramentum descendet potiùs quàm assurgat & in bullas coïbit: at si pinguedinem tollas, ubi calamus tetigerit atramentum, illud per rimulas ascendet benè sparsum.

Hujus phœnomeni ratio nulla est quàm adducta, quia videlicet atramentum non tangit immediatè calamum pinguem, & ideò calamum inter & atramentum aër positus æqualiter ex omni parte premit & facit ut atramentum coëat in bullas: at tangit immediatè calamum non pinguem, ideòque cùm non tanta sit vis aëris positi inter rimulam quanta est vis aëris prementis ex aliis partibus, atramentum debet ascendere & benè spargi, partes enim insensiles innituntur calami poris: sic pariter, si in syphone inverso cujus crus longius & alterum crus brevius, infundatur aqua per orificium, aqua ascendet in crure breviori, altius si nitidum sit, quàm si sit oleosum.

Hujus phœnomeni non est alia ratio quàm quæ fuit adducta.

Quartum phœnomenon. Quòd si calx viva aquâ imbibatur, mollis illa sit, è contrariò indurescit gypsum.

Explicatur. Partes calcis vivæ ante effusionem aquæ jam minutissimæ sunt, quàm maximè molles, friabiles in maximo motu positæ; proindeque dum accedit aqua, facilè divisionem ponit inter partes illas, nec multùm de suo deperdit motu, adeò ut non supersit nisi mollities. At verò partes gypsi duræ sunt, satis crassæ & maximæ; hinc dum infunditur aqua, illæ

sefe insinuat inter partes gypsi quas dividit; sicque superficies fiunt multò ampliores, motus fit insensibilis quia communicatur, evaporantur partes subtiliores, fit transpositio partium, immutantur figuræ, sicque tandem durities accedit.

Adeò hoc verum est quòd si aqua copiosior gypsum imbueret, id est, ut nostri artifices loquuntur (*si le plâtre est noyé*) vix gypsum indurescit, & nunquam, nisi partes humidæ alienæ factæ aut partes transmutatæ fuerint, indurescit.

De ipsâ Aëris Liquiditate.

Liquiditatem corporum descripsimus, fatisque patet quòd pro variis liquoribus debeat esse varia partium configuratio, varia motûs quantitas, varia determinatio: porrò quàm sit difficile assequi accuratè varias illarum partium configurationes, varias motuum quantitates & determinationes, inde colligere possumus quòd nullo organo, nullis instrumentis hoc ipsum possumus percipere; sed prout occasio dederit ex effectibus notis augurari conabor quænam sit corporis liquidi dispositio mechanica, atque cùm eò loci sermo sit de aëre, existimo aëris particulas quæ sunt tertii elementi esse breves, inftar pilorum barbæ, non longiores &

amplificatas, instar capillorum incomp-
torum, esse illas cylindricas & teretes,
& aliquandò in utrâque extremitate acu-
tas, non ramosas, non inflexas, quia
aliæ aliis adhærescerent facilè; quod ad-
mitti non potest, debent enim quoquo-
versum moveri à globulis quibus maxi-
mè disjunctæ & tenues innatant.

DE RATIONE DIAPHANI.

Quædam corpora sunt opaca, quædam
perspicua. Hic quæritur quid sit perspicui-
tas: circà quam difficultatem variæ sunt
Physicorum opiniones; sed ex nostris prin-
cipiis facilè colligi potest perspicuitatem
corporum esse corporis dispositionem me-
chanicam. Itaque in eo posita est difficul-
tas ut sciamus quænam sit dispositio me-
chanica partium corporis perspicui. Hæc
ut tollatur, sit

PROPOSITIO.

*Dispositio mechanica corporis perspicui con-
sistit in pororum recto tractu, qui velut
totidem canaliculi materiæ æthereæ pleni,
lumen continent & transmittant.*

Pr. Nam in eo consistit mechanica dis-
positio corporis perspicui, quo posito,

M v

faciliùs intelliguntur quæcumque in corporibus perspicuis observantur phænomena: atqui rectus pororum tractus, qui velut canaliculi materiæ æthereæ pleni continent lumen, est dispositio mechanica quâ intelliguntur faciliè quæcumque observantur in corporibus perspicuis phænomena. Etenim non aliâ de causâ corpus dicitur diaphanum quàm quia sensibilibiter penetratur lumine, quod diximus consistere in recto & perturbato motu materiæ subtilissimæ: atqui non potest meliùs concipi corpus aliquod sensibilibiter penetrari lumine, quàm admittendo rectos pororum tractus, qui velut canaliculi quidam materiam subtilissimam contineant & eatenùs luminis continuacionem & transitum contineant: ergo dispositio mechanica partium, in quâ consistit ratio diaphani, est rectus pororum tractus in corpore quod dicitur diaphanum.

Itaque cùm aër sit corpus diaphanum, debemus intelligere plures in eo poros esse atque meatus rectos qui pleni sint materiâ subtilissimâ seu æthereâ; quod jam suprâ dictum est, quia partes aëris plurimis globulis innatant, & cùm hæc agitur materia, recto & imperturbato motu celeri & vibrato illuminatus est tunc aër.

Aër non est aspectabilis; nam hæc aspe-

etabilitas oritur ex aliquâ corporis opacitate vi cujus est luci impervium corpus: nam ut corpus videatur, vel lucidum esse debet, vel radiorum refractione colorem creare & sensum suum excitare. Porro aer non ita se habet, plenus est poris, lumen non reflectit, igitur aspectabilis non est. Hic aliqui cœlum inter & terram aliquid inane præjudiciis ducti admittunt, quia nihil vident, nihil sensibilibus tangunt.

Quancumque in maximâ distantia oritur quædam aspectabilitas, & ideo si cœlum sit serenum, color cæruleus apparet maxime conspicuus, quia tandem distans aer insensibilibus reflexionibus reflexionem facit radiorum sensibilem, vi cujus objicit oculis intuentium hunc colorem.

OBJECTIONUM SOLUTIO.

Objicies 10. Si ratio perspicui consistet in recto pororum tractu, admitti deberet quædam incredibilis pororum multitudo, non modò in fluidis, v. g. in aëre & aquâ, sed in firmis & duris corporibus, putà in vitro, crystallo & adamante, &c. Absurdum consequens. Nam quomodò tanta pororum copia stare potest cum firmitate vitri, duritie adamantis?

N. min. Nec enim à vero abhorret

M vj

quòd ingens pororum multitudo sit in corporibus duris, imò hoc planè conciliatur cum experimentis omnibus: videlicèt crassi humores transpirant per cutim nostram & carnes, materia magnetica nullo negotio permeat ferrum, lapides: ergo signum est quòd possit supponi in perspicuis ingens pororum multitudo.

Instabis: Si in corpore diaphano tanta foret pororum multitudo, distingui possent ac percipi hujusmodi pori: atqui istud fieri non potest; ergo tanta non est quanta fingitur pororum multitudo.

N. maj. Ut patet exemplo materiæ magneticæ allato, quæ in durissimis & solidissimis corporibus incredibilem pororum multitudinem sensibilibiter pervadit, nec tamen pori isti sunt proptereà sensibiles per se, neque duritiem & soliditatem impediunt.

Sunt etiam in animalibus infiniti cuticulæ pori quos indicat sudor, neque tamen per se indicantur oculis. Titio accensus ex unâ parte, fumum & aquam, vapores crassos sæpiùs expirat ex aliâ per insensibiles poros, unde nihil magis in totâ Physicâ certum est quàm solidissima quæque corpora infinitis poris insensibilibus esse pertusa.

Objicies 2°. Si corpora forent diaphana ex eo quòd lumen per poros continua-

rum rectà transmitteretur ad oculos, deberent objecta quæ per vitrum & crystallum conspiciuntur apparere interrupta, siquidem corpora diaphana componuntur ex poris & solidis partibus; quæ quidem partes solidæ multos ab objecto proficiscentes radios reflectendo penitus extinguunt; sicque deberent aliquæ partes objecti subduci ab oculis & consequenter deberet accidere interruptio quædam in objecto visibili, qualis sæpè apparet cum objecta conspiciamus per cancellos: atqui tamen objecta quæ per crystallum & vitrum conspiciuntur non apparent interrupta; ergo, &c.

N. maj. Ad cujus probationem fateor corpora diaphana componi ex poris & solidis partibus; partes solidas extinguere penitus multos radios ab objecto proficiscentes: fateor etiam aliquas objecti partes subduci oculis, & consequenter quandam oriri interruptionem in objecto visibili: sed dico interruptionem à partibus solidis non esse sensibilem ob luminis propagationem per liberos meatus, radii enim liberè transeuntes ità oculum afficiunt & sensum implent, ut non possint discerni partes objecti, quæ non radiant, & sensum non feriunt; sicut in aquâ vino Aurelianensi tinctâ nulla est distinctio sensilis aquæ particularum &

corporis colorati, licèt partes illæ aquæ plusquàm centiès milliès excedant multitudinem partium vini. Hoc etiàm videre est in virgâ ex unâ parte accensâ, quæ si celerrimo motu moveatur, v. g. circulariter, exhibet oculis igneam quandam fasciam continuam sine ullâ interruptione sensili, licèt tamen magna sit interruptio & vacuitas: ergo objecta quæ per crystallum videntur, conspici non debent interrupta, sicut objecta quæ conspiciuntur per cancellos, tum quia hæc objecta sensum non implent per partes quæ non videntur, tum quia partes cancellorum sensiles sensilem faciunt interruptionem.

Objicies 3^o. Explicari non potest in hâc sententiâ quare corpora diaphana permixta cum diaphanis, aër v. g. cum aquâ vel cum vitro, vel vitrum cum aquâ jam non sint diaphana, sed fiant opaca; cur crystallus comminuta non sit ampliùs diaphana, sed opacitatem contrahat: ergo pelluciditas videtur non consistere in ejusmodi pororum rectitudine quæ fingitur esse in corporibus diaphanis.

N. ant. Scilicèt ejusmodi phœnomena, quæ objiciuntur satis appositè, explicari possunt à nobis: enimverò perspicuitas, ut dictum est, consistit in recto pororum tractu, qui materiâ æthereâ pleni promoveant luminis continuationem ac trans-

tum : porrò cùm corpora diaphana heterogenea simul permiscentur , ex illâ permixtione sequitur ampliùs non esse rectos pororum tractus , sequitur innumeras oriri luminis refractiones , quibus radii ità perturbantur ut non sit liber luminis transitus : porrò his positis , sequi debet opacitas in corpore : itaque vitrum tersum , politum , atque adedò diaphanum , fiet opacum , si corpori duro affricetur : v. g. si arenulâ conteratur , quia tunc exasperata superficies multiplicem induit figuram , ex quâ oriuntur variæ refractiones quibus tollitur pelluciditas ; crystallus etiam comminuta fit opaca : tum quia hâc contritione partium exasperatur superficies , tum quia corpus fit parvum , pauci radii subeunt poros , & consequenter non est tanta pelluciditas.

DE VI ELASTICA.

Vis elastica est virtus quædam quâ corpus ad violentam figuram pressione adductum sese restituit statui pristino , ut videre est in tenuissimis ampullis quas pueri ex aquâ sapone impregnatâ per ludum efficiunt : nam pileo leniter excepti tales globuli statim resiliunt ad eam ferè altitudinem ex quâ delapsi sunt : patet in folliculo inflato , patet in clave tym-

pani , dum fides tremulo motu agitatæ pristino statui sese restitunt ; patet in virgâ viridi inflexâ & in aliis.

Quæritur à Physicis quid sit elaterium : ut illud explicent Pèripatetici , confugiunt ad commentitia quædam principia , qualitates nimirum occultas ab omni dispositione mechanicâ abstractas , quas venire dicunt à naturâ ipsâ cujuslibet entis : natura hæc , inquiunt , cùm figuram sibi accommodatam semel nacta est , eam servat atque retinet ; & si quandò amiserit , eandem sibi naturali restituit instinctu ; quoniam unaquæque res habet à Conditore insitum naturaliter ut proprium esse suum totis viribus tueatur ac defendat , proindeque si à figurâ naturali dimoveatur externâ vi , eandem sibi restituit figuram ; & in hoc consistit elaterium.

Hoc de quibusdam naturis dictum volunt : nam in eorum opinione quædam sunt naturæ satis indifferentes ad hanc vel illam figuram ; v. g. plumbum inflexum , cera , figuram sibi non restitunt.

Sunt & aliæ naturæ juxtâ eos quæ tantum amant figuram suam quantum imaginatione possumus consequi : nam partium suarum disruptionem potius patientur , quàm figuram amittant ; sic virga sicca quæ sine suâ disruptione inflecti nequit.

Hæc si dixerimus cum illis, nihilo doctiores sumus; & quantum à rectâ philosophandi ratione abhorreat ista methodus, postea videbitur.

Est proinde laudabilior ratio eorum, qui in mechanicis affectionibus quærunt vim elaterii, aut qui ab iisdem dispositionibus repetunt effectus elasticos.

Itaque hoc certum supponimus quòd vis elastica maximè pendeat à configuratione & contextu partium corporis quod elasticum dicitur: ut autem intelligatur facillimè quænam sit illa Mechanica, distingue in hâc occasione corpora triplicis generis: alia sunt quæ inflecti possunt & non resiliunt, ut cera &c. alia sunt quæ inflecti possunt & resiliunt, ut calybs: alia sunt quæ inflecti non possunt, ut virga arida: porro partes illorum corporum debent esse aliter configuratæ, aliter contextæ: qui verò sit contextus, quæ configuratio partium corporis elastici, ex sequentibus accipe. Sit

PRIMA PROPOSITIO.

Partes corporis elastici debent esse partim rigide, partim molles, & ita disposita ut pori quidam intercipientur.

Pr. Nam duo sunt in corporibus elasticis: 1°. Flecti debent illa, & post in-

flexionem debent restitui : atqui nisi partes haberent insensiles , partim rigidas , partim molles , flecti non possunt & deinde restitui : nam corpora quæ omninò rigida sunt flecti non possunt , & si incurventur , disrumpuntur , ut videre est in virgâ aridâ : corpora verò quæ partes habent omnes plicatiles , amissam figuram non restituunt : ergo corpora elastica habent partes partim rigidas , partim molles.

Hoc itaque discrimen est inter virgam aridam & virescentem quòd hæc habeat plures partes molles quæ tandem rigidæ fiunt , breves & multis poris intercissæ laxioribus , dum arescit.

SECUNDA PROPOSITIO.

Ut sit elaterium , debet esse motus.

Pr. Nam ut sit elaterium , corpus pristinam figuram extraneâ pressione mutatam debet recuperare : atqui ut corpus pristinam figuram extraneâ pressione mutatam recuperet , debet esse motus : nam sicut arcus calybeus motu resistit tensioni , ità idem arcus tensus motu relaxatur : ergo concipi debet motus communicatus illis partibus , ut sit elaterium.

TERTIA PROPOSITIO.

Verùm motus ille communicatur illis partibus à materiâ quâdam subtili concitatissimo motu agitâ, quovis modo illa vocitetur, sive aër subtilior, sive ather, sive alio donetur nomine.

Pr. Nam motus ille concitatissimus in illis partibus communicari debet à causâ quæ sufficiat & proportionetur tanto motui communicando: atqui sola materia subtilior concitatissimo agitata impetu sufficit & proportionatur tanto motui communicando illis partibus; nam materia illa communicans motum debet permeare intimos corporum recessus: debet applicari minutissimis & occultissimis illorum corporum partibus: sed nisi subtilior foret illa materia, non permearet illos recessus, non posset applicari minutissimis & insensilibus partibus: ergo motus communicatus illis partibus est à materiâ subtili concitatissimè agitâ,

Verùm veluti oculis subjici debet quâ ratione hæc materia communicet motum illis partibus, ut pristino statui sese restituant: itaque sit

QUARTA PROPOSITIO.

Materia subtilis concitatissimo agitata motu communicat motum in istis partibus, vel facit ut suo restituantur statui; quatenus antea comprimens illas hujusmodi corporis partes & à se invicem interjectis quibusdam spatiolis pro suarum partium divisione dilatans; tunc fortius agit in partem convexam, deinde plus solito partes compressæ sunt aut diductæ.

Pr. Nam si virga virescens complice-
tur, tunc partes convexæ diducuntur;
partes autem concavæ comprimuntur,
tunc pori fiunt arctiores; quandò verò
partes convexæ diducuntur, tunc pori
fiunt ampliores, tunc materia subtilis
copiosius currit per poros capaciores, &
applicatur partibus rigidis, atque adedò
cum vix ac ne vix quidem possit transire
per poros partium concavarum, corpus
pristino statui, obice remoto, restitui de-
bet: ergo habemus modum quo materia
subtilissima sit elaterii causa, positâ certâ
dispositione mechanicâ partium in qui-
busdam corporibus.

DE VI ELASTICA AERIS.

Hæc generalia de virtute elasticâ applicari possunt quibusdam corporibus determinatis, quibus elaterium convenit, & præsertim aëri, cujus occasione disputatur de elaterio.

Aërem elasticum esse plurimis probatur experimentis, quippè densari potest aër & comprimi; densatus autem & compressus vim habet resiliendi, & per ampliores locum se protinùs extendendi: unde fiunt machinæ quæ ope solius aëris aquas sursùm versùm, instar fontium, propellunt, ut videri potest oculis: sunt aliæ, putà sclopetæ pneumaticæ, quæ cum magno impetu globulos plumbeos jaculantur.

Ideò verò elasticus est aër, quia partes ipsius maximè rigida & multis globulis intercisa & diducta, si plus solito comprimantur in se invicem, nec habeant spatium quo exspatiantur, quia sibi facile non adhærescunt, tunc materia subtilis agitationem partium rigidarum conservans eò fortius agit in illas partes quò major est compressio: unde si obstaculum solitæ aëris vertigini tollatur, jam diffunditur aër, & maximâ vi explicatur ad majus spatium occupandum:

quapropter difficillimè concludi potest & intrà terminos contineri, atque quibuslibet rimulis exitum tentat; proinde si quæ fortè sit rimula, tunc rapiditate summâ per hanc rimulam sibilando excurrit: experiuntur istud qui tempore hyberno ad ignem se calefacientes frigoris sensum in dorâ partibus patiuntur, propter aërem, cubiculum ingressum per latentes vias. Idem experiuntur qui facem accensam approximant ad illas rimulas: tanta est fluiditas aëris; sed fluiditas nascens non ex partibus mollibus, ut in aquâ, sed ex partibus rigidis.

Hinc inest specialis virtus elastica aëri quæ forsan in nullo alio reperitur corpore: nimirum ipsius elaterium semper idem & constans manet, ut videre est in iisdem sclopetis, quæ post longum temporis spatium eâdem vi globulos emittunt, ac si aër recens fuisset intrusus, unde phœnomena quæ veniunt ab aëris elaterio, eadem semper & constantia manent, ut videbimus ubi de gravium suspensione.

DE VI ELASTICA CALYBIS.

Insignis calybi convenit virtus elastica, ut patet ex eo quòd si globus calybeus incidat in incudem, vel marmoreum ta-

bulatum, primo excavetur, & deinde pristinae figuræ redditus ad eandem fere altitudinem resiliat à quâ prius fuerat dimissus: excavatur, inquam; nam si calybeus ille globus in marmoreum tabulatum sebo perfusum demittatur, eò majus vestigium relinquit, quò ex loco altiori decidit: porrò in calybe plura observatione digna sunt ex quibus dicta confirmabuntur.

Calybs ardens aquæ frigidæ repente immersus, seu, ut loquuntur, temperatus aquâ frigidâ, nec postea recoctus, adeò fit rigidus ut non possit flecti; quòd si ad rubedinem recoquatur, tum partes sunt molliores, & inflexus non multum resistit. Ex quo liquet partium rigiditatem aliquâ flexibilitate temperandam esse, ut vis elastica procuretur corporibus.

Requiritur etiam ut partes rigidæ mollioribus temperatæ talem inter se situm servant ut dum flectitur corpus non fiat partium transpositio, sed compressio duntaxat & dilatatio ampliatis & constrictis meatibus: sunt enim quædam corpora duriora, aliis corporibus elasticis, quæ tamen propter quamdam suarum partium molitudinem non habent vim elasticam: v. g. plumbum, quod durius est intestinulo testudinis, non habet tamen mollietie nimiam partium suarum vim elasticam

nisi valde debilem, quam aliunde videmus insignem in citharæ fidibus, licet mollioribus.

Ratio hujusce phœnomeni hæc est, quòd cum lamina plumbea in arcum curvatur, pars illius concava arcatur, & pars convexa dilatatur; tuncque in eo situ permanet quòd insensiles particulæ plumbi locum & situm mutant, & omninò dimoveantur: unde plumbum & stannum contusa fiunt molliora; non item ferrum & cuprum quæ malleo densantur & duriora fiunt, ex eo quòd in plumbo & stanno partes contusæ situm omninò mutant, & istâ mutatione induant molliorem statum: in ferro verò & cupro partes non mutant omninò situm, sed sicut taxat meatuum compressio; proindeque accedit major durities, quoniam plures particularum superficies planæ pluribus superficiebus planis applicantur.

Ob mediocrem partium illarum rigiditatem, fit ut in temperando multæ adhibeantur cautiones; siquidem moderatè debet ignescere: nam si usque ad candorem in igne retineatur, tunc illi meatus fiunt apertiores, & quantumvis temperetur calybs, non poterit suffICIENTER comprimi: etenim calybis particulæ, ipso igne dilatante, postquàm temperatus est, retinent aliquid de illâ pristinâ ampliatione:

riore: unde si ex duobus filis calybeis ejusdem crassitie, alterum igni admotum aquâ frigidâ temperetur, hoc ipso crassius evadet; magno quidem argumento particulas in calybe temperato situm & cohesionem aliquantùm mutare, adeò ut & durior & fragilior fiat calybs: nam subito aquæ frigore intumescit, quòd partes insensiles ignis virtute diductæ subito figantur: subtilis enim materiæ compressio in partes solidas vim exerit suam; quæ tunc quidem partes perturbato ignis motu distractæ sunt; quapropter massa ferri spongiosa remanet, quoniam quedam partes ab aliis partibus divulsæ, repente aquæ frigore correptæ, continentur in modum fornicis, ità ut non sit omnium partium hujusmodi tam arcta compressio.

Porro idem non contingit si sensim calybs refrigeretur: siquidem cum partes calybis sensim refrigerantur, pristino statui restituuntur faciliùs, quia diù manent molles, flexibiles & agitæ. Quamobrem artifices cavent ne calybs ad rubedinem coctus nimium indurescat, eum diutiùs inter prunas continent dum suâ sponte extinguatur; fit enim ut debilitato motu partes non sint aliæ duriores, aliæ molliores, aliquæ magis, aliquæ minùs applicatæ sibi, ut contingit in malè ordi-

nato lapidum acervo: sunt enim lapides qui, quòd aliorum pondus sustineant & aliis subjectis lapidibus applicentur, fortius compressi, strictius etiam compinguntur; è contrariò sunt nonnulli lapides qui aliis minimè subjecti, & quasi in fornicibus conclusi, vix cohærent cæteris, sed jacent liberiore situ.

DE LACRYMA BATAVICA.

Occasione datâ virtutis elasticæ, loquor de mirabili quodam corpore vitreo, quod à figurâ dicitur Lacryma, & à loco in quo inventum est fortuitò dicitur Batavica: quia stupenda phænomena quæ tentavimus multoties circâ hancce Lacrymam, insigni virtuti elasticæ aëris tribuuntur vulgò, de illo paulò fusiùs differendum.

Vitrum illud conflatum est ex liquefactis silicis cineribus. Aquæ instillatur: nam infusum aliis liquoribus multò diversum est & nihil præstat: aquæ tepidæ instillari debet: nam frigidæ vel ferventi aquæ infusum ante frangitur quàm indurescat; majore copiâ primùm in aquâ infunditur: dein de verò stillatim fluit: unde instar lacrymæ ovatum est in imâ parte, & postea acuminatur desinitque in cuspidem diversimodè inflexum.

Hæc lacryma vitrea partes habet in ex-

tremâ cuspide, simili texturâ situque compactas; quòd cuspis, utpotè tenuior, uno tenore foris & intùs densetur: reliquæ verò partes crassiores, eò quòd priùs foris quàm intùs frigescant & densentur: non sunt ejusdem ubique contextûs & tenoris, sed quò magis ab exteriori superficie distant & sunt intimiores, eò magis laxantur; & quò magis accedunt ad superficiem, eò sunt compactiores & angustioribus intercissæ poris: apparent spatiola aut vacua, aut aëre plena in mediâ lacrymâ.

Durissima est hæc lacryma vitrea, quæ repetitis mallei ictibus confringi vix possit, dum ad aliquam à cuspide distantiam facilè digito confracta in tenuissimum pulverem non sine fremitu comminuitur ac dissilit; nec fit partium comminutio tam præceps nisi cauda lacrymæ eò loci frangatur ubi jam cava & velut perforata apparet: nam si extrema duntaxat & solida pars cuspidis disrumpatur, non defilit vitrum, sed integrum manet. Si lacryma recoquatur igne, non comminuitur in pulverem; si in aëre statim concresecat, fracto pedunculo non disrumpitur: si arenulâ stampensi alteratur, tum sæpè dissilit cùm ad majores bullas pervenitur; sed si Smiridis pulvere subtili cum oleo mixto deteratur, nulla ut plurimum fractio sequitur.

Eadem lacryma disrupto apice in machinâ pneumaticâ, confringitur quidem, sed partes comminutæ non procul dissiliunt.

Sunt ista mirabilia phænomena quæ à dispositionibus mechanicis pendent; unde quæritur quænam illæ sint.

Quidam voluere Lacrymam Batavicam pedunculo rupto disrumpi per vim elasticam aëris intrâ poros & partes interiores compressi: quia cùm, fracto pedunculo, aër reperit exitum, nititur se liberare & celerius partes vitri dilatat & frangit: alii voluerunt hæc oriri phænomena, quia rupto pedunculo, canalis aperitur materiæ æthereæ irrumpenti per suum canaliculum, quæ materia liberiore cursu fluens in partibus interioribus lacrymæ, postea reducitur ad angustias, sicque vim facit & vitrum disrumpit. Quænam sententia vincat, ex sequentibus accipite.

PRIMA PROPOSITIO.

Phænomena quæ sunt circa Lacrymam Batavicam non veniunt ab elaterio aëris inclusi.

Pr. Hæc enim sententia non satisfacit experimentis omnibus. 1°. Cùm lacryma fuit recocta, fracto pedunculo, non fit fractio lacrymæ: porro si fractio foret ab

elaterio aëris inclusi, deberet fieri fractio quando recoquitur vitrum, quia tunc aër inclusus antea compressus frigore, tunc ignis vi dilaretur, sicut aqua dilatatur in vapores calore ignis in æolipylâ, quemadmodum aër ipse in bullis vitreis inclusus dilatatur calore ignis; ita ut non sine crepitu parietes vitri quibus concluditur disrumpat.

Et certè disrupto pedunculo lacrymæ in pneumaticâ machinâ, partes non dissiliunt tam longè quàm extrâ machinam in pleno: atqui si disruptio veniret ab elaterio aëris inclusi, partes comminutæ deberent longiùs dissilire: nam machinâ pneumaticâ expurgatâ aëre crasso, aër exterior ambiens lacrymam tam resistit disruptioni quàm extrâ machinam.

Denique ut phænomena venirent ab elaterio aëris inclusi, aër ille inclusus deberet esse compressus; porro tantùm abest ut sit compressus, quin imò sit maximè rarus, ut patebit.

SECUNDA PROPOSITIO.

Hæc omnia phænomena veniunt ab irruente materiâ subtili per foramen apertum rupto pedunculo.

Pr. Hæc enim admitti debet opinio quam dispositio mechanica partium cor-

poris persuadet; quæque satisfacit phœnomenis: atqui dispositio mechanica partium lacrymæ. & phœnomena, persuadent materiam subtilem irruere per foramen apertum, nam 1°. durissima est hæc lacryma in imâ parte, quod partes exteriores frigore correptæ & subito condensatæ instar fornicis aliæ aliis innixæ se tueantur.

2°. Si cauda lacrymæ eò loci frangatur ubi jam apparet perforata, sive ubi partes interiores incipiunt esse fungosæ, tunc in minutissimum pulverem dissilit, quia cum vitrum aquis instillatum est, partes quidem exteriores obriguerunt, & ad superficiem factæ compactiores arctissimo vinculo sibi adhæserunt, tenuissimis duntaxat meatibus intercisæ, dum intereâ partes vitri interiores ob caloris agitationem malè colligatæ & ferè contiguæ, manserunt grandioribus intercisæ meatibus ibidem interceptis; ità ut materia subtilis, si quandò irruat, facilem invenire possit aditum; quemadmodum fracto lacrymæ pedunculo in eâ parte ubi jam apparet perforata, æther subtilissimus irruens & abundè admissus inter poros grandiores partium malè coherentium facile fluit; at inde offendens partes superficiiei magis compactas quarum meatus sunt angustiores, tunc fit rapidior &

non sine impetu fremituque illas dividit, non secus ac aqua liberiore cursu per alveum leniter profluens, rapidior evadit & valentior dum pontem offendit, compressa nimirum & coacta ad cursus angustiores.

30. Lacryma non comminuitur nisi disrumpatur ad eam partem quæ perforata est, quia si solida sit pars quæ frangitur, poros habet angustissimos, quales habent partes illæ quæ sunt versus circumferentiam; proindeque largam ætheris copiam non admittunt, sed qui subit æther penetrat ipsam sine ullâ offensione, neque disrumpit partes, sed integras permeat, ut permeabat prius disrupto nondum lacrymæ pedunculo: ergo ad comminuendum vitrum necesse est in eâ parte frangi ubi jam cauda apparet perforata.

40. Lacryma recocta igne non minuitur, nec dissilit in pulverem, quod vitri meatus caloris vi referentur & ampliores fiant, ita ut si fracto pedunculo materia subtilis in interiores partes lacrymæ irruat, abundantius habeat exitum liberiores per ampliatos & quasi distentos vi caloris poros superficie.

50. Si lacryma in aëre concresecat, non frangitur, nec dissilit, quia cum partes diutius maneant molles, arctius inter se devinciuntur omnes, & æquabilius con-

textæ sunt non solùm versùs extimam superficiem, sed interiùs & per totum: ex quo fit ut ferè sint inter se æquales ubique meatus, atque adeò materia subtilis aditum habeat & exitum ubique pariter faciliorem; proindeque nulla debet fieri vehementior ætheris irruptio, qui liberiùs primùm irruens, deinde compressus & coactus vitrum comminuat; sed per æquabiles meatus it, reditque, subit & egreditur sine collisione & fremitu.

6°. Cùm lacryma atteritur arenulâ stampensi, tùm sæpè dissilit, cùm ad majores bullas pervenitur: scilicèt tunc materia subtilis cum impetu irruit, & tandem compressa vitri partes disjungit; sed ubi Smiridis pulvere subtili cum oleo mixto atteritur, tunc nulla ut plurimùm fractio subsequitur, quòd subeunti abundantius ætheri non pateat sufficiens aditus propter ramosas olei partes ipsum occludentes, eo ferè modo quo duo marmora lævigata oleo illita sese mutuò sustinent, ex eo quòd externus aër subire non possit.

7°. In machinâ pneumaticâ disrupto apice, lacryma quidem comminuitur, sed partes non procul dissiliunt, quòd in machinâ pneumaticâ non sit aër crassior qui unà cum æthere intrà poros fracti cuspidis vehementiùs irruat, sed solus æther subtilis, qui aëre crassiore destitu-

tus, faciliùs pervadens meatus angustiores tantâ vi non concutit vitrum; sicut aqua durioribus & crassioribus corporibus onusta, majore impetu concutit pontem obvium quàm si sola per alveum flueret.

8°. Materia quædam spatium in lacrymâ medium occupat, quæ quidem materia nihil aliud est quàm aër rarefactus, non verò compressus & condensatus, ut putabant prioris opinionis assertores; cum enim circumstans frigus primùm constringat lacrymæ partes ad superficiem positas, dum partes interiores concepto adhuc calore aliquantùm laxantur, certè interceptus aër calore rarefactus sese recipit intrâ medias & intimas vitri partes, superstitite adhuc calore fusas, quo fit ut hujusmodi bullæ medium istud spatium occupent ubi liberior est situs. Adde quòd si corpus aliquod condensetur & gelascat, partes quæ minùs gelascere possunt sese in medium spatium recipiant; patet in vino Remensi, cujus pars robustissima & spiritibus fœta sese recipit in medium: ergò dispositio mechanica partium Lacrymæ Batavicæ, & phœnomena, probant materiam subtilem irruere per foramen apertum.

Dices: Si meatus angustiores positi versus ovatam lacrymæ partem simul col-

lecti viam faciant tam patentem, ut exeat materia irruens, quanta est via ut intro-mittatur per apertum foramen, certè disruptio non oritur à materiâ irruente: verùm consequens, ergo & antecedens.

N. min. Nam meatus superficiem versùs exteriorem tam sunt exiles & angusti, ut viam tam patentem non efficiant quanta est sola via per foramen apertum: inde finge tibi poros hujusce lacrymæ quasi totidem infundibula, ità ut foramina quæ respiciunt partes interiores lacrymæ sint patentiora, quæ verò sunt in partibus exterioribus sint angustiora; unde quia perpetuò irruit materia concitatissimè agitata, vim facit in latera pororum, & ad angustias redacta subitò partes dividit.

**DE RARITATE, RAREFACTIONE,
DENSITATE ET CONDENSATIONE.**

Rarum dicitur corpus quod sub magnâ dimensione parum habet materiæ propriæ: hinc lac ebulliens rarum dicitur, quia tunc sub majori dimensione continetur eadem substantia quæ priùs continebatur sub minore: raritas ergò est status corporis quo corpus habet porum materiæ propriæ sub magnâ dimensione; idèòque rarefactio est vis quâ acquiritur

raritatis status, seu quâ fit ut eadem substantia incipiat apparere sub majore dimensione.

Densum dicitur corpus quod sub parvis dimensionibus multum habet materiæ propriæ: sic ferrum relativè ad lignum densum est, quia sub parvo volumine materiam habet sibi propriam ampliorè; densitas igitur est status densi corporis; condensatio verò est vis quâ acquiritur densitatis status, seu quâ fit ut eadem substantia incipiat apparere sub minore dimensione.

Disputant Philosophi cur corpus idem modò sub minoribus dimensionibus, modò sub majoribus contineatur, sine augmentatione vel imminutione materiæ propriæ.

Difficultatem hanc ut quidam solverent, dixêre quasdam esse qualitates quibus extensio cujuslibet rei absoluta possit & augeri & minui sine augmentatione vel imminutione materiæ propriæ.

Gassendistæ cum Epicureis voluerunt rarefactionem fieri aliquandò intrusione materiæ alienæ, & aliquandò dilatatione pororum: condensationem verò extrusione materiæ, ut aliquandò restrictione vacuolorum. Contrà sit

PRIMA PROPOSITIO.

Materia augeri non potest vel minui in ratione propriâ sua massa sine augmentatione vel imminutione materia.

Pr. Scilicèt non concipitur eandem massam sine imminutione suâ posse occupare spatium minus, nisi admittatur penetratio corporum: atqui penetratio corporum non datur, saltem naturaliter; ergo, &c.

SECUNDA PROPOSITIO.

Corpora non fiunt rarâ ampliatione vacuolorum, & densâ restrictione.

Pr. Ex antedictis, ubi explosimus omnino illa vacuola, non ergo possunt esse causa condensationis vel rarefactionis.

TERTIA PROPOSITIO.

Rarefactio fit per intrusionem materia vel magis vel minus subtilis; condensatio verò per ejusdem extrusionem.

Pr. S^{ta} terminorum expositione: videlicèt corpus raram est quando sub di-

ensione majori apparente habet parùm materiæ propriæ: porrò cùm introducuntur corpuscula heterogenea, magis est apparens corporis dimensio, nec tamen major est materiæ propriæ copia; ergo intrusione alienæ materiæ intelligitur corpus rarum: intelligitur etiam densum extrusione, quia densum sub parvâ dimensione apparenti eandem habet propriæ materiæ copiam quam habuit sub majori dimensione apparente: porrò posito quòd materia aliena extrudatur, tunc dimensio apparens incipit esse minor, licet tamen eadem sit materiæ propriæ copia: ergo positâ nostrâ sententiâ, rectè intelligitur rarefactio & condensatio. Hinc v. g. rarefit sponsia dum aqua subit poros ejus, quos dilatat & ampliat; condensatur autem, cùm extruditur aqua ab ipsius poris: idem fit dùm panis recens comprimitur, qui postea dilatatatur, quia materia subtilis exclusa poris agit in aëra interceptum inter poros; sicque dilatatatur aër, proindeque partes panis.

OBJECTIONUM SOLUTIO.

Objicies 1°. Corpus extraneum, cujus extrusione rarefactionem fieri diximus, est fictitium: vix enim concipi potest quomodo corpora solida sint ex omni parte

perforata instar cribrorum : deinde hæc materia subtilis, posito quòd existat, potest liberè exspatiari in aëre, neque explicari potest quâ ratione poros petat tam angustos.

Certius nihil est in totâ Physicâ quàm dari materiam ipso aëre longè subtiliorem, ut in toto Physices decursu probatum fuit, & probabitur imposterum : quo verò nomine donari debeat ego non disputo : vocetur, si velis cum Cartesio, materia subtilis, quæ complectatur globulos & minutias; cum aliis dicatur æther, inde materia atherea: cum aliis nominetur substantialis forma corporum, quo sensu lubens admitto formam substantialem in corporibus vel inanimatis, quæ proinde erit activa, cum insignem habeat motum à Deo conservatum. Quid ad me, qui de nominibus nunquam disputabo? hoc unum postulo ut existat corpus illud tenuissimum, & sit rarefactionis & condensationis causa præcipua.

Nec quæ afferuntur in contrarium argumenta aliquid probant : nam, ut jam diximus, constat experienciâ corpora vel densiora plures habere poros, quibus est liber huicce materiæ transitus : id videri potest in partibus nostri corporis maxime callosis, v. g. in plantâ pedum versùs talos, & in volâ manûs : id videri po-

test in ferro, magnete, machinâ pneumaticâ aëre expurgatâ, in quo superest materia pneumática, ut patet ex lumine.

Ad id quod dicunt, illam materiam debere exspatiari liberè in aëre, & nullam esse rationem cur in illas angustias se conijciat, sic repono: materia ista fluidissima est, suum habet motum, quem Deus conservat, & ità facilis est tum in determinatione motûs, tum in figuris quas induit, ut facilè possit mutare determinationem suam, quâ accurrat & suam mutare figuram, quâ se corporibus accommodet quibus occurrit. Sicut ergo si fossa fiat propè alveum fluvii, occurrit aqua protinùs ut fossam repleat, ità si minor sit in aliquâ parte resistentia, tunc materia subtilissima fluit & accurrat ad illam partem porosque reperit & meatus sibi accommodatos, nec-non satis capaces.

Ista sanè si comparentur cum sententiâ quæ vigeat olim in scholis, sunt ingeniosiora, &, fatentibus Veterum sectatoribus, amœniora, &, eorum pace dixerim, vero propiora: nec enim sumus ex illorum hominum grege, qui laudemus aliquid quia novum, sed quia verum. Interea quid hîc ago? potestne institui similitudo, inter placita quorum unum ignorantiam sapit, aliud doctrinam, unum vel pronuntiatione verborum terret, aliud

delectat? quid est enim, amabo vos, augmentatio extensionis propriæ non auctâ materiâ? quid est imminutio non imminutâ?

Nec est quòd ad Aristotelem confugiant, quia licet gloriantur se habere ipsum tanquam magistrum, certè in hac parte non faret ipsis, imò totus est pro nobis: sic loquitur capite octavo de Categ.

Densum est ex eo quidpiam, quia partes ejus sibi propinquæ sunt, rarum autem ex eo quòd inter se distent.

Objicies 2^o. Cùm ignis scintilla in acervum pulveris pyrii delabitur, accenditur pulvis & insigniter rarefit; porrò non potest explicari quomodò ignis scintilla vix deperdens de suo motu eam faciat rarefactionem cujus virtute arces & propugnacula disjiciuntur, ut cernimus in cuniculis: ergo recurri debet ad qualitatem occultam hujus phænomeni effectricem.

1^o. Licet exponi non posset phænomenon pulveris pyrii, non inde sequeretur illud esse exponendum per qualitatem peripateticam: satius foret suam ingenuè fateri ignorantiam quàm tegere verbis difficultatem: oleum quippè & operam perdidere omnes qui vacuis illis qualitatibus tam impensè studuerunt.

2^o. Nego rarefactionem hanc nullate-

nus exponi posse : negati ratio sit aliqua phœnomeni expositio.

Mirum sanè est phœnomenon & artis ferè diabolicæ instrumentum. Inventum ferunt anno circiter millesimo quadringentesimo à Rogerio Bacone, Ordinis Sancti Francisci Sacerdote, insigni Chymistâ, qui tentandis experimentis occupatus salnitrum miscuit sulphuri & carbonibus, primus talis mixtionis effectus aliquot expertus est. Sic phœnomenon explicamus.

1o. Partes pulveris pyrii sunt veluti totidem globuli, qui spectari possunt quasi totidem parvi vortices: globuli continentur quâdam pelliculâ cujus pori sunt angustiores, dum pori partium sunt laxiores.

2o. Partes globulorum insensiles sunt satis rigidæ, & figuram conorum habent; iis incumbit materia subtilis: unde si pellicula continens partes illas laceretur & frangatur, tunc major copia materiæ subtilis per foramen summâ vi irruens partes illas circulariter circumagit; inde vim faciunt à centro versùs circumferentiam atque eundem motum aëri circumstanti imprimunt, sicque globuli simul omnes inflammati aëre medio ità rarefiunt ut arces & propugnacula disjiciant.

Aërem circumstantem agitari pariter cum partibus globulorum & facere ut

motus ab uno globulo communicetur aliis, probari potest illo phænomeno. Plures globuli pulveris pyrii ponantur in recipiente machinæ pneumaticæ, extrahatur aër crassior à recipiente, ope speculi ustorii radii colligantur, globuli seorsim accendantur, & uno inflammato, non inflammabuntur alii; si tamen aër crassior foret in recipiente, uno inflammato, omnes pariter inflammarentur: ergo argumentum adest certissimum, circumstantem aëra & intermedium maximè promovere inflammationem, ipsum pariter agitari, ipsum rarefieri & dilatari irruptione materiæ subtilis.

DE GRAVITATE AERIS.

Leve dicitur quod ipsis naturæ legibus tendit à centro ad circumferentiam.

Grave quod iisdem legibus tendit à circumferentiâ ad centrum.

Hinc levitas est certa quædam corporis habitudo quâ corpus à centro assurgit ad circumferentiam.

Gravitas est illa corporis habitudo quâ corpus à circumferentiâ inclinatur ad centrum.

His positis, quæritur an aër sit levis, ut contendebant Veteres; an verò sit gravis, ut docent Recentiores: pro quibus sit

PROPOSITIO.

Aër gravis est.

Pr. Nam illud est grave quod simpliciter additum alteri gravi facit gravius: atqui aër simpliciter additus alteri gravi facit gravius: experientiâ patet. Sume folliculum laxum & flaccidum & stateræ appende, deinde ipsum infla fiatque turgidus, iterum appende stateræ, majus erit pondus folliculi inflati quàm laxi.

Et verò illud est grave quod alteri incumbens eò fortiùs premit quòd altiùs incumbit: atqui eò fortiùs premit aër quòd altiùs incumbit, nam major est aëris copia respondens pedi montis quàm vertici: atqui aër graviùs & fortiùs premit pedem montis quàm verticem: v. g. si folliculus aëre inferiore semiplenus & in pede montis flaccidus deportetur ad summum montis excelsi apicem, sensim intumescet & distendetur: quòd si postea descendas, statim detumescet & iterum flaccidus apparebit.

Hujus phœnomeni alia ratio afferri non potest nisi quia in pede montis aër magis premit quàm in vertice, unde aër interior & in folliculo inclusus, cùm non ità prematur in vertice, distenditur & dilatatur.

Hinc etiam hydrargirus suspensus manet in altitudine majori ad radicem montis quàm in vertice, ut experienciâ constanti compertum est: videlicet ad pedem turris Parisiensis Ecclesiæ Metropolitanæ suspensus mansit ad majorem altitudinem quàm in vertice, quia gravior est in pede turris quàm in vertice.

Primus illud experimentum tentari curavit Pascalius à Domino Perier in monte Averniæ, propè Claromontum, qui vulgò dicitur: *le puits du dôme*. 1º. Tentatum est in horto Patrum Minimorum ad pedes montis sito. 2º. In medio montis. 3º. In vertice. Mercurius seu hydrargirus mansit suspensus ad pedes montis in altitudine majori secundum unum fermè pollicem: ergo aër gravis est.

OBJECTIONUM SOLUTIO.

Objicies 1º. Si aër esset gravis, sentiremus pondus, imò nos opprimeret: atqui nullum aëris pondus sentimus, tantum abest ut nos opprimat: ergo non est gravis.

N. maj. Quia premit nos æqualiter ex omni parte; hinc licet aqua sit gravis, tamen pisces in ipso maris fundo, ipsi homines non sentiunt pondus aquæ, neque ab aquis opprimuntur: scilicet gravitatis

sensatio non est in fluido nisi quandò partes corporis inæqualiter premuntur: ratio est quia quaecumque sit pondus etiam millionum librarum, si sit in æquilibrio cum alio pondere, corpus substratum ipsi non sentit vim corporis in æquilibrio positi: porrò sive in aquâ, sive in aëre, partes quæ premunt corpora sunt in æquilibrio cum partibus vicinis, & idè corpora quæ sunt in illis fluidis non sentiunt fluidorum gravitationem.

Instabis: Altior est columna aëris respondentis pedi nostro quàm capiti: ergo premitur inæqualiter ab aëre.

10. Licèt altior foret, & quidem cum discrimine insigni & sensili, tamen quia columna respondens pedi est in æquilibrio cum columnâ vicinâ, certè non est pressio inæqualis; nec enim pondus centum millionum librarum in æquilibrio positum magis premit quàm unius libræ in æquilibrio positum.

20. Sic vulgò distinguunt antecedens. Discrimen non est sensile & satis insigne, C. discrimen est satis insigne, N. & pariter distinguunt consequens.

Objicies 20. Elementa non gravitant in proprijs locis: atqui aër incumbens terræ est in proprio loco: ergo aër non est gravis.

10. Quid intelligunt per primum ele-

mentorum locum? quid est elementa in propriis locis? enimverò si res metaphysicè spectetur, elementa non habent proprium locum, sunt enim de se indifferencia ad hunc vel illum locum: itaque eatenus habent elementa proprium locum, quatenus physicè spectantur, id est, habent locum à dispositione mechanicâ, à motu; à dispositione fieri debuit ut terra foret centrum sui vorticis cui immineret aqua, cui superincumberet aër: porro quid impedit quominus aër incumbens aquis graviter, id est, prematur deorsum, sicut aqua eminens terræ gravitat, & premitur deorsum? imò illud ipsum benè explicatur de aëre sicut de aquâ; nam v. g. si fiant aliquæ rimulæ in superficie terræ, aqua descendet & per rimulas repet: ità aër, si sint pori in aquâ & meatus, subit interiora aquarum: si fiat in aquis excavatio, fossam replet, sicut aqua replet cavitatem in terrâ factam.

2^o. N. maj. Nam illa gravitant in propriis locis quæ premuntur deorsum per mechanicas leges: atqui aër premitur deorsum per mechanicas leges: ergo aër in proprio loco gravitat.

Quamquam hæc gravitatio effectum sensilem non habet, sed ejusdem generis est cum gravitatione lapidis filo suspensi & impediti, cui si manum sup-

ponas, non senties pondus, & ejusdem cum gravitatione quam habent duo corpora in æquilibrio posita: nam sint v. g. in unâ lance duæ libræ plumbi, in aliâ sint duæ libræ ferri, tunc corpora sunt in æquilibrio posita, & profectò gravia sunt; in eo quippè posita sunt æquilibrio, quia quantum plumbum nititur descendere, tantumdem nititur & ferrum: ergo in æquilibrio posita sunt quatenus gravia sunt: atqui tamen si manum ferro supponas, vel plumbo, nullam poteris experiri gravitationem: ità pariter aqua, ità aër videlicet aquæ gravitas non percipitur à piscibus dolio inclusis & translatiis, quia columnæ aquæ in æquilibrio posite sunt, & quantum una nititur descendere, tantumdem nititur altera: at verò equi trahentes dolium in quo pisces includuntur cum aquâ sentiunt pondus, quia æquilibrio non compensat pondus aquæ.

Illud patebit aliis exemplis. Manum quis immittat in ingentem granulorum acervum, vix sentiet pondus incumben-
tium granulorum, eò quòd æquabile sit istud pondus circà partes manûs superiores, inferiores & laterales: si quis etiam situlam aquâ plenam in profundo putei positam extrahat, vix ullum situlæ pondus sentiet usque ad aquarum extremita-

tem, quia sirula æquabiliter ab aquis ambientibus sursum, deorsum & lateraliter premitur: debemus tamen dicere situlam aquâ plenam & granula esse gravia, quia eatenus pondus non sentitur, quatenus in æquilibrio ferè posita sunt ista: porro eatenus posita sunt in æquilibrio, quatenus unum nititur tantum deorsum quantum aliud.

Objicies 3°. Corpora gravia, ut lapis, plumbum, aurum, minùs in aquâ ponderant quàm in medio aëre, & aqua partem aliquam ponderis detrahit: ergo aqua ipsa nullatenus gravitat in proprio loco.

N. consequentiam: enimverò ideò aqua minuit pondus hujuscemodi corporum, quia in propriis locis gravitat: nam si aqua nullatenus gravitaret in propriis sedibus, nusquam explicari posset quomodò gravibus corporibus partem aliquam ponderis detraheret: hoc enim non accidit nisi cum plumbum in aëre suspensum est, & pars quædam aëris æqualis moli plumbeæ è contrà penditur, & aliquâ ex parte plumbi pondus imminuit, non secùs ac pondus in lance positum minuitur magis vel minùs propter pondus majus vel minus in aliâ lance positum: porro dum plumbum in aquis ponitur, tunc aquæ moles moli plumbeæ æqualis

æqualis contrà penditur, & aliquâ ex parte plumbi pondus minuitur, eâ ratione quæ inter plumbi & aquæ gravitatem intercedit, hoc est, duodecimam partem gravitatis plumbo detrahit; siquidem pondus aquæ se habet ad pondus plumbi ut unum ad duodecim; proindeque ex illo experimento quod adversarii objiciunt probatur potius aquas in propriis locis gravitare.

*Quæ sit Causa Suspensionis & Ascensûs
Gravium.*

Peripatetici, qui docuere priùs aërem esse levem, consequenter docent ascensum & suspensionem gravium non esse tribuenda aëris gravitati, sed homori quem natura habet de vacuo; quam sententiam vel nostris temporibus publicè & pertinaciter defensam fuisse audimus: imò vel ii qui gravem esse aërem concedunt, pauci tamen, negant gravitatem ejus causam esse illorum phœnomenon; sed alii plenitudinem, alii amorem continuitatis tanquam causam referunt: contrà sit

PRIMA PROPOSITIO.

*Ascensus gravium tribui non debet natura
horrori de vacuo.*

1^o. quidem, quia non intelligitur quid sibi velint per naturam: nam vel per ipsam intelligunt Deum, qui omnia fecerit, vel res ipsas factas: porro quare Deus abhorreret à vacuo, cum aliquandò fuerit? quare res factæ vacuum abhorrerent, cum hæc insensilia supponantur.

2^o. Vacuum tam possibile quàm plenum: cur ergo natura magis abhorreret à vacuo quàm à pleno?

3^o. Cum dicunt gravia ascendere & manere suspensa, quia natura abhorret à vacuo, etiamsi daretur talis horror, causam duntaxat finalem hujusce ascensûs atque suspensionis afferrent, nihil autem dicerent de causâ efficiente, de quâ tamen apud Physicos dubium est: nam transeat naturam abhorrere à vacuo, & idèò ascendere gravia & manere suspensa: afferri præterea debet à Physicis dispositio mechanica quâ natura utitur ut ascendant gravia & suspensa maneant: porro causam hanc mechanicam nusquam attulere Peripatetici: ergo quæstioni non satisfaciunt, & aliud non dicunt quàm

qui dicerent lignum Parisios advehi vitandi frigoris causâ, & omitterent dispositionem mechanicam quâ utitur hominum industria ut lignum Parisios transportetur.

4°. Si gravium ascensus & suspensio horrore quem habet natura de vacuo tribui posset, cur Mercurius non maneret suspensus ultrâ altitudinem 27 pollicum aut circiter? cur aqua non manet suspensa ultrâ altitudinem 33 pedum aut circiter? sanè vacuum tam naturæ timendum in unâ parte quàm in aliâ: ergo fictitius horror est ille.

5°. Ascensus & suspensio gravium non debent tribui horrore naturæ de vacuo, si omnia phænomena per aliam causam naturaliter cognitam possint clarè explicari: atqui omnia phænomena quæ spectant ad ascensum & suspensionem gravium rectè explicari possunt per aliam causam naturaliter cognitam, ut ex omnibus patebit phænomenis mox exponendis: hinc quæ à Recentioribus de hoc argumento dicta sunt nullâ ratione potuerunt refelli à Peripateticis: imò, quod rarò fit, subitò facta est animorum conversio, & plures à Peripateticis aliunde infensi Recentioribus in hancce tamen sententiam venerunt; atqui vix unus est Pro-

fessor qui audeat multo veterno putidam
Veterum opinionem propugnare.

SECUNDA PROPOSITIO.

*Ascensus & suspensio liquorum oriuntur à
gravitate aeris.*

Probari melius non potest propositio
quàm explicando phænomena hujusce
suspensionis & ascensûs: porro inter ea
quædam facilia sunt, quædam verò diffi-
cilia: ideò primò

Explicantur Phænomena facilia.

Primum sic se habet: Sit tubus cujus
pars interior aquis immergatur, sit em-
bolus qui educatur per partem superio-
rem, tunc aqua sequetur embolum &
sursùm ascendet: porro istud fit quia cùm
educitur embolus, columna aëris respon-
dens aquæ emboli subjæctæ sustinetur
eductione emboli, nec premit partem
aquæ subjæctam, dum aliæ columnæ pre-
munt aquam circumstantem, atque sic
aqua per embolum cogitur ascendere, eâ
ferè ratione mechanicâ quâ aqua ascen-
dit, si corpora crassiora, putà lapides,
demergantur in aquis.

Confirmari potest idem experimentum

in vino, oleo, hydrargiro & aliis liquoribus, & quod est maximè advertendum, liquores illi non ascendunt nisi ad certam altitudinem. Hydrargirus v. g. ad 27 digitos aut circiter: aqua ad 32 pedes aut circiter, vinum ad majorem altitudinem, servatâ proportionem gravitatis eorum corporum; ex quo horror vacui penitus evanescit: nam si ex horrore vacui orirentur ascensus ille & illa suspensio, cur altius aqua quàm hydrargirus, vinum quàm aqua, oleum quàm vinum ascenderent, & quidem servatâ proportionem gravitatis?

Secundum est: Sit vas plenum aquâ, scyphus aquâ plenus immergatur aquis quâ parte apertus est, tunc manebit aqua pensilis in scypho, nec effluet: sed illud venit quia aër premit aquæ partes circumstantes in vase subjecto, & nullus aër premit aquam contentam in scypho.

Tertium: Si pileus expansis alis ita applicetur ut commissura mensæ & pilei ea sit quâ non pateat aditus aëri externo. 2^o. Attollatur æquabiliter pileus, illicò ex parte alarum senties pondus aliquod & vim eò majorem, quò magis attolletur pileus atque alarum commissura fiet arctior cum mensâ. 3^o. Ubi aër externus furtivum invenerit aditum, statim magno ruet impetu, pileum attollet &

O iij

minutissimum pulverem exsufflabit: sed ista positâ aëris gravitate, intelliguntur: nimirum non potest attolli pileus quin comprimatur aër externus, & proinde quin alæ fortiùs comprimantur, & aër interior rarefiat, donec per furtivos aditus aër exterior irruens motu velocissimo propellat partes pulvisculi minutissimi & eas congreget.

Quantum sic habet: Sit vas aquâ plenum. Sit tubus inflexus qui dicitur syphon. Crus unum sit alio longius, exsugatur aër per foramen cruris longioris; aqua in vase contenta attolletur per crus brevius & descendet per longius: sic exhaurietur vas. Phœnomeni ratio est, quia per sùxionem aëris aqua respondens cruri breviori minùs comprimitur quàm partes circumstantes aquæ: ideòque ascendere debuit, & postea descendere.

Quintum ducitur ex cucurbitis medicorum quæ applicantur cuti accensâ intùs flammâ: nam tunc aër respondens huicce carni rarefit, nec ità premit hanc carnis partem: at verò partes aliæ corporis interim premuntur ut antea: ideò humores debent ascendere ad carnem cucurbitâ conclusam, atque adeò pulpa protinùs attollitur. Hoc fit generatim in corpore quotiès sunt partes quæ magis comprimuntur quàm aliæ: hinc factum est

ut caput plerumque turgescat iis qui diutius sunt in aquis, quia aquæ magis premunt reliqua corporis membra quàm aër premat caput.

Sextum: Duo hemisphæria intus concava sibi conjungantur, ità ut aëri non detur aditus, si aër in hemisphæriis contentus non excludatur, hemisphæria poterunt facillè separari; quòd si per antliam educatur, vix poterit fieri separatio. Hujusce phænomeni ratio est hæc: quòd dum aër inclusus est in hemisphæriis, adjuvet manum separantis hemisphæria quæ comprimuntur & ad intrà & ad extrà: at verò cum aër eductus est, tunc hemisphæria premuntur ad extrà ex omni parte, nec interiùs premuntur; & ideò manus separantis vix illa dividere potest, cum nullatenùs adjuta ab aëre interiori, debeat experiri aëris externi ingens pondus, & tantas adhibere vires quantæ requiruntur ad attollendum aëris cylindrum, cujus basis sit æqualis maximo circulo superficiei hemisphærii.

Septimum est: E duobus marmoribus levigatis & terfis, quæ si applicentur, vix divelli poterunt, licèt marmor inferius pondus quinquaginta librarum & ampliùs annexum habeat. Cujus phænomeni ratio est quòd in illà hyporhèsi marmor inferius ab aëre subjecto tantùm prema-

tur quantum superius marmor ab aëre incumbente: videlicet vis utriusque est æqualis. Hujus quidem ut deorsum deprimat, illius autem ut fursum impellat: ergo ut marmora divellantur, debent comprimi & attolli aëris columnæ ejusdem cum marmore latitudinis, cui pressioni & elevationi suo pondere obsistit aër.

Explicantur Phænomena difficilia.

Fieri non possunt nisi artificiosâ quâdam machinâ, quam appellant pneumaticam, ex eo quod adhibeatur ad aërem exhauriendum: vocatur etiam Boyliana, quod à *Roberto Boyle*, nobili Anglo, fuerit maximè perfecta. Varios habuit status hæc machina; sed quidquid sit de illis, habetur nostris temporibus alia simplicior, commodior, cujus ope eadem phænomena tentantur: tribus columnis sustinetur, in quarum medio est syrx cum embolo: syringi applicatur tubus angustior, cujus summitati imponitur capitellum, instar orbis, ad sustinendum recipiens, in medio ductu ope verticilli communicat recipiens cum syringe, tolli potest communicatio: deinde ope rimulæ in verticillo dari potest aëri externo aditus in recipiens, & ejusdem rimulæ auxilio potest aër è syringe propelli extrâ, quod oculis faciliùs deprehendi potest.

Primum. Cùm exhaustus aër è recipiente, embolus recurrit fortiter in interiorem andiam: ratio est quia aëris interioris virtus est attenuata, aër verò externus magis compressus elaterio suo repellit embolum.

Secundum. Si recipiens non foret sphæricum, sed planam haberet superficiem, exhausto aëre confringeretur; ratio est quia aër interior foret attenuatus & debilitatus, aër verò externus premeret fortius: porrò recipiens planum frangeretur non sphæricum; non quòd aër externus non premat æqualiter recipientia, sed quòd arcuata figura vasis semetipsam tueatur, ut patet in fornicibus, in quibus ea est lapidum commissura quâ vix corruant post plurima sæcula.

Tertium. Si orificio recipientis vitreum operculum aptetur, exhausto aëre, confringeretur à columnâ aëris incumbentis: si operculi loco apponatur manus vel digitus, senties aëris pondus, ità ut vix divelli possit nisi verticilli ope aër immitatur: si manus intrà ipsum recipiens retineatur, educto aëre, protinùs intumescet, ut fieri solet dum cucurbitæ medicorum adhibentur, & ideò intumescet quia molliores carnis partes nullo ambiente aëre compressæ liberius explicantur, quia partes humidæ & sanguineæ

O v

brachii externo aëre compressæ huc descendunt.

Ex quibus non solum aëris pondus, sed elaterium clarè demonstrantur, ut ex aliis mox afferendis patebit clariùs.

Quartum. Vesica suilla in quâ sit paululum aëris crassioris collo illigata ponatur in recipiente, exhauriatur aër, ità distenditur ut attollat pondus vel 40 librarum: ratio est quia cum vesica est in aëre libero, aër premit fortiter vesicam & ipsam corrugat. At verò si ponatur in machinâ pneumaticâ, tunc aër interior conclusus in vesicâ non compressus ab exteriori, ità se explicat elaterio suo, ut attollat illud pondus.

Quintum. Collo phialæ vitreæ satis exiguæ, ità ut sex drachmarum aquæ sit capax, circumligetur vesica agnina lenta & plicatilis, aëre vacua: intra recipiens posita, exhausto aëre, intumescet & aër in phialâ conclusus totam vesicam implebit phialâ decuplò majorem. Ratio eadem est quæ suprâ: nam vesica non compressa ab aëre externo, internus antea compressus sese dilatat & extendit ad spatium decuplo majus occupandum: imò potest ad spatium sexagesies & septuagesies majus extendi.

Sextum est experimentum Toricelli. Toricellus tubum vitreum tribus pedibus

aut circiter altum ex unâ parte conclusum implevit hydrargiro: tum invertendo tubum supposuit vasi subjecto in quo stagnabant hydrargirus, qui ascendit & mansit suspensus in tubo ad altitudinem 27 digitorum cum aliquot lineis, parte summâ tubi aëre crasso destitutâ: quod si experimentum aquâ tentetur, aqua suspensa manet ad altitudinem 32 pedum aut circiter. Porro si experimentum illud tentetur in machinâ pneumaticâ exhausto aëre Mercurius jam non manet suspensus, sed descendit ad superficiem usque stagnantis in vase Mercurii: quod si admittatur aër, Mercurius ascendet à vase in tubum & manebit suspensus ad solitam altitudinem: ratio est quia pars hydrargiri respondens foramini tubi non comprimitur ab aëre: adeoque si intromittatur aër, partes hydrargiri vicinæ cogunt fortius compressæ partem illam ut ascendat.

Septimum. Sit foramen exiguum in ovo; ponatur in recipiente, educatur aër crassior, ovi substantia exit è conchâ: intromittatur aër, eadem substantia per foramen se recipit intrâ concham: ratio est quia natus est aër in ovo: porro extracto aëre crassiori, aër ille natus non compressus dilatatur intrâ concham, & suâ dilatatione facit ut exeat substantia: at dum introducitur aër in machinam, tunc

O vj

quia aër in conchâ positus est maximè dilatatus & rarus, ideò substantia ovi compressa aëre admissio se recipit ad suum locum, quia ibi minùs est resistentia.

Octavum. Spongia ponatur in aqua ad æquilibrium, educatur aër è recipiente, apparent in aquis bullæ plures; introducatur aër, spongia petit fundum: iterùm educatur aër, spongia repetit superficiem aquæ; si iterùm introducatur aër repetit fundum, & sic continuatis vicibus. Ratio est quia dum primò extrahitur aër è recipiente, aër positus intrâ aquas dilatatur & facit ut dilatetur spongia, unde aliquatenùs attollitur: at si introducitur aër, comprimitur spongia; ideòque fundum petere debet, quia gravior est pari volumine aquæ: at si extrahatur iterùm aër, dilatatur iterùm & repetit superficiem, sicque continuatis vicibus propter easdem rationes.

Huic experimento respondet aliud quo plurimùm delectantur adolescentes: tubus est vitreus aquâ plenus in quo figura quædam homunculum exhibens materiæ aquâ levioris. Cava est figura. Foramen est in uno crure, sed ferè insensile; supernatat figura aquis. At si digito tubi foramen occludatur, tunc aquæ comprimuntur & ingrediuntur per foramen in figuram, sicque figura aquâ turgidâ gravior pari vo-

lumine aquæ descendit in fundum; si digitum tollas, aër aquis compressus dilatatur, aquam expellit, & iterum figura facta levior attollitur. Hinc pro diversâ motione digiti varias agitationes patitur figura modò in fundo, modò in medio, modò in superficie, ad libitum.

Nonum. Sit vas liquore plenum vel aquâ vel vino &c. Exhaustiatur aër è recipiente, tunc erumpunt innumeræ bullæ ex spiritu vini præsertim: ratio est quia positus aër intrâ liquores non compressus ab aëre exteriori dilatatur, nimirum natus delitescit aër in liquoribus, imò in solidis quibusdam corporibus. Hoc comprobavit illustris Philosophus *Mariotte* in tentaminibus de aëre: phyalâ impleatur aquâ quæ ebullitionem diù passâ fuerit; phiala invertatur & innatet scypho eâdem aquâ pleno, itâ tamen ut admittat aëris guttulam, tùm tribus diebus prioribus maxima pars guttulæ aëris absorbetur ab aquâ, & quod reliquum est dissolvitur per octo dies; inde patet aquam quæ minimam ebullitionem passâ fuit expurgatam fuisse aëre: aërem postea admissum absorptum fuisse, qui intrâ poros aquæ sese recepit. Itaque aër subit liquores & in eorum poris delitescit.

Decimum. Assumatur vas vitreum longiusculum aquâ plenum, collocentur in

vase phialæ quædam apertæ mediâ parte plenæ aquâ, alterâ mediâ plenæ aëre, ita ut fundum petant; si exhauriatur aër è recipiente, ascendant phialæ; ideò sanè quia dum extrahitur aër crassior, aër in recipiente residuus non ita comprimitur, sed rarefit, proindeque tantum non est pondus phialæ quantum erat antea: ideòque phiala debet assurgere.

Undecimum. Includatur in recipiente ampulla aëre plena hermeticè obfignata, quæ priùs bilanci imposita in aëre libero fuerat in æquilibrio cum corpore solido: post sutiones bilanx inclinabitur quâ parte erit solidum corpus: aëre verò admissò, recuperabit æquilibrium; ratio est quia extracto aëre crassiori, aër in ampullâ positus non ita premitur & maximè dilatur: unde tantum non est ipsius pondus.

Duodecimum. Ponatur in recipiente pomum rugis contractum & flaccidum, exhauriatur aër, complanantur rugæ & fructus sanus apparet: quòd si admittatur aër, pomum iterùm flaccesset; aliud pomum pelle spoliatur, ponatur iterùm in recipiente, exhauriatur aër, spumescet pomum quasi igni fuisset admotum: ratio est quòd extracto aëre delitescens aër in poris pomi jam minimè compressus extendat sese, proindeque in primo casu rugas complanet, quia facilè exire non

potest per corium pomi; in posteriori verò spumam excitet, quia simul cum liquore pomi dilatatur.

Decimum-tertium. Assumatur ampulla oblongo collo hermeticè obfignata. Sit fragilis & tertiâ sui parte aquæ plena, exhauriatur aër, brevi frangetur colli extremitas & innumeræ bullæ ex aquis erumpent: ratio est quia aër inclusus nulloatenus compressus pondere aëris externi sese dilatat.

Decimum-quartum. Fructus, flores & corpora quæ aëri exposita citò putrescunt diù conservantur in recipiente ex quo aër crassior extractus est: v. g. rosa per dies novemdecim inclusa nec odorem nec vividum colorem amisit; assata caro, panis, violæ, fraga post menses septem nullo modo corrupta sunt: cerivisia per duos menses æstivos servata est, nec tonitru debilitata: ratio est quòd aër hæc corpora non compresserit, partes non dissociaverit, nec impregnaverit nitro vel sulphure: quinimò aër delitescens in poris illorum corporum sese dilatavit & factus rarior partes non corrumpit. Hinc si aërem intromittas, rosa brevi evanescet, caro corrumpetur.

Partes in aëre duplicis generis distinguere debent: quædam sunt subtiliores quæ cum faciliè subeant poros ampliores cor-

porum, vix nocent hisce corporibus: quædam sunt crassiores figuræ multiplicis quæ rapiuntur à subtilioribus; illæ verò per poros eorundem corporum non ità facillè transire possunt, atque adedò partes dividunt & dissociant, si tamen partes illæ non sint vinculis validissimis secum invicem constrictæ & colligatæ: hinc dum aër è machinâ pneumaticâ extrahitur, partes ferè omnes crassiores extrahuntur, atque remanent solæ tenuiores, ideòque diutius asservantur & tardiùs corrumpuntur cerivisia, violæ, assata caro, panis &c. Nimirùm pori illorum corporum sunt satis ampli ut facilis sit & liber transitus partibus aëris in machinâ superstitis: at verò dum aër ille crassior non extrahitur, subit illorum corporum poros, qui cum non sint satis ampli & satis capaces, partes eorum corporum malè compactas & cohærentes facillè dissolvit & dissociat.

Plura de hoc argumento addi possent quæ subtilis Physicus de suo inveniet, v. g. Dici posset cur lignum & lapides aëri etiam libero exposita non ità facillè corrumpuntur quàm corpora prædicta, quia partes ligni & lapidum validiùs connexæ sunt; dici posset cur caro sale condita difficiliùs putrescat, quia partes salis rigidæ compingunt carnes & colligant;

ideòque tam facilè ab aëre divelli & dissociari non possunt.

Corruptionem esse ab illâ compressione aëris testatur experimentum certissimum: eatenus lac corrumpitur & carnes facilius putrescunt per æstatem quàm per hyemem, quia vehementior est agitatio aëris per æstatem: eatenus etiam uno temporis instanti fit ingens ex tonitru corruptio in illis corporibus, quia aër sulphureis & nitrosis partibus impregnatus variis percussionibus & re percussionibus agitur defertque partes illas ad carnes & liquores: hinc rustici nostrates fulgurante cœlo propè lac aut cerivisiam carbonēs ardentes apponunt, neque tunc corruptio fit, quia ignis attollit ipsum aëra. Sustinet, repellit partes nitrosas & sulphureas, adedque lac & cerivisiam propugnat à nimia compressione & divisione suarum partium.

Decimum-quintum est. Pannum sericum in recipiente ita comburi ut vix speciem mutet donec admissō aëre in cineres redigatur, quo probatur iterum dissolutionem fieri ab aëre crassiori: nam ideò panni species vix mutatur, quia aër in recipiente subtilior est, ut partes dissociet; sed introductus summâ vi irruens aër crassior illas distrahit partes.

OBJECTIONUM SOLUTIO.

Objicies 1°. Si ascensus aquæ vel Mercurii esset argumentum aëris gravitantis, ascensus ille tantus non esset, ubi tantum non est aëris incumbentis pondus: atqui contrarium experiëntiâ constat: nam in recipiente machinæ pneumaticæ tantum non est aëris pondus quantum est sub aperto cœlo: atqui tamen si experimentum Toricelli fiat in recipiente machinæ pneumaticæ, suspensio Mercurii est ad eandem altitudinem ad quam foret sub aperto & libero cœlo; ergo suspensio Mercurii non est argumentum aëris gravitantis.

N. secundam maj. Nimirum aër inclusus in recipiente tam premit Mercurium stagnantem in vase quàm aër sub aperto cœlo, quod quidem 10. colligere possumus ex eo quòd Mercurius ad eandem altitudinem maneat suspensus in recipiente ad quam manet extrâ recipiens. 20. Ex eo quòd aër in recipiente contentus sit compressus & non possit dilatari.

Pr. maj. Ibi non est tanta aëris gravitatio ubi columnæ aëris non sunt ejusdem altitudinis: atqui columnæ aëris quæ sunt in recipiente non sunt ejusdem altitudinis cum illis quæ sunt in aperto campo: ergo non est tanta aëris in recipiente in-

clusi gravitatio quanta est aëris in campo liberi.

Dist. maj. Si cætera sint paria , C. Si sint imparia, N. Sim.

Dist. min. Columnæ aëris contentæ in recipiente non sunt ejusdem altitudinis cum illis quæ sunt in campo libero , & cætera non sunt paria , C. Sunt paria, N. Ergo &c. N. Consequentiam.

Explico distinctionem, quod ut fiat: in atmosphærâ aëris incumbentis globo teraqueo sunt partes inferiores, id est, propiores globo, & partes remotiores à globo seu superiores: partes superiores & inferiores non sunt eodem modo compressæ, sed inferiores magis sunt compressæ; idèdque magis compactæ quàm partes superiores, quæ sunt magis dilatatæ & divisæ, superiores enim incumbunt inferioribus: hæc autem disparitas oritur à materiâ æthereâ sive à globulis & minutiis quæ vim faciunt in partes superiores & inferiores, sicque agendo in superiores agunt in inferiores; idèd inferiores magis compressæ, superiores verò non ità: quapropter si experimentum Toricelli fiat & in pede montis & in vertice, suspensio Mercurii non est ad eandem altitudinem, quia ratione medii cætera sunt imparia: nam aër in vertice montis positus est magis divisus, magis dilatatus,

minùs compressus, quàm aër in pede montis positus, ideòque aër in vertice non tam premit hydrargirum stagnantem in vase quàm aër in pede.

Porro si experimentum fiat in recipiente in quo sit aër æqualiter compressus, in quem proinde materia ætherea eandem vim facit ut dilatetur, certè si non possit dilatari, manere debet ad eandem altitudinem Mercurius suspensus ad quam maneret in aperto campo, quia cum sit æqualiter compressus nec possit dilatari retentus vitro, certè æqualiter premit stagnantem hydrargirum in vase ac si non adesset recipiens, licèt columnæ aëris in recipiente non sint ejusdem altitudinis cum illis quæ sunt extrà recipiens; sicut si columna ejusdem altitudinis cum atmosphæra premeret definito pondere globum terraqueum, eadem profectò ratione premeret, si divisa retineretur, nec posset evagari: nam aër in recipiente est æquè compressus ac volumen aëris extrà recipiens positum: retinetur autem à recipiente, nec potest evagari, dilatari: ergo recipiens præstat quod præstarent partes aëris superiores, erat enim aër in recipiente positus compressus à partibus superioribus; retinetur in eo statu à recipiente: ergo recipiens præstat & supplet vices partium superiorum aëris, dum retinet aëra in priore statu.

Ex hâc compressione ortâ à partibus superioribus sequitur vim esse elasticam in aëre compresso quâ ex omni parte premit sursùm & deorsùm horizontaliter: nam materia ætherea vim faciens inter illas partes ut ipsas dividat & dilatet, certè facit ut partes illæ versùs quemlibet locum nitantur & iter suum arripiant quâ parte minùs resistitur, unde si exhaustiatur aëre recipiente, aër exterior, si modò sit aliqua rimula, irruit per rimulam: unde si igne rarefiat aër in aliquo cubiculo, tunc subitò aër extrà cubiculum positus irruit per quascumque rimulas, & quidem eò concitatiùs & rapidiùs quò angustiores erunt rimulæ: quemadmodum aqua rapidiùs fluit quò angustior est alveus & minùs capax: porrò maxime nocivi sunt aëres illi subeuntes per rimulas, præsertim iis qui fortiùs approximantur ad ignem. Hinc accuratè claudi debent illæ rimulæ periculosæ magis quàm ingentes hiatus villarum agrestium.

Ex his aqua posita in amphorâ à latere perforata non effluit, si teneantur parallela horisonti, quia tantus est aëris nifus à latere positi quantus est nifus aëris supernè incumbentis: quod quidem experimentum oculis meliùs constat & postea faciliùs explicatur.

Urgebis: Vis elastica nata ex compres-

sione non est causa hujusce suspensionis: nam hæc suspensio durabilis est & perpetua: atqui vis elastica non est perpetuò futura: tandem enim debilitatur, imminuitur, imò perit, ut videre est in omnibus corporibus elaterio donatis; ergo &c.

Dist. min. Debilitatur in aliis corporibus præter aërem, C. In ipso aëre, N.

Itaque sunt corpora plurima quorum vis elastica frangitur, ut patet in virgâ arefcente, in ipso calyce, cujus partes dislocantur, sive cujus pori sunt ejusdem ubique capacitatis, in quantum materia ætherea illos ampliat quâ parte sunt strictiores: sed aër, quidquid sit de aliis corporibus, vim habet elasticam, quæ nullatenus frangitur; quod quidem adeò certum est ipsis experimentis constantissimis, ut possit tanquam fundamentum eò loci constitui: enimverò hoc aëri proprium est ut facile dilatari & facile comprimi possit; hujus elaterium idem semper est, & constans permanet, ut videre est in sclopetis pneumaticis quæ post longum temporis intervallum eâdem vi globulos emittunt ac si recens aër fuisset intrusus.

Ratio mechanica discriminis petitur ex diverso elaterio: eatenus quippè cætera corpora sunt elastica, quatenus materia ætherea cum aliquo aëre agit in ipsas partes aliorum corporum fluens per illo-

rum corporum poros : at partes aëris singulæ breves sunt maximè compactæ , neque elaterium in aëre oritur ex eo quòd materia ætherea fluat per poros singulorum partium , sed quod cum fluere non possit per illos poros , ideòque cum partes aëris resistent huicce fluxui , fluat necesse est inter ipsas partes singulas , quas distrahit quantum potest & dividit : unde mobilissimus aër quemadmodum mobilissima materia ætherea , ideòque licet partes singulæ à se invicem distrahantur per materiam ætheream , constantissimè tamen retinent suam figuram , ut patet in hydrargiro ; ideòque tenaciùs aër suum retinet elaterium quàm cætera corpora.

Aër eadem ratione densatur quâ incumbentis alterius corporis pondere comprimitur : quare si aëris moles quæ à telluris superficie usque ad extremos atmosphæræ limites patet , sit levior , cur aër terræ proximus rarior quoque futurus est ? Unde cum in Barometro aër unà cum Mercurio includitur , tùm ille dilatatur & Mercurium eò usque deprimit dum inclusus aër & Mercurius pensilis cum externo aëre librentur. Quare si Mercurius maneat in tubo suspensus usque ad 14 digitorum altitudinem , inclusus aër duplò rarior futurus est quàm ante experimentum.

Objicies 2^o. Sit experimentum quod primò sumatur tubus unius libræ affixus extremitati vectis. 2^o. Impleatur hydrargiro, cujus etiam pondus sit unius libræ, unde & tubus & hydrargirus sunt duarum librarum: porro si hydrargirus maneret suspensus in tubo & in æquilibrio à columnâ aëris externâ, certè una tantum requireretur libra in alterâ extremitate vectis ut æquilibrium fieret cum tubo: atqui contrà experientiam consequens, nam duæ postulatur libræ in alterâ extremitate ut fiat æquilibrium: ergo Mercurius non manet suspensus & in æquilibrio propter vim aëris externi.

Certissima est propositio minor & constitit nobis experimentis pluries tentatis, sed major negari debet: reverà tubus est unius libræ, si velis, & ut sit æquilibrium, poni debet pondus libræ in aliâ extremitate: reverà pondus Mercurii in tubo erit unius libræ, & tamen duplex libra in alterâ extremitate desideratur licèt, Mercurius suspensus sit in æquilibrio à columnis aëris externi prementis stagnantem hydrargirum: quia nimirum antequàm tubus unius libræ impleteretur hydrargiro, aër erat in cavitate tubi sustinens partem impetûs columnæ aëris incumbentis tubo, proindeque hæc columna non ità agebat valide quàm agit tubo repleto hydrargiro
unde

unde præter columnam agentem in tubum, quæ sustinetur unâ librâ, est columna agens in hydrargirum, quæ sustineri debet alterâ librâ, adeoque experimentum favet nostræ sententiæ, tantum abest, ut contradicat.

Objicies 3^o. Si ascensus gravium tribui deberet aëris gravitati, aqua expurgata desineret effluere per syphonem, cum aër crassior extractus est è recipiente: contra experientiam consequens.

N. maj. Cum enim aqua expurgata est, sufficit, ut continenter fluat, quod fit in recipiente aër purior, qui licet nullis machinis educi possit, multis tamen se prodit effectibus: unde si duo marmora terfa & levigata, illita, agglutinata sint vel oleo vel spiritu vini, quia aër ille subtilior non invenit aditum inter marmora, aliquandò marmora non divelluntur à se invicem, sed fit aliquandò ut ex oleo & spiritu vini faciliùs emergant aëreæ bullæ, inter commissuras quæ cum habeant vim elasticam, marmora cohærentia divellunt.

Objicies 4^o. Si ascensus vel suspensio gravium tribuantur aëri compresso, sublata compressione, nulla debet esse suspensio, sed contra experientiam consequens: nam si tubus fit in recipiente plenus aquâ expurgatâ, exhausto aëre, manebit aqua pensilis: imò tubus Mercurio expurgato,

plenus, immersus vasi Mercurii itidem expurgati, non modò ad altitudinem consuetam, sed ad 60 digitos & ampliùs suspensum tenebit hydrargirum, licèt aër omnis crassior fuerit exhaustus: ergo suspensio aquæ & Mercurii non venit ab aëre externo compresso.

N. min. Nam 1^o. experimenta probata non sunt omninò constantia, & tentata pluries felicem non habuerunt exitum. 2^o. Extracto aëre crassiori, semper manet aër purior: porrò licèt aër ille purior non possit tenere suspensa Mercurium & aquam minimè expurgata, potest tamen tenere suspensa, si nullus aër crassior residuus fuerit in aquâ vel in Mercurio: nam si Mercurius & aqua expurgata planè fuerint, tunc non est intrâ partes illorum corporum aër compressus: quia verò non est intrâ partes aër compressus, certè nulla fit dilatatio, nulla explicatio, actio nulla in partes aquæ expurgatæ seu Mercurii: inde aër purior potest sustinere corpora in eodem statu, proindeque suspensa: tum quia partes aquæ & Mercurii expurgatorum intimiùs adhærescunt parietibus vitri, & idèò sustinentur ab iis: quòd autem nulla sit actio aëris in partes aquæ expurgatæ seu Mercurii, quòd aqua suspensa maneat, patet idèò quia aqua ascendit per tubum capillarem ex utrâque

parte perforatum : quia aër crassior facile non agit in tubo capillari : unde si paululum succutiatur machina, statim cadet hydrargirus seu aqua , quia nihil est quod sustineat utrumque corpus : nunquam autem caderet, si aër foret compressus in recipiente, quantumvis machina succutiatur.

Objicies 50. Si ascensus aut suspensio gravium tribuerentur aëris gravitati, quò major esset aëris gravitas, eò major esset suspensio, & vicissim quò minor esset, eò minor esset suspensio ; sed aliud experientia videtur demonstrare : nam si experimentum Toricelli fiat tempore sereno, altius ascendit hydrargirus quàm si fiat tempore nimbofo, sed aër videtur esse gravior tempore nimbofo quàm sereno ; ergo &c.

Experimentum certum est ; sed inde concludo aërem magis gravitare tempore sereno quàm pluvioso : nimirum hæc est liquorum mensura ut vinum dicatur aquâ levius, quia Mercurius ad majorem altitudinem ascendit in aquâ quàm in vino : oleum vino levius est, quia ad majorem altitudinem assurgit in vino quàm in oleo.

Ratio verò mechanica cur aër magis gravitet tempore sereno quàm nimbofo & obscuro, hæc potest afferri, quia tempore sereno vapores à terrâ ascendunt, aër itaque deprimi debet : sicut aqua de-

bet deprimi cùm vinum inferiùs aquâ assurgit suprâ aquam : porrò si deprimatur aër, ergo magis compressus est : at verò obscuro tempore vapores descendunt, ergo paululùm attollitur aër : si paululùm attollitur, ergo minùs comprimitur, ergo minor suspensio tempore pluvioso quàm tempore sereno, & major per idem tempus serenum aëris gravitas.

DE AQUA.

Aqua dicitur à Peripateticis elementum frigidissimum & insigniter humidum.

Verùm ista definitio non est adæquata, multas quippè omittit aquarum proprietates tam essentielles aquis quàm sint frigus aut humiditas.

Itaque, ut definiatur aqua, observandum est ipsam sumi vel essentialiter, vel integraliter.

Sumitur essentialiter, si spectetur aqua secundùm illud quod eam facit differre à quovis alio corpore.

Sumitur autem integraliter, si spectetur hæc immensa aquarum copia, quæ globum terrestrem circumfluit & alluit.

Porrò, ut gradum cognoscamus, qui facit differre aquam ab aliis corporibus, ipsius aquæ principia & formatio explicari debent : aqua verò, meo iudiciò, sic

formari potuit : sunt in globo terrestri pori plurimi & diversæ matrices in quibus corpora compinguntur & suam mensuram accipiunt : per istos poros plurimæ repunt minutiae & plurimi globuli : porro & minutiae & globuli in istis poris obliquis & transversis, in longum protensis, circumvolutiones multas patiuntur, atque ita comprimuntur simul & agglutinantur, ut tandem aqua facta fuerit : & aqua ad superficiem terræ pervenit, quia motu vertiginis terræ à centro ipsius recedit : hæc est aqua sumpta essentialiter, quæ definiri potest fluidum constans ex partibus partim globosis, partim extensis in longum, & instar anguillarum lubricis.

: Aqua spectata integraliter definitur corpus diaphanum, liquidum, humidum, communiter frigidum, terrestrem globum circumfluens, suis undique ponderibus libratum & æquatum.

1^o. Dicitur corpus diaphanum : est enim luci pervium, ut constat, ideòque minutiae & globuli è quibus aqua efformata est poros plurimos perforatos tenuerunt, per quos lux continuatâ serie propagari possit, & reverà propagatur.

2^o. Aqua dicitur corpus liquidum : videlicet satis facillè cedit manibus obviis : partes enim ejus concisæ sunt, flexibiles,

oblongæ, & lubricæ, nec-non intercurrente subtili & perniciosissimâ materiâ agitantur.

30. Aqua dicitur corpus humidum: nam, ut ex oppositione siccitatis possumus colligere, humidum illud est cujus occasione habetur ab animâ nostrâ humiditatis sensatio; quod experientia testatur.

Quænam autem esse debeat dispositio tum in corpore humido, tum in corpore nostro, ut habeatur in animâ humiditatis sensatio, ex eâdem experienciâ satis facillè colligi potest: enimverò corpora humida suo contactu sic cuti adhærescunt, ut cutis inde non arescat, sed quasi ampliètur; proindeque tunc est humiditas in corpore nostro quandò partes corporis nostri molliores sunt & graciliores: inde mulieres & infantes sunt ut plurimum humidi temperamenti.

4°. Aqua dicitur communiter frigida, quia frequentius partes aquæ insensiles sunt in minore motu, aut saltem in motu minùs perturbato quàm partes nostri sanguinis. Dixi communiter, quia sunt aliquandò in motu perturbato magis, ut patebit de quibusdam thermis & aquis mineralibus.

50. Aqua dicitur terram circumfluens, quibus verbis aqua distinguitur à pluvîâ & à phlegmate quod est in omnibus fere mixtis.

Aqua dicitur circumfluere terras, quia omnia maria secum communicant, & propriè nullum est continens quod non sit aquis divisum.

De aquæ gravitate dicetur ubi de terrâ: imò de liquorum æquilibrio, de liquidis quæ comparantur cum aliis liquidis, vel etiam cum corporibus solidis.

His positis, tria à nobis præstari debent. 1º. Disputandum est de Mari. 2º. De fontium origine. 3º. De mineralibus aquis. Sit itaque

DE MARI.

Maris nomine intelligitur congeries ingens aquarum, quæ sibi continuæ sunt & terram circumfluunt,

Potest mare spectari vel geographicè, vel physicè: quia verò notio maris geographica maximi usûs est, ut æstus reciprocum marium pro vario locorum situ exponamus, idèò aliquid dico quod sit Geographorum.

Mare unicum est, si accuratè loqui velimus: nam mare quod dicitur Mediterraneum cum Ponte Euxino non est nisi major Oceani sinus, quemadmodum Mare Balticum, Mare Rubrum; & tamen pro more vulgari mare dividitur in Oceanum & Mediterraneum.

Mare Mediterraneum est magna Oceani portio, quæ per fretum Gaditanum ingressa inter terras elabitur media, jacetque inter Europam, Africam & Asiam.

In illo mari reperiuntur plurimi sinus, quorum alii majores sunt, alii minores.

Primus major est sinus Venetus, qui dicitur aliter Mare Adriaticum, in quo plures insulæ.

Secundus major est Archipelagus, in quo celeberrimæ insulæ, quæ fabulis fere omnibus Græcorum locum dedere.

Sunt & aliæ insulæ versùs Asiam Chyprus, ex Chypro versùs Archipelagum Rhodus, ex Rhodo versùs Græciam Creta, ex Cretâ versùs Italiam Insula Melitensis, à cruciferis Equitibus celeberrima: postea Sicilia insula major, divisa ab Italiâ per Messinæ Pharum. Postea Sardinia, deinde accedendo versùs partes nostras, Corsica; denique versùs Hispanias Majorica & Minorica.

Sunt alii sinus minores: celebris est sinus Naupacteus propter Victoriâ insignem relatam à *Joanne Austriaco*, Militiæ Christianæ Duce & Imperatore adversùs Turcas. Sunt pariter sinus Negropontinus, Thessalonicensis, & alii.

Mediterraneum dividitur in duas partes præcipuas. Prima extenditur à freto Gaditano ad fretum Hellepontiacum,

ubi est Constantinopolis; altera est aquarum congeries quæ Tartarorum, Moscorum, Circassium, Georgicorum terris continetur; dicitur Pontus Euxinus.

Oceanus est reliqua corporum copia, quæ sibi continua est, terrasque universas alluens pro variis oris varia sortitur nomina: inde Mare Æthiopicum, Indicum, Britannicum, Francicum &c. Aliis tamen vocatur nominibus, quæ aliunde suam ducunt originem; v. g. cum dicitur Mare Pacificum, Mare Atlanticum &c. Aquas Oceani esse sibi continuas dictum est, quia jam repertæ sunt viæ & strata, quibus junguntur aquæ marinæ: hinc aquæ terris undique conclusæ non sunt nisi lacus, v. g. Mare Tiberiadis, Mare Mortuum in Palestinâ, Mare Caspium in Asiâ &c. non sunt nisi lacus, quemadmodum Lacus Genevensis, Lacus Constantiensis propè Helvetios &c.

In Oceano sunt plurimi sinus & plurima freta.

Primus sinus dicitur Mare Balticum, in quo insulæ celebres; Mare verò Balticum alluit fines Daniæ, Pomeraniæ, Russiæ, Livoniæ, Finlandiæ, Sueciæ, Norvegiæ: in illo magno sinu sunt alii sinus minores: duo sunt præcipui, sinus Finlandiæ & sinus Botniæ.

Secundus est inter Africam & Asiam,

inter terras Arabûm : dicitur Mare Rubrum, aut sinus Arabicus.

Tertius est inter Arabiam & Persiam : dicitur sinus Persicus, ultrà quem in mediis terris est sinus Bassora. Huic finitimus est, alter ad Indi fauces.

Quartus est ad ostium Gangis, qui dicitur sinus Bengalensis : minores proximi sunt sinus Siamitarum & sinus Choreæ, ad partes Sinarum orientales.

Quintus est inter Novam Hispaniam & Californiam ; dicitur mare coruscans.

Sextus est propè Castiliam Auream ; dicitur sinus Panamensis.

Septimus est inter Novam Hispaniam & Floridam ; dicitur Mexicanus, in quo plures insulæ apud mercatores famosæ.

Octavus est in Virginiâ.

Nonus est in Novâ Franciâ, ad ostium fluminis à S. Laurentio dicti.

Decimus est in Novâ Britannia.

Freta præcipua sunt. Primum inter Rusiam & Novam Zemblam, dicitur Waigats. Secundum est inter Scaniam & insulam, in centro Maris Baltici ; dicitur fretum de Zonel. Tertium est ad Gaditanum, ad ostium Mediterranei Maris. Quartum est inter Africam & Arabiam ; dicitur Babelmendel. Quintum est inter Arabiam & Persiam ; dicitur fretum de Bassore. Sextum est fretum de Sundâ, inter

insulas Seumatræ & Javæ. Septimum est Malacanum, inter Malacam & Seumatram. Octavum dicitur de Anian, inter Asiam & Americam. Nonum est Magellanicum, inter Americam meridionalem & terram igneam. Decimum magis accedit ad polum antarcticum & inter continentem australem & eandem terram. Undecimum est fretum uxonum, inter Estotilandum & Novam Franciam. Duodecimum fretum de Davis, inter Groënlandiam & Estotilandiam.

Alia sunt pertinentia ad mare, v. g. quid sit portus, quid promontorium, sed ista apud Geographos: nos autem more physico duo considerabimus in mari, sal-
sedinem ejus & varios motus: sit itaque

De Salsugine Maris.

Quidam volunt mare esse salsum, quia recipit in se plures aquas pluviales, quæ cum habeant secum admixtas plures partes salinas, suo sale impregnant mare.

Alii salsuginem repetunt ex eo quod fervore solis perpetuo aduratur.

Quidam docent mare salsum esse, quia Deus in principio partes salinas miscuit simul cum aquis.

Alii denique volunt esse in fundo maris rupes salis immensas, quæ quidem ab

aquis perpetuò corroduntur, ex quo mare
falsuginem contrahit. Sit

PRIMA PROPOSITIO.

Mare non est falsum ex aquâ pluviâli.

Pr. Nam si falsugo maris inde oriretur,
aqua pluviâlis foret falsior: atqui tantum
abest ut falsior sit, quin imò dulcis est;
ergo &c.

Et certè si mare foret ideò falsum, de-
beret esse magis falsum quandò pluit,
quàm quandò diu non pluit: atqui hoc
experientiæ contrarium; ergo mare non
accipit falsuginem à pluviâ.

SECUNDA PROPOSITIO.

*Mare non accipit falsuginem à perpetuo
Solis fervore.*

Pr. Si mare falsedinem haberet à fer-
vore solis, aqua dulcis exposita fervori solis
tandem falsa fieret: atqui hoc experientiæ
contrarium est, quia si non sint in ipsâ
salinæ partes, falsedo gustu non percipi-
tur: si tamen sint quædam partes salinæ,
profectò exhalatione dulcium partium
quæ attolluntur, aqua tandem fit falsa.

TERTIA PROPOSITIO.

*Mare non habet salsedinem ab eo quòd
Deus particulas salinas simul miscuerit
cum aquis.*

Pr. Nam 1º. Hæc opinio tam facile
negari potest quàm facile proponitur,
neque ullâ nititur mechanicâ.

2º. Quia sales è Mari perpetuò extra-
huntur, tandem mare salibus foret ex-
haustum, & quotidie fieret minùs salsum:
contrà experientiam consequens.

QUARTA PROPOSITIO.

*Salsedo maris est ab immensis salium ru-
pibus in ejus fundo positis.*

Pr. Nam ab eo repeti debet salsedo
maris, quo posito, salsedo maris benè ex-
plicatur; atqui benè explicatur positis hu-
jusmodi rupibus: nam benè explicatur
salsedo maris, si aqua marina aliquid ex
illis rupibus corrodat & dissolvat: atqui
corrodit & dissolvit; ergo positis illis rupi-
bus immensis, benè explicatur salsedo maris.
Reperiri autem tales rupes patet ex eo
quòd sit insula quædam vocabulo *Ormus*,
quæ nihil est præter salem durum & can-

didum ex quo fabricantur ædes, unde nullus est dulcis aquæ puteus in totâ insulâ; sed sapiens opifex rerum voluit ut sublatus vapor dulcis in arborum folia decidens daret aquas uberrimas salutares & siti extinguendæ aptissimas.

OBJECTIONUM SOLUTIO.

Objicies 1°. Rupes illæ salium jam forrent dissolutæ: itaque ab illis non bene repetitur salsedo maris.

N. ant. Cujus negati ratio ut habeatur, observandum est aquam, quæ sales dissolvit, certam tantum copiam posse dissolvere, quia tandem ejus vires exhauriuntur: unde si major sit salis copia, non fit amplius dissolutio. Quod eò loci de aquâ dissolvente dicimus, de aliis dissolventibus dici potest; v. g. saliva nostra in ore, fermentum in stomacho non dissolvunt nisi certam escarum copiam, ultra quam non fit amplius dissolutio, idèdque cibus manet indigestus: sic aqua regalis non nisi certam auri quantitatem, sic aquæ stygiæ non nisi certam metallorum dissolvunt copiam, quia vires debilitantur; itaque postquam aquæ dissolverunt certam illarum rupium quantitatem, quamdiu manent sic impregnatæ sale, non dissolvunt amplius: ergo rupes illæ non sunt jam dissolutæ.

Objicies 20. Si salsedo maris foret à rupibus in fundo positis, aquæ propiores fundo deberent esse magis salæ: atqui tamen magis salæ non sunt, imò major plerumque est salsedo partium à fundo remotiorum.

De minore illud accipite, pro variis locis aquas fundo propiores esse magis vel minus salas: quia nimirum aqua dulcis aliquandò scaturit in fundo maris: sed quidquid sit de minore, N. maj.

Pr. Sal petit fundum liquidi: ergo aquæ propiores fundo deberent esse magis salæ.

10. Argumentum illud urget contra omnes, sive salsedo sit à rupibus salis in fundo maris positis, sive sit ab alio principio.

20. Dist. ant. Sal minimè dissolutus liquidi fundum petit, C. Sal dissolutus petit fundum liquidi agitati, N. v. g. si sal, faccarum & alia ab aquis dissolvenda in aquis ponantur, certè fundum vasis petent, nisi dissolvantur & vas agitetur; at si fuerint dissoluta & vas agitetur, certè ad circumferentiam veniunt: porro in mari partes salinæ sunt dissolutæ, mare liberè exspatiatur & agitur; ergo partes salinæ accedere debent ad superficies aquarum.

Objicies 30. Aqua marina salsior est

sub zonâ torridâ quàm circâ polos: sed verisimile non est plures esse salinas rupes in fundo maris circâ zonam torridam quàm circâ polos: ergo hæc falsedo non oritur ab illis rupibus.

Quantum ad minorem, nemo vidit utrum sint nec-ne plures rupes salinæ circâ zonam torridam quàm circâ polos; sed tamen quia fieri potest ut sint plures, certè si major illa falsedo aliâ ratione explicari non posset, supponi posset quod sint plures.

Sed Dist. maj. Et cætera non sunt paria, C. Et cætera sunt paria, N. Sic dist. min. & N. consequentiam.

Itaque sub zonâ torridâ aqua maris salior est quàm circâ polos, & tamen non habet fortassè mare plures rupes in fundo circâ zonam torridam quàm circâ polos, sed cætera non sunt paria. 1^o. Motus maris est vehementior circâ zonam torridam quàm circâ polos, proindeque circâ hanc zonam aquæ magis corrodunt salinas rupes, & idè salis major copia hæc in parte maris quàm in alterâ. 2^o. Sol respondet semper zonæ torridæ, & idè plures particulæ aquarum attolluntur in altum aëra: porro qui attolluntur vapores non sunt salini, quippè salinæ partes, ut benè loquitur Cartesius, sunt duræ veluti columellæ, quas fervidior solis æstus non potest ad se adducere, proindeque

semper remanet in aquis. marinis salinum corpus: at verò circa polos nulli ferè attolluntur vapores.

Ex quibus interim colligi potest cur aqua pluvialis falsa non sit: enimverò salinæ partes non attolluntur, ut dicetur ubi de pluvia; & patet experimento domestico: dum ossa calefit, attollitur vapor ad operculum, qui quidem vapor insipidus nullum salem continet. His positis, sit

DE MOTIBUS MARIS.

Motus maris est difficilior totius naturæ phenomenon, in quo perscrutando certa polliceri nequeo, non sufficio, non audeo. Sed multum laboris & industriæ cum aliis Philosophis, tum veteribus, tum recentioribus adhibebo. Dicam quippè ingenuè nihil allatum hætenus quod omninò satisfaciat nobis: ergo si aliquid verosimile attulero circa effectum tam multiplicem, officio meo benè functus videri debebo.

Porro motus maris duplicis sunt generis, alii generales, alii speciales.

Motus generalis is est qui in omnibus ferè Oceani partibus deprehenditur. Distinguitur vulgò duplex; unus continuus in occasum, alter verò reciprocus.

De Motu Maris ab Ortū in Occasum.

Motus ille insignior est circā zonam torridam quā circā polos: hinc faciliior est navigatio ex insulis orientalibus versū Africā, & ex Africā versū Brasiliā, quā ē Brasiliā versū Africā, & ex Africā versū Indiam: hinc quia vix sensibilis est motus ille versū polos, id est, extrā tropicos, eādē ferē facilitate ab ortu navigamus in occasum quā ab occasu in ortum.

Ratio verò cur sit magis sensibilis intrā tropicos motus ille quā extrā, venit ex eo quòd major sit circumferentia aquarum quæ positæ sunt versū zonam torridam quā versū polos.

Quærent Physici causam huiusce generalis motus, sed missis variis eorum opinionibus, nostram sic expono: Supponimus aquam simul cum terrā circā solem moveri: porrò motus iste globi terraquei est ab occasu in ortum: verum quia aqua, quæ est corpus liquidum, non movetur eā velocitate quā movetur terra, ideò videtur habere motum ab ortu in occasum, qui quidem motus augetur à vento orientali: enimverò aër non movetur eādē velocitate ab occasu in ortum quā movetur aqua, aqua quā terra, proin-

deque videri debet aër habere motum ab oriente in occidentem; idem motus aquarum ab ortu in occasum augetur, ex eo quòd figura massæ elementaris sit elliptica: porro ratione illius figuræ, aquæ quæ continentur sub minore diametro magis comprimuntur; atque ideò mare videtur habere motum ab ortu in occasum.

De Motu reciproco.

Præter motum ab ortu in occasum est motus à zonâ torridâ versùs polos & à polis versùs zonam torridam: ideò verò mare patitur eos motus, quia intumescit aqua & detumescit: neque enim est alter motus quàm motus ab ortu in occasum: sed quia aliquandò major fit aquarum intumescencia, aliquandò detumescencia, ideò aliquandiù retrogradi videtur aqua, id est, ire à zonâ torridâ versùs polos, & à polis redire ad zonam torridam.

Quæritur causa hujusce intumescenciæ & detumescenciæ aquarum, sed priùs exponi debet varietas quam patitur æstus ratione locorum & temporum.

Ratione temporis æstus vel est diurnus, vel est menstruus, vel est annuus.

Diurnus in eo consistit quòd mare intrà 24 horas ad idem littus bis acce-

dat & ab eo bis discedat: nam in nostris Galliæ littoribus aquæ Oceani per sex horas sensim crescunt: tum per quartam circiter horæ partem moratæ decrescunt sex horarum spatio, donec per horæ quartam partem moratæ similiter redeant, eâ lege ut æstus sequentis diei sit unâ ferè horâ tardior.

Æstus menstruus in eo consistit, quòd diurnus per mensem bis crescat nempè circà novilunia & plenilunia, bis autem decrescat in quadratis lunæ aspectibus.

Annus in eo consistit quòd menstruus singulis annis bis sit fortior, nempè circà æquinoctia, & bis deficiat, nempè circà utrumque solstitium; hâc tamen lege ut æstus crescat etiam post unum, alterum & tertium novilunii & plenilunii diem occurrentium æquinoctiis.

Pro diversitate locorum adeò varius est æstus, ut vix nec vix quidem diversitas recenseri possit; videlicèt sub zonâ torridâ, inter tropicos maximè se prodit, in plagâ etiam indicâ juxtâ Gangem & Indi fauces, nec-non in fretis atque sinubus quæ ostia habent protensa ab oriente in occidentem: secùs in fretis, in sinubus, quorum ostia porriguntur ab Occidente in Orientem. Hinc vehementior est æstus in freto Magellanico quàm in freto Gaditano: hinc in mari ultrâ terram igneam

occidentali æstus est vehemens; at vix sentitur in toto mediterraneo, minimusque est ad Africæ littora, aliquandò Massiliæ & in sinu Veneto, propter rationem à nobis afferendam.

Æstus ille aliquandò vehemens deprehenditur & varius, ità ut aliquandò flumina retrocedant æstu, v. g. Tamisis in Britannia, Betis in Hispania. Observari debet idem spatium temporis non infumi ubique: nam in Lusitano Oceano senis horis intumescit mare & detumescit: ad Garumnæ fauces in Aquitaniæ littore septenis accedit Oceanus, & binis horis refugit. Ad Eritreum Africæ promontorium ternis accedit, octenis regreditur: ad oram Guineæ tantus est impetus æstus marini, ut tres anchoræ vix queant impedire ne abducatur navis. In littore Cambaiæ ad Indi fauces mare binis horis triginta circiter leucas accessu obtegit, binis totidem secessu detegit: atque adeò tantâ rapiditate agitur, ut homines cursu vix evadant ingruentem undam; ne verò incautos abripiat æstus, tympani sonitu admonentur.

His positis, quæritur quænam sit causa hujusce intumescentiæ & detumescentiæ. Parùm referret aliorum sententias his exponere & refellere, sufficiat illam quæ nobis verosimilior videtur oculis subijcere,

Quæ sit Causa Æstûs maritimi reciproci.

Cartesius docuit æstum reciprocum maris esse à lunâ comprimente aquas subjectas, proindeque cogente ut majori copiâ effluent: unde æstûs varietatem ratione dierum, mensium & annorum, petit ex illâ compressione globi lunaris, ità ut diversitas ejusdem æstûs ratione locorum petatur à littoribus, fundo maris, ventis, insulis, fretis, fluviorum exonerationibus.

Sed etiam, juxtà Cartesii principia, nollem dicere lunam comprimere aquas subjectas: dicerem potiùs materiam ætheream lunam inter & aquas positam in angustiis premere, tum ipsam lunam, tum ipsas aquas, quæ proinde per 6 horas fluunt versùs polos, donec recedente lunâ ab hac maris parte, aquæ detumescant & videantur refluere à polis versùs lineam æquinoctialem: quibus positis, sit

PRIMA PROPOSITIO.

Luna causa est æstûs marini sive intumescencia & detumescencia aquarum.

Pr. Nam quoties corporis alicujus motus & affectiones præcipuæ habent ma-

nifestam coherētiā cum alterius corporis motu, itā ut utriusque motūs discrimina inter se perpetuā quādam vicissitudine coherēant, admodū verisimile est unum corpus ab altero moveri: sed magna deprehenditur intumescentiæ & detumescentiæ maris cum lunæ motu vicissitudo, & motūs lunæ marisque discrimina perpetuo tenore coherēnt per dies, per menses & annos.

10. quidem, per dies coherēnt lunæ marisque discrimina: sicut enim lunæ motus divisus est in quatuor partes juxta quatuor cœli portiones, id est, in quatuor puncta, scilicet ortum & occasum, verticem diei & verticem noctis, itā singulis diebus mare quater cietur, bis intumescendo & bis detumescendo: nimirum quoties luna nostrum meridianum circulum, sive suprà, sive infrà nostrum horisontem subit, toties Oceanus crescit à meridie ad septentrionem: quoties verò eadem luna oritur vel occidit, hoc est, ascendit suprà aut descendit infrà horisontem, toties Oceanus decrescit & videtur refluere à septentrione ad meridiem: hinc quia luna ab uno ad alterum ex his punctis non nisi per sex horas accedit, idcirco mare senis horis primū intumescit, & senis iterū primū detumescit: tum senis aliis horis iterū inu-

mescit, & aliis senis iterum detumescit : rursus quia luna à meridiano diei vertice non regreditur ad eundem nisi spatio 24 horarum cum quinquaginta circiter minutis, propterea quotidianus æstus hoc eodem spatio tardior est, ita ut si hodie mare æstuet horâ nonâ, non debeat crastinâ die æstuarè nisi post nonam cum quinquaginta circiter minutis : ergo per dies cohærent motuum lunæ & maris discrimina.

20. Per menses cohærent lunæ & maris discrimina : nam sicut luna per mensem pro quadruplici formâ fit crescens, quadrata, plena, quadrata decrescens, sic per mensem quatuor sunt æstuum diurnorum discrimina : nimirum æstus maris major est lunâ crescente, quadratâ minor, lunâ plenâ iterum major, lunâ decrescente iterum minor : hinc sanè quia circâ novilunia & plenilunia luna est in minore diametro : at verò dum quadrata est, est in majore.

30. Per annum quoque cohærent motuum lunæ & maris discrimina : sicut enim luna per annum quatuor habet diversas cum terrâ habitudines pro quatuor anni tempestatibus, nempe æquinoctio verno, solstitio æstivo, æquinoctio autumnali & solstitio hyberno, sic quatuor æstus menstrui per annum discrimina :
nam

nam æstus novæ lunæ & plenæ lunæ major est, tum verè, tum autumnò, minor est tum æstate, tum hyeme: quippè in æquinoctiis luna est in parte magis perigæâ minoris diametri, in solstitiis autem reperitur in parte magis apogæâ majoris diametri: ergo per dies, per menses & annos cohærent inter se motus lunæ & æstus maris: ergo admodum verisimile est lunam esse causam æstûs maritimi.

Dices: tam motus marinus dici potest causa motûs lunaris propter rationem allatam, quàm motûs lunaris dicitur causa marini æstûs: ergo ratio allata nihil probat.

Dist. ant. Si cætera sint paria, C. Si sint imparia, N. Proindeque ratio allata nihil probat si cætera sint paria: sed quia sunt imparia, aliquid probat. Nam cum luna sit in fluido, certè benè intelligitur quomodo ad nos aliquandò accedat, aliquandò recedat à nobis, & quidem juxtà tempora assignata, per dies, menses & annos: at non concipitur undenam foret æstus ille marinus qui faceret ut luna recederet à nobis & ad nos accederet juxtà tempora jam assignata.

Alii prorsùs negant antecedens, quia si marinus æstus foret causa motûs lunaris, tantùm abest ut luna nobis foret propior dum æstus est major: imò foret remotior, quia vehementius repelleretur:

hoc repugnat experientiæ: ergo juxta rationem allatam dici non potest æstus marinum tam esse causam motûs lunaris, quàm motum lunarem esse causam æstûs marini.

SECUNDA PROPOSITIO.

Luna est causa æstûs marini, quatenus ad nos accedit, & à nobis recedit.

Pr. Nam eatenus luna est causa æstûs marini, quatenus facit ut aquæ maris intumescant & detumescant: atqui eatenus facit ut aquæ maris intumescant & detumescant quatenus ad nos accedit & à nobis recedit: nam quatenus ad nos accedit & à nobis recedit, ponit materiam subtilissimam in majoribus vel minoribus angustiiis: atqui eatenus luna facit ut aquæ intumescant & detumescant, quatenus ponit materiam subtilissimam in majoribus vel in minoribus angustiiis: nam eatenus luna facit ut aquæ intumescant & detumescant, quatenus immutat rotundam & æquabilem aquarum circumfusarum terræ figuram, excavando ejusmodi aquas versùs æquatorem, ità ut fiat intumescencia versùs polos: atqui luna dum ponit materiam subtilissimam in majoribus vel minoribus angustiiis, immutat ro-

tundam & æquabilem aquarum terræ circumfufarum figuram, excavando hujusmodi aquas versùs æquatorem, ità ut intumescencia perveniat ad polos: ergo luna quatenùs ponit materiam subtilissimam in maioribus vel in minoribus angustiiis, facit ut detumescant aquæ & intumescant: ponit autem quatenùs accedit ad nos & à nobis recedit; proindeque luna est causa ætüs marini, quatenùs ad nos accedit & à nobis recedit.

Hæc conclusio facilè demonstrari potest in hypothefi Copernicanà: fit A, B, C, D (fig. 6. tab. 16.) nostri vorticis ovatus vertex, in quo vortex terrestris & vortex lunaris: 5, 6, 7, 8. designat materiam subtilem, quæ est lunam inter & globum terraqueum. Sit circulus 1, 2, 3, 4. designans aquas, quæ, ut res fiat clarior, universam terram ambiunt: est enim eadem ratio ac si contentæ in alveo spectarentur: I designat centrum vorticis: N centrum ipsius terræ.

Terra autem spectatur ut duplici motu circumacta: uno communi circà solem per annum, altero proprio, quo circà suum axem circumfertur per diem: videlicèt, ut olim dicebamus, planetæ in hypothefi Copernicanà cœlo liquido circumfusi circà solem circumferuntur ab occasu in ortum & describunt figuras ellipticas, sicut in-

Q ij

fluxu fluminis, dum aqua in se sinuata varios efficit vortices, corpora quædam ut paleæ, folia &c. motu aquæ circumaguntur & simul circà suum centrum torquentur, dum interim ab aquâ rapiuntur communi vertigine; & quò propiùs ad centrum vorticis accedunt, eò citiùs gyros absolvunt, nec tamen perfectos describunt orbes, sed circuitus quorum partes distantia à centro inæquali removerentur.

Diximus & olim quòd non tantùm planetæ circà solem moverentur, sed quòd satellites quidam hunc haberent motum circà planetas: v. g. quinque sunt circà Saturnum, quatuor sunt circà Jovem; diximus & lunam spectari posse tanquam terræ satellitem; quippè quæ circà terram per mensem moveatur & cum ipsâ terrâ circà solem: denique putatur circà suum axem per 24 horas ità circumduci, ut quo tempore luna & terra circà solem communi circuitu circumferuntur, eodem etiam tempore circà suum axem terra trecentis quinquaginta-quinque circuitionibus deferatur: quo ergo tempore terra & circà solem & circà suum axem fertur, eodem luna & circà solem & circà terram ipsam rapitur. Prior motus lunæ dici potest annuus, posterior menstruus: de motu menstruo priùs agetur quàm de motu annuo.

Menstruus conferetur & cum cœlo & cum terrâ: porro luna, quæ comparata cum velocitate quâ fertur terra circâ cœlum, immota cogitari potest, suâ præsentia obstat quominus centrum N & I centrum vorticis eodem simul loco existant: eadem luna efficit ut N paulò longiùs distet à puncto B: quia cum terra & luna ferri nequeant tantâ velocitate quanta est velocitas materiæ vorticis quo circumfunduntur, ideo præsentē lunâ inter B & I centrum terræ N, ad punctum D aliquantulùm accedat necesse est, ut terra paribus hinc inde cœli circumfusi momenti librata quiescat, nam solâ hâc virtute terra sustinetur. Similiter luna ad punctum C existat, idem terræ centrum ad punctum A debet accedere; & sic de cæteris lunæ locis propter eandem rationem; atque hic est motus quem vulgò dicunt terræ trepidantis: enimverò materia vorticis A, B, C, D, ad majores loci angustias ponitur ubi lunâ præsens est, ut sit in aquâ contractiori alveo ducta quæ in his spatiis rapidiùs fluere debet, adeoque hæc materia redacta ad majores angustias debet subjectam tum aquæ, tum aëris superficiem pressius urgere: unde cum aër & aqua sint corpora liquida, quæ idcirco compressa effluunt, propterea aër & aqua debent effluere ab æquatore versus polos.

Verum quamvis luna comparata cum terrâ videatur quiescere, ipsa tamen suum quolibet mense circuitum circâ terram perficit in vortice A, B, C, D, itâ ut vigesimam ferè octavam partem conficiat quovis die: unde eadem luna sex horis labentibus aliquid spatii inter B & C interjecti conficit; ex quo fit ut pars I non nisi senis horis cum duodecim circiter minutis ad altiorē aqua perveniat, & sic de cæteris; itâ ut diurnus æstus comparatione ejusdem meridiani unâ ferè horâ tardius recurat.

Menstruus autem lunæ circuitus A, B, C, D, non est rotundus, dicitur ellipticus: quare si duobus diametris sese ad angulos rectos interfecantibus dividi supponatur orbis lunaris, jam illæ diametri non erunt æquales, sed unus erit brevissimus, & alter longior: in breviori luna reperitur per novilunium & plenilunium: in longiori reperitur per quadratos aspectus, ex quo fit ut luna per plenilunium & novilunium propior terræ comprimatur magis aquas quàm per quadratos aspectus, quia tunc remotior est: unde circâ novilunia & plenilunia majores videntur esse æstus quàm circâ quadraturas.

Non tantum terra circâ suum axem per diem, & luna circâ ipsam terram per mensem, verum etiam utraque circâ solem

per annum abripitur; luna quidem secundum planum ecclipticæ, terra verò secundum planum æquatoris: quò fit ut luna & terra vere & autumnò parùm, æstate verò & hyeme multùm inter se distent: si enim luna & terra lineis parallelis abriperentur, vel ambæ secundum planum æquatoris, vel ambæ secundum planum ecclipticæ, eadem & æquali semper distantia annuum cursum peragerent, nec magis se comprimerent unâ quàm alterâ tempestate; sed cum luna secundum planum ecclipticæ obliquæ, terra verò secundum planum æquatoris rectâ abripiatur quotannis, fit ut luna & terra duobus æquinoctiis magis & duobus solstitiis minus ad se accedant: unde vere & autumnò lunâ magis comprimente, seu potius ponente materiam ætheream in majoribus angustiis, majores sunt æstus; hyeme verò & æstate eadem lunâ ponente eandem materiam in minoribus angustiis, minores sunt æstus.

Quidam quærunt quare stagna & lacus non patiantur hanc intumescentiã cum comprimantur aquæ stagnorum à materiâ æthereâ positâ in majoribus angustiis.

Facilis est responsio, quia nimirum alvei non sunt satis ampli ut aquæ magis comprimantur ex unâ parte quàm ex alterâ.

Licet sunt quidam lacus, v. g. Quebeci

Q iv

in Americâ, propè locum dictum *la Baie des puants*, est lacus qui intumescit & detumescit bis in die. Est lacus qui dicitur unctorius in Americâ septentrionali, altior superficie maris secundum quingentas exapedas; & tamen intumescit & detumescit aliquandò usque ad altitudinem duorum pedum, aliquandò trium, aliquandò quatuor: exoneratur fons ille cadendo in flumen S. Laurentii: distat à mari secundum ducentas & septuaginta leucas: porrò hanc intumescentiam in hisce stagnis & fontibus non ità facilè explicare possunt Physici: aliquid afferre conabor ubi de fontibus.

De Motibus Maris specialibus.

Motus specialis is est quo aliquæ duntaxat Oceani partes agitantur motu sibi proprio.

Varii sunt illi motus, atque discriminant æstum reciprocum; v. g. adeò validus est motus maris circà littora Africæ versùs occidentem, ut dies aliquot requirantur ut naves littas appellant, licèt à littore tantùm distent secundum unum milliare: hoc oritur ex eo quòd plurimi fluvii quos inter reperitur fluvius Zaïre se projiciant in mare summo impetu.

Motus alii veniunt à ventis, à fundo

maris, à dispositione littorum, ab aëre quodam delitescente & irruente per foramina.

Motus qui sunt à ventis sunt maximè irregulares; imò sunt ità vehementes aliquandò, ut mare contrà generalem motum fluat: id videre est ad insulam Java in freto Calappa, tunc enim mare movetur ab insulis Maldivis versùs Indiam.

Motus speciales qui sunt à fundo maris & à littoris dispositione sæpè circulares fiunt, & vortices appellantur seu gurgites: quidam in gyrum duntaxat circumaguntur; quidam certis horis absorbent & certis horis refundunt & respuunt: nonnulli absorbent & refundunt.

Vortex celebris est propè Græciam, què dicitur Euripus Calcidicus; ille recipit aquam certis horis & aliis expuit: alter est Normanniam inter & Angliam, propè Chereburgum, ad quem naves huic proximæ mirà velocitate feruntur, sed factæ viciniore repelluntur: alter est omnium celeberrimus ad Norvegiam, cujus medium occupatur à Petrà quam incolæ vocant *Mouske*: porro illa vorago sex horis absorbet omnia vicina, aquam, Balenas, onerarias naves, quæ omnia totidem horis eructat & evomit.

Causa eorum gurgitum nulla assignari potest nisi fundum ipsius maris & caver-

nosa quædam loca anfractuosa quibus aquæ inter se communicant, ita ut per varias oscillationes aquarum fiant itus & reditus: hoc quidem non satisfacit, fateor; sed mirum non est si loca à sensibus nostris adeò remota nos lateant.

Motus qui sunt à spiritu agitante aquas, aut faciente in ipsis ebullitionem, dicuntur concussio & tremor. Est motus huiusmodi in loco dicto (*Cap Breton*) mare ubi versùs Aquitanix littora sine ullis ventis adeò turgescit, ut mare videatur exundans paratumque ad littoris inundationem.

DE FONTIUM ORIGINE.

Antequam loquamur de hoc argumento, quorundam vocabulorum notiones præmittimus.

Fluvius est aqua satis copiosa fluens oblongâ viâ juxta alveos à certo terræ loco versùs alium locum.

Alveus est cavitas in quâ continetur aqua depressa magis quàm litus.

Rivus dicitur aquarum copia quæ non habet eam profunditatem & latitudinem ut possit navigia admittere.

Torrentis est aqua cum impetu fluens ex montanis locis.

Confluens est locus ubi fluvius in alterum sese exonerat.

Brachium fluvii est pars quædam fluminis fluens per alveum distinctum.

Fons est aqua scaturiens ex certo loco terræ & profluens in declivia.

Puteus est aqua in profundo scaturiens collecta, non verò fluens.

Plurimæ sunt opiniones circa aquarum originem. Nostram aperiet

PROPOSITIO.

Præcipua fontium origo est ipsum mare.

Pr. Nam illud est origo fontium quo posito, explicantur phænomena ad fontes pertinentia: atqui hoc posito, explicantur phænomena illa.

1º. Si necessario debeant esse canaliculi per quos aqua marina effluat intra terræ viscera, sanè fontium aqua ex illis canaliculis potest resultare: atqui debent esse plurimi canaliculi per quos aqua marina effluat intra terræ viscera: videlicet per annum tantæ aquarum copia immittitur in mare, ut totam tellurem superaret nisi forent ductus illi & meatus.

2º. Reperiuntur fontes salsi, & quidem eò frequentius quò loca sunt maris propiora: porro licet quidam ex illis fontibus sint à fundo salino & petroso, in quantum sunt rupes salis in quibusdam

Q vj

regionibus, tamen verisimile non est tot esse petrosas rupes quot sunt fontes salsi: ergo falsi sunt aliqui, quia ducunt originem à mari.

Fatendum tamen est pluviam & nives resolutas multum facere ut augeantur fontium vires: nam, experientiâ teste, fontes ferè omnes per æstatem imminuuntur & aliquandò arefcunt: imò quidam sunt fontes minutissimi neque omninò profundi, qui veniunt ex imbribus & resolutis nivibus, si modò terra apta sit fundo suo, ut aquas colligat & servet: nonnulli etiam veniunt ex fluminibus; nam quemadmodum sunt canaliculi per quos aqua marina effluit intrâ terræ viscera, sic supponi possunt canaliculi per quos aqua fluminum pariter effluit. Hinc quandò sunt fluminum exundationes, loca propiora fluminibus v. g. fossæ replentur aquis.

Prima tamen origo aquarum aliter explicanda est, fuit enim aqua primùm facta intrâ terræ viscera mechanicâ aliquandò exponendâ.

OBJECTIONUM SOLUTIO.

Objicies 1^o. Aqua fontium plerumque dulcis est, maximè si fontes sint à mari remotiores: atqui posito quòd aqua ma-

rina per angustos canales in interiora terræ sese cursim insinuet, jam non posset explicari quomodo aquæ fontium sint dulces.

N. min. Nam dum aquæ marinæ per canales illos angustos se insinuant vel relinquunt partes salinas impeditas in canalibus, vel attritu vario affectio partium salinarum mutatur: hinc aquæ fontium videri debent dulces; sicut pluvia per solemeducta ex mari est tamen dulcis, ex eo quòd aut sole partes educantur quæ dulces sunt, aut ex eo quòd partes salinæeductæ figuram amittant.

Obijcies 1^o. Fontes sunt in cacuminibus montium altiores ipso mari, imò omnes fontes mari altiores sunt: nam ad mare tendunt omnes, proindeque viam declivem tenent: porrò posito quòd fontes illi sint mari altiores, concipi non potest quomodo aqua marina par canaliculos ducta perveniat ad montium altitudinem: nam in hac sententiâ fontes & mare erunt quasi syphon cujus crus urum amplum est, aliud autem minùs capax: porrò in syphone aqua est ad eandem altitudinem in utroque crure, ut demonstravit Pascalius: ergo &c.

Fateor altiores esse mari fontes, & dico aquam marinam posse pervenire ad cacumina montium, in quibus aliquandò reperiuntur fontes: enimverò si suppona-

tur quòd terra interior montis spongiosa sit, sanè concipi potest quomodò aqua possit pervenire ad cacumina montium : sicut si panem calidum aliquà sui parte imbibas liquori, assurgit liquor altiùs & sese insinuando attollitur, totumque penetrat panem : atqui satis probabile est terram montium interiorem esse spongiosam : nam videtur illa aquam bibere avidiùs & recipere : ergo aqua marina, si terra spongiosa sit, potest ascendere ad cacumina montium.

Sed quomodò ascendat liquor per spongiosum corpus difficultas est satis magna, quæ dependet à mechanicâ spongiosi corporis : nec enim possum dicere esse in corpore spongioso facultatem attractricem sive qualitatem suatricem, atque in exemplum afferre panem calidum, hic enim modus explicandi non faceret nos doctiores.

Itaque id unum dico : in corpore spongioso esse plurimos poros in quibus aut aër magis est dilatatus, ut in pane calido, aut quorum pororum partes sustinent aëris columnas, proindeque faciunt ut aqua in illis poris non sit adeò compressa ; unde his partibus suffulta attollitur, ut patet in filo : quòd si aliquà sui parte immergatur aquis, sit madidum ultra aquas, imò usque ad extremitatem, si immergatur spiritui vini, hæc ratio confirmari potest si dicamus

in quibuscumque corporibus partes esse aliquas tenuiores & leviores, quæ ab aëre compressæ declinando intus ascendant, quæ tandem partes simul adunatæ efficiunt corpus sensibile: hoc videre est in vaporibus sublatis in altum, qui tandem varia corpora sensilia efficiunt adunati: porro quis non videat partes illas tenuiores aquæ marinæ per canaliculos repentis esse in majori copiâ, quæ tandem adunatæ & collectæ in cellulis montium fiant origo fontium?

His adde aquæ partes in poris contentas attolli debere ad montium cacumina, quia impregnatæ calidioribus terræ partibus & calore subterraneo excitatæ attenuantur in vapores; adeoque perveniunt ad ipsos montium vertices.

Nec est quòd dicas in syphone aquam non ascendere altius per crus angustius quàm per capacius; nam

1°. Si aqua sit magis compressa versùs orificium majoris quàm versùs orificium minoris, sanè ascendit altius per crus angustius quàm per crus capacius: porro probabile est totam superficiem Oceani esse magis compressam ab aëre quàm aquas repentes per cavitates & cellulas terræ in quibus non est aër nisi rarefactus à calore subterraneo.

2°. Quandò crus angustius capillare est,

aqua ad majorem altitudinem ascendit, ut experienciâ patet: imò si tubum capillarem utrinque apertum immergas aquâ, jam aqua ascendit per tubum altior in tubo: porro crura per quâ aquâ marinæ repunt capillaria sunt, nec enim ducitur per canales amplos & latos, sed potius per continuam aquearum particularum progressionem, ut itâ loquar, in materiâ terrestri.

*DE QUIBUSDAM FLUVIORUM
PROPRIETATIBUS.*

Postquam egimus de fontium origine, tractandum est de quibusdam proprietatibus fluviorum.

Fluvii quidam in medio itinere sub terram se condunt, & rursûs egrediuntur, quales sunt in Mesopotamiâ Tigris, in Normanniâ Rilla.

Quidam variorum metallorum, mineralium & corporum oleosorum particulas secum deferunt: v. g. sunt fluvii auriferi in Japonio & alibi. Rhenus lutum aureum defert. Sunt in ditione Tyrolensi circa Germaniæ Alpes rivi & fontes qui aurum proferunt.

Nulli leguntur fluvii argentiferi, non quòd desint qui argentum ferant, sed quia difficilius discernitur.

Fluvii quidam certis temporibus aded augmentur, ut extrà alveos egressi terras vicinas inundent. Celeberrimus inter eos est Nilus, qui aded crescit, ut totam Ægypti terram, exceptis collibus, tegat: fit inundatio circà 17. Junii diem, crescit illa per 40 dies, & diebus totidem in alveum se recipit flumen, ex quâ unâ inundatione pendet totius Ægypti salus: nam terra sterilis est aut ferax, prout copiosior vel parcius est influxus seu inundatio.

Veteres causam hujusce inundationis quæsierunt, sed frustra, quia fontes Nili non erant his temporibus cogniti: jam explorati sunt à Lusitanis, Belgis & Anglis commercium habentibus in regnis Congo, à quibus est acceptum fontes Nili esse lacum Zaïre, cujus vicina sunt juga montium, quos dicimus lunæ montes & jugum Seth; iste autem lacus est ab æquatore versùs austrum sub gradu decimo: idedque cùm nos habemus æstivum tempus, ibi hyems est: porro hyems respectu illarum gentium frigida non est propter parvam ab æquatore distantiam: sed in locum nivis cadunt quotidianæ pluvix duabus horis ante & post meridiem. Nubes nunquam ferè permittunt solis conspectum, juga montium iis semper tecta conspiciuntur: hinc maxima nivium copia suprâ juga montium, hinc imbres ferè

continui cadunt, & torrentes ex montium jugis, qui confluunt in lacum, ex lacu in alveum fluvii, inde exundatio Nili.

*DE AQUIS MINERALIBUS ET
THERMIS.*

Aqua Mineralis est ea quæ continet in se particulas terrestres, à quibus insignem habet proprietatem: multiplicis autem est generis, nimirum pro diversis fundis sunt diversa mineralia & metalla, v. g. lapides, sales, alumen, vitriolum, ferrum, cuprum &c. quorum partibus manet impregnata.

10. Quædam aquæ sunt salæ, v. g. fontes propiores littoribus maris, quia aquæ marinæ per canaliculos non fuerunt satis detergæ à suis salibus: imò quædam sunt salæ in continentibus à mare remotissimis, v. g. apud Sequanos ad urbem quæ dicitur *Salins*, quia nimirum ibi sunt salinæ rupes.

20. Sunt quædam acidæ: imò fons est in Sicilia, cujus aqua adeò est acida, ut sit pro aceto incolis: adde fontem ad oppidum S. Baldomari in Agro Lugdunensi, cujus aqua supplet vini penuriam, & si quarta pars vino misceatur, vinum nihil saporis deperdit: si affundatur, farinæ, fermentat: salubris est, & rarò incolæ utuntur medico.

30. Sunt plurimi fontes amari, v. g. ad littus Coromandelium, imò Mare Mortuum: hinc est quòd in illis aquis sint admixta bitumen impurum, sulphur, nitrum, cuprum; videlicèt aqua in vase cupreo diù relicta amarum acquirit saporem.

40. Quædam aquæ sunt oleosæ & pingues: sic est fons in Scotiâ duobus miliaribus ab Edimburgo, alter in Bavariâ, cujus superficiei innatat oleum, quo tanquam pice utuntur incolæ; illud oritur quia reperitur materia bituminosa, cujus partes aquis admixtæ calorẽ subterraneo liquefiunt.

50. Quædam sunt aquæ venenosæ: sic Mare Mortuum, sic aliæ plures ad Alpes: hæc oritur quia quædam ex illis per terras arsenicales & antimoniales fluunt, quarum particulis impregnantur.

60. Quædam habent colores insolitos, v. g. ad urbem Chinon aqua profluit subflava ex specu, & maxima pars in lapidem concrefcit. Causa coloris varii est à terris per quas aquæ fluunt; idèò verò concrefcunt in lapidem, quia majorem copiam partium similium gypso advehunt; quod quidem in plurimis aquis reperitur; hinc ab annis quinque in canali fontis à Sancto Michaële repertus est intus canalis alter lapidosus, formatus nimirum à lapillis, quos aqua repens secum advehit.

70. Sunt quidam fontes omninò frigidi; unus est non procul à Viennâ, Gallicæ ditionis, tantæ frigiditatis ut ora intumescant bibentibus; non procul à culmâ scaturit aqua quasi fervens.

8°. Quidam sunt alternatim calidi, alternatim frigidi, alii nocte calidiores quàm die, alii hyeme tepidi, æstati frigidi; quæ quidem sensatio varia non oritur omninò à dispositione aquarum; sed etiam à corpore nostro pendet, ut vidimus ubi de calore.

90. Sunt fontes, dicuntur vulgò thermæ; sed ex istis quidam non ebulliunt, quidam autem ebulliunt. Ebullitio fit ex eo quòd in certis locis sint plures spiritus subterranei, qui partes aquarum insensiles in motu perturbato ponunt & expansivo, ità ut cum illæ sint volatiles, ex aquis emergant, & idèd eas attollant.

Hæc & similia explicanda sunt per dispositiones mechanicas. Quòd si fugerent nos illæ dispositiones, fateamur potius nostram ignorantiam quàm ad certas qualitates recurramus Peripateticorum, vel ad corpuscula Epicureorum de se calida, de se frigida; hujusmodi enim philosophandi ratio cum ignoratione superbiam conjungit.

DE TERRA.

Sumitur hîc pro Globo visibili quem pedibus calcamus, in quo plures fodinæ, variaque sunt corporum genera; qui montibus & vallibus est asper, ornatus est plantis, & animalium mater habetur.

Suam dedit Cartesius de formatione terræ opinionem seu potius hypothesim, quam in ejus operibus legere juvat. Sit

OPINIO NOSTRA CIRCA TERRAM.

Datur in centro terræ ignis positus & conclusus qui sit fons & principium caloris terrestris in partibus terrestribus dehescentis; imò suprâ ignem datur aër cum terrestribus particulis, datur & aqua; unde non immeritò quidam putaverunt terram esse suprâ cætera elementa: quapropter si in aëre super terram posito descendat, certè si fiat ingens fossa, tunc maximè retardatur ejus descensus.

2^o. In globo terrestri partes superficiei proximæ sunt satis fungosæ, raræ & spongiosæ, in quibus sunt pori plurimi, canaliculi, nec-non matrices aptæ seminibus formandis, vegetandis & transferendis alimentis. Denique est media regio, ejus partes sunt magis compactæ, ma-

gis colligatæ & cohærentes, in quibus tamen sunt pori, canaliculi, & matrices aptæ efformandis aquis, fossilibus variis, mineralibus & metallis: sunt tamen in illâ regione rimulæ quædam quibus subterranei spiritus huc illuc discurrunt; imò si spiritus illi subterranei cum materiâ bituminosâ inflammentur, fiunt aperturæ patentiores quibus dilatarus aër concutit variis motibus terram, ut sæpe nimis contingit in Italiâ & aliis quibusdam regionibus. Imò si terra hæc multo bitumine & nitro abundet, sequuntur inflammationes, ut patet in Vesuvio monte & aliis, de quibus postea.

Terram dixi globum terrestrem, nam figuræ est rotundæ; non eo tamen sensu quasi perfectè rotunda foret, est enim ad polos complanata eâ ferè figurâ quam suis caseis dant Batavi. Hanc polorum terræ complanationem compererunt Viri Academici quibus Rex Christianissimus non ità pridem id operis injunxerat.

Quòd autem terra ad rotunditatem accedat, patet ex eo quòd eclipsis lunæ, quæ fit interpositu terræ inter ipsam & solem, augeatur & minuatür cum æquali proportionē, hoc enim arguit aliqualem ejus rotunditatem.

30. Sensim augetur lumen solis orientis, & sensim minuitur lumen solis occi-

dentis, & quidem cum æquali proportionē; sed illud fieri non posset si terra non foret aliquatenus rotunda.

40. Si quis proficiscatur suprà mare à termino qui sit mons vel turris altissima, tunc paulatim partes inferiores turris & montium occultantur usque ad ipsa fastigia quæ tandem fugiunt oculos: hinc qui est in tabulato navis non videt amplius littus, videt autem qui est in summâ antennâ.

DE GRAVITATE.

Monui jam gravitatem in corpore esse formaliter determinationem motus, quæ sit juxta naturæ vires à circumferentiâ ad centrum.

Dixi nullam esse gravitatem seu levitatem absolutam in corporibus; illa quippè non est nisi respectiva, & corpus grave respectu unius leve est respectu alterius, & vicissim.

Monui etiam nullum corpus habere de se gravitatem, videlicet corpus est in se quid merè iners & otiosum.

Itaque corpus grave est moles illa corporea quæ fertur deorsum virtute externâ, quæcumque sit virtus illa.

Centrum gravium est punctum illud ad quod fertur corpus grave: hoc autem, ex

omnium consensu, est terræ centrum, si agatur de gravibus vorticis nostri.

Ut corpus deferatur deorsum, requiritur aliqua virtus quæ aliquando gravitas dicitur; sed cum deorsum fertur, dicitur actualis descensus; cum nititur, ferri dicitur gravitatio & ponderatio.

Momentum corporis gravis est ipsa gravitatio, orta non solum à mole corporis, sed à situ & partium dispositione, sic corpus unius libræ in staterâ majus habet momentum quod magis removetur à fulcro seu Epimoclio.

Centrum gravitatis est pars corporis à quo corpus grave liberè suspensum foret in æquilibrio.

Linea directionis est linea recta ducta per centrum gravitate ad centrum gravium; dicitur etiam diameter gravitatis, quia transiens per centrum gravitatis dividit corpus grave in duas partes æqualis ponderis, seu potius æqualium momentorum; hæc linea est semper horisonti perpendicularis, secans horisontem in angulos rectos.

Linea horisontalis corporum gravium est linea horisonti parallela ducta per centrum gravitatis. Linea ista horisontalis semper est jugum in stateris saltem sensibilibiter sumpta, propter maximam distantiam corporum gravium à centro terræ.

Perpen-

Perpendiculum motûs gravium est linea horisonti perpendicularis, per quam ascensus aut descensus gravium mensuratur.

Fulcimentum sive fulcrum aut epimocion illud est cui linea horisontalis incumbit.

Corpora æquè ponderantia dicuntur ea quæ sunt æqualis gravitatis ortæ præcisè ex mole, non ex situ aut dispositione partium: v. g. duo globi aurei ejusdem diametri & crassitie.

Corpora æquilibrata dicuntur ea quæ, si suspendantur, faciunt æquilibrium, sive sint æquiponderantia, sive non.

DE CAUSA MOTUS GRAVIUM.

Nihil compertum magis est quàm esse corpora gravia, seu corpora quæ nullo impedimento obstante seorsùm feruntur à circumferentiâ versùs centrum; sed quæ sit causa hujusce descensûs maximè ambiguum est: quia vel à primis infantie diebus vidimus oculis nostris ea corpora quæ gravia dicuntur, sursùm projecta tandem descendere: quia vel ipsis manibus experti sumus nisum & impetum in illis corporibus versùs centrum: quia hæc corpora terræ affixa vidimus, quasi forent pluribus vinculis alligata cum ipsâ terrâ; idèò nulla ferè subit admiratio hujusce

phœnomeni, imò putamus ideò causam nobis esse cognitam: nimirum cum non videamus corpora externa agentia in lapides, subito ducti præjudiciis tribuimus lapidibus vim quamdam insitam per quam sic descendant aut saltem descendere nitantur.

Sed si diligenter inspiciamus naturam corporum & omnia quæcumque ad gravitatem ipsorum faciunt, certè hærebimus, nec ità facilè insitam ipsis gravitatem judicabimus: si affundatur aquæ saccharum, 10. fundum petit, dissolvitur, tuncque partes dissolutæ per aquas disperguntur: quid sit de gravitate sacchari? lignum, quod grave est, comburitur, partes in flammæ abeuntes ascendunt fursùm. Quid sit de gravitate ligni? luna nobis omnibus eminet, sic alii planetæ; luna est terrestre corpus, nec tamen cedit in terram nostram; per quid ergo retinetur luna?

Hæc certè difficultatem faciunt, & saltem sufficiunt ut cohibeatur assensus & à judicando abstineamus: hinc debet nasci diligens examen cum attentâ omnium opinionum inquisitione quas excogitavêre Philosophi, ut gravitatis causam explicarent.

OPINIO PERIPATETICORUM.

Peripatetici secuti prædicta præjudicia, nec infantiae vitia exuentes, putant inesse quibusdam corporibus formam aliquam substantialem, quæ sit principium gravitatis, putà in terrâ & in aquâ, quæ sunt duo elementa gravia, dum aliunde dicunt aliam esse formam substantialem in aliis corporibus quæ sit principium levitatis, putà in aëre & in igne: ergo si lapis projiciatur sursùm, motus est violentus in lapide, neque ab ipso lapide oritur, sed lapis projectus tandem descendit; & illud est à principio intrinseco lapidi, unde naturalis est.

Si idem à nobis dicitur, jam non sumus doctiores rusticis, nihilque explicatur à nobis: prætereà quid est hæc forma substantialis? quænam ipsius natura? quænam origo? quænam virtutes? qualis influxus? per quid differunt illæ formæ quarum una est principium levitatis, altera est principium gravitatis? quid sit de illis formis dum faccarum in partes minutissimas comminuitur, dum lignum in flammam convertitur, dum aqua in vapores attenuata sursùm attollitur? Hæc à Peripateticis nunquam exponi potuerunt: ergo nihil explicant, imò suppo-

R ij

nunt quod in quæstione positum est: scilicet sunt quædam, inquiunt, gravia de se & ex naturâ suâ: quasi verò quodlibet corpus non sit indifferens ad quamlibet loci partem, ad hoc ut vel quiescat, vel ut moveatur, ad hoc ut moveatur celerius vel tardius: quomodò ergo descensus lapidis dicitur esse à principio intrinseco lapidi, cum tamen quidquid movetur semper rectà moveatur, nec unquam mutetur determinatio nisi ab extrinseco, ut habent solemniora totius *Physices* axiomata?

Dices: Violentus est lapidis ascensus & naturalis descensus: ergo hic ab intrinseco, ille verò ab extrinseco nascitur.

Dist. ant. Violentus est ascensus & naturalis descensus, in quantum juxta leges motuum ab Auctore naturæ positas lapis relictus corporibus obviis & circumstantibus debet in hocce aëre nostro deprimi deorsum, C. Alio sensu, N.

Hic non immorabimur in exponendis & refellendis Peraltii, Socii Academici, hypothesebus, cum ipsemet falsus fuerit biennio antequàm è vivis discederet in illo systemate plures contineri errores, seque ab illo recessisse, ut mihi relatum est ab homine fide dignissimo, ejusdem regis Academiæ Socio.

OPINIO GASSENDI.

Gassendus viam novam explicandæ gravitatis commentus est, quam sic proponit: Terra meritò supponi potest ingens magnes, quam hypothesim omnes docti admittunt: porro à magnete manant plurima effluvia corpusculorum, quæ ab uno polo exeunt & redeunt per alium: dum lapis fursùm projicitur, determinari potest ab illis corpusculis ad terram ut revertatur & accedat, quemadmodùm ferrum cogitur accedere ad magnetem. Hanc autem rationem sic exponit Bernierus, Gassendistæ doctrinæ vindex acerrimus, lib. 2. Effluvia à terræ centro spectentur quasi totidem radii: porro sicut radiorum proficiscentium ex quovis loci puncto unus trajicit perpendiculariter corpus, id est, sine fractione, dum alii versùs perpendicularem franguntur, si corpus sit densius, ità ex illis effluviis una linea perpendicularis per medium lapidem rectà transfit: at verò plures aliæ lineæ effluviarum trajiciendo refranguntur versùs hanc partem perpendicularem: fit itaque inclinatio in illis lineis quâ premuntur partes lapidum minutissimæ viciniores lineæ perpendiculari, atque adeò fieri debet descensus: sed contrà sit

R iij

PROPOSITIO.

Systema Gassendi non satisfacit.

Pr. Nam illud systema non satisfacit, si non explicetur quomodo in lapidibus & in aliis corporibus duris lineæ corpusculorum patiuntur refractiones quas radii patiuntur in aquis: atqui explicari non potest quomodo in lapidibus & in aliis corporibus duris lineæ corpusculorum patiantur refractiones quas radii patiuntur in aquis: ergo illud systema non satisfacit.

Et certè illa effluvia ità fiunt ut corpuscula ad terram redeant, alioqui tandem suis corpusculis terra maneret exhausta: porro redeundo alium diversumque nisum debent habere, sicque nulla gravitas.

Præterea non tantum ex centro terræ fieri possunt effluvia, sed etiam ex aliis punctis axis: ergo licet forsan explicaretur quod descenderent, non explicaretur quod peterent centrum terræ.

Denique si terra sit ingens magnes & ab illis effluviis sit corporum gravitas, quia effluvia fieri debent per polos, debet aliter se habere lapis projectus versus æquatorem & aliter projectus versus

polos, quia effluvia aliter sunt sub æquatore, aliter sub polis: atqui tamen falsum est, ut patet experiētiā, lapidem aliter descendere versùs polos, aliter versùs æquatorem: ergo non satisfacit.

OPINIO CARTESII.

Cartesius aliam inivit viam ut demonstraret quā ratione sursum projecta, putā lapis tandem debeant ad centrum redire: scilicet num. 20. quartæ partis Principiorum globulos impeditos docet occurſu totius molis terræ ne secundum lineas rectas ferantur, omnes ejus terræ partes versùs medium propellere; & in hoc, inquit, gravitas corporum terrestrium consistit. Quod, ut intelligatur, observat, si partes terræ spectentur solæ, non esse graves: cū enim terra circā suum axem spatio 24 horarum proprio motu volvatur, futurum est ut partes illæ omnes hinc inde dissiliant versùs cœlum; proindeque sint leves, nisi aliis retineantur corporibus, ut reverà retinentur: nimirum terra proprio motu non movetur, sed à materiā cœlesti eam ambiente defertur; materia autem cœlestis, quatenus consentit in illum motum quo terra defertur, nullam habet vim gravitatis & levitatis, sed quatenus ejus partes plus habent agitationis quā

in hoc impendant; ideòque terræ occurſu à motibus ſuis ſecundùm lineas ſuas rectas perſequendis impediuntur ſemper, ab eâ quantum poſſunt recedunt; & in hoc earum conſiſtit levitas.

Porrò ſingulæ partes materiæ cœleſtis non poſſunt recedere à terrâ, niſi dum aſcendunt, infrâ ſe deprimant & propellant aliquas partes terreſtres in quarum locum ſuccedunt. Cùm omnia ſpatia quæ ſunt circâ terram vel à particulis corporum terreſtrium vel à materiâ cœleſti occupentur, & cùm globuli omnes materiæ cœleſtis æqualiter propendeant ad ſe à terrâ amovendos, nullam ſinguli vim habent ad alios ſuî ſimiles loco pellen- dos; & cùm eadem ſit propenſio in particulis corporum terreſtrium, quoties globuli aliquas ſuprà ſe habent, ominind in eos vim iſtam debent exercere ſuam. Hinc gravitas corporis terreſtris non propriè efficitur ab omni materiâ ſubtili illud circumfluente, ſed præciſè tantùm ab eâ ipſius parte quæ eſt illi magnitudinis æqualis, v. g. corpus B terreſtre in medio aëre conſiſtens & conſtans pluribus particulis tertii elementi quàm moles aëris ipſi æqualis, ac proinde pauciores vel anguſtiores habens poros in quibus materia cœleſtis contineatur, maniſeſtiſſimè ſi corpus B deſcendat partem aëris æqua-

lis in ejus locum ascensurum; & quia ista in mole aëris plus materiæ cœlestis quàm in eo continetur, patet in hâc mole vim esse ad illud deprimendum.

Calculus gravitatis postea facit Cartesius: in meatibus, inquit, corporis B est aliquid materiæ cœlestis quod est in æquilibrio cum æquali quantitate ejusdem materiæ contentæ in aëris mole: item est in aëris mole aliquid terrestre quod est etiam in æquilibrio cum æquali quantitate materiæ contentæ in corpore B. His autem utrinque detractis, quod residuum materiæ cœlestis in hâc aëris mole agere debet in id quod residuum materiæ terrestris in corpore B: atque in hoc uno gravitas corporis B consistit. Ex quibus colligi potest corpus grave dici quia habet plus materiæ terrestris & minùs materiæ cœlestis quàm aliud infrà positum.

Quo loco observandum est 10. nomine materiæ cœlestis non intelligi solos globulos, sed ramenta iis admixta, imò particulas terrestres, quæ secutæ cursum materiæ cœlestis, moventur celerius cæteris; putà particulas omnes quæ aërem componunt. 2^o. Ramenta, cæteris paribus, vim habere majorem ad corpora terrestria deorsum pellenda quàm globulos, quia plus habent agitationis, globulos majorem quàm particulas terrestres aëris

R v

quas secum movent. Hæc est Cartesii sententia circa gravitatem.

*OPINIO NOSTRA DE CARTESIANO
SYSTEMATE.*

Fateor miram esse ingenii vim & sagacitatem in hâcce adinventione. Leges mechanicas motuum ingeniosè respexit, fideliter adhibuit: attamen diffiteri nequeo remansisse in illo systemate capita quædam nec satis aperta, nec satis demonstrata. 1^o. Dum sursum corpus projicitur, videtur motu ipsius vorticis adjuvari versùs circumferentiam: nam positus lapis in materiâ subtili recedente versùs circumferentiam videtur, quòd debeat ipsi rapi versùs hanc partem.

Respondent Cartesiani debere tandem deprimi, quia materia subtilis perpetuò ascendens citiùs fertur, sicque facit ut lapis deprimatur: sed si res ita sit, quidni luna deprimatur deorsùm ab eadem materiâ, cum sit in vortice terrestri.

Præterea cur in magno vortice planetæ mole majores sunt remotiores à centro, & planetæ mole minores centro propiores: at verò in vortice terrestri rariora sursum posita sunt, & solidiora seorsùm jacent.

SENTENTIA VARIGNONI.

Contendit solam aëris fluiditatem esse gravitatis causam, & vult quòd si projectum ad eam pervenerit altitudinem in quâ columnæ fluidi superiores sunt altiores columnis inferioribus, decidere debere, quia fortius depellitur deorsum quàm fursum: si verò sint ejusdem altitudinis supra & infra, neque ascendere, neque descendere debere, quinimò si inferiores columnæ sint longiores superioribus, debere perpetuò ascendere: hinc dicit quòd si tormentum bellicum ità erigeretur ut globus ferreus emitteretur fursum, non rediret ille globus, si modò ad eam altitudinem perveniret in quâ inferiores columnæ forent longiores, aut saltem æquales cum superioribus; quod forsan factum fuisse declarat, quia hocce experimento tentato apud Clarissimum *Perier* apud *Arvernos*, globus ferreus adhibitâ quâvis diligentia fursum emissus nunquam rediisse visus est. Quid sentiam, dicam ingenuè, amicus licèt Auctor, magis erit amica veritas. Sit itaque

P R O P O S I T I O.

Infelicitèr conjecit Varignonus.

Pr. Ille conjecit infelicitèr qui gravitatem aëris supposuit, cujus gravitatis causam non attulit; atqui Varignonus gravitatem aëris supposuit cujus causam non attulit: dixit enim quod est in confesso apud omnes, columnas aëris eò fortius premere quò sunt altiores, neque probavit undenam illud oriretur: atqui hoc est gravitatem in aëre supponere, neque causam ejus afferre: deberet enim dici quâ mechanicâ istud fiat: ergo conjecit infelicitèr.

O P I N I O N O S T R A.

Quid nos post tot Philosophiæ heroës circâ causam gravitatis referemus? nihil certè eruditius afferetur à nobis, sed quod aliquandò Physicum decet ignorantiam nostram fatebimur humillimè, existimamus enim esse aliqua in hoc orbe universo phænomena, quorum causæ sunt tam multiplices, tam involutæ, ut illæ superent ingenii nostri vires: sit

P R O P O S I T I O.

Gravitatis causam nemo capit.

Patet ex dictis, quia nullus inter doctos causam attulit, quæ respondeat phœnomenis & eis satisfaciat.

Dices: Facile concipitur lapidem sursum projectum eatenus descendere, quatenus corpus aliquod, sive sit aër, sive sit materia subtilis, fortiùs deorsum premit lapidem quàm lapis sursum propellatur, & proinde cogit ut descendat lapis: ergo concipitur causa gravitatis.

Dist. ant. Nec mechanicè demonstratur quomodò corpus illud deorsum premit fortius, C. Et illud mechanicè demonstratur, N. Proindeque concipitur causa generalis gravitatis; sed non concipitur causa gravitatis, quæ respondeat omnibus phœnomenis.

C O R O L L A R I A.

Primum est: Corpus quod sursum projicitur, in æternum tenderet sursum nisi ab alio corpore mutaretur determinatio; itaque cum lapis sursum projectus tandem cogitur ad descensum, illud fit ab alio corpore in motu posito.

Secundum est: Corpus illud quod mutat determinationem alterius tangit ipsum: nam corpus unum non agit in aliud nisi tangat.

Porro lapis in aëre fluido positus debet repelli per materiam subtilem obsistentem motui fursùm & resistantem: nam licèt illa transeat per aliquot meatus corporis, tamen filamenta quædam offendunt partes solidas lapidis, & ideò lapis deorsùm detruditur; sed quâ mechanicâ sic detrudat corpora hæc materia subtilis, iterùm dico, nescio.

Quam lineam describit Projectum ascendens & descendens.

Huic quæstioni nitidè satisfacit Clarissimus *Regis*. Describit, (fig. 5. tab. 16.) inquit, lineam quæ resultat ex circulari & ex rectâ; v. g. Supponatur terra cujus centrum sit A, turris B C. Supponamus corpus B, dum turris movetur ex C, ad D ascendere, profectò si turris apex C sit versùs E, corpus erit versùs F, donec perveniat ad punctum D simul cum apice turris: quòd si corpus eò loci descendat, dum turris movetur ex D versùs H, tunc apici turris posito in G respondebit corpus positum versùs I, donec corpus D perveniat ad terram in K;

sicque determinationem habuit tum descendendo, tum ascendendo, quæ resulter ex circulari & rectâ: nos tamen ope sensuum non agnoscimus determinationem circularem, sed tantum rectam, quia cum terrâ movemur: nimirum dum corpus est versum F, translati fuimus versum 2 & descendendo versum 3. Sicque determinatio circularis manere debet insensilis.

*DE GRAVIUM DESCENSU IN
PLANIS INCLINATIS.*

Certum est ex dictis corpora gravia, seu corpora quæ descendunt à circumferentiâ ad centrum, relicta sibi descendere in aëre libero juxta lineam quæ videtur perpendicularis: porro eadem gravia descendere possunt juxta plana inclinata: sunt autem de hoc descensu duo experimentis constantissima.

Primum est: Corpora gravia lentius decidunt in planis inclinatis quàm si perpendiculariter deciderent.

Alterum est: Lentior est descensus in planis magis inclinatis quàm in planis minus inclinatis.

Demonstratur primum.

Sit planum inclinatum A B cui insit globus C. Certè debet cadere lentius

quàm si moveretur in aëre libero, si ejus momentum sit imminutum: atqui momentum ejus est imminutum: nām globus v. g. C tangit planum inclinatum versùs D: porrò ducatur linea recta ex D versùs G pars globi D F E (f. 1. t. 15.) retardat motum aliarum globi partium, adèd ut pars D F E, si foret alteri parti D C E æqualis, impediret ne globus volveretur, & faceret ut plano insisteret sensibilibiter immotus.

Demonstratur secundum.

Lentior est descensus in planis magis inclinatis, quia quò planum est magis inclinatum, eò plures sunt partes quæ earum lapsum retardant, & quò minùs est inclinatum, eò pauciores sunt partes: sit planum A B magis inclinatum, globus C tangit ipsum versùs D, à quo ducitur lineâ rectâ versùs G, tunc pars globi D F E (fig. 2. tab. 15.) plures continet partes retardantes motum partium D C F quàm in priorì casu.

Et certè quandò planum est magis inclinatum, eò magis gravia sustinentur horisontaliter: porrò quandò gravia sustinentur magis horisontaliter, eò lentius decidunt, quia dum tota sustinentur horisontaliter, nullatenùs cadunt: lentior igitur

tur debet esse motus in planis magis inclinatis quàm in planis minùs inclinatis.

DE ACCELERATIONE GRAVIUM.

Certum est gravia, dum descendunt, motum suum accelerare: nam quò altius decidunt, eò vehementior est eorum percussio & motus fit velocior prout magis permanet.

Quæritur hùc utrùm projecta quælibet motus suos accelerent: porrò projectio triplex distinguitur: alia verticalis fursùm & deorsùm: alia horisontalis, quæ fit secundùm lineam horisonti parallelam, v. g. cùm volvitur globus in arcâ planâ; alia denique mixta, quæ fit secundùm lineam obliquam: v. g. cùm exploditur tormentum bellicum è turri in terram, vel è terrâ in turris altitudinem: his positis, sit

PROPOSITIO.

Projecta quælibet motus suos accelerant.

Pr. 10. De projectis verticaliter. Illa autem suos accelerare motus tam crebrâ & tam ardenti experientiâ constat, ut id sit extrâ omnem controversiam.

1º. Projecta verticaliter fursùm motus

etiam suos accelerare experiëntiâ constat, quia paulò post initium sui motûs magis feriunt quàm in ipso initio : ratio est quia fluiditate aëris commoti & determinati adjuvatur projecti motus, eâ ferè simili ratione quâ si navis in portu incipiat moveri externâ vi, difficilior est ejus motus & lentior in ipso initio quàm paulò post, quia ubi semel commotæ sunt aquæ, facilior est motus navis & celerior, quippè adjuvatur ab aquis.

30. Projecta tum horisontaliter, tum projectione mixtâ eâdem experiëntiâ suos accelerant motus, in quantum paulò post initium motus projecta magis feriunt quàm in ipso initio, cujus accelerationis causa idem est aër commotus & adjuvans.

Quanquàm acceleratio tum in projectione verticali supernâ, tum in projectione mixtâ supernâ, tum in projectione horisontali tandem debilitatur, cum corpus perpetuò transeat ab uno aëre in alium nondùm agitaturn, quippè tandem aër tandem motum projecti vincit suâ resistantiâ.

DE ACCELERATIONIS PROPORTIONE.

Hic loquor de gravibus, quæ sibi relicta descendunt, & quæritur quâ pro-

portione motus eorum acceleratur; quæ quidem quæstio, ut ingenuè loquar, est difficillima. Experimenta, à quibus solis argumentum ratio potest ducere, difficilia sunt, & aliquandò videntur opposita.

Omnes fatentur motum gravium accelerari & esse aliquam proportionem in illâ acceleratione: porro triplicem distinguere proportionem, aliam geometricam duplam, aliam in ratione subduplâ, aliam denique quæ sit numerorum imparium.

Geometrica proportio dupla in eo consistit quòd secundo momento conficiatur spatium duplum illius, quod primo tempore confectum est, & sic duplicando: v. g. corpus instanti 1^o. emetiatur pedem unum, 2^o. duos pedes, 3^o. quatuor, 4^o. octo, 5^o. sexdecim, 6^o. triginta duos, & sic deinceps.

Acceleratio in ratione subduplâ fit ità ut argumentum decrescat & ad æquabilitatem reducatur: v. g. 10. instanti percurratur pes unus, 2^o. duo percurrantur cum dimidio, 3^o. tres cum quadrante & dimidio quadrantis, & sic deinceps.

Progressio arithmetica numerorum imparium hæc est quâ spatia decursa se habent ut quadrata temporum, & tempora veluti radices: v. g. si corpus descendendo per primum momentum pedem percurrat, 2^o. momento tres, 3^o. quinque &

Ac deinceps, tunc autem spatia decursa à corpore sunt inter se ut quadrata temporum & tempora ut radices spatiorum.

Quod quidem ut intelligatur, sciendum est numerum qui resultat ex numero per semetipsum multiplicato appellari illius quadratum: v. g. numerus quaternarius est quadratum numeri binarii, quia binarius per binarium multiplicatus efficit numerum quaternarium: ergo si postuletur quadratum binarii, assignandus erit numerus quaternarius. Si quadratum ternarii postuletur, assignandus erit numerus novennarius, quia ex ternario per ternarium multiplicato gignitur: numerus autem qui per semetipsum multiplicatus facit numerum quadratum appellatur radix quadrati seu radix quadrata; v. g. numerus binarius est radix quadrata numeri quaternarii, numerus ternarius est radix quadrata numeri novennarii, quia numeri illi per semetipsum multiplicati faciunt numeros quadratos.

Itaque cum spatia decursa per corpus dicuntur se habere ut quadrata temporum, sensus est numerum partium æqualium spatii, quas corpus grave inter certas temporis partes æquales percurrit, esse æqualem numero quadrato huiusmodi partium temporis: v. g. si lapis decidens primo minuto conficiat exapedam, altero

minuto conficiet tres exapedas, tertio quinque, quarto septem, quinto novem, & sic deinceps. Quo posito, spatia decursa à lapide decidente erunt ut quadrata temporum, tempora verò ut radices: nam ex hypothefi primo momento conficitur una exapeda, secundo minuto conficiuntur tres: ergo quatuor jam confectæ sunt: ergo tertio novem: ergo quarto sexdecim: ergo quinto viginti-quinque fuerunt decursæ: ergo primo minuto finito, est unica pars aliquota temporis & unica pars aliquota spatii decursi: secundo minuto finito, duæ sunt partes aliquotæ temporis & quatuor spatii jam decursæ: tertio minuto finito, tres sunt partes aliquotæ temporis & novem sunt partes aliquotæ spatii decursæ: quarto minuto finito, quatuor sunt partes aliquotæ temporis, & sunt sexdecim partes aliquotæ spatii confecti decursæ: atqui quadratum unitatis est unitas, quadratum binarii est quaternarius, quadratum ternarii est novenarius: igitur in progressionem arithmeticam numerorum imparium spatia decursa sunt quadrata temporum, tempora verò sunt radices.

Ad faciliorem intelligentiam, sit figura in quâ prima columna exhibet partes corporis aliquotas quibus duravit motus qui supponitur arithmetice accelerari, dum altera exhibet numerum partium aliquo-

tatum spatii, quæ singulis istis partibus aliquotis temporis peragantur, nempe numerum exapedarum: tertia denique series exhibet numerum partium aliquotarum spatii, quæ ab initio motûs confectæ sunt usque ad certam partem aliquotam temporis inclusivè sumpti.

His positis, triplex fuit Philosophorum opinio. Quidam voluerunt accelerationem gravium fieri juxta proportionem arithmeticam numerorum imparium: sic Galilæus. Quidam voluerunt hanc accelerationem fieri in ratione subduplâ: sic Dominus Regis. Denique pauciores voluerunt hanc accelerationem fieri secundum proportionem geometricam duplam: verum ista opinio vix defendi potest: nam acceleratio in immensum cresceret & longè ultra quàm demonstrent experimenta.

SENTENTIA GALILÆI.

Galilæus docuit accelerationem gravium fieri juxta progressionem arithmeticam numerorum imparium 1. 3. 5. 7. 9. 11. 13. 15. 17. &c. quod quidem experimentis probare conatus est.

Sic fieri solet experimentum: Assumatur tubus vitreus oblongus & in varias partes divisus; ad perpendiculum non erigatur, sed inclinetur ut descensus sit

lentior, & faciliùs observetur: tunc enim globus qui primo temporis intervallo describit exapedam, 2°. tres peragrat, 30. quinque & sic deinceps; adverte tamen rationem haberi resistentiæ mediæ quo impeditur ne progressio illa accuratè fiat.

Experimentum etiam in tubis perpendiculariter erectis tentavere Geometriæ factis insignes, qui fatentur hunc descensum ità fieri, ut intrà minutum secundum corpus grave quod ex duorum pedum altitudine decidit intrà duo minuta secunda perficiat octo, adeò ut si spatium determinatum primâ temporis parte decurrat, sequente æquali parte temporis triplum emetiat: ergo acceleratur motus gravium secundum progressionem arithmeticam numerorum imparium.

Aliud experimentum ducunt à fune pendulis: Assumatur pendulum filo bipedali suspensum, intrà minutum secundum unam perficiet vibrationem, id est, ascensum & descensum: filum fiat quadruplò longius, hoc est, octo pedum, vibrationem suam non conficiet tempore quadruplo, ut contingeret si motus foret æqualis, sed tantum tempore duplo: quòd si pendulum fiat novies longius, v. g. pedum octodecim, intrà tria minuta secunda vibrationem conficiet suam: adeò ut spatio decursa sint quadrata tempo-

rum : nam quod pendulum novies est longius triplo tempore vibrationem novies majorem describit.

Ratione probatur à Galilæo , quòd velocitates seu impetus acquisiti in descensu gravium se habeant ut tempora : scilicet singulis instantibus acquiruntur æquales velocitates seu impetus : porro hoc tempore quo acquiritur impetus , dimidiam tantum partem illius spatii perficit , quod peragrasset , si totus simul extitisset : ergo impetus quem corpus grave decidens primo tempore acquirit successivè , & vi cujus pedem unum peragrat , totus secundo tempore existens , facere debet ut grave duos pedes percurrat ; atque secundo illo tempore adhuc successivè acquiritur æqualis impetus , quo similiter unus pes decurritur ; proindeque secundo illo tempore tres perficiuntur pedes , nempe duo pedes à primo gradu impetûs successivè acquisito in primo tempore & toto perseveranter existente initio temporis secundi , & pes unus à secundo gradu impetûs successivè acquisito per totum illud tempus secundum : porro in fine secundi temporis existunt duo gradus impetûs jam acquisiti , qui cùm perseverent toti , simul conficiunt quatuor pedes per totum tempus tertium , quia toti simul existunt : insuper acquiritur successivè unus gradus
impetûs

impetûs per totum illud tempus tertium; qui quidem gradus, ex eo quod successivè acquiratur & totus perseveranter non existat, unicum tantum pedem conficiet: ergo in illo tertio tempore conficientur quinque pedes, quatuor scilicet à duobus gradibus impetûs perseveranter existentibus, & pes unus ab altero gradu impetûs successivè acquisito, & ità deinceps: nam in quarto tempore sequenti jam supponuntur acquisiti tres gradus impetûs perseveranter existentes per totum illud tempus quartum; proindeque peragrabunt in quarto illo tempore sex pedes: Interim tamen per totum illud tempus quartum acquiritur adhuc gradus unus impetûs qui, quod sit in statu acquisitionis nec totus existat simul, unum duntaxat conficiet pedem: igitur toto tempore quarto conficientur pedes septem; nempe sex à tribus gradibus impetûs perseveranter existentibus, & pes unus ab altero gradu impetûs successivè acquisito. Similiter series habet in tempore quinto & cæteris: atqui ità progressio arithmetica est numerorum imparium: igitur gravia descendunt juxta progressionem arithmeticam numerorum imparium.

Quamobrem si queratur quot pedes quolibet dato tempore à corpore gravi percurrantur, facile responderi poterit,

si detur spatium quod primâ parte temporis aliquotâ corpus grave fuerit emensum.

OBJECTIONUM SOLUTIO.

Obijcies 1^o. Ità acceleratur motus gravium ut tandem ad æquabilitatem perducatur; v. g. si corpus decidat ab altitudine trecentorum pedum, fit tandem ut velocitas non augeatur amplius, quod licet certissimum non sit, majori tamen gaudet probabilitate quàm experimenta facta à Galilæo: globus bombardilis vel sagitta, si vibrentur ex altissimâ turri aut montis vertice, tandem minùs feriunt quàm si ex minori altitudine fuissent emissa: atqui motus qui tandem ad æquabilitatem perducitur non acceleratur juxtâ progressionem arithmeticam numerorum imparium: igitur descensus gravium non acceleratur juxtâ prædictam progressionem.

Dist. maj. Motus gravium ità acceleratur, ut tandem ad æquabilitatem perducatur propter resistantiam mediï, C. independenter à resistantiâ mediï, N. concessâ minore, dist. conf. Descensus gravium non acceleratur juxtâ progressionem arithmeticam numerorum imparium per accidens & propter resistantiam mediï, C. independenter à mediï resistantiâ, N.

Itaque plurimi qui tuentur Galilæanam

assertionem fatentur ita fieri ut tandem motus ad æquabilitatem perducatur: sed tunc, inquiunt, grave sibi non relinquitur; oritur illud ex mediæ resistantiæ v. g. aëris. Nec mirum est si explosus globus bombardilis ex altissimâ turri minus feriat quàm ex minori altitudine explosus; quia pulsus aër obsistit & agrè patitur se tantâ velocitate agitari, dividi, comprimi, & cogi ut in orbem recurrat: dum grave ex aëre in aquam cadit, motus gravium statim imminuitur: cuius phœnomeni ratio hæc unica est, quia aqua motui gravium magis resistit quàm aër, & idè in aquâ descensus brevè fit æquabilis.

Objicies 2^o. Repetitis experimentis constitit grave decedens non servare progressionem illam arithmeticam numerorum imparium, nec tam celeriter decidere: ergo &c.

Dist. Non tam celeriter decidere, quia obsistit aëris resistantia, C. si non obsisteret, N. Itaque cum aër resistat etiã à primo momento, motus gravis retardatur, nec servat accuratè illam progressionem arithmeticam numerorum imparium.

DE MOTU PENDULORUM.

Motus pendulorum proximè accedit ad motum gravium in planis inclinatis: vi-

delicet arcus per quem pendulum circulariter decidit, varias planorum inclinationes perpetuò continet, & quarta pars circuli, quæ est maximus arcus pendulorum, omnes planorum inclinationes complectitur.

PRIMA PROPOSITIO.

Omnes penduli vibrationes ita fiunt ut ex utroque latere arcus sint aequales.

Pr. Experimentiâ. Sit enim pendulum C (fig. 3. tab. 15.) si descendat pendulum à litterâ B versùs C, ascendet à litterâ C versùs D, non autem versùs E; itaque arcus B, C, æqualis est arcui C D.

Ratio favet, quia si nulla foret gravitas in pendulo C & descendendo ex B versùs C acquireret successivè impetum, eodem tempore non ascenderet versùs D, sed versùs E, quia impetu toto permanente, plus spatii eodem instanti percurreret corpus quàm motu successivè acquisito: sed corpus C grave est; itaque quantum adjuvatur ab aëre descendendo ex B versùs C, tantum ipsi resistitur ab aëre, dum ascendit ex C versùs D, quia ex utraque parte columnæ æqualiter premunt: itaque per idem tempus quo descendit ex B versùs C, ascendit ex C versùs D.

SECUNDA PROPOSITIO.

*Omnes ejusdem penduli vibrationes majores
& minores sunt tamen sensibilibiter æquæ
diuturnæ.*

Pr. Nam ejusdem penduli vibrationes sunt æquæ diuturnæ, si pendulum in percurrentis inæqualibus arcubus idem tempus impendat: atqui pendulum ferme æquale tempus impendit in percurrentis arcubus inæqualibus: nam pendulum percurrentis arcum non deflectit multum à subtensâ seu plano arcui respondente: atqui inæqualium arcuum subtensæ seu plana istis arcubus respondentia æquali tempore percurruntur: igitur idem pendulum inæquales vibrationes efficit æquæ diuturnas.

Cùm dico illas vibrationes esse æquæ diuturnas, sic loquor, quia discrimen temporis sensibile non est: nam æqui diuturnitas ista non est omninò accurata, sed est duntaxat sensibilis: hujusce autem sensibilis diuturnitatis ratio physica est quoddum arcus unus major est altero, corpus grave majus occupat momentum, quare excessus unius arcus suprâ alterum compensatur momento & inclinatione.

*DE GRAVIBUS**que cum aliis Gravibus librantur.*

Ut gravitationis meliùs intelligatur effectus, corpora debent librari secum invicem: porro illa pars mathematices quæ de illis librationibus agit statica inscribitur, cujus principia sequentibus propositionibus complector.

PRIMA PROPOSITIO.

Gravia aequalia posita in distantia aequali ponderant aequaliter: sic vectis cujus extremitatibus A & B (tab. 2. fig. 9.) appenduntur gravitate aequalia A & B, ita ut Epimocion C sit in media vectis parte.

Pr. Experimentiâ & ratione, quia unum valet quantum alterum.

SECUNDA PROPOSITIO.

Gravia aequalia in distantia inequali suspensa ponderant inequaliter, quod in longiori distantia pendet magis, ponderat, & ad centrum gravium fertur.

Pr. Sit vectis cujus extremitatibus A B apponuntur corpora mole æqualia. Epi-

moclion C sit in mediâ parte, corpus B quod magis distat ab Epimoclio deprimatur: hinc fit ut si gravibus secundum quamdam distantiam æquiponderantibus, uni adjicias quidpiam grave, tollatur æquilibrium, & illud præponderet cui adjectio facta est: pariter si uni detrahatur aliquid grave, tollitur æquilibrium, & id à quo nihil detractum fuit præponderabit & deorsum feretur.

TERTIA PROPOSITIO.

In omni corpore gravi datur aliquod gravitatis centrum.

Pr. Cùm enim centrum gravitatis sit punctum aliquod ex quo corpus situm habet, quo partes sunt æqualium momentorum, certè non est corpus quod non possit habere hunc situm in quo partes sint æqualium momentorum.

QUARTA PROPOSITIO.

Nullum corpus potest quiescere nisi linea à puncto suspensionis ad centrum terra ducta, qua est linea directionis, transeat per centrum gravitatis.

Pr. Enimverò centrum gravitatis est punctum ex quo, si grave cogitetur sus-

penſum, partes hinc inde ſuſpenſæ æqualium ſunt momentorum: igitur neceſſe eſt partes hinc inde poſitas æqualiter accedere ad centrum terræ, ità ut ſiniſtræ non attollant dexteras, nec viciffim: at ſi linea directionis non tranſiret per centrum, jam vel ſiniſtræ partes attollerent dexteras, vel viciffim: v. g. globus cujus centrum gravitatis ſit E ſuſpendatur in A, (fig. 4. tab. 15.) ità ut linea directionis ſit AC: dico globum in eo ſtatu non poſſe quieſcere, quia partes ſiniſtræ attollerentur à dextris: ergo neceſſe eſt partem ſiniſtram descendere, quouſque punctum E, quod eſt centrum gravitatis, ſit in lineâ directionis.

QUINTA PROPOSITIO.

Gravia quæ in diſtantiis æqualibus poſita ſunt, ſunt in æquilibrio.

Ratio ab experimentis petitur: cùm enim & motûs & ponderis gravitas concurrant ad componendum momentum, & in hoc caſu ſit motus æqualis propter æqualem diſtantiâ, ſit item æquilibrio, neceſſe eſt conſequenter eſſe æqualem gravitatem in utroque ponderè: nam ſi eſſet inæqualitas gravitatis, tunc non eſſet æquilibrio, quandoquidem nulla ſup-

ponitur distantiae inæqualitas quæ compen-
set æqualitatem gravitatis.

Observandum tamen est sic statui hu-
jusmodi proportionem, ut supponatur
medium æquale ex omni parte, ita ut
non magis premat unam statæræ partem
quàm aliam: habenda igitur est ratio
medii, præcipuè si sit heterogeneum cum
accuratius expenditur corporum gravitas,
quæ ex propriâ mole, non ex adjunctis
æstimatur: quapropter si corpora sint he-
terogenea, hoc est, si consistant ex ma-
teriâ dissimili, possunt esse ejusdem mo-
lis & diversi ponderis, v. g. aurum &
lignum: nec enim possunt illa esse æqui-
librata, si in diversis mediis apponantur,
licet unum non sit alio majus: v. g. au-
rum primum in aëre libratum cum plumbo
& in æquilibrio, si appendatur in aquâ
appenso plumbo in aëre, jam non est
æquilibrio, quia aurum minùs gravitat
in aquâ quàm in aëre: illud autem non
oritur ex eo quòd aqua non gravitet,
sed potiùs ex eo quòd gravitet: nam
præterquàm quòd plurima sunt hujusce
gravitationis phænomena tum allata, tum
afferenda, ideò aurum minùs in aquâ
gravitat, quia par aquæ moles libratur
cum auro, & vim ejus aliquam compen-
sat: sed hæc postea.

SEXTA PROPOSITIO.

Gravia quæ in distantiiis equalibus non sunt in æquilibrio sunt inequalia.

Hæc propositio debet intelligi ad sensum præcedentis.

SEPTIMA PROPOSITIO.

Si gravia posita in distantiiis inequalibus æquiponderent, grave quod majus est ratione molis geometricè sumptum in minori positum est distantia, & quod minus est in majore.

Propositio hæc sequitur ex præcedentibus; sed ut vera sit, materia debet esse homogenea.

OCTAVA PROPOSITIO.

Si duo corpora librata ita se habeant ut quò magis pondus unius superat pondus alterius, eò magis distantia vice versa superet alterius distantiam, tunc futurum est æquilibrium.

Pr. Sit v. g. corpus A duplum corporis B, ita libratum ut distantia corpo-

ris B (tab. 2. fig. 9.) à jugo librationis sit dupla distantia corporis A, tunc corpus A & corpus B erunt in æquilibrio.

Hæc propositio generalissimum continet totius Mechanices principium in quo augmentum virium fundatur; quod experientiâ quidem notissimum est, sed ratione vix & ne vix quidem potest probari.

His breviter præmissis, agimus de libratione gravium, hæc autem vel dura sunt & firma, vel sunt liquida.

DE GRAVIBUS LIQUIDIS

qua cum aliis liquidis vibrantur.

Gravia liquida dicuntur ea quæ facile non continentur propriis terminis, sed diffluunt quantum pondus & gravitas valent divellere ac distendere partes ex quibus constant. Hinc fit ut singulæ partes hujusmodi gravium liquidorum ad centrum terræ accedant quàm proximè fieri potest. Sit aquæ cylindrus ad superficiem terræ verticalis, non manebit hoc modo ad perpendiculum erectus verticaliter, sed diffluet per totam terræ superficiem; cum enim partes aquæ non multum cohæreant inter se, facile divelluntur & separantur ab invicem propter pondus partium superiorum, quo partes in-

S vj

feriores premuntur ; atque adeò necesse est aquæ cylindrum perpendiculariter erectum diffluere per totam globi terrestris superficiem quantum poterit gravitas aquæ partes ipsius distendere ac divellere ; & quò corpus erit gravius atque liquidius eò magis diffluet ac distentetur , ut patet in hydrargiro.

Quòd si fingamus super hujusce aquæ superficiem circumfusam terræ alterum aquæ cylindrum erigi , necesse erit pariter circumfundi per totam terræ superficiem ; & sic de cæteris aquæ cylindris qui fingi poterunt eodem modo erecti , ex quibus necesse est fieri molem aquarum terræ circumfusam ad modum circuli.

Si fingamus iterùm super aquas erigi cylindrum aëris aquis insistentem perpendiculariter , consequens est cylindrum aëris non mansurum perpendiculariter erectum : nam cum aër sit liquidus & gravis , cylindrus aëris diffluet per totam superficiem aquarum , & si superstruatur cylindrus alter , pariter diffluet , & omnes quotquot poterunt excogitari , ità ut fiat ingens altera moles tota aërea aquis undequaque circumfusa : idem dicendum de quolibet corpore liquido vel aqua graviore vel aëre leviori.

Hoc posito , facile concipitur singulas partes corporum fluidorum gravitare vel

in proprio centro, vel motum pressionis habere, necnon librari cum aliis partibus, ita ut graviores semper magis descendant & ad centrum terræ accedant propius, leviores autem supernatent, denique æquales librentur.

Ex his tria distinguuntur corpora: videlicet magis premunt graviores partes subjectas leviores, & hæ minùs obfistunt: igitur oportet leviores è loco disjici à gravioribus; sicque corpus quod gravius est, aditu facto trans liquidum corpus quod supponitur levius, fundum petit & detruditur semper inferius.

Ideò corpora solida, si graviora sint, dividunt corpora liquida leviora, & terræ propius insistent: nam lapis gravior aëre vel aquâ fortius premit partes aquæ vel aëris sibi subjectas quàm illæ obfistant lapidi; sicque lapis facto sibi aditu trans aërem vel aquam, necessariò decedit & terræ centro propius insistit.

Ex quo librationis conflictu, qui fit in descensu gravium, plurima oriuntur non negligenda.

1°. Si aliqua moles corporis in liquido gravitantis est cum simili mole ejusdem corporis liquidi, estque major pondere, toties illa detruditur deorsum. Porro detrudi deorsum non potest nisi dividat liquidum gravitans: porro liquidum gra-

vitans dividere non potest, nisi liquidi molem sibi æqualem cogat sursùm ascendere.

2°. Aliqua moles corporis in liquido gravitantis, si cum simili mole ejusdem liquidi sit pondere minor, toties attollitur, ut experienciâ constat.

3°. Si aliqua moles corporis sit cum simili mole liquidi pondere æqualis, toties inter moles est æquilibratio, id est, nec attollit molem liquidi, nec moles liquidi attollit corpus gravitans.

Hæc tria possumus experiri, si tres assumantur globuli mole æquales, plumbeus, vitreus plenus aëre, & cereus: plumbeus decidit; nam cum sit aquâ gravior, attollit molem aquæ sibi æqualem, cujus locum occupat: vitreus attollitur super aquas, etiamsi deprimatur, sibi permissus redit; nam æqualis aquæ moles, cujus locum occuparet, ipso gravior est: cereus æquilibratur; nam moles cerei corporis æqualis est ponderis cum mole aquæ: ergo non potest attollere molem aquæ sibi æqualem, proindeque nec ejus occupare locum, nec etiam moles aquæ potest ipsum attollere; nam quantum aqua obsistit, tantum aquam opprimit sibi subjectam.

Hinc statua vitrea in tubo aquâ pleno mobilis in omnes partes, sursùm, deorsùm, in mediis aquis. Si aqua non prematur digito, supra ipsam attollitur, quia

cum solo aëre quem continet aquâ levior est. Si prematur digito, jam aqua ingreditur statuat per foramen, tuncque simul cum aëre & aquâ fit gravior pari volumine aquæ, tunc descendit in fundum: quòd si tanta non fiat compressio, manet in medio tubo, quia hæc est tantum aquæ portio intromissa quæ faciat æquilibrium cum pari volumine aquæ: hinc statua subsultat, si modò varietur digiti pulsus.

Dices: Corpus hominis natantis gravior est pari mole aquæ, nec tamen decidit, nec fundum petit: ergo corpora graviora non semper decidunt.

Dist. ant. Nec tamen decidit propter adjuncta quibus frangitur gravitatio, C. Si non frangatur gravitatio, N.

Itaque propter adjuncta corpus hominis natantis non decidit: hæc autem sunt: 1^o. Natatio fit facilius in aquis profluentibus, quia motu suo ferè horisontali sustinent corpus gravitantis, & difficilior est in aquis stagnantibus, quia unus est impetus aquarum versùs centrum. 2^o. Extensio corporis natantis major plures partes aquæ sibi subjectas premit, quæ proinde magis obsistunt: hinc supini vel immotis aquis supernatant, tum ex eo quòd in pulmonibus fit plurimus aër, tum ex eo quòd dorsum latius pectore

premat majus aquarum volumen : ideò qui pectus angustissimum habent & spiritum diutius non retinent ad natandum minus sunt idonei.

Præterea impetus in natante procreatus gravitationem frangit, sive dividatur explicatis in orbem artubus instar ranarum, sive aqua scindatur cum brachia alternis vicibus cœsim producuntur & retrahuntur, sive utrâque manu vel utroque pede percutiatur aqua instar canum : sive supini utrâque manu aquam retroagamus, instar anatum : atque his omnibus ars natrix innititur.

Hinc liquet cur navis altius immergatur quòd carina est acutior : nam cum obtusior est, majorem aquarum superficiem premit, ideòque non tam immergitur, & difficilius scinditur aqua ex eo quòd plus aquæ extrudat : ideò triremium carinæ sunt acutiores ut facilius moveantur & immergantur aquis, quia nimirum trirèmes militibus duntaxat, alimentis & armaturis onerantur : naves autem onerariæ, quia majora pondera sustinere debent carinas habent obtusiores.

Infinita eò loci dici possent, quibus pateret cur aquis innatent multa corpora, cum videlicet in illis corporibus major est pro mole superficies & plurimus aër : cur situla aqua plena nullo negotio at-

tollitur à fundo putei ad extimam aquarum superficiem: nempè situlæ pondus sustinetur à pondere simili aquæ. Dici posset cur baculus ligneus ad perpendiculum in aquam demersus vi aliquâ sursum extruditur eò majore impetu quò aqua profundior est.

Unum restat quod obijci potest. Lignum aquis innatans, si in globulos minutissimos dividatur, jam ligni frustula fundum petunt.

Verùm responderi potest hanc aquis innatationem oriri ex plurimò aëre nativo & delitescente intra poros ligni: at cùm lignum in particulas divisum est, aër iste liberum habens aditum & solutus recessit, sicque major fit gravitas in particulis ligneis pro æquali mole partium aquæ, proindeque decidere debent particule lignæ.

Quæ de gravibus respectivè ad aquas dicta sunt, eadem respectivè ad aëra dici possunt proportionè servatâ: hinc aëri possent supernatare corpora; quod quidem excogitatum Mathematici insignes suis demonstrationibus ornaverunt.

Hinc natatus piscium, volatus avium, qui fit alis expansis, explicari debet mechanicè, & exponetur aliquandò.

Qui plurima scire voluerit circà illum librationis conflictum, legat librum Pas-

calii, cujus titulus est : *De Æquilibrio liquorum.*

*DE DESCENSU SOLIDORUM
quæ cum aliis gravibus librantur.*

Solida dicuntur ea quorum partes suis terminis facilè continentur, ità ut pondere suo non diffluant, ut marmor, aurum, trabs &c.

Hujusmodi gravia possunt secum invicem librari, atque in istà libratione solidorum maximè consistit augmentatio virium per machinas, ut modus inveniat, quo minora pondera possint attollere majora, & sic vires augeantur ex unâ parte, imminuantur verò ex alterâ. Sit v. g. pondus mille librarum quod debeat attolli per pondus librarum decem : sic debent inter se componi pondus mille librarum & potentia librarum decem, ut potentia reddatur sufficiens, & vires ejus augeantur.

Modus porrò unicus & unîversalis ad id præstandum in eo positus est, ut pondus & potentia ità applicentur in machinâ, ut dum simul moventur, potentia vehementiùs moveatur quàm pondus, tanto quidem excessu, ut major sit proportio motûs. potentiæ ad motum pon-

deris, quàm resistantiæ ponderis ad vires potentiæ.

Hoc autem ut fiat; necesse est ità applicari in machinâ pondus & potentiam ut major sit proportio distantie potentiæ ad distantiam ponderis à communi centro motûs quàm reciproce virium ponderis ad vires potentiæ; nam quando ut est pondus ad potentiam, ità reciproce distantia potentiæ ad distantiam ponderis fit æquilibrium: ergo ut sequatur motus seu non sit æquilibrium, major esse debet proportio distantie potentiæ ad distantiam ponderis quàm reciproce ponderis ad potentiam: quoties verò id habetur, per machinam habetur & consequenter motus tam potentiæ quàm ponderis major in potentiâ quàm in pondere, quoniam motus utriusque est ut utriusque distantia.

Hinc 1^o. quò velociùs movetur potentia, eò tardiùs movetur pondus, & è converso.

Hinc 2^o. quò velociùs movetur potentia, eò faciliùs movetur pondus, & è converso.

Hinc 3^o. quò faciliùs movetur pondus, eò majùs est tempus quo movetur, & quò difficiliùs movetur pondus, eò minus est tempus quo movetur, & è converso.

Hæc omnia fundantur in generali Me-

chanices principio : gravia cùm librantur, eò majora habent momenta, quò longius distant à puncto suspensionis seu ab Epimoclio.

*De variis Machinarum Speciebus quibus
Gravia librantur.*

Ut facilior sit Tractatus iste, dialogo continebitur, id est, interrogationibus & responsionibus.

Discipulus. Quot sunt machinæ?

Magister. Infinitæ licèt excogitatæ fuerint & quotidie cum singulari prudentiâ novæ inveniantur, tum in sustinendis, tum in sublevandis ponderibus : tamen omnes ad quinque revocari possunt, quia aliæ non differunt ab istis nisi figurâ, aut constantur ex pluribus simul adhibitis.

Quomodò vocantur illæ machinæ?

Hæc sunt nomina : vectis, axis in peritrochio, cochlea, cuneus, rotæ dentatæ, quæ quatuor postrema fortassè revocari possunt ad unum vectem.

DE VECTE.

Quid est vectis?

Est palus firmus ac rigidus, vulgò ligneus aut ferreus, ex unâ parte acutus, ex aliâ obtusus, ad movenda onera ido-

neus: pars obtusa caput, acuta vocatur lingula.

Quinam sunt usus vectis?

Tres præcipui sunt: primus est cum lingula subjicitur oneri & fulcimentum seu epimoclion solidum ac firmum ipsi subjicitur propè lingulam, & potentia quæ vectem deprimat, applicatur ad caput.

Quinam est secundus usus vectis?

Cum lingula oneri supponitur, nullum est Epimoclion, sed caput per potentiam attollitur: tunc enim quia omnes vectis partes, extremo puncto excepto, quod terræ innititur, attolluntur sursum, necessario pondus movetur atque sublevatur: in hoc tamen casu terra ipsa rationem habet Epimoclii.

Quinam est tertius usus vectis?

Est quando uni extremo fulcrum, v. g. terra subjicitur; alteri verò extremo imponitur onus sublevandum, atque inter utrumque extremum media applicatur potentia motrix, quæ vectem unà cum onere sublevet, immoto manente extremo terræ innixo.

Usus hujusce vectis estne utilis?

Licet non occurrat vulgò, quia non juvat potentiam ad onus facilius attollendum, utilis tamen aliquandò & necessarius est, quoties nimirum abundamus virtute & potentiâ; egemus autem

velocitate motûs in pondere: nam in hoc usu pondus velocius movetur quàm potentia, quia plus distat à fulcro, ideòque majus spatium eodem tempore percurrit pondus quàm potentia.

Quot puncta in vecte considerari debent?

Tria: scilicet punctum oneris, punctum potentiae, & punctum fulcri, quae tria puncta tribus modis inter se disponi possunt; ex quibus modis tres vectis differentiae oriuntur.

Quænam est prima vectis species?

Pondus B (fig. 5. tab. 15.) habet in uno extremo, potentiam A in alio; fulcrum autem C intermedium est, v. g. in usu primo vectis.

Quænam est secunda species?

Fulcrum C (fig. 6.) habet in uno extremo, potentiam A in altero, pondus B autem est intermedium, ut in usu secundo.

Quænam est tertia species?

Fulcrum C habet in uno extremo, in alio pondus B, inter utrumque potentiam A, ut in usu tertio.

Quid est futurum si potentia & pondus ita disponantur ut rationes distantiarum & virium sint reciprocae?

Tum potentiae, tum ponderis momenta erunt æqualia, erunt in æquilibrio, nec potentia vincet pondus, nec pondus vin-

cet potentiam; cujus rei ratio est quia quò gravia librata magis distant à puncto suspensionis, seu fulcro, eò magis ponderant: ergo si potentia & pondus (t. 2. f. 9.) sint in ratione reciproca distantiarum & virium, debent habere æqualia momenta: quod ut tibi constet, sit vectis A B, in cujus puncto A appendatur pondus quatuor librarum & potentia in B sit unius libræ; sed quadrupla sit potentia distantia, sicut pondus est quadruplum; erunt pondus & potentia in ratione reciproca distantiarum & virium: erunt igitur æqualium momentorum, erunt æquilibrata, nec pondus superabit potentiam, nec potentia à pondere superabitur; quia sicut pondus A quadruplò majus est potentia B, sic potentia B quadruplo longius distat à fulcro C.

Ergo si pondus & potentia ità disponantur in vecte ut sint æqualium momentorum, jam potentia & pondus debent esse in reciproca distantia suarum virium, hoc est, si ponderis & potentia sint æquales vires, debet esse æqualis utriusque distantia à fulcro: & si sit vis potentia major quàm ponderis, eò major ad æquilibrium esse debet distantia ponderis quàm potentia: si verò major sit vis ponderis quàm potentia, eò major ad æquilibrium esse debet distantia potentia, quàm ponderis?

Ità planè; hanc capis doctrinam: illud adde, quòd si potentia & pondus in vecte ità disponantur ut distantiae & vires non possint esse reciprocae, tunc non possit esse æquilibrium, sed potentia vincat pondus, vel pondus vincat potentiam.

Ædepol illud addidissem, hoc quippè sequitur ex priori axiomate: at dubium superest, si potentia movet pondus per vectem, quomodò spatium & velocitas potentiae moventis se habent ad spatium & velocitatem moti ponderis.

Spatium & velocitas potentiae moventis ad spatium & velocitatem moti ponderis se habent ut distantiae utriusque à fulcro; & si priorum memineris, hoc facile tibi constabit. Sit linea A C B horisonti parallela, bifariam divisa, sive in partes æquales, sive in partes inæquales, cujus extremitatibus A & B appensa sint pondera sive æqualia sive inæqualia: concipe hanc lineam (fig. 9. tab. 2.) cum suis ponderibus moveri circa punctum C veluti centrum motus: descendat extremitas A cum suo pondere usque in D: extremitas verò B cum suo pondere ascendat usque in E: vides ambas extremitates & ambo pondera describere arcus A D & B E ex eodem centro C, quia arcus spatia sunt eodem tempore decursa
ab

ab utroque pondere; atque adeò spatia ista metientur eorum velocitates.

Factum video, sed amabo te, demonstra.

Morem tibi gero: demonstro igitur spatium & velocitatem motûs $A D$ ad spatium & velocitatem motûs $B E$ esse ut distantiam $A C$ ad distantiam $C B$: nam anguli $A C B$ & $B C E$ sunt inter se æquales utpotè ad verticem oppositi: ergo arcus $A D$ & $B E$ similes sunt qui proinde eandem habent inter se proportionem quam semidiametri $A C$ & $C B$ à quibus describuntur: ergo ut distantia $A C$ ad distantiam $C B$, ità spatium $A D$ ad spatium $B E$, & quoniam eodem tempore utrumque mobile, nempe potentia & pondus percurrunt suum spatium, hoc est velocitas arcûs $A D$ & arcûs $B E$ erunt ut spatia, & spatia erunt ut distantia: ergo & velocitates erunt ut distantia, proindeque velocitas per spatium $A D$ erit ad velocitatem per spatium $B E$, ut distantia $A C$ ad distantiam $C B$, quod erat demonstrandum.

Quot modis pondus potest applicari vecti?

Plurimis modis fit hæc applicatio quibus variatis variatur etiam resistentia.

1°. Unum extremum vectis infigi potest ponderi ità ut transeat per centrum

Tom. VI.

T

gravitatis ponderis adeòque centrum gravitatis ponderis erit in ipso vecte.

2^o. Cum uni extremo vectis pondus est appensum.

3^o. Cum uni extremo pondus imponitur, ità ut centrum gravitatis ponderis sit suprà vectem.

4^o. Dum pondus supponitur uni extremo vectis ità ut centrum gravitatis ponderis sit infrà vectem.

Ad quem vectem pertinent illi modi?

Ad vectem primi generis: alios autem modos in aliis vectis generibus omittimus & æstimari debent ex illis.

Quid resultat ex eo quòd pondus diversis modis applicetur?

Illud nimirum: aliquando eandem, aliquando esse diversam gravitationem & resistantiam etiamsi retineatur eadem semper ab epimoclis distantia ponderis & potentiae & reliqua maneat eadem v. g. quando centrum gravitatis ponderis est in ipso vecte horisonti æqui distante eadem semper potentia sufficit ad illud sustinendum, sive attollatur pondus sive demittatur: hoc ut intelligas exhibe vectem AB horisonti æquidistantem, cujus epimoclion C potentia B. centrum gravitatis A (Fig. 8. tab. 15.) sit in ipso vecte, seu vectis in ipso centro gravitatis: moveatur vectis suprà epimoclion v. g. vel sit in situ

F G, & centrum gravitatis in *F*, vel sit in situ *H M* & centrum gravitatis in *H*; certè eadem potentia *B* sive in *G* transferatur cum vecte sive in *M* eâdem ubique facilitate poterit sustinere pondus, & pondus servabit eandem in omni situ resistantiam.

Potestne istius propositionis asserri quædam ratio?

Hanc accipe: quia semper & in omni situ manet eadem proportio distantix potentiæ ab epimoclio ad distantiam ponderis ab eodem epimoclio; ac proinde eadem est vis potentiæ, & eadem resistantia ponderis, quæ quidem ratio valet etiam pro vecte secundi & tertii generis.

Quid evenit quando pondus suspensum est à vecte?

Idem planè quod modò diximus de pondere habente centrum gravitatis in vecte: sit enim vectis *HI* cujus epimoclion *K*, pendeatque pondus *E* à puncto *H*, potentia verò sustinens sit in *I*, certè si vectis moveatur & constituatur in situ *P Q* aut alio quocumque manente, tamen epimoclio in *K*. eadem potentia sufficiet ad sustinendum pondus.

Da quæso rationem hujusce propositionis & utere tuâ methodo.

Hanc habe: Distantia ponderis & potentiæ ab epimoclio sumitur à perpendicu-

T ij

laribus PM & NQ (Fig. 9. tab. 15.) ductis à puncto suspensionis ponderis in P & à puncto applicationis potentiae Q , sicut autem PK ad QK , hoc est HK ad IK ità PM ad QN in quocumque situ vectis : ergo sive attollatur pondus, sive deprimatur, eadem semper potentia sufficit ad illud sustinendum quando pondus suspensum est à vecte, non secus ac si centrum gravitatis esset in ipso vecte.

Quenam pondera per vectem primi & secundi generis possunt moveri ?

Qualibet & quavis potentia : sit enim vectis primi generis AB Fig. 5. quò major est distantia AC suprà distantiam CB , eò minor potentia in A sufficit ad movendum corpus : cum igitur distantia AC possit esse major & major, poterit distantia BC semper esse minor & minor.

20. Sit vectis secundi generis CA (Fig. 6.) quò major est distantia AC suprà distantiam CB , eò minor potentia A sufficit ad elevandum pondus : cum igitur possit hujusmodi distantia fieri major & major, potest consequenter fieri potentia minor & minor.

Igitur ut video, vecte tertii generis non potest moveri quodvis pondus quavis potentia, quia in vecte tertii generis potentia semper debet esse major pondere, quia major est distantia ponderis ab epimoclio

quàm distantia potentiæ ab eodem : ergo non potest quælibet potentia movere quodlibet pondus per vectem tertii generis.

Hoc optimè conclusum est.

*DE AXE IN PERITROCHIO
SUCULA ET ERGATA.*

Pinge axem in Peritrochio.

Hæc est ipsius ; forma ; A B est axis, E F (Fig. 10. tab. 15.) sunt clavi ferrei vel lignei teretes & fortes centro axis profundè & immobiliter infixi & crenis seu foraminibus pegmatis inserti ut situm horizonti parallelum axis habeat. C D est tympanum seu rota lignea axi circumposita, quam Peritrochium Græci appellant: unde tota machina appellatur axis in peritrochio : si non foret tympanum machina diceretur sucula & ergata axis nimirum sinè peritrochio : radii O. N. R. P. S. Q. sunt baculi teretes & fortes tympani periferiæ in distantia æquali infixi, quos scytalas vocant. Axi alligatur funis C D quem ductorium appellant, qui quidem funis ad pondus P usque demittitur & ei circumligatur.

Quinam est hujusce machinæ usus?

Hunc accipe : potentia movens v. g. manus hominis applicatur successivè O, N, R, P, S, Q, & alii si qui sint hisque

depressis circumducit tympanum CD & cum tympano axem AB infixum firmiter: quo quidem tympano circumducto, funis CD circumvolvitur secumque trahit pondus P sibi illigatum.

Axis in peritrochio ad quem vectem revocatur?

Est vectis primi generis, & quidem perpetuus.

Demonstra esse vectem primi generis.

Sit in appositâ figurâ basis Tympani $ACBE$ & axis sit centrum C . (Fig. 11. tab. 15.) ex axe pendeat funis L cum pondere K . scytalæ verò CD sit applicata potentia aut ex eâ pendeat alius funis cum alio pondere concipiatur, nunc linea recta A, B, D, C , horisonti parallela & potentia in D deprimat deorsùm radium CD & consequenter totum tympanum & axem circa centrum C convertat donec linea C, B, D, I , habeat situm C, E, O , utique funis circa axem circumvolutus attolleret pondus K . sicque vectis erit primi generis.

Proba jam esse vectem perpetuum.

Si scytalæ veluti rota conjungantur, tum est vectis perpetuus, tunc enim quasi vectes infiniti uniuntur, ut operatio continetur sine interruptione.

Quænam est proportio potentiae pondus sustinentis ad pondus ipsum?

Ea quam semidiameter tympani CB

habet ad semidiametrum scytalæ CD, quoties potentia & pondus applicantur in eadem lineâ rectâ horisonti parallêlâ : nam si potentia non applicaretur in hac rectâ lineâ eandem vim non haberet.

Hinc 10. ut potentia minor pondere illud moveat per axem in Peritrochio debet esse major proportio distantiae potentiae à centro axis ad semidiametrum tympani quàm ponderis ad distantiam.

20. Ut potentia quæ sustentabat pondus illud moveat, debet crescere distantia huiusce potentiae à centro axis.

30. Si funis ita circumvolvatur circa axem uti spiræ sequentes superponantur prioribus & omnes quasi in acervum contorqueantur, crescet difficultas movendi, quia crescet semidiameter tympani & pondus magis distabit ab epimoclio, & consequenter minuetur proportio.

40. Motus, spatium, & velocitas potentiae ad motum, spatium & velocitatem ponderis majorem habent proportionem quàm pondus ad potentiam.

50. Quò major est distantia potentiae à centro axis suprâ distantiam ponderis ab eodem, & consequenter quò facilius movetur pondus & quò potentia movetur celerius eò tardiùs ascendit pondus.

60. Rotæ molendinorum in quarum circuitu dispositæ sunt primæ seu palmulæ

prominentes in quas aqua facit impetum & aliæ hujusmodi machinæ nihil aliud sunt quàm axis in Peritrochio seu vestis primi generis perpetuus.

DE TROCHLEA.

Quid est Trochlea ?

Si sit simplex, unico constat orbiculo qui volvitur circa axem immobilem, atque circumposito fune ductorio pondera attrahuntur: sit potentia A, orbiculus B, funis CC, pondus D. (Fig. 12. tab. 15.)

Quid præstat?

Potentia motricis vires non auget & in eâ æqualis est motus tum ponderis tum potentia, quantum ascendit D tantum descendit A; unum ergo emolumentum est quòd funis non atteratur, & faciliùs circa orbem B moveatur.

Quid est Trochlea dispartita?

Duos continet orbiculos, alterum A (fig. 1. tab. 16.) cujus axis est immobiliter affixus, alterum B cujus axis est mobilis ex quo pender pondus D. Itaque fune religato unâ suâ parte C, alterâ parte potentia E trahatur. Potentia sit 50 librarum æquivalet ponderi centum librarum: nam in hoc casu reperitur ratio reciproca. Scilicet si pondus sit duplum potentia, ipsa potentia duplò cele-

rius movebitur quàm pondus : quia dum pondus effertur eo intervallo quod est inter B & A, potentia duo segmata funis nempè H G & I L quæ simul sunt dupla spatii B A adducet : adeòque duplò celerius movebitur : ergo vis erit duplicata ; proindeque si 50 libris sit fortior attollet fursùm orbiculum B cum pondere D.

Possuntne dari aliæ Trochleæ quarum sint plures alii orbiculi ?

Ità certè : nam si duo sint orbiculi mobiles & si sit alligatus funis ad axem orbiculi immobilem , qui circumdatur duobus mobilibus , tum etiam immobilibus & à potentiâ trahatur , dico vim potentiæ esse quadruplam : nam tum eadem ratione potentia quadruplò celerius moveri debet quàm pondus : ergo si pondus sit 100 librarum & potentia fortior 25 libris attollet pondus.

ROTÆ DENTATÆ.

Ad vectem revocantur-ne ?

Ità certè & dentes sunt totidem vectes ; quapropter si plures inter se rotæ committantur major erit vis in potentiâ , majorque celeritas comparatè ad pondus : sed hoc cavendum diligenter ut rotarum dentes sese mutuò aptissimè stringant : aliter motus non modò non juvaretur , sed etiam prorsùs impediretur.

T I

Quanam est vis hujusce machinæ?

Major certè simplici vecte: sit enim potentia quæ vi suâ possit attollere libram unam, moveat rotam B & illius asci conjunctam rotulam C. (fig. 2. tab. 16.) Sic sint decem dentes in rotulâ C & centrum in rotâ D. Hinc fiet ut dum rotula C decies volvetur, unum tantùm circuitum absolvat rota D. Item si eadem ponatur ratio inter rotulam E quæ rotæ D conjuncta est, & inter rotam F, tum, quo tempore rotula E simul cum rotâ D. Decies convertetur, interim rota F semel duntaxat circumagetur: quare prima rota B decies celerius quàm D, eademque rota D decies volvetur velocius quàm F. Sive quod idem est, rota B centies movebitur velocius quàm F. Quamobrem si potentia unâ librâ sit gravior poterit attollere centùm libras.

C U N E U S.

Quid est cuneus?

Est prisma triangulare, cujus duo latera in communem lineam rectam desinunt: ergo ex duplici plano inclinato constat, inde pendet ejus notio à plano inclinato.

Quid est planum inclinatum?

Planum est quod angulum acutum affi-

cit cum lineâ horisontali, & eò magis inclinatum est quò angulus acutus est minor. Sic linea A B ad horisontalem lineam A I inclinata. (fig. 1. tab. 15.)

Quinam est usus plani inclinati?

Is certè ut majori facilitate gravia corpora vel attollamus vel demittamus; nam si pondus esset attollendum vel demittendum secundùm lineam perpendicularem, tota illius gravitas esset sustentanda à potentiâ, cùm è contrario quædam portio sustinetur à plano.

Suntne aliæ machinæ?

Sunt profectò. Sed illæ omnes pendent ex iis quæ fuerunt expositæ, has prosequantur rerum staticarum scrutatores.

DE CORPORE MIXTO.

Mixtum dicitur illud quod videtur coalescens ex elementis seu primis corporibus sensilibus. Videtur ergo partes habere heterogeneas.

Apud eos qui admittunt atomos, corpus est resultans ex variis atomis: apud Peripateticos, est corpus resultans ex igne, aëre, aquâ & terrâ: porrò cùm insigniter differt ab elementis ex quibus componitur dicitur mixtum perfectum, cùm parùm differt dicitur mixtum imperfectum: ideòque primum de mixtis imperfectis.

T. vj

Mixta imperfecta Græci. Meteora vocant, quòd in aëreâ regione consistant. Componuntur ex effluviis & halitibus proficiscentibus ab aquâ, terrâ: sic pariter ex aliis planetis proficiscuntur halitus ex quibus meteora pariter gignuntur in eorum vorticibus.

Causa generalis materialis ex quâ resultant sunt halitus, quapropter sit

DE HALITIBUS.

Halitus generatim sunt effluvia, quæ attolluntur à corporibus crassioribus.

Aristoteles halituum duo genera admittit, vaporem scilicet & exhalationem: vapor, inquit, est halitus humidus proficiscens ex corporibus aqueis.

Exhalatio verò est halitus siccus proficiscens ex corporibus siccis & terrestribus.

Non possum assumere hanc halituum divisionem, quippè quæ non sit satis accurata nec satis adæquata; tanta quippè est halituum varietas ut vix divisione contineri possit: quapropter si divisio placeat hanc assume: halitus sunt aut vapores aut fumi aut spiritus: vapores sunt halitus qui profluunt ex corporibus aquosis. Aliter vapor est tenuissimum effluvium aquosi corporis. Fumi oriuntur ex succis pinguibus & oleagiosis: aliter fumus est

subtilissimus effluxus corporis oleaginosi. Spiritus sunt halitus qui exhalant ex succis qui sunt rariores: aliter spiritus est tenuissimum effluvium purioris succi.

● Halitus licet subtiles vix amittunt propriam corporum naturam ex quibus exhalant, proindeque dum plures colliguntur & simul concrescunt propriam corporum exhibent speciem à quibus proficiuntur, ut patet ex plurimis observationibus: v. g. dum sulphur sublimatur, fumi redeunt in verum sulphur: dum Mercurius agitur, si aurum ore teneas inter dentes, Mercurii fumus auro adhæret: plures scilicet fumi exhalant ex hydrargyro, plures ex metallis dum liquantur, præsertim ex plumbo, stanno, dum vapores ex aquis attolluntur in aquas compinguntur.

Ex illis halitibus aut seorsim congregatis aut simul admixtis formantur mixta imperfecta: hinc alia ignita aut ad ignem accedentia, quia dominatur materia inflammabilis, alia terrestria, alia aquosa, de quibus agendum est.

DE IGNITIS IMPRESSIONIBUS.

Plurimæ sunt ignitæ impressiones quæ in aëre accenduntur & ideo dicuntur cælestes & æreæ: vocantur vulgò fax seu

lampas, torris, trabs, capra saltans, stella vagans, lancea, jaculum, draco volans, ignis fatuus, ignis lambens, Castor, Pollux, Helena, fulmen.

Fax, torris, trabs &c. non sunt nisi impressiones ortæ ex halitu sulphureo & nitroso, quæ varia sortiuntur nomina, tum propter copiam & conditionem sulphuris, tum propter configurationem, quam oculis exhibent. Sic fax dicitur impressio subitò inardescens instar lampadis & aliquandiu lucens. Torris est impressio tota ardens in longum extensa, quæ si sit longior, trabs dicitur; trabes autem diu non apparent, quia si materiæ tenui insideant, facilè extinguuntur, si crassiori facilè cadunt: quanquàm visæ sunt aliquæ diu permanentes, sed illæ in sublimi aëre positæ erant.

Capra saltans est impressio ex eodem halitu orta quasi globus igneus præferens circum se floccos penfiles instar lanæ saltuque lasciviens.

Stella vagans quæ æstimatur ut sydus aliquod à rusticis hominibus non est nisi major halitus copia in longum expansi: unde cum accenditur unâ parte halitus pabuli sui venam sequitur, & totum iter signat flammâ continuâ, eâ ratione quâ pulvis pyrius accenditur.

Lancea est eadem impressio, sed in mu-

cronem acuitur: alio nomine dicitur pyramis.

Jaculum est eadem impressio tota simul accensa sed desinens pyramidaliter, quâ parte terræ imminet.

Draco volans est eadem impressio, sed cujus mediæ partes intumescunt & ventris speciem exhibent.

Ignis fatuus est pinguis halitus & tenax nullo modo flagrans, sed lucens instar lampyridis aut ligni putridi: motu aëris huc & illuc facile agitur donec dissipetur; nascitur ex partibus sulphureis crassioribus terræ immixtis: hinc circa paludes & cimæteria nascitur aut occidit: vento propellitur in valles & versùs flumina dirigitur, ità ut fugiat homines insequentes, insequatur verò fugientes; nimirum dum homo insequitur propellit aërem ante se: ergo debet fugere ignis fatuus: at si homo fugiat cum aëre sequitur hominem.

Ignis lambens est exhalatio accensa, quæ ità adhæret rebus oleo illitis, ut lambere videatur.

Castor & Pollux sunt apud Physicos ignes gemini, qui apparent navigantibus sæviente nigrâ tempestate, qui quidem à nautis dicuntur Castor & Pollux: cum enim hi duo fratres mare à pyratis liberassent, tanquam dii maris habiti sunt,

ex quo pagani nautæ eos in tempestate implorabant. Serenitatem futuram & prosperum cursum nautis videntur significare.

Cùm ignis ille solitarius est dicitur Helena : hæc autem inflammatio futuram adhuc tempestatem & infaustum exitum dicitur significare. *

Numerus illorum ignium non est ita definitus ut nunquam plures appareant : licet enim triumpi duntaxat veteres meminerint, nostri tamen nautæ aliquandò quatuor vel quinque simul observant.

Sic formantur illi ignes : exhalationes vaporibus immisceri solent, quæ quidem propter partes minùs solidas & figurarum minimè regularium non possunt à nube dissoluta in floccos tam longè propelli quàm vapores, & ideò aëris agitatione separantur à vaporibus, eo ferè modo quo rusticæ cremorem lactis agitanter butyrum aceto secernunt à partibus fluidis : posita hæc separatione exhalationes hinc & inde in diversos acervos congregatæ juxtà nubem fluctuant, donec nubes illas deprimat ; & quia sequuntur aëris motum qui sequitur agitationem navis, funibus & trabibus navium adhærent.

Cùm unus duntaxat ignis apparet, videtur significari futura tempestas : nam unicus ignis est nubis unicæ dissolutæ indicium ; vix autem est unica nubes ;

sed plures frequentius reperiuntur simul.

Duo ignes videntur significare serenitatem mox futuram, quia plures nubes dissolutas significant.

DE FULMINE.

In fulmine explicando hæc distingui debent: fulgur, tonitru, fragor, lapis fulmineus & ipsum fulmen.

Fulgur est coruscatio repentina perstringens oculos quæ, si non audiat sonus, appellatur simpliciter fulgor, gallicè (*un éclair.*)

Tonitru est sonus quidam quasi boans & reboans, qui auditur quasi discurrens intra nubis viscera repetitis ut echæ boatibus.

Fragor est alter sonus horrendus & stridulus vulgò *elictacla*.

Fulmen est ipsa exhalatio, quæ videtur à nube ad terram descendens & accensa, quæque causa est tot prodigiorum, de quibus postea.

Lapis denique fulmineus gallicè (*le carreau du foudre, du tonnerre*) est eadem exhalatio, quæ magis condensata duritiem lapidis obtinet: verum à plurimis dubitatur utrùm detur ille lapis.

Dubium est inter Philosophos de ratione mechanicâ quâ fulmen oritur. Circa hanc varii varia sentiunt.

Cartesiani opinionem suam sic proponunt: vapores attolluntur in altum aëra, ut dicetur postea, ex illis fiunt nubes: illarum nubium alia superior est, alia inferior: intrâ nubes materia quædam sulphurea, nitrosa & bituminosa, quæ ipsum fulmen est, intercipitur: si nubes superior magno impetu ruat in inferiorem & labatur, tunc materia fulminea intercepta colliditur & fricatur, quâ collisione non solum incalescit sed inardescit etiam & accenditur. Ex hac autem inardescentiâ materiæ sulphureæ intrâ nubes interceptæ fit sæpius fractura in parte nubis quæ minùs resistit, quâ parte dirigitur exhalatio, quemadmodum bombæ diriguntur & ignes volatiles. Sic positis sit

PROPOSITIO.

Cartesiani probabiliter explicant principia mechanica fulminis.

Pr. Nam illa expositio mechanica maximè probabilis est quæ nihil admittit nisi maximè congruum legibus mechanicis, & quâ positâ omnia explicantur phænomena quæ ad fulmen pertinent: atqui hæc expositio Cartesianorum nihil admittit nisi maximè congruum legibus mechanicis, & ipsâ positâ explicantur omnia quæ ad fulmen pertinent.

1^o. Quidem hæc expositio mechanica nihil admittit nisi maximè congruum legibus mechanicis : nam juxta mechanicæ leges possunt attolli vapores ex quibus nubes , nubium illarum , cum una possit esse superior aut plures , alia inferior , juxta easdem leges , attolli potest materia fulminea quæ intra nubes intercipiatur : juxta easdem leges nubes superior ponderosior reddita potest de labi in inferiorem , & juxta mechanicam exhalatio intercepta potest accendi & inardescere , atque per aliquam fracturam propelli vehementius ; eodem modo , inquit. Cartesius , quo in alpibus circa mensem maium , junium nive calefactâ sole & ponderosiore redditâ , minimus aëris motus subito magnas nivium moles devolvit quæ in vallibus resonantes imitantur sonitum tonitruï satis similem , & consequenter hæc expositio mechanica nihil admittit nisi congruum legibus mechanicis.

2^o. Positâ hâc expositione explicantur omnia phœnomena quæ ad fulmen pertinent.

1^o. Rariùs tonat hyeme quam æstate , quia tanta materiæ sulphuræ copia non attollitur , & præterea ad sufficientem altitudinem non evehitur.

2^o. Solus habetur aliquando fulgor sine tonitru , aut quia non est superior nubes

quæ cadat in inferiorem, aut quia si fuerit non cadit in inferiorem nisi leviter; aut quia nubes in quibus est materia sulphurea sunt rariores, proindeque leviter concutitur aëris atmosphæra.

3°. Aliquando auditur boatus nullâ coruscatione apparente, quia superior nubes delabitur in inferiorem nullâ exhalatione inflammationi idoneâ interceptâ.

4°. Et fulgurat & auditur boatus quia fit & illapsus & intercipitur exhalatio.

5°. Fulmen cadit, quia major impetus communicatus exhalationi est aliquando sufficiens ut ipsa ad terram descendat, tuncque in illa descensu fragor auditur seu stridulus boatus ob percussione[m] subitam fulminis aëra dividensis.

6°. Si sit lapis fulmineus concrefcere debet, quia exhalationibus immiscentur partes crassiores similes ei terræ quæ subidet in fundis vasorum in quibus collecta est aqua pluvialis: enimverò experientiâ constat quòd si hujusce terræ partibus quasdam nitri & sulphuris partes simul admisceamus, & hanc mixturam accendamus, illa mixtura subito concrefcit in quemdam lapidem.

7°. Fulmen montes & turres frequentius ferit quàm loca humiliora, tum quia si nubes à latere dehiscat fulmen obliquâ viâ fertur & loca altiora tangit: tum quia si

nubes sit ubique ejusdem firmitatis, certum est illam esse aperiendam in hac parte potius quàm in alià parte ob resistantiam subjectæ turris.

80. Singulis vicibus quibus tonitru auditur ferè semper pluvia citò decedit, quia excutiuntur ferè semper nivis flocculi qui decedentes aëris inferioris calore in pluviam solvuntur, sicut nix agitata & manibus palpata concipit calorem & in aquam diffluit.

90. Cum pluvia satis copiosè diffunditur, fulmen de suo robore aliquid remittit, tum quia inferior nubes de suâ firmitate deperdit, tum quia materiæ sulphuræ partes simul cum flocculis nivis elabuntur.

100. Terebrat fulmen dum obliquè erumpens arborem v. g. ex transverso ferit ruptis ejus fibris.

110. Dissipat fulmen cum rectà erumpit disjunctis quidem sed illæsis fibris.

120. Urit tribus modis. 10. Afflando, absumptis duntaxat levioribus; hoc modo linteum spiritu vini madefactum uri videtur.

20. Comburendo, dum partes crassiores partim absumit, partim intactas relinquit, dum ex ligno conficit carbonem, qui nimirum carbo est lignum semiustum.

30. Accendendo cum assumptis parti-

culis omnibus quæ possunt inflammari, soli relinquuntur cineres, sic lignum solet igne consumi.

Porro eorum omnium causa generalis non est nisi tum compositio exhalationis, tum ejus motus: Præterea fulmen molliora quæque & tenuiora v. g. capillos, pilos & alia hujusce generis absumit aliquando illæsis fortioribus, putà carne & ossibus, quia partes exhalationis sunt instar spiritûs accensi linteum duntaxat lambentis; partes enim illæ tenuiores sunt quàm ut obvias particulas crassiores possint ab aliis separare: præterea etiam fulmen aliquando firmissima dissipavit illæsis tenuioribus v. g. ossa illæsa carne, gladium intactâ vaginâ, aurum intactâ crumenâ, quia partes exhalationis citiùs & faciliùs transgressæ poros corporum tenuiorum liberiores tantas agunt moras intrâ solidiora corpora, ut eorum partes communicato motu undique disjiciant ed faciliùs quòd partes exhalationis solam salis volatilis aut aquæ fortis naturam habeant, quæ quidem aqua durissima metallorum corpora resolvens vix quidquam agit in ceram.

130. Lucretius narrat, fulmine vinum illæso dolio aliquando fuisse exhaustum, cujus phœnomeni ratio est quia exhalationis partes erant subriles & penetrantes, quæ per meatus dolii facillimè ingressæ

vinum in vapores attenuaverint sicque remanserit superstes in dolio solum caput mortuum.

14^o. Narrat Seneca, absumpto dolio vinum aliquando stetisse, cujus phænomeni ratio est quòd ignis crassior longas agit moras intra dolium & extimam vini superficiem ita undequaque denset ut hac superficie densatâ & compactâ reliquum vinum contineatur.

15^o. Est aliud insigne phænomenon fulminis, vinum turbare solet, plurimi liquores acescunt, caro citius putrescit cujus causam dant Peripatetici qualitates: damus nos aëris agitationem videlicet tota aëris atmosphæra respondens nubi tonitru gravidæ concutitur, repercutitur; atque adeò hoc motu violento aër impregnatus materiâ fulmineâ it reditque per poros illorum corporum impetu majore; proindeque situm, partium texturam figuram mutat & solvit, atque adeò aciditas oritur in illis corporibus, nec non putredo.

Rationem hanc nostram plurima confirmant experimenta.

1^{um}. Est quòd si liquores sint in cellariis profundioribus non turbentur, quia nimirum aër in illis locis non commovetur nec agitur.

2^{um}. Est quòd si cellaria non sint profunda, liquores tamen conserventur, mo-

do in illis carbones fossiles accendas cum tonat: tunc enim sustentant aëra & obsistendo impediunt ne motus per fulmen aëri communicatus perveniat ad ipsos liquores.

3^{um}. Est quod cerevisia de vi suâ & sapore nihil amittat, ut observat D. Boyle: si vas hermeticè sigilles, tunc enim non patet aditus aëri crassiori qui partes illius divelleret & dissociaret: ergo positâ hac mechanicâ omnia explicantur phœnomena, quæ pertinent ad fulmen.

Plurima legi possunt de fulmine apud auctores quæ mechanicè quantum fieri potest exponenda sunt, itaque fulmen habeo ut naturale phœnomenon: hoc tamen obstare non debet quominus audiatur tanquam Dei vox significans ejus dominium in nostra bona tum fortunæ tum naturæ, vox, inquam, clamans quàm horribile sit incidere in manus Dei viventis: sic juxta Scriptura iris est signum pacti & fœderis quod olim cum Noëmo pepigit Dominus non futurum esse ampliùs generale diluvium; tamen iris est naturale phœnomenon.

DE IRIDE.

Iris est arcus multicolor resultans ex rubro, flavo cæruleo & alijs coloribus. Tempus pluviosum ita denuntiat, ut modò futurum

turum sit serenum, quia non apparet iris nisi luceat sol, proindeque nisi pars aliqua cœli nitida sit, & nullis obvoluta nubibus.

Difficultas est apud Philosophos de loco hujusce arcûs & de causâ à quâ colores illi multiplices oriuntur.

Certum est 10. Iridem tanquam arcum videri, apparet enim veluti circuli portio qui à lineâ in solo per oculum ducta, hoc est, in axe visorio veluti centro ducitur. Hinc arcus ille eò minor est quòd sol à meridiano circulo hinc & inde magis aut minùs distans: arcus eò magis circinnatus quòd magis spectator à terris ad cœlum ascendit, possetque spectator ità attolli ut ei non arcus tantùm aut circuli portio, sed integer circulus appareret, quemadmodùm solet contingere in rore terris incidente.

Certum est 20. Iridem fieri in ipsâ nube roridâ jam propè abiturâ in stillas, ut patet, quia si spectator in valle positus & montem ob oculos habeat, jam iris videtur inhærens ipsi monti, & ad terram usque descendens, nec tamen illi colores sunt in monte, ut omnes fatentur, aut in nubibus, quia nubes usque ad terram non descendunt.

Cartesius cap. 80. de Meteoris mathematicè demonstravit & locum in quo fit iris, sive corpus cujus occasione excitau-

tur iridis colores, & causam unde oriuntur illi colores. Sit

PROPOSITIO PRIMA.

Iris est in ipsis guttis aquæ sive pluvie descendentes.

Probatur experimentis, v. g. si aquam ore acceptam projicias sursum & emittas, sole averso iridem plerumque exprimit: dum sub exortum solis conspiciuntur virentia prati gramina rore aspersa; globuli roris ex certo situ & loco spectati exhibent colores iridis, sicut dictum est antea: spectator in valle positus arcum iridis observat descendentem ad ipsas terras, quia globuli pluvie ad illas usque descendunt.

SECUNDA PROPOSITIO.

Colores iridis multiplices oriuntur ex radiorum refractione & reflexione.

Patet propositio, tum quia colores sic generatim fiunt, ut probatum fuit ubi de coloribus: tum quia pro vario solis aspectu varius est color.

Utramque propositionem sic Cartesius demonstravit: assumpsit pilam vitream satis accuratè rotundam, valde pellucidam,

aquâ plenam; lucebat sol ex parte cœli A, oculus erat in puncto E, pila in regione B, H, D: (fig. 3. tab. 16.) tùm pars D rubra & multò illustrior visâ est, dummodò lineâ AC cum alterâ CE angulum duorum, & quadraginta circiter graduum constituat. Si ad hunc angulum paulò magis dilatetur pars D, rubor evanescit; at si contrahatur, non ita evanescit, sed velut in duas partes minùs scintillantes dividitur, in quibus flavus, cœruleus & alii colores apparent: (fig. 4. tab. 16.) deinde pilâ altius elevatâ, ita ut angulus FCE sit 51 graduum circiter, respexit regionem K hujusce pilæ, pars K rubra apparuit, sed non adeò lucida ut D, factò angulo ACE duorum & quadraginta circiter graduum: eodem angulo FCE paulò ampliore factò, alii colores magis dilucidi apparuêre, & eodem aliquantulum contracto, omninò evanuêre: igitur guttæ aliquæ quæ rotundæ sunt, sunt corpus cujus occasione excitantur colores iridis.

Præterea sic observavit Cartesius colores istos pendere à radiis solis, qui venientes ex A ad B, fig. 3. aquam ingrediendo frangebantur in puncto B & ibant ad H, unde reflexi ad D & ibi ex aqua egrediendo iterum fracti tendebant ad E. Quod adeò verum est ut rubicundus color evanuerit simul ac corpus aliquod opacum &

obscurum alicui linearum AB, DE, appositum: sic notavit colorem in puncto K, fig. 4. esse à radiis solis, qui venientes ab F ad G frangebantur versùs H, & in H reflexi ad I, rursùsque ab I reflexi ad K, in quo tandem fracti. Hinc primarius color iridis est à radiis post duas refractiones & unam reflexionem ad oculum venientibus: secundarius autem est à radiis, qui non nisi post duas refractiones & duas reflexiones eodem pertingunt ex quo color ille minùs est conspicuus quàm prior: ergo causa generalis hujusce coloris multiplicis in iride est varia radiorum reflexio & refractione.

Idem constat ope vitrei prismatis, in quo res demonstratu facilis.

*DE HALONE, PARHELIIS NUBIUM
COLORIBUS, &c.*

Halo est corona circa sydera, sive fulgor in modum coronæ astrum cingens: convenit cum iride, quòd illa corona sit propemodùm rotunda, quòd interdum sit colorata; sed in eo differt quòd corona nunquam conspiciatur ubi pluit: hinc licèt halones generentur reflexione aliquà aut refractione luminis, non sit illa refractione in aquæ guttis aut grandine, sed in nube roridà, quæ nondùm stillat: vel in

iis stellulis ex glacie pellucidâ compositis, quæ sunt nubium partes. Modum hujusce refractionis & reflexionis explica t idem Cartesius capite nono Meteororum , n. 4^o.

Halo frequentius apparet circâ lunam , quia cùm halo non pendeat ex tot reflexionibus & refractionibus quàm iris, non eget tam vehementi lumine ut producat.

Parhelii non sunt nisi emphaticæ impressiones quæ solis effigiem mentiuntur : sunt ergo mentiti soles qui in nube quasi in speculo à vero sole manantes regeruntur.

Hinc ut habeatur tale phœnomenon , duo pariter requiruntur , una pellucida pars & tersa , quâ lumen reflecti possit , altera opaca quâ possit reflecti eo quo acceptum est ordine : sic speculorum formam obtinet crySTALLUS cujus pars averſa plumbo aut hydrargiro illita est : sic aqua, sic pariter metalla , plumbum , stannum, argentum &c. si polita sint.

Difficultas est quomodò nubes possint acquirere duas illas partes : Cartesius cap. 10^o. Meteororum illam expositionem tentavit : nubes, inquit, potest vento calido agitari, qui ventus aliquam nubis partem liquefacit, hæc & frigore alterius venti, putà Borealis, & vicinia nivis nondum liquefactæ gelascit, ex quo habetur glacies pellucida in unâ parte nubis. Hoc posito, non difficile intelligitur quòd sol

suam imaginem in illâ glacie possit exprimere, quemadmodum exhibet in aquis: quanquam hanc imaginem non exprimit nisi ad centrum circuli, qui videtur parhelium constituere.

Hoc præterea notandum est, solem altiorem vel humiliorem circulo semper videri per refractiones, quarum ope conspici potest, etiam cum est infra horisontem: itemque ope refractionum umbræ in horologiis plus justò possunt accedere vel recedere, atque ità horam planè aliam quàm reverà sit designare.*

Ex his patet Parhelios multiplices simul haberi posse, quia non una tantum, sed etiam multiplex nubes ità potest obijci soli, ut in iis quasi in speculis sol multoties expressus videatur. Hinc anno 1629 die 20. Martii, horâ 2â. pomeridianâ, visi sunt Romæ quinque soles.

DE NUBIBUS.

Vapores in altum attolli pluriès jam dictum fuit: eorum dilatatione generantur venti; at verò si condensentur, fiunt varia corpora, quæ conspiciuntur oculis, dicunturque nubes & nebulæ.

Ut autem vapores, nubes & nebulæ formentur, viâ multiplici & diversâ utitur natura: nimirum ut nebulæ fiant, ad tan-

tam altitudinem attolli non debent vapores: sunt crassiores minùs attenuati, plurimis constantes exhalationibus & partibus terrestribus: hinc caligo sæpiùs fœtet; sed ut fiant nubes, attolluntur altiùs vapores subtiliores, magis attenuati, qui plurimùm ætheris in se continent.

Itaque in eo nubes & nebula conveniunt, quòd fiant ex vaporibus, differunt quòd vapores nubium sint altiorem, nebularum sint crassiores & depressiores, quòd partes nebulæ sint magis condensatæ quàm partes nubis: hinc nubes sunt corpus rarum & spongiosum, instar nivis, ideòque manent in aëre suspensæ, ex eo quòd circumstantis aëris pondere librata teneantur pensiles, non secùs ac naves onustissimæ aquarum circumstantium pondere sustinentur; neque enim nubes alligantur funibus aut fulciuntur columnis, proindeque motus earum repeti debet ex certâ quâdam latitudine molis.

Motus quo feruntur nubes plurimùm adjuvat illam suspensionem: quemadmodùm enim homines aquis innatant, licet aquis graviores, quia certam motûs mensuram in brachiis & pedibus efficiunt quâ aquam verberant, sic nubes quasi natant in aëre propter certam motûs mensuram: imò nubes in aëre eas habent determinationes motuum, quibus pueri

temerè delectantur in aquis dum medias inter aquas natant, dum sese ità immergunt ut fundum tangant, ad superficiem postea redituri: enimverò nubes modò appropinquatur terræ, modò assurgit altiùs: hoc verò motu feruntur à vento fortiori agitante fluidum in quo natitant.

Nubes sic mota atque penilis dissolvi potest in aquæ guttas; cujus phænomeni hæc est ratio, quòd divisione partium nubis excludatur æther, atque proinde partes quæ sub alio volumine contentæ priùs ascendebant jam descendunt; haud secùs ac partes ligni quæ simul adjunctæ aquis innatant; fundum petunt, si in granula dividantur.

Nubes exhibent varias figuras; sunt aliquandò majores, aliquandò minores: ratio est quia major halituum copia attollitur, aliquandò minor; vel quia plures aliquandò condensantur vapores, aliquandò pauciores: diverso verò aëris motu diversimodè configurantur, & ideò diversos induunt colores, qui quidem colores oriuntur à diverso solis aspectu, reflexione & refractione radiorum: hoc persuadet mutatio subita & repentina colorum in nubibus, quâ modò videntur albæ, modò nigræ, modò rubræ, modò alios dant colores; imò nubes eadem in diversis locis apparet, & in diversis temporibus, sub specie diversâ.

Itaque foetus est præjudicii opinio muliercularum, quâ ex colore & figurâ nubium conjiciunt bonam vel malam fortunam: hæc enim sunt phænomena naturalia quæ pendent ex motibus & figuris, nec pestem, famem significant, ratione colorum & configurationis partium exteriorum, sed aliquandò efficiunt propter conditionem partium ex quibus constant & in quas dissolvuntur.

Nubes ergo fingi debet ut ingens acervus nivis concretus ex vaporibus in altum sublatis. Rem explicuit Cartesius Meteororum cap. 3^o. nimirum partes vaporum in altum sublata tandem nullum habent motum, nisi motum fluidi à quo rapiuntur partes illæ, simul adjunguntur; ideoque sibi adhærescunt quâ adhæsione fiunt sensiles flocculi: hac ratione exsurgit nix ut deprehenditur in frequentissimis evaporationibus in quibus vapor in altum sublatus abit in spumam. Nix illa, quæ est nubis corpus, fons est pluvix & grandinis.

DE NIVE.

Cùm nubes nihil aliud sit quàm ingens acervus qui circumstantis aëris pondere libratus sustinetur, facile conjicitur quomodò nix in terram cadat; nam si dissolvatur nubes, id est, si satisfaciente

aëris pondere pars aliqua nubis deorsum labatur : ergo nubis dissolutio nihil aliud est quam partes nubis divisæ, quam flocculi aliquam aëris agitationem disjuncti : fit autem ista disjunctio, si v. g. infra nubem sit minoris aëris agitatio, tunc enim flocculi disjunguntur & divisi labuntur : porro quilibet flocculus ex pluribus aliis globulis villosis mutuò implicatis componitur, sicut flocculus lanæ ex pluribus lanæ partibus mutuò implicatis constat.

Est aliquid admiratione dignum in illis flocculis : nimirum quilibet, stellarum instar, radios habet plerumque sex, ita ut frigidiore cælo, huc atque illuc volitantes quasi stellulæ appareant.

Hoc phænomenon explicuit Rohaltius 3.^a parte Physices : legatur à physico studioso.

Nix multas patitur affectiones. 10. Friabilis est; globulis enim constat qui faciliè separantur & faciliè comprimuntur. 20. Terram calefacit & juniores plantas tuetur à gelu. Ratio est, quia plantarum pori frigore sunt coarctati, ideòque partes secundi elementi non possunt illos subire, nisi concentus partium & dispositio tollatur : sed quia nix continet maximam secundi elementi copiam, & quidem subtilioris, tenet poros liberos & satis capaces, imò partibus secundi ele-

menti perpetuò discurrentibus sensim sine sensu pori amplificantur, nec debet fieri partium disruptio.

Hinc 1^o. li quorum nasus in regionibus septentrionalibus congelatur, nasum priùs nive fricant quàm ad ignem accedant, quia partes ignis nimis commotæ per poros coarctatos non transirent nisi disruptendo partes, at verò partes nivis exiguæ & tenues sensim sine sensu poros dilatant: hinc digiti dolore torquentur, si congelati approximantur igni, sed potius levi calore paulatim debent recreari, ut priorem partium situm recuperent.

Hinc 2^o. Nix fertilitatem terræ inducit, tum quia non sinit halitus expirari à terris & plantis, tum quia multo nitro abundat, tum quia partes continet nutritioni plantarum servientes & excitat in terrâ succos idoneos tali vegetationi; unde sub ipsâ leta exurgunt gramina; imò aliquæ plantæ efflorescunt.

3^o. Aquæ nix innatat, quia multo turget aëre.

4^o. Perstringit oculos, quia propter prædictos globulos lumen quoquòversum uberius reflectit: hinc qui habitant loca nivibus conspersa visum plerumque habent debiliorem.

5^o. Dum ningit, vix auditur sonus campanæ, quia prædicti globuli cadentes

nocent motui undulationis ex quo excitatur sonus.

6°. Halitus nivales naribus ingressi pulmones & ventriculū malè afficiunt, quia halitus illi nitrosi motu suo faciunt ut spiritus uberiores expirent : ideò dum ningit, summo mane panis manducandus est, paululū vini accipiendum.

7°. Si nix dissoluta bibatur, sanguinis turbatur circuitus, quia videlicet partes nitrosæ nivis motum habent irregularem, ex quo nix hausta sanitati nocet.

8°. Nix tractata manibus tandem calefacit manum, quia innumeri globi & cuspides ex quibus constat, discurrunt undique, & infixi carnibus impediunt cursum sanguinis & quominus revehatur per venas, inde manus turgescit & rubescit.

DE PLUVIA.

Pluvia non est nisi dissoluta nix, quæ liquatis & rotundis guttis cadit : cū enim nubes oriatur ex vapore per aëra densato, cūque vapor in aëre densatus sit nebula vel nubes, ideò pluvia est nubes soboles orta ex divisione : si verò nebula liquetur, non tam pluvia est quàm caligo : igitur pluvia est nubes quæ in aquam solvitur : nam quandò nubes conjunctis suis partibus manet integra, tan-

diù in aëre sublimi sustinetur quòd sub-
jectus aër sive suo firmatus pondere, sive
vento è terris in cœlum spirante com-
motus, nubis ponderi resistat: at cùm ipsa
discerpitur nubes in varias particulas, tunc
in alias convertitur impressiones, atque
inde pluvix, nives, grandines oriuntur.

Porro pluvia non est quælibet nubes
• soluta: sunt enim quædam nubes raræ,
quæ in aërem abeunt, aut in effluvia insen-
silia; appellantur illæ steriles, at verò
quædam sunt quæ contractâ densitate pon-
dere suo deorsum impelluntur.

Pluvia dicitur cadens liquatis guttis;
hoc experientiâ constat: quippè sive nu-
bes solvatur primò in flocculos nivis con-
gelatos, sive primò solvatur in guttas
liquatas, perinde est: nam fieri potest ut
aër per quem flocculi nivis decidunt adeò
calidus sit, ut nivem liquefaciat antequàm
ad terras pervenerit.

Pluvia dicitur cadens rotundis guttis,
nam corpus liquidum rotundam induit
figuram, cùm omnes ejus partes paribus
momentis undique comprimuntur, tran-
quillo præsertim cœlo, nam vento flante,
illa figura æquabilis vento mutatur: at-
qui pluviales guttæ sunt liquidum cor-
pus quod paribus momentis undique com-
primitur: hinc si aquam sursum projicias,
in guttas rotundas descendit undique com-
pressa pariter à materiâ subtili.

Pluvia cadit aliquandò per guttas gràndiores majusculas, aliquandò per minutiores, sed magis continuas & crebriores: hinc pluviarum duæ sunt species, imber & nimbus.

Nimbus est pluvia cujus guttæ sunt grandiores & majusculæ.

Imber est pluvia cujus guttæ sunt exiliores, quæ jugi tenore diffluunt.

Quæres cur aliquandò pluat guttis majoribus.

Respondeo illud fieri quandò pars nubis superior solvitur prior; nam guttæ è superiori parte nubis descendentes aliis occurrunt quibuscum conjunguntur, tuncque majores fiunt; at cum pars inferior nubis priùs liquefcit, tunc minutissimæ sunt guttæ.

Quæres cur aliquandò per æstatem pluat, etiamsi nullæ conspiciantur nubes?

Ratio est quia tunc vapores crassiores attolluntur, qui antequàm in nubem sensibilem convertantur, cadunt aëre fatifcente.

Varia sunt futuræ pluviae vel serenitatis indicia: putà sol in ortu tinctus flavo colore, luna pallida, flavæ nubes circa solis ortum, nigræ circa vesperam, stellæ plus æquò scintillantes, quæ videntur exultare quasi lascivientes.

Non tantùm à cœlis sumitur indicium pluviae, sed à terrestribus; videlicèt ligna

in ignem projecta crepitant, boves extenso collo cœlum suspiciunt, muscæ acrius pungunt, porci graminina discerpunt, lumbrici emergunt è terrâ, formicæ præcipitant se in sua latibula, hîrundines circâ aquarum superficiem volitant, muscas fortè & alia animalcula prædam suam à ventis & halitibus in terras depressam infecuturæ: ranæ frequentius coaxant, gallus crebrò & debile cantat, pulices acrius mordent.

Hæc & alia signa laudantur à rusticis hominibus; docti verò proferunt quod ex barometro colligitur: videlicet quò aër est humidior, eò magis descendit hydragirus; quò magis serenus est, eò ad majorem altitudinem suspensus manet.

Dicitur aliquandò pluuisse ranas: illud sic explicari potest: ranarum semen minutissimum est, rana in ipso ovo est efformata, ut recentior accuratissimè observavit: illud ergo potest attolli simul cum partibus aqueis & paludosis quibus inhæret: advectum autem ad aëris regionem calore solis excitari potest & augeri rana; cum verò nubes solvitur, suo cadit pondere.

DE GRANDINE.

Nonnulla jam præmisi de hoc argumento, quæ paucis sic expedio. Gran-

do aliquandò in majores & rotundas bullas cadit, aliquandò in minores, aliquandò in superficies planas quæ sint ipsa glacies.

1º. Cadit in minores globulos, quia cùm nubes in minores guttas dissolvitur, guttæ pluviales crustatim concrescunt, & congelatæ fiunt minores grandinis globuli.

At 2º. Grando cadit in majores & rotundas bullas, si guttæ pluviales inter descendendum aliis adjungantur, & postea condensentur à frigore nimio infimæ regionis, aut ab ipso aëris nitro.

3º. Cadit grando in superficies planas, si pars superior nubis lique scat radiis solaribus, sed postea congeletur, quemadmodum fieri solet dum nix terris incubans liquecit, & postea congelatur: tunc habetur glacies quæ tandem agitatione fluidi in plana dividitur, sicque cadit.

*DE RORE, BRUMA, SUDO,
MANNA CALABRICA.*

Dixi vapores à terrâ attolli quos inter quidam subitò concreti in guttulas insensiles cadunt, arborum foliis inhaerent, pluresque simul adjuncti totum efficiunt sensile quod ros dicitur.

Ros copiosior est vere & autumnò quàm per hyemem & æstatem: nam per

æstatem ad majorem altitudinem assurgunt vapores, per hyemem verò ros fit gelu albicans: at vere & autumnno sufficiens est & proportionata virtus ut vapores in guttas convertantur.

Bruma est ros conversus in gelu albicans: bruma ergo distingui debet à quâdam spissâ caligine, quæ lumen ipsum oculis surripit: nascitur hæc caligo & vere & autumnno, vix autem hyeme & æstate: nam hyeme non est sufficiens calor ut hi attollantur vapores atque fumi: æstate verò major est & altiùs attolluntur.

Cùm calor maximus est, simul cum vaporibus attolluntur exhalationes, quæ horâ serotinâ descendunt in particulas insensiles, & fit sudum, gallicè (*le ferein*): hoc autem nocere potest si contineat exhalationes è locis putridis profectas.

Fit Manna Calabrica cùm vapores attolluntur in Calabriâ pinguiore, quæ insensibiliter descendentes inhærent fagorum foliis ubi concrescunt atque unâ cùm humore profluente ab arbore constituunt mannâ.

DE CALORE SUBTERRANEO.

In terræ visceribus calorem esse constat ex phænomenis, ex monte Vesuvio flagrante & aliis, & ex calore qui per hyemem sentitur in locis profundioribus.

Calor iste est ab igne aliquo; ignis autem est à partibus quibusdam sulphureis & nitrosis, quæ in terræ visceribus per Venas serpunt: inde factâ partium agitatione & motu expansivo, partes illæ rarefiunt, atque si materia sulphurea ad terræ superficiem perveniat, sine ullo motu terræ hæc inflammatio conspicitur: sicut si accendatur pulvis pyrius & non pateat liber aditus, jam fit partium disruptio, fractura cum ingenti motu corporis in quo pulvis pyrius conclusus est: ità si non fit liber aditus huic inflammationi conceptæ, fit ingens terræ motus quo vel ædificia subvertuntur & corruunt, quo terra dividitur cum insignioribus rimis: hinc si in monte Vesuvio cesset inflammatio per aliquot dies, motus terribilis vulgò sequitur, at si mons ingentes concipiat flammæ, tunc in illis regionibus nullus est terræ motus timendus, quia rarefactio hæc aperturâ vim suam exerit.

Ut autem illarum inflammationum effectus intelligamus, debemus admittere in illarum regionum visceribus plurimam sulphuris copiam admixtam partibus terreis & aquis temperatam. Patet experimento: si sulphur & terram admisceas quibus paululùm aquæ affundas, concipitur hic calor qui manum comburat, quin imò tota massa aliquandò accenditur: si

pariter limaturæ calybeæ liquores acidos affuderis, fit ingens ebullitio: porro in cineribus Vesuvianis ferreæ partes reperiuntur, excitant illi odorem sulphureum.

DE VENTIS.

Omnis agitatio sensibilis in aëre ventus appellatur; hinc aër flabello agitato, aër ex folle emissus ventus dicitur. Hic loquor de ventorum origine, de variis speciebus & præcipuis affectionibus.

De Ventorum Origine.

Cartesius opinatur ventos nihil esse nisi vapores dilatatos, quod per æolipylas explicat. Sit globus ex ære, totus cavus, exiguam habens aperturam, impleaturque aquâ usque ad mediam partem, & imponatur igni; tunc aquæ partes ita agitantur & dilatantur, ut per foramen ventus spiraret maximus rapiens secum partes aquæ in vapores attenuatas: qui quidem ventus non cessat nisi universa aqua per foramen egressa fuerit aut defecerit ignis: ergo, concludit Cartesius, venti oriuntur ex vaporibus dilatatis, qui habent exhalationem admixtam.

Verum quidam duntaxat venti sic generantur: at sunt alii diversâ viâ geniti.

Ventus qui sic generatur est vapor exhalatione permixtus, qui ex aquis, nubi-
bus & terris humilioribus calore solis ex-
citatus ita rarefit, ut quò minùs resistitur,
pergat.

1^o. Dicitur vapor exhalatione permix-
tus: nam ventorum materia sunt omnes
halitus qui dilatati vim faciunt ut eò per-
gant quò liberiores habent aditum: hali-
tus autem huiusmodi, vel sunt sicci, vel
sunt humidi; proindeque nec solus va-
por est ventorum materia, nec sola ex-
halatio, sed est vapor exhalatione per-
mixtus.

2^o. Vapor ille dicitur calore solis ex-
citatus ex aquis, nubibus, terris humi-
dioribus. Dicitur rarefcere; quod satis pa-
tet exemplo æopylæ, in castaneis, in ligno
viridi, in pomis: dum enim ista appro-
ximantur igni; vapor inclusus dilatatur:
sic pariter in regione æthereâ sunt nubes,
caligo, jacent in terrâ nives, aquæ, hu-
mores plurimi: porrò hæc calore solis di-
latari possunt, atque adeò ex illis ventus
fieri potest sicut ab igne generantur.

Calor subterraneus potest vapores ex-
citare & dilatare, ex quo ventus oritur:
hinc qui laborant in profundioribus fodi-
nis ex lumine cæruleo candelæ & aliis sig-
nis præfagiunt tempestates. Hinc refert
Gassendus emitti à quodam Provinciæ

monte ventos contrarios ex utraque parte. Eidem calori subterraneo tanquam occasione tribui potest repentina quædam maris intumescencia, quæ fit vel tranquillo aëre.

Ventus qui aliter generatur vel est motus minor in aëre ab occasu in ortum, quàm sit motus terræ & motus aquæ: est quippe in aëre perpetuus motus in oriente versus occidentem & quidem maximè sensibilis his qui habitant zonam torridam, quia non ita velociter movetur aër ab occasu ad ortum quàm ipsa aqua & terra: de quo motu postea dicitur, vel ventus est fluxus pressi aëris.

Oriri potest ex pluribus causis illa impressio, putà ex ruentibus desuper nubibus: hinc quidam venti cessante pluvia cessant.

Oriri pariter potest ex perturbato atmosphæreæ æquilibrio, à fluxu & refluxu maris, ab ipso lunari corpore & aliis planetis mox versus terram accedentibus, mox recedentibus, ex quibus benè explicatur cur frequentiores sint & vehementiores venti versus mensem Martium & circa mensem Septembrem, quia tunc luna magis approximat terræ.

Aliæ sunt causæ quamplurimæ quas non possumus omnes exponere: tot enim sunt quæ possint aliquam commotionem & agitationem in aëre efficere.

Præcipua Ventorum Species.

Venti à diversis partibus unde flant varia fortiuntur nomina ; quia verò quatuor sunt præcipua mundi puncta , ideo sunt quatuor principales venti : oriens, gallicè (: *Est* :) meridionalis, gallicè (: *le Sud* :) occidentis (: *Oüest* :) Septentrionalis (: *le Nord* :) dicuntur Zephyrus , Auster , Eurus , Boreas seu Aquilo.

Inter ventos illos alii sunt interpositi , qui à nautis ; 2 dicuntur ; quod tabula melius exprimitur quàm verbis.

Tres distinguimus ventorum classes : alii sunt generales & perpetui in locis in quibus flant , alii sunt provinciales , alii anniverfarii.

Primus generalis est oriens qui fiat perpetuò intra Tropicos : porrò diximus hunc motum esse ex eo quòd terra circa tropicos motum vehementiorem habeat quàm ipse aër ; quibus addè solem ferè semper respondentem zonæ torridæ aërem magis rarefacere , nam si calor solis non juvaret ad procreandum ventum orientalem , dici non posset quomodò ventus ille qui orientalis est in zonâ Torrida , fiat *Nord-est* in parte Septentrionali , fiat autem *Sud-est* in parte Meridionali.

Hi duo venti inter Tropicos perflant , & eorum causa hæc unica est quòd aër calore

solis magis rarefiat intrâ Tropicos quàm extrâ.

Alter ventus generalis est occidentalis à vigesimo - tertio gradu latitudinis ad 40. extensus; idè autem sic aër movetur, quia in hac parte terræ velociùs agitur quàm terra.

Provinciales venti tot ferè sunt quot sunt provinciæ; enimverò quæque provincia suum habet solis aspectum, suos ignes subterrancos, suas aquas, sylvas, montes, cavernas ex quibus omnibus oriuntur venti satis diversi.

Venti anniversarii certis temporibus nascuntur & certâ lege naturæ flare solent.

Est quidam ventus periodicus, qui quot annis æstate mediâ post ortum caniculæ fiat per multos dies à terciâ diei horâ: nimirum sol accessu suo certis legibus rarefacit aëra; deinde præsentia suâ ventorum materiam in vapores attenuat, qui vapores dum rarefiunt; ventum excitant.

Quamvis hi venti dicantur oriri oriente caniculâ, non pendent tamen à caniculâ: siquidem cum exortus caniculæ contingat, nunc seriùs uno mense, spirant illi venti maturiùs, ex quo colligi potest hujusce syderis potestatem in terras non esse sufficientem ut procreet hujusmodi ventos:

quinimò sydus istud nequidem est ardentioris æstûs causa, quidquid antiqua & vulgaris ferat opinio: istud enim sydus quod est stella in ore majoris canis, quæ assurgit manè suprà nostrum horisontem orientalem, quando sol oritur in principio Leonis, nempe exeunte, Julio, meliori jure frigoris quàm æstûs ferventissimi causa habebitur: siquidem quo tempore nobis oritur, eodem asperum est frigus iis quibus hæc stella verticalis est.

Alii sunt venti subitanei qui varia sortiuntur nomina, communiter tamen dicuntur procellæ.

De Ventorum Proprietatibus.

Ventorum affectiones alias dicunt manifestas, alias occultas: manifestas vocant calorem, siccitatem, frigus & humiditatem: occultæ verò definiuntur: qualitates quas aër agitatus contrahit, vel ex materiâ quâ agitatur, vel ex materiâ quam secum trahit, & cui consociatur in illo cursu: quæ quidem qualitates non sunt nisi dispositiones, mechanicæ, ut patet in æolipilis: quippe ventus spargit odorem gratum vel molestum, juxtà liquoris inclusi naturam: atque aër ex follibus per tubum oblongiorem nive & glacie obductum erumpit frigidior: sic ex fœtido & morbi-

do pulmone halitus efflatur foetens & mor-
bificus: sic pariter venti affectiones habent
à corpusculis quæ secum rapiunt.

Ventus orientalis ex Aristotele calidus
est & siccus; tamen in Lotharingiâ, Pic-
cardiâ, Normanniâ superiore, Angliâ,
Belgio, sæpius frigidus est, quod è frigi-
dioribus locis in Germaniâ prodeat: in
Italiâ sæpè humidior est, quod spirans ab
Adriatico mari secum trahat multos vapo-
res: in Indiâ occidentali, ut plurimum
salubrior est & frigidior; è contrà in Ara-
bia & Africâ ità calidus ut vix ferri pos-
sit, ex eo quod arenosas percurrat regiones.

In Zona torridâ & fervidis regionibus
venti qui flant à terrâ semper sunt calidio-
res: è contrà in frigidis regionibus ventus
maritimus nimium frigus ventorum tem-
perat.

Venti occidentales sunt humidiores nec
admodum frigidi, quod spirent à mari:
unde ex hac plagâ magnæ plerumque
oriuntur tempestates, illi venti flant sæpius
sub solis occasum.

Eurus spirat oriente sole; nam sol exo-
riens vapores uberiores excitat qui utrin-
que in partes soli oppositas determinantur:
qui vespere in partes nostras reflant vocan-
tur occidui; qui verò spirant ad eas re-
giones ad quas sol accedit dicuntur
ortivi.

Boreas sive aquilo gelidus est & siccus, & gravis; percurrit loca glacie & nubibus obducta, deorsum ruit, & aërem ex sublimi gelidâque regione ad terram trahit.

In Belgio & locis ad mare septentrionale vergentibus sæpè boreas nebulosus est & imbifer, quod etiam accidit ex eo quod auster ab aquilone reperiçussus in seipsum reflectitur.

Constantinopoli pariter nebulosus est aquilo & imbifer, quod à Ponte Euxino spirans, multos secum trahat vapores.

Auster nobis humidus est & calidus, nubes laxans; calidus est ex subterraneis & sulphureis halitibus excitatis in illis locis in quibus sol meridianus radios minùs obliquos vibrat.

Flante austro; aër calore & humore laxatur, vapores resolvuntur, caput gravedine laborat, stupor nimius affertur nec non tristitia. Auster in quibusdam locis, ut in Aquitaniâ, Occitaniâ, Africâ malignior est: in assoribus flante hoc vento pueri plerumque ægrotant, quia corporis meatus aperiet laxat, humores liquat, tumque artifices qui circa plumbum & mercurium laborant malè se habent, quod præ humore solvantur nervi, ii præsertim; qui in ore disperguntur & inde lingua plerumque vacillat aëre humido.

E contrâ aquilo salubrior est quod poros

astringat, contineat partes sanguinis subtiliores, nec faciliè patiatur eas expirare; quare nos efficit vegetiores, humores à putredine, & corpora à morbis epidemicis ruetur: interim tamen distillationes acriores & pungentes laterum dolore excitat, dum insensilem expirationem prohibet, atque plerumque nocet iis qui calculo laborant dum occludit meatus.

DE MIXTIS PERFECTIS.

Inter Mixta perfecta alia dicuntur inanimata, alia verò animata: priùs loquar de inanimatis: sit itaque

De Mixtis perfectis inanimatis.

Nulla sunt corpora quæ non sint absolute mixta, quia semper ex aliis resultant, tanquam partibus componentibus, quantum sunt physica quædam principia ex quibus præsertim suas repetunt vires corpora crassiora: ea verò à chymistis nominantur caput mortuum sive terra, phlegma seu aqua, sal, sulphur & mercurius, quæ dicuntur semina mixtorum.

Caput mortuum est pars cinerea nullius virtutis, tota passiva, quæ in resolutione ultimâ remanet: reperitur in omnibus corporibus, ut benè demonstrant chymistæ.

Cùm caput mortuum dicitur nullius esse virtutis, hoc intelligi debet comparatè ad virtutem salium, sulphurum & spirituum quæ sunt principia fortiora; non autem absolūtè, quia in capite mortuo est aliquis motus, imò superest aliquid salis & aliorum corporum.

Cùm autem caput mortuum dicitur terra, non intelligitur nostra terra in qua sunt matrices, semina & succi quibus fiat nutritio sive vegetatio: terra quippè nostra frugifera est nec-non pinguis; quam ad fecunditatem pinguedo cùm aliquâ rigiditate partium sociari debet, ut totum resultans sit friabile, solubile, nec pinguedo debetesse in singulis partibus, qualis est in terrâ quæ dicitur gallicè (*glairreuse*) hinc est aliquod corpus quod veluti mediat inter terram & lapidem, gallicè dicitur (*de la marne* :) quod terris inspersum eas fecundat, quia sale nitroso & sulphureo abundat, ex quibus sequitur fertilitas.

Phlegma est humor insipidus, minimè potens & inflammatus, qui in resolutione corporum extrahitur & secernitur ad aliis.

Cùm dicitur nullius esse virtutis, loquimur, ut antea, comparatè ad alia corpora quæ non separantur omninò à phlegmate, nec enim ab ipso secernitur quidquid est salis, sulphuris & mercurii. Si phlegmati aliquid salis addideris, fiet sapi-

dum ; si aliquid sulphuris, fiet inflammabile ; si aliquid spiritus , fiet volatile.

DE SALIBUS.

Salis nomine vulgò apud nos intelligitur corpus illud quo solemus uti ad condiendos cibos ; sed illa salis acceptio strictior est , & sunt aliæ salium species.

Sal itaque est dura & rigida columellarum levium, plerumque acutarum, congeries, quæ plicatilibus aquæ, alteriusve humoris partibus interceptæ, possunt dissolvi.

Dicitur 1º. congeries, in quo convenit cum aliis corporibus.

Dicitur 2º. dura, ut ipso tactu colligi potest.

Dicitur 3º. columellarum levium, quia materia subtilissima fluens per meatus subterraneos efficit æquabiles illas columellas pro æquabilitate meatuum, non secus ac plumbum fusum in proplasmate æquabili æquabiles induit columellas dum con-
crescit.

4º. Columellas dixi plerumque acutas : ut enim plurimæ instar cuneorum abeunt in mucronem, ita quædam instar cylindrorum æquali ubique crassitudine constant.

Denique congeries illa dicitur dissolvi posse, & merito, quia sicut partes coales-

cere potuerunt, possunt disjungi: porro ad talem dissolutionem non sufficit quodlibet corpus, sed requiritur illud cujus partes subtilissimæ sunt plicatiles & salium poris accommodatæ: porro cum salis congeries ex columellis sibi invicem incumbentibus concreta sit, propterea dissolvi non potest nisi à partibus, non modò penetrantibus, sed etiam commoventibus, ità ut partes dissolutæ cum dissolventibus fluctuent.

De Speciebus Salis.

Sales sunt totidem mineralia, putà armoniacus, arsenicalis, vitriolicus, &c.

Est quidam sal communis, qui vocatur aliter marinus, unde maris fædè: hujus partes sunt longæ, rectæ, rigidæ, acutæ, medio cylindricæ, mixtæ & temperatæ capite mortuo, phlegmate & particulis salis acidi.

Sal marinus vix odorem excitat, quia partibus caret oleosis & sulphureis.

Diximus aquam maris interiora terræ per canaliculos subire ut sit fontium origo: additum fuit partes dulces facile perreptare terrestres poros, sed partes salinas propter figuram implicari, nec posse intrà poros illos longiùs excurrere, quod quidem sic confirmari potest; nam in

inferiori Occitaniâ incolæ aquam Rhodani accipiunt quam circumducunt per arenas mediterranei maris, & hæc terra fit sal-sior marinâ.

Præter marinum datur sal alter, qui dicitur fossilis sive gemma; non multum ille differt à marino; extrahitur à rupibus quibusdam salium quæ sunt in terræ visceribus.

Datur prætereà sal petræ, qui facilius aquâ solvitur quàm marinus, quia superficiem habet magis asperam: idem sal in pari volumine levior est marino, quia magis est spongiosus: idem sal mixtus sulphuri faciliè potest inflammari, quia partes ejus plerumque sunt volatiles: sal petræ non tantum in terrâ interiori, sed in antris formatur, in veteri gypso reperitur, quia nimirum sal acidus in aëre agitatus certis quibusdam particulis terrestribus adhæret, ex quibus sal ille resultat.

Sal polycrestes plurimas continet partes sulphureas.

Sal armoniacus fit ex salibus volatilibus, v. g. viperæ, fœcis camini & salis marini.

Sunt alii sales extracti ex mineralibus & metallis, ex plantis, ex ossibus animalium, ex eorum liquoribus, v. g. ex urinâ.

Salibus annumerantur vitriolum & alumen. Vitriolum tamen est propriè minérale resultans ex sale acido, capite mor-

tuo, phlegmate & sulphure; hinc spiritus vitrioli est quàm maximè acidus.

Alumen est aliud minerale, in eo à vitriolo diversum, quòd sal ipsius sit magis acidus, ut patet ex spiritu aluminis, qui & acidus magis est & acutus.

D E S U L P H U R E.

Vix potest afferri sulphuris notitia quæ variis ejus speciebus conveniat: ut aliquid clarum statuatur eò loci, sulphur id omne dicitur à nobis, quod ex oleo aliquibus corporibus temperato resultat: ergo oleum maximè dominatur in sulphure.

Oleum verò est mollis ramulorum mutuò implicatorum congeries, quæ potest igne liquari & inflammari.

1°. Congeries illa dicitur mollis, ità ut oleum partim cedat manibus obviis, partim resistat, videlicèt est quid veluti medium inter liquiditatem & duritiem.

2°. Ramuli dicuntur mutuò implicati: nam sicut rami arborum mutuò implicantur, eòque magis quòd sunt magis flexibiles, sic oleosi ramuli, quia flexibiles sunt, permixtis fibris mutuò implicantur.

Cùm autem propter hanc varietatem ramulorum hæc olei elementa nequeant tam facile fluere, aut tam arctè conjungi quàm aquæ elementa, ideo oleum faci-

lius gelascit quàm aqua ; aquâ levius est , interim tamen minùs durescit.

Hinc oleum difficilè separatur à linteo , panno ; cùm enim prædictis ramulis mutuò implicatis concretum sit , linteo ità intextum est , ut illasâ ipsius lintei texturâ vix possit extrahi.

Dicitur 3^o. oleum igne liquari posse , quia licèt prædicta olei corpuscula , suam propter fibrarum varietatem , instar corpusculorum aquæ , lubrica non sint ; eadem tamen corpuscula propter eandem fibrarum varietatem adeò interrupta sunt , ut admissio intus subtiliori corpore possint moveri ; atque adeò oleum fit liquidum admoto igne , vi cujus hæc commotio promovetur , imò quàmvis hyeme sæviante oleum gelascat , sicut dictum est , suas tamen intrâ inanitates tantum hujus subtilioris corporis admittit , quantum ad commovendas exiguas saltem corpusculorum fibras sufficit ; unde oleum suâ servatâ semper mollitie , nunquàm in durio rem glaciem concrescit , instar aquæ : hinc si vel solo manûs motu vas refrices , oleum liquefcet.

Dicitur denique oleum inflammari , idque patet experienciâ , propterea igne sive cœlesti sive elementari potest oleum in exhalationem attenuari.

DE SPIRITIBUS.

Difficilius explicari potest apud Chymistas quid intelligant nomine spirituum, quorum infinita varietas est, quanquam generatim spiritus dici potest principium subtile & activum quod maximè prodest ad vegetationem plantarum præcipuè & animalium. Hinc corpora quæ plurimo spiritu abundant citius deficiunt, eorum quippè maximus est motus & facilius possunt corrumpi; ideò mineralia & metalla quasi incorruptibilia habentur, quia in illis corporibus pauci reperiuntur spiritus.

Quanquam ex corpore quovis educuntur aliqui spiritus, plures ex nonnullis, pauciores ex aliis, nec spiritus sunt corpora simplicia, verum sunt mixta vel salibus, vel sulphuribus, & aliquo phlegmate temperata.

Ideò alii sunt spiritus acidi, alii nitrosi, alii salini, alii vitriolici, alii animales, &c. Spiritus profunt maximè ut corpora dissolvantur, v. g. stannum & cuprum spiritu nitri: quippè corpora duriora solvuntur à liquoribus, putà aurum per aquam regalem, argentum, Mercurius, ferrum, calybs per aquas stygiàs, plumbum per vinum acre; sed ista ad Chymistas, & interim agendo de mine-

ralibus, plantis, metallis & animalibus, idem argumentum iterum tractabitur.

DE MINERALIBUS.

Inter mixta perfecta inanimata prima species minerale dicitur: Mineralia verò sunt corpora quæ in terræ visceribus gignuntur, quæque nullatenus sunt ductilia, in quo differunt à metallis, quæ ductilia sunt: idèò autem mineralia non sunt ductilia, quia constant partibus brevioribus & minùs ramosis quàm sint metallorum partes.

Hæc positâ definitione hydrargirus est minerale corpus, non metallicum, quia est malleo minimè ductilis; tamen à Chymistis annumeratur metallis, ex eo quòd spectetur ut elementum metallorum, quapropter non tractabitur de hydrargiro nisi cum de metallis loquar.

His positis, mineralia quædam fluida sunt, plura tamen dura, è quibus nonnulla liquari possunt, ut antimonium, arsenicum, vitriolum, quæ sunt totidem mineralium species; nonnulla non possunt liquari, ut lapides.

DE LAPIDIBUS.

Lapis est corpus durum minimè ductile, neque aquâ exsolubile: est granorum congeries.

Disputatur de modo quo formentur lapides.

Aristoteles vult ipsos compingi ex sicco halitu.

Refellitur : nam solus halitus ficcus non potest esse lapidum materia : enimverò in corpus durum transformari non potest halitus ficcus sine humore ; ideò ex solâ terrâ non formantur lapides , quia corpora quorum partes omni humore destituuntur in pulverem fatiscunt.

Alij volunt lapides ex aquâ concrefcere : at immeritò ; quia nisi alia admisceatur materia, explicari nequit hæc transmutatio.

Alii docent lapides formari ex terrâ & aquâ simul.

Refelluntur. Nam ex terrâ dilutâ aquis nihil nisi lutum emergit.

Alii præter terram & aquam requirunt succum lapidificum per meatus terræ percolaum : sed nisi explicetur quid sit succus ille lapidificus , & quomodò in terræ visceribus percoletur , verba sunt ista.

Itaque ex naturâ lapidum conijcimus cum Avicennâ eos concrefcere ex viscoso & tenaci humore , rigidisque salium partibus cum terrâ permixtis : nec enim sufficit solus humor tenax, aut solâ terra, aut ista duo simul , sed præterea requiritur copia salis ; enimverò in lapidibus durities , experienciâ teste , videtur repetenda à

salibus: v. g. sal metallicus omnes cogit solutiones & cuncta indurat corpora: hinc ovorum testæ, marina conchilia, cochlearia suam repetunt duritiem à sale nitroso: hinc etiam nitrum & quædam lixiviosa lapidescunt.

Totum istud comprobari potest experientiâ factâ à Domino *Duclos*: sal tartari multo aceto sæpius fuso & distillato impregnatus, immixtus ærenulæ stampensi, igne reverberii parùm phlegmatis emittit. Si deinde massa ex vase extracta, affusis decem aquæ ferventis libris trajiciatur per Chartam bibulam, omnis acrimonie expers percipitur; & postero die invenitur coagulata, ita ut si vi ignis tentes aquam elicere, massa in lapidem convertetur: igitur sal humore tenaci & viscoso dissolutus nec-non terra in lapides concrescunt accedente illicò caloris motu: porro in terræ visceribus sunt salinæ partes, sunt terrestres, est humor ille viscosus & tenax qui jam dici potest lapidificus, est matrix in quâ corpus concreseat; denique sunt ignes subterranei.

Hæc est coagulationis causa in lapidibus purè mechanica; atque tres illas leges ponimus: 1^a. est ut partes aptè configuratæ sint, v. g. si convexum cavo aptè inferatur. 2^a. est ut materia subtilis circumfusa comprimat partes. 3^a. est ut agi-

ter: hinc solâ agitatione butyrum ex lacte concrefcit.

Sunt plures lapidum species; omnes non perfequar, dicam præfertim de gemmis & lapide magnetico.

DE GEMMIS.

Verifimile est pellucidas confici ex materiâ fluidâ: nimirum sola fluiditas videtur poffe dispositionem partium inducere quæ ad pelluciditatem requiratur: hinc vitrum fit ex materiâ liquidâ: hinc metalla ipfa, ut argentum & plumbum, in aquis fortibus aut acetosis diffoluta in cryftallos abeunt pellucidas. Non ferè aliter formantur gemmæ quàm fales ipsi ex variis lamellis, adeò ut vel in adamante fint fciffuræ quibus lamellæ lamellis videantur applicatæ.

Color in gemmis est omninò adventitius; vel enim à minerali quodam colorato oritur, vel ab exhalatione ingente.

Itaque gemmarum materia fluida est; & cum adhuc fluida est, fit mixtio cum fuccis metallinis & mineralibus.

Quare fi quæ fint in gemmis medicatæ vires, non aliunde oriuntur quàm ex fuccis mineralibus, qui cum materiâ lapidum adhuc fluidâ commixti simul indurantur, cum interim feperari non poffint

succi ut in granatis, cum gravitatem gemmarum specificam augeant & eas variis omninoque diversis subinde coloribus & tincturis afficiant.

Neque hoc loco inquiram an gemmis insint hujusmodi vires de quibus tam plura fabulantur; enimvero fabulis proxima sunt quæ de viribus gemmarum narrant Mitridatici, Pharmacopolæ, ut remedia sua pretiosiora reddant.

DE LAPIDE MAGNETICO.

Mirabiles & varii sunt lapidis effectus, imò variæ sunt magnetis species ex quibus plurima phænomena habentur, ita ut ducenta ferè nobis sint cognita.

Revocantur omnia ad tria capita, ad directionem, attractionem & communicationem; triplex quippè virtus debet distinguì, directiva, attractiva & communicativa.

Vis directiva magnetis in eo consistit quòd magnes situm aliquem affectet, ita ut ex unâ suâ parte versùs australem plagam, ex alterâ versùs septentrionalem convertatur quasi sponte suâ: patet experientiâ. Si magnes vasi tanquàm cymbulæ imponatur, tunc quippè non erit ad omnem situm indifferens in suâ cymbulâ, sed secundum unam partem austrum; secun-

dùm aliam respicit aquilonem, nec quiescit cymbula nisi tandem in eo sita collocetur magnes.

Ex quo lapis ille spectari debet ut parva terra in quâ distinguendi sunt circuli, putâ æquator & duo poli, septentrionalis & australis.

Australis polus magnetis is est quem magnes convertit ad borealem terræ polum, & vice versâ polus borealis est ille quem ad polum australem terræ dirigit, quod videre est in acu nauticâ, adeò ut ars omnis navigandi in Oceano aliquot abhinc sæculis huic potissimum experientiæ innitatur.

Vis attractiva magnetis in eo consistit, quòd magnes ferrum aut alium magnetem aliquandò ad se rapiat, aliquandò repellat; quæ quidem attractio & repulsio videntur esse mutux, ut experientiâ probari potest, quâ magnes impositus cymbulæ aquæ innatanti sequitur ferrum quòcumque duxeris: quod idem continget si cymbulæ ferrum imponatur & magnetem admoveas.

Vis communicativa magnetis consistit in eo quòd magnes suâ imbuat virtute ferrum sibi admotum & præsertim polis.

Hæc constantissima sunt; verùm difficultas est maxima circâ causam phœnomeni tam multiplicis. Peripatetici more suo

qualitatem magneticam dixere causam hujusce triplicis effectus: hæc de re dederunt conclusiones & objectionibus satisfacere conati sunt: alii dispositiones mechanicas excogitare, & si quædam certa sint in hoc argumento, multa sanè incerta sunt.

DE VI DIRECTIVA MAGNETIS.

Ut certa ab incertis secernamus, aliquot propositionibus meam expono sententiam. Sit itaque

PRIMA PROPOSITIO.

Magnes non convertit se ad terra polos nisi per corpus aliquod quod sit motum.

Pr. Nam illa conversio est aliqua motus localis species in corpore residens: sed nihil movetur localiter nisi ab eo quod est in motu: sic dum versatiles pinnulæ diriguntur versus aliquas mundi partes, non dubitamus id fieri vento, dum pluma versus unam mundi partem volitat; illud sine ullâ errandi formidine tribuimus aëri agitato: idem fertur judicium, dum fax accensa in cubiculo agitur: idem dum naves puppim proramque convertunt: nam hæc est naturæ lex, *corpus quod movetur, ab alio movetur.*

SECUNDA PROPOSITIO.

Corpus lapidem magneticum movens & sic convertens ad polos, est corpus subtilissimum.

Facilis est propositio : nam corpus illud subtilissimum est quod oculis non deprehenditur, quod corpora solida facile permeat: atqui corpus convertens magnetem oculis non deprehenditur, corpora dura permeat, quia ejus actio non impeditur interpositu alterius corporis: videlicet si limaturam Calybis supra tabulatum spargas & tabulato subicias lapidem, limatura varios obtinebit situs pro vario magnetis situ: ergo corpus magnetem convertens ad terræ polos debet esse subtilissimum.

TERTIA PROPOSITIO.

Corpus illud subtilissimum subit magnetis poros angustissimos, quos permeat.

Paret experimentis: propositio, v. g. si temerè limaturam calybis spargas suprà chartam, in cujus chartæ medio sit magnes aptè dispositus, hæc gyros ac vortices circà magnetem pulchrè describet, eà videlicet ratione quæ luculenter propositionem nostram astruat, hoc est, quæ pro-

bet corpus subtilissimum concitatissimè
agitatum continuis & reciprocis ictibus
& reditibus permeare totum magneticum
lapidem: siquidem si charta succutiat,ur,
non sine admiratione cernes limaturam
calybis velut in quosdam angulos sese ac-
commodaturam secundum quos eat &
redeat materia magnetica: quòd si alium
magnetem propè admoveas, ità ut polus
australis magnetis unius polo septentrio-
nali alterius obvertatur, tunc fiet unus
vortex, ideòque primus vortex aliam in-
duit figuram versùs polum approximatum:
at si cognomines poli sese respiciant, tunc
contrarium deprehendetur, fient duo vor-
tices atque effluvia magnetica; ab uno
magnete prodeuntes, non progredientur
rectà ut subeant alterius polos, sed sta-
tim in seipsos reflectentur per polum op-
positum, quòd faciliorem habeant aditum,
revertantur; atque inde fit ut limatura
calybis breviores & magis arcuatos de-
scribat vortices: ergo manifestum est ma-
teriam subtilissimam subire poros angu-
stissimos lapidis magnetici.

QUARTA PROPOSITIO.

Corpus illud subtilissimum quod subit poros lapidis magnetici liberum non habet aditum nisi magnes determinatum habeat situm.

Illud quoque experientiâ comprobatur: nam si magnes non habeat situm determinatum, cum cymbulæ impositus est, ipsum acquirere conabitur; ex quo patet liberum non esse aditum materiæ subtilissimæ: hinc acus nautica posita juxta magnetem deprehenditur diversum habere situm pro diversis partibus quibus respondet: v. g. si polum magnetis contingat, ipsi perpendiculariter insisteret, ita ut longitudo acûs nauticæ cum axe magnetico quasi describat lineam; quòd si juxta æquatorem eadem acus collocetur, tunc non videbitur magneti perpendiculariter adjacere, & axem in angulos rectos secare sicut æquator ipse interfecabit, sed disponetur secundum lineam parallelam, ita ut ipsa acûs nauticæ longitudo ad angulos rectos ab æquatore intercidatur: quòd si eadem acus ab æquatore magnetis ad alterum polum ducatur, quòd ab æquatore longius recedens propius accedet ad polum, eò magis ad axem incli-

nabitur, ità ut diverso illo situ eximiam referat hujusce vorticis speciem quem circà magneticum lapidem per subtilissimam quamdam materiam describi statuimus.

Eadem materiæ magneticæ circulatio, quæ perenni fluxu circà magneticum lapidem efficitur, certo comprobatur experimento ducto ex situ quem constanter servat limatura calybis temerè injecta in chartam eo modo quem suprà docuimus: cum enim tenuissimæ lamellæ calybeæ disponantur omnes hoc modo, & cum acus nautica circà diversas magnetis partes disponatur ratione suprà allatâ, certissimum est materiam subtilissimam continuâ vestigine ab uno magnetis polo egressam ferri in alterum polum per quem regrediatur in intima magnetis viscera.

Observandum est constantem esse & perpetuam limaturæ calybeæ vel acûs nauticæ præfatam dispositionem, nisi specialis lapidis magnetici contextus inducat aliquam anomaliam, ità ut in illo lapide venæ venis æquabiliter non cohæreant, seu rectus non sit situs & parallelus, sed quasi anfractuosus. Nihilominus tamen materia calybea sic disponetur ut eximiam aliquam vorticis speciem adhuc subjiciat oculis.

Ex hac dispositione limaturæ calybeæ facilè est magnetis polos observare, vel

etiam ex acūs nauticæ dispositione: quippè certum est magnetem suos habere polos, ità ut limatura calybeæ perpendiculariter incidens vel ab austro ad septentrionem, vel à septentrione ad austrum rectâ viâ videatur progredi: scilicèt linea recta ducta ab uno polo ad alterum polum axem magnetis referet, altera verò linea quæ fingetur axem interfecare in angulos rectos ipsa exhibebit æquatorem.

Quomodò acus calybea componit se ad magnetem, eo modo acus nautica componit se ad terræ situm: nam acus calybea, ut dictum est, polo magnetis admota huic insistit ad perpendiculum; at statim atque ad magnetis æquatorem seu partem illam magnetis inter utrumque polum medio loco positam progreditur, magis ac magis inclinatur donec in ipso æquatore situm magneti parallelum obtineat: tùm æquatorem prætergressa paulatim jam attollitur & cuspidem commutat, ità ut quæ magnetem antea contingebat jam sursùm attollatur; idem autem in acu nauticâ terræ respectu contingit: acus autem nautica eundem non habet situm in quibuscumque terræ partibus, quia sub æquatore jacet horisonti parallela: posita versùs partem borealem ad horisontem magis inclinatur, quò propius accedit ad polum; & similiter versùs austra-

lem plagam magis horisonti inclinatur, quò magis accedit ad australem polum: illud certis experimentis notum atque perspectum est navigantibus. Unde acus ad libellam composita, semel atque vi magneticâ contacta est, statim æquilibrium amittit, statim deprimitur eò magis polus ipsius australis, quò magis mundi polus in eâ regione attollitur, adeò ut sub ipso æquatore revocetur ad æquilibrium, & ipsa cuspis quæ veluti pondere depressa deorsum inclinabatur, attollatur jam & ad libellam fiat composita. Res aliter se habet ultrà æquatorem navigantibus ad austrum: nam cuspis septentrionalis quæ ad polum meridiionalem convertitur sensim deprimitur, & eò quidem magis quò mundi polus in eâ regione altior: propterea nautæ ceram aut aliud leve corpusculum alteri extremo acûs nauticæ solent adjicere ut tueantur æquilibrium, cuspides commutant & aliquid ponderis detrahunt vel addunt pro variis mundi regionibus quas peragant: quapropter ob varium accessum ad æquatorem vel recessum ab æquatore inclinatio ista quæ deprehenditur in acu nauticâ varietatem habet.

Denique observandum magnetis polum septentrionalem hunc esse qui ad austrum dirigitur, australem verò qui dirigitur

ad septentrionem : enimverò si duo poli sint cognomines, exempli causâ, borealis unus, & alter etiam borealis, tunc sese mutuò expellunt & inimicitiae speciem exhibent, quia magneticus effluxus ab uno polo erumpens alterius magnetis polum cognominem non potest subire, idè-que debet esse discordia : at si poli sint dissimiles & minimè cognomines, tunc consentire videntur, huiusque situm affectant.

QUINTA PROPOSITIO.

Materia hæc subtilissima quam diximus causam cur lapis magneticus convertatur ad terra polos, ab ipsâ terrâ proficiscitur.

Propositio plurimis probatur phœnomenis : primum est quòd acus nautica sic vim suam à magnete quem tetigit mutuatur ut ad illius situm sese componat, ut borealis cuspis australem magnetis polum affectet & sequatur ; ità magnes excusus à terrâ retinet situm quem semel habuit in fodinâ & sese componit ad terræ normam : porrò illud concipi non potest nisi quidpiam accipiat à terrâ, ut acus nautica ab ipso magnete accipit.

Secundum est quòd acus ad æquilibrium composita illud amittat simul atque virtute magneticâ, imbuitur & cuspis australis

tralis statim deprimitur eò magis quò mundi polus in eà regione est altior, adeò ut eò minor sit acùs nauticæ inclinatio quò magis æquatori approximat, & ultrà æquatorem cuspis quæ velut pondere depressa deorsum inclinabatur, statim attollitur: idem etiam contingit in acu calybeà, ex quo sequitur acum nauticam vim suam directricem accipere à terrâ, sicut acus calybea accipit à magnete.

Tertium est quòd calybs à solâ terrâ, licet non admoveatur magneti, sæpius contrahat vim non tantum directricem, verum etiam attractricem; v. g. virga calybea candens è fornace educatur, unâ suâ extremâ parte immergatur aquis ad perpendiculum, vim ad polos mundi directricem constanter retinet, & quæ pars aquis temperata est vim poli australis semper conservat quantumvis invertatur; imò interdum limaturam calybis ad se trahit ac si fuisset magneti admota. Vis illa non oritur à temperaturâ, sed ab ipso situ virgæ calybeæ, cujus si pars una perfundatur aquis, nihilominus eandem vim directricem acquireret. Hinc nihil mirum est si instrumenta calybea fabrorum sæpius ad se trahant ferri limaturam.

Idem probat aliud phænomenon experientiâ constans, nempe virgæ ferreæ, aut alia quævis instrumenta ferrea, quæ

aliquandiù insistent terræ ad perpendicularum ; contrahunt vim magneticam ad polos directricem ; ideò cùm virga ferrea terram attigit, pars infima trahit ad se verforii cuspidem quæ ad austrum dirigitur, situ virgæ ferreæ inverso, quæ priùs infima est, nunc verò altior, alterum cuspidem verforii ad se trahit : ergo vim hanc magneticam ferrum accipit à terrâ.

Neque eò loci omittendum quod à Gassendo fuit observatum circa crucem ferream Ecclesiæ Aquensis Metropolitanæ in Provinciâ : hæc diù fastigio Ecclesiæ infixâ tempestate quâdam dejecta fuit, sed illius crusta vim magneticam habuere quâ clavos ferreos ad se traherent & sese converterent ad mundi polos.

Hæc omnia quæ hætenus diximus videntur certissima & ad mechanicas affectiones revocata sunt, nam ineptè admodum explicantur per qualitates occultas, antipathiam & sympathiam, sed supersunt difficiliora explicanda ; nec enim sufficit quod suprâ assertum est, videlicet corpora magnetica converti ad polos & inter se variis motibus affici propter interpositum influxum materiæ cujusdam subtilissimæ quæ poros corporis magnetici subeat, in quo quidem corpore perpetuum efficiat vorticem, quod etiam non

possit per eamdem meatuum extremitatem regredi per quam egressa fuit, nisi meatuum dispositio novâ quâdam ratione immutetur: hæc, inquam, non sufficiunt omninò, sed ultrà res est explicanda; & in eo variæ sunt Philosophorum opiniones. Nihil ego hâc in re constans polliceor, probabilia dicam: sit itaque

SEXTA PROPOSITIO.

Materia subtilissima, quæ causa est cur magnetes se convertat ad mundi polos, ab uno terræ polo ad alium polum secundum lineas axi parallelas perpetuò com meat per interiora terræ viscera.

Hoc omninò concedendum videtur, ut patet ex dispositione limaturæ calybeæ, in quâ deprehenduntur illæ lineæ parallelæ.

SEPTIMA PROPOSITIO.

Eadem materia egressa è polis quos per meat per terram exterioriorem tanquàm per ipsum corticem & ipsum aëra remeat ad eundem polum quem antea subierat, ita ut continuo fluxu per terræ viscera & continuo refluxu per terræ corticem efficiat continuum circà terram vorticem, qualem videmus effici circà magneticum la-

pidem, cujus quidem vorticis causa est quod materia illa egressa per terra polum non possit regredi per eundem, neque ulterius diffundi per aëra patentem.

Quod regredi non possit satis patet ex dispositione figuræ: verum difficultas est maxima de dispositione mechanicâ partium hunc regressum impediante. Quamquam certum esse debet Physico quod à dispositione mechanicâ procedat obex ille, sive figura partium & meatuum textura obsistat, sive hujus materiæ partes sint veluti minusculæ cochleæ contortæ, ut Cartesio placuit, sive alteram naclæ sint figuram regressui minimè idoneam.

OBJECTIONUM SOLUTIO.

Objicies 1°. Si vis magnetica directiva proficisceretur à terræ effluviis, acus magnetica ad mundi polos dirigeretur nec ab iis multum deflecteret; contrarium tamen experimur: plurimum enim deflectit, nec uno modo; hinc Lutetiæ tribus ferè gradibus versùs occidentem declinat.

Hæc experimenta facta à viris peritissimis non negabo, ex quibus reverà sequitur magnetem non dirigi ad polos cœli, sed ad polos terræ, à quâ vim suam mutuatur magnes; adeò ut terræ interioris,

quæ velut est nucleus, venæ à septentrione in austrum sic dirigantur ut sæpè non nihil deflectant ab axe terræ; proindeque sequitur effluvia magnetica subeuntia poros in magnete parallelos convertere magnetem aut terram in easdem partes; quo fit ut magna deprehendatur inter navigandum acûs nauticæ variatio, & necesse sit sæpiùs eam magneti admove-
re, ut subinde vis illa directiva excitetur.

Præterea artis navigandi peritissimi observant crates ferreas aut subjectas acui nauticæ aut vicinas declinationem ejus variare, si ab austro in boream disponuntur; secùs si ab ortu in occasum jaceant: atque hinc sequitur optimè facturos nautas, si versorium, dum in portu remanent, extrà æquilibrium ab ortu in occasum dispositum collocarent.

Objicies 2^o. Non tantùm acus nautica à mundi cardinibus deflectit, verùm etiam respectivè ad eundem locum varia est declinatio: videlicèt Parisiis, Aquis sextiis, Londini, anno erat declinatio sex aut septem graduum versùs orientem, circà annum 1667. nulla penè erat, anno 1687. fuit duorum aut trium ferè graduum versùs occidentem.

Quæ omnia hîc objiciuntur vera sunt, neque tamen aliquid concluditur contra nos: quippè generalem proponimus cau-

sam directricem magnetis ad mundi polos, nec excludimus causas pro quarum diversitate diversitas est in declinatione acūs nauticæ: quænam autem possint esse illæ causæ particulares fortè nescimus; fortè sunt in locis subterraneis causæ incognitæ mutationis, fortè propter vicinas ferri fodinas quæ in terræ visceribus continentur potest variari non mediocriter magnetis declinatio, haud secùs ac acus nautica intra sphæram activitatis magnetis alicujus inclusa magneticis polis insistit ad perpendiculum, nisi fortè sit ferrum proximum.

Ex his colliges acum nauticam nullius esse usûs in locis polo vicinioribus; tunc enim effluvia quæ à polo terræ ad perpendiculum decidunt acum ipsam in omnes horisontis partes sine discrimine deflectunt; quod quidem Batavi in suo itinerario expertos se fuisse referunt.

DE VI MAGNETIS ATTRACTRICE.

In eo consistit, ut diximus, vis illa, quod magnes alium magnetem aut ferrum ad se rapiat aliquandò, aliquandò repellat, pro vario situ; in quo quidem phœnomeno explicando non recurram ad formas substantiales magneticas, ad qualitates occultas, antipathiam & sympathiam: exponentur omnia juxtà disposi-

tiones mechanicas: ac primò quidem ob-
servo in aliis omnibus nihil esse præter
motum localem: porrò motus localis nul-
lus est nisi nascatur ex impulsu, ut in
Physicâ generali probatum est: unde ea
ad vulgi sensum attrahi dicuntur quæ sub-
sequi videntur corpus quod movet, ut
apparet in equis Khedam trahentibus,
vel in aniliis, vel in syphone, aut aliis
machinis hydraulicis quibus aquæ tractio
sensilis efficitur: nam si propius rem ins-
picere juvat, deprehendetur corpus mo-
vens pellere corpus aliud, quod habet con-
tinuitatem cum altero, quod videtur sub-
sequi: hinc nulla clara attractionis notio,
nisi hujus quæ impulsione perficitur.

His positis, difficultas est de modo quo
magnes ferrum à se distans, aut aliunde
magnetem moveat: enimverò nulla sen-
sibus percipitur conjunctio magnetici la-
pidis cum ferro: itaque sit

PRIMA PROPOSITIO.

*Vis attractiva magnetis oritur ex perpetuo
corpusculorum effluvio.*

Pr. Nam, ut antea dictum est, ferrum
ad præsentiam magnetis movetur: porrò si
movetur, ab alio corpore movetur, ut in
conclusionibus superioribus probatum fuit:

Y iv

corpus autem illud non est nisi magnes, aut effluvium à magnete; magnes quidem, si tangat ferrum, effluvium à magnete, si ferrum non tangat: si v.g. campana in turris fastigio pulsetur, funis est medius quo pulsatur, tormentum bellicum mediante globo subvertere turrim: quapropter licet nescirem quâ ratione campana fuisset pulsata, quâ ratione caput leporis fuisset confractum, colligerem tamen illud oriri ab aliquo corpore in motu posito: itaque, ut eadem utar ratione, colligere debeo ferrum quod movetur, licet à magnete distans, moveri à corpore subtiliori, licet nesciam quæ sit dispositio mechanica.

Ex his sequitur nihil esse certius quàm ferrum moveri propter corpuscula manantia à lapide magnetico; sed difficultas est de modo quo effluvia ita emanant ut ferrum versùs magnetem pellant, tuncque variant Philosophorum sententiæ.

Cartesius finxit circinnatos & hamatos effluxus instar striarum concatenatos, quibus magnes alterum magnetem arripiat & trahat. Ut mentem nostram explicemus, sit

PROPOSITIO SECUNDA.

Dum profluunt magnetica corpuscula, non solum feruntur antrorsum motu directo, sed simul circa suum centrum circumvolvuntur; ex quo circulari motu contingit ut dum magnes magneti secundum polos amicos admovetur, corpuscula illa directo cursu per fibras transcurrentia hujusmodi fibras offendant ordine contrario propter rotationem: sicque ipsum magnetem quem facile permeant pellant versus magnetem alium ex quo profecta sunt: hujus rei exemplum habemus in spicis segetum, quæ in angustos meatus præclusæ, dum commoventur, protinus averso gradu retrorsum abeunt: hujusmodi spicis solent delectari pueri & ludere: brachiis vel collo semel infixæ, quâ parte strictiora sunt vestimenta serpunt solâ mediocri agitatione concussæ, quo pacto jocorum consortes in summam rapiunt admirationem.

OBJECTIONUM SOLUTIO.

Objicies 1°. non concipitur facile quomodo hujusmodi corpuscula magnetica circulariter moveantur & simul directo cursu, ita ut, dum permeant faciles po-

ros per fibrillas depressos, sine offensione fluant, & tamen contrario ordine fibrillas easdem collidant, sicque magnetem ad alterius magnetis amplexum adducant: hæc enim videntur subtilius quàm veriùs excogitata.

Etiamsi hæc mechanica à nobis demonstrari non possit, tamen ut probabilior retineri potest; neque enim in illis quæ nostrorum sensuum testimonia fugiunt requiritur ut excellentia mechanicæ structuræ ex illis testimoniis probetur, hoc enim impossibile est, sed sufficit quòd possibilis asseratur quâ positâ fiat satis omnibus phænomenis: porro dum admittimus in magnetis poris fibrillas rigidiores easque depressas, dum admittimus effluxus magneticos motu directo simul & circulari ferri per illos poros, nihil admittimus quod non sit possibile; hoc tamen posito facimus satis omnibus phænomenis, ut videbitur postea & ex jam dictis patet: ergo retineri debet nostra sententia.

Hoc ergo primùm liquet, in omnibus illis phænomenis nihil occurrere præter motum localem, qui solâ impulsione fiat, quod multis rationibus probatum est: hinc si duorum magnetum polos minimè cognomines limaturæ calybis immergas, tunc infinitæ velut aciculæ uniuscujusque magnetis polo insistent: si propiùs admo-

veantur duo magnetes, si cognomines poli sibi admoveantur, tunc omnes aciculæ velut segetes & plantæ vento depressæ videbuntur, quod certè impulsione quâdam perfici necesse est.

Non dissimili ratione, si magnes admoveatur chartæ in quam effusa sit calybis limatura, limaturæ deprimentur, si æquator magnetis ipsis subjiciatur, at erigentur si subjiciatur polus: si subjiciatur alter polus, alterâ extremitate erigentur: hæc omnia ex impulsu, siue impulsus sit à corporibus magneticis, siue determinetur à ferro, siue magneticæ substantiæ sint concatenatæ series, siue aër expellatur ferrumque à tergo pellat, siue pili sint in magnete depressi.

Objicies 2°. Debilior magnes rapit ad se ferrum quod adhærebat vegetiori, & tamen effluxus in vegetiori sunt fortiores.

Equidem debilior magnes id præstat, sed ideò quia vis vegetioris mediante ferro transmigrat in debiliorem: hinc pars acûs nauticæ ad septentrionem tendens ferrum ad se trahit fortiùs quàm opposita, quòd illa effluxus à polo terræ septentrionali excipiat, non item pars altera.

*DE VI COMMUNICATIVA
MAGNETIS.*

Magnes communicat virtutem suam tum directivam quâ convertitur ad terræ polos, tum attractivam, quâ ferrum ad se trahit. Difficultas est in explicando hoc phœnomeno; ut solvatur, observari debet.

1^o. Virtutem hanc communicari non posse nisi à corpore in motu posito quod ferro tribuat dispositionem partium mechanicam qualem ferè habet magnes; hoc autem fieri nequit nisi per corpuscula magnetica, alia quippe fingi non possunt.

2^o. Ferrum est metallum, quippe quod igne & malleo duci potest.

3^o. Ferrum maximè accedit ad magnetis naturam: idèò à Physicis dicitur magneti cognatum: hæc autem proprietas inde probatur quia ferrum & magnes maximè conveniunt, patriâ, colore, meatibus, fibris, pondere & firmitate.

Patriâ conveniunt: eruuntur quippe ex iisdem fodinis; quò fit ut magnes à nonnullis dicatur ferri uterus.

Colore conveniunt: nam ut magnes, sic ferrum subnigro colore afficitur.

Pondere & firmitate conveniunt: est enim utriusque pondus ingens & durities non mediocris; magnes tamen durior est ferro & ponderosior.

Meatibus conveniunt, utpotè quæ ambo facile transmittunt magneticos effluxus.

Magnes & ferrum conveniunt fibris: nam ut in magnete, sic pariter in ferro necesse est fateri meatus quibusdam fibris quasi pilis crispari, quibus effluxus magnetici impediuntur aliquando & deflequantur: propterea ferrum dicunt tertium quoddam terræ genus, quatenus nimirum prima terra est ipsa terra, 2^a. est magnes. 3^a. est ferrum.

Quanquam fibris suis aliquatenus differunt ferrum & magnes; nam fibræ magnetis in unam tantum partem possunt flecti; fibræ verò ferri in utramque: ratio est, quia magnes summam ab incunabilis firmitatem & stabilitatem suarum partium sortitus est; ferrum autem sive in terræ visceribus, sive in fornace ductilitatem quandam, quæ sine flexibilitate non est, contraxit, atque hinc fit ut sit utriusque corporis diversa dispositio ratione fibrarum.

His observatis, intelligi potest ratio mechanica quâ vis magnetica ferro communicatur; nimirum pili in meatibus ferri sunt erecti, effluvia magnetica subeuntia poros ferri deprimunt pilos, tuncque ferrum habet vim magneticam, quia effluvia directo simul & circulari motu translata per illos depresso pilos idem in ferro fa-

ciunt quod in magnete ; unde potest eripi vis illa ferro , si nimirum contactu opposito pili depressi erigantur, virtus magnetica ferro communicata eò magis viget, quò diutius ferrum tangit magnetem ; ratio est quia fibræ meatuum ferreorum continuato materiæ subeuntis motu ita in unam partem inflectuntur, ut in contrariam partem non ità reflecti possint : cum autem effluvia magnetica non solum magnetem ipsum, sed etiam mediam terram semper circumfluant , propterea ferrum virtute magneticâ afficitur & præsens & absens ab ipso magnete : præsens quidem quatenus materia magnetici vorticis quo minùs resistitur progressa per meatus ferreos potiùs, quàm per circumstantem aëra circumferitur : absens verò quatenus eadem materia vorticis terrestris iter à magnete paratum nacta , faciliùs per ferrum illud quàm per corpora circumstantia circumfluit ; hinc virtus magnetica communicatur absque ullo magnetis damno : imò tantùm abest ut virtus magnetis minuatur affricu ferri , ut potiùs hâc virtute per ferrum frequentius & longius excurrente, magnes videatur evadere fortior.

De Quibusdam aliis attractivis.

Alia sunt præter magnetem quæ attrahant, v. g. succinum, lacca, vitrum ipsum, magna pars gemmarum, sed non attrahunt nisi leviora corpora, v. g. paleas, præsertim si sint affricta; unde si succinum affrices, corpuscula radiis solaribus excitata turbatim advolabunt ipsi, fumus versùs succinum irruet quasi in varios vortices actus.

Existimo hanc vim attractivam positam esse in tenui & viscoso halitu effluente à corpore: hinc fricari debent illa corpora, ut igni admoveri, ut meatus occlusi referantur: hinc aquæ immersa, aut humore perfusa, nihil trahere possunt, eò quod meatus occludantur; hinc non solo affrictu, sed tersione vis electrica sit validior, quia cum electrum à sordibus aut pulvere exortum est, faciliùs erumpunt halitus.

Halitus non penetrant obvia quæque corpora, ut effluxus magnetici, sed interposito telæ vel subtilis coercentur.

Difficultas est de modo quo tenues halitus effluentes à corporibus electricis trahant ad se paleas & alia corpora.

Cartesius vult corpuscula primi elementi è succinò affricto per rimulas erumpere

quasi gladios, quæ cum non offendant meatus in aëre idoneos, in locum priorem revertuntur.

Hæc sententia non placet, 1^o. Quia omni caret fundamento. 2^o. Quia halitus viscosi à corporibus electricis erumpentes non sunt materia primi elementi.

Supereft igitur ut dicamus hanc attractionem oriri à tensione halituum: hinc sicut fides instrumenti musici pro nimia tensione disruptæ in se se redeunt, tum halitus vehementiori eruptione, excitati, calore desinente & impetu se se remittente, veluti tenuissima fila retrahuntur quæ corpuscula secum advehunt. Sic videmus oleosos & viscosos humores qui ex virgæ extremo filatim ita cadunt ut plerumque in se recurrant.

DE METALLIS.

Metalla sunt corpora dura quæ igne liquari & malleo contundi possunt. Metallis vulgaribus annumeratur hydrargirus, licet sit fluidus, nec sit malleo ductilis, quia chymistæ arbitrantur ex eo veluti communi semine fieri cætera metalla, quia aliis admixtus & indurari & malleo duci potest; ut autem de metallis agam, sit primò

De Origine Metallorum.

Astronomi & Alchymistæ putant necessitudinem intercedere planetas inter & metalla, adeò ut singulis planetis competat jus efformandi metalli proprii & cognati, & metalla vicissim in planetas agant, licèt natura alia ab aliis maximâ locorum distantia sejunxerit; & inde ex metallo & planetâ emittuntur corpuscula ad mutua commercia quæ non sunt quibuscumque corporum poris promiscuè subeundis idonea, sed his duntaxat meatibus quos natura ad consimiles corpusculorum figuras aptavit & confirmavit. Sic metalla planetarum influxibus tanquam proprio & naturali alimento nutriuntur & planetæ vicissim metallorum effluviis conservantur & afficiuntur.

Inde orta sunt ficta illa nomina & simulata metallorum appellationes Chymistis usitatissimæ, quibus aurum solem, argentum lunam, ferrum martem, hydrargyrum mercurium, stannum jovem, æs venerem, plumbum denique Saturnum appellavêre.

Singulis planetis, singulis metallis diem constituerunt quo agerent inter se, ita ut quæ circa aurum fieri possunt artis tentamina feliciorem habeant exitum dñe Do-

minicâ, quæ Soli consecrata est, quàm cæteris septimanæ diebus; quæ fiunt circa argentum feliciorē habeant die Lunæ: & Fabulis illis hanc delirationem adjunxerunt, singulos planetas alternis vicibus nostris affectibus dominari; quæ quidem apud Astronomos ad nauseam & fastidium legi possunt.

Non afferam momenta quibus expugnentur hæc anilia figmenta: aliam ergo metallorum originem quærimus.

Alias dant origines Chymistæ: alii ex terrâ vitriolicâ, sulphure & mercurio componunt metalla: aliâ commune sulphur, hydrargirum vulgarem & salem in aquâ exsolubilem designant.

Quidam vim quandam plasticam metallorum admittunt non errantem & vagam, sed stabilem, utrique gentium eodem planè modo operantem.

Sed hæc omnia quàm obscura, quàm incerta sint exinde colligi potest quòd unus Chymista non intelligat alium.

Communior Chymistarum opinio hæc est, metalla potissimum confici ex duplici materiâ, quarum una humida est & altera siccior: sicciorē sulphur vocant, vel animam, vel tincturam metalli. Humidam mercurium vel aquam viscosam dicunt. Sed venio ad ea quæ clariùs à Physicis proponuntur de generatione metallorum.

Ut intentum obtineant Physici, postulant concedi interiorem telluris partem esse quasi nucleum solidiorem & compactiorem, adeò ut materia ex quâ constant metalla in intimam terræ regionem refundatur, cujus quædam duntaxat particule & quasi venule superiorem & molliorem terræ partem circumerrent; quas quidem particulas succi acres & corrosivi fortè diviserunt easque partibus oleaginosi involuras subterraneus calor erexit in extimas terræ partes: succi enim acriores ex duplici partium genere constant, & subtilioribus, quæ faciliè evolant, & crassioribus, quæ à subtilibus divisæ in corpora duriora condrescunt faciliè, cujus generis sunt vitriolum, alumen, sal gemmæ: liquores verò pingues & unctuarii in terræ meatibus, non in rectum aptatis, sed instar ramorum fusis formantur: atque hinc olea mineralia prodeunt: porro cum majora inter se relinquant interstitia, faciliùs subtiliorem materiam admittunt, atque adeò in jugi motu versantur. Leviora inde corpora esse necesse est, nec tamen sunt verè perspicua, quòd poros rectà dispositos non habeant, nec faciliè ex poris illorum corporum quæ subierunt ramenta avolant, nisi fortè velut ramuli dividuntur qui non ità faciliè mutuis ramulis impediuntur: tùm enim liquor fluidus & subtilis prodit, sed partes

unctuosi illius corporis ubi crassiores sunt quàm ut à se invicem possint separari, ità sibi mutuò interdum implicantur, ut sublato motu partium, in durum corpus coalescant; id quàm maximè si hujus liquoris meatibus extranea salium volatilium corpuscula adhæreant, tunc enim partes insensiles motu majori destitutæ dura efficiunt corpora, ut sulphur & bitumen, quæ calore liquefcunt.

*NOSTRA SENTENTIA
De Naturâ Metallorum.*

Ex dictis patet metallum esse corpus durum cujus partes duræ sunt longiores & ramosæ, quarum crassities varia situsque constituunt varias metallorum species.

1º. Metallum est corpus durum, ut patet ipso tactu; quid sit autem durities, dicetur postea.

2º. Partes metalli longiores sunt & ramosæ: hinc malleo duci possunt. Pro variâ crassitie & situ partium sunt metalla varia, quia corporum varietas ab illâ dispositione mechanicâ pendet: hinc si arte mutari possit dispositio mechanica, unum corpus metallicum poterit in aliud converti.

In montibus frequentiores sunt venæ metallicæ: signum illarum venarum mul-

tiplex est: nam aliquandò in vicinis fluminibus sunt aliqua metallorum ramenta; eò loci ros non concrescit, nives citò liquefcunt, non sunt læta gramina, arbores non sunt altæ, & aliquandò caudus vapor erumpit ex illis locis.

Venæ illæ variæ sunt: in quibusdam hoc metallum, in aliis aliud; quædam sunt tractabiles quæ in catino fusorio plumbum faciliè subeunt, aliæ intractabiles quæ aliquid minerale habent admixtum, ut pyrites & macarsitæ.

Vena auri cæruleum aut flavum colorem cornu refert: vena argenti vitrea est seu æmulatur colorem plumbi.

Auri & argenti venæ in Peruviâ teruntur in mortariis lapideis, aquâ perfunduntur; tùm additur aliquid salis & multùm hydrargiri post lotiones crebras: ut partes impuræ separentur, habetur auri vel argenti amalgama.

Qui metalla fodiunt, licèt vesicas applicent ori ut tueantur se à lethali fumo hujus veneni, brevì tamen aut phthisi aut paralyfi laborant, quia tenues halitus nervorum origines invadunt, venas solvunt, & præsertim ductus lymphaticos.

DE FERRO.

Ferrum est metalli species de cujus naturâ quædam dicta sunt cùm disputatum

fuit de magnetæ: convenit cùm aliis metallis quòd partes longas habeat & ramosas: differt autem ab illis, quia partes eadem sunt crassiores, rigidiores, sed pauciores.

Ex eo quòd partes rigidiores habeat & crassiores, sequitur ipsum vix posse liquari & malleo duci: at ex eo quòd pauciores habeat aquis fortibus, faciliùs solvitur quàm alia metalla, atque in plurimis locis rubigine occupatur: ferrum pariter est ex eo alstringens, quia poris absorbetur humiditas quæ relaxationis fuit causa.

Dum liquatur ferrum, in plurima granula abit, quia partes ejus & longæ & rigidæ non secantur nisi virtute ignis.

Ex ferro fit calybs, si v. g. ferrum liquatum subitò frigescat; sed tunc calybs faciliè frangitur, quia non sunt nisi granula quæ superficie sphaericâ sociantur.

DE PLUMBO.

Plumbum, quia metallum est, partes habet longas & ramosas; sed eadem partes molliores sunt magis æquales, proinde non sunt tot pori in plumbo quot in ferro.

Hinc 1^o. Plumbum gravius est ferro, quia compactius est propter æqualitatem suarum partium.

Hinc 2^o. Plumbum est minùs fragile &

minùs durum, quia partes molliores sunt; hinc etiam faciliùs liquatur.

Putatur vulgò plumbum continere plurimas partes sulphureas: hinc aurum & argentum puriora fiunt dum eorum partes partibus plumbi adhærent alligatæ: hinc hydrargirus fixus redditur, dum partes ejus sulphureis uniuntur: imò quidam existimant hydrargirum solo plumbi fumo posse concrefcere, quod tamen ab aliis negatur, quia partes plumbi non sunt merè sulphuræ, plurimæ salinæ sunt, sal enim Saturni non est nisi solutio partium plumbi facta per acidam aceti partes.

Plumbum calcinatur & in pulverem tunc abit & calcem: verùm, quod stupendum est, licèt partes plumbi volatiles virtute ignis fuerint dissipatæ, fit tamen gravius, quia sales & sulphura quæ sunt in fumo ignis intrà poros plumbi retinentur.

Si plumbum calcinatum aceto imponatur, fit effervescèntia sine calore sensili: humor postea in vapores attenuatur, ita ut tertia pars tantùm maneat humoris; fiunt crysalli quas vocant salem Saturni: plumbum aquis fortibus non dissolvitur, quia molliores partes plumbi & æquales obtundunt vim hujusce dissolventis.

DE STANNO.

Differt à plumbo stannum, quia partes ejus molles non sunt ita molles, sed sunt magis fixæ. In partibus stanni sunt quædam salinæ: hinc sal Jovis est solutio partium stanni immixta partibus aceti: quædam sunt sulphuræ; quia immixtæ sali petreæ & appositæ igni inflammant vas lapideum igne recoctum.

Quædam ejus partes, putà quæ sunt duriores, solvuntur aquâ forti, solvuntur etiam spiritu nitri.

Stannum & plumbum, licet malleo ductilia, in pulverem tamen converti possunt, si liquata agitentur donec frigescant, quia dum agitantur, aër admittitur intrâ partes, quas proinde separat & dividit; imò in calcem converti possunt, si igni permittantur, ex eo quòd partes sulphuræ exaltentur.

DE HYDRARGIRO,

Hydrargirus inter metalla collocatur, quia, ut antea dictum est, est veluti commune semen ex quo cætera metalla fieri putantur.

Corpus est cujus partes sphericæ, leves, lubricæ, poris præditæ tam angustis

ut ferè à solâ materiâ primi elementi penetrari possint, ex quo maximè hydrargiri fluiditas, gravitas, & rotunditas constant.

Hydrargirus facilè dividi potest, quia partes sphaericæ & lubricæ vix ullam habent societatem.

Hydrargirus opacus est, quia non sunt sufficientes globuli intrâ poros, ut motus luminis continuetur. Hydrargirus cùm dividitur, abit in guttas perfectè sphaericas: cùm enim ab aëre penetrari non possint partes, aër ex omni parte eas æqualiter premit versùs centrum: maximè gravis est, quia plurima filamenta materiæ subtilis vorticoso motu agitatae in ipsum agunt, & ideò per poros hydrargiri vix subire possunt: madida reddit metalla, non autem vitrum, quia vitrum habet superficiem levem, ideò à Mercurio vix tangitur. At verò aurum & alia metalla superficiem habent rugosam cui maximè inhæret Mercurius, & partes illæ graviores, leves atque tenuissimæ, ipsum aurum penetrant, imò partes auri dissociant, ut patet ex eo quòd aurum facilè avertat in pulverem qui dicitur aurum calcinatum.

Perpetuò fumi crassiores avolant ex hydrargiro, unde si commoveatur & inter dentes teneas aurum, illud inficitur fumo hydrargiri & albicat.

DE CUPRO.

Cuprum metallum est quod habet partes ramosas & longas; differt à stanno quòd ejus partes sulphureæ, licèt copiofiores, magis volatiles sint adjunctæ partibus salis magis compactis ex quâ mechanicâ sequitur. 1º. Ex eo quòd partes salinæ sint acres, cuprum carnes rodit, ut patet vitriolo. 2º. Cuprum incalcinatum apparet instar vitri: scilicèt dum calcinatur, fit aspersio sulphuris communis, quod partes ejus sulphureas magis volatiles abripit, ideòque partes quæ sunt magis ligatæ & consequenter facillè separantur. 3º. Quia salis partes sunt magis compactæ, pori sunt aliunde magis capaces, ideòque facillè penetrantur ab aquâ, quæ multas cupri particulas convertit in rubiginem, quæ gallicè dicitur *ver-de-gris*. Hæc autem rubigo fit melior si cuprum vino occitanico aspergatur, quia vinum istud abundat sale tartari, qui faciliùs cupri poros penetrat.

Cuprum spiritu nitri dissolvitur; ex hac dissolutione fit vitriolum cupri: illud est autem diaphanum instar crystalli si cuprum & stannum liquata durecant, quia stannum cupri poros penetrat: at ferrum ad rubedinem recoctum cuprum facit durius.

DE ARGENTO.

Partes habet accuratiùs conjunctas quàm cætera metalla, ergo fusile est atque ductile: ergo difficile liquatur, solvitur aquâ forti; sed de hâc solutione legantur Chymistæ.

DE AURO.

Aurum est magis fixum, constat quinque partibus crassioribus & accuratiùs permixtis, quia partes habet crassiores: magis est ductile, quia eas habet accuratiùs permixtas: difficiliùs liquatur: dissolvitur aquâ regali, quæ per poros ingressa separat auri partes; partes illæ suspensionis manent donec oleo tartareo affusæ præcipitetur aurum in pulverem conversum.

Proponitur quæstio eò loci utrùm verum aurum fieri possit per chymicam artem.

Hoc absolutè fieri potest: nimirum hydrargirus potest absolutè reddi fixus, ejusdem gravitatis cum æquali volumine auri, ejusdem ductilitatis, & habere partes tam accuratè permixtas.

Attamen hoc à nemine tentetur, est enim difficillimum atque periculosissimum:

scilicet tanta partium mechanicarum suppellex requiritur, tam accurata coctio, ut ab igne nostro istud obtineri non possit unde opes malè consumuntur: inde impostores fiunt qui monetam adulterinam introducunt.

APPENDIX DE DURITIE.

Occasione datâ metallorum, quæ dura sunt, videtur agendum de duritie.

Duritiem supponunt Epicurei, non explicant dum volunt atomos esse insectiles & indivisibiles, proindeque infinitè duras: at hæc atomorum indivisibilitas fuit à nobis rejecta, ac proinde hoc sensu intellecta durities.

Peripatetici rem pariter supponunt, dum formam substantialem admittunt in corporibus, quæ duritiem ipsis conciliet; quo quidem nihil Physico indignius dici potest, nihil quod superbam magis redoleat ignorantiam.

Cartesiani duritiem repetunt à partium quiete, quia apud fidos Cartesii discipulos quies est virtus, aut saltem à virtute nascitur, sicque corpus resistit quiescens; adeoque pugnancia non loquuntur. Sed miror Auctorem philosophicæ Institutionis duritiem à quiete partium repetere,

cùm ipse neget quietem à virtute nasci; contradictoria certè loquitur.

Cartesiani tamen errant, quia, ut suprà probatum est, quies non arguit vim.

Duritiem non explicuit pariter Malbranchius, qui materiam infinitè mollem docuit.

Itaque ingenuè fatendum prima duritiei elementa nobis esse incognita, nisi dicamus partes fuisse simul compactas & ex omni parte compressas, ità ut diversimodè concatenatæ fuerint & sibi mutuò adhæserint.

De Mixtis Perfectis animatis.

Tria sunt in rerum naturâ quæ creduntur animam habere, putà plantæ, brutæ animantes, & homines.

Anima apud Peripateticos est actus primus corporis organici potestate proximâ vitam habentis: porro vita triplex, putà vegetans, sentiens & rationalis: unde triplex anima, vegetans, sentiens, & rationalis.

Anima vegetans dicitur actus primus corporis organici potestate proximâ vitam vegetativam habentis, quæ quidem tribuitur plantis.

Facultates animæ vegetantis tres præcipuas numerant, nutricem, auctricem, &

genitricem, quarum definitiones in compendiis.

Facultatis nutricis quatuor famulantes afferunt, attractricem, retentricem, concoctricem, & expultricem.

Genitricis functio dicitur generatio: porro generatio est origo viventis à vivente principio conjuncto in similitudinem naturæ. Hæc olim tantâ religione audiebatur ut non sine piaculo violari possent, non modo à Philosophis, sed etiam à quibusdam Theologis Scholasticis, qui cum agebatur de generatione verbi divini, non satis attendentes ad illud Isaïæ, *generationem ejus quis enarrabit*, non timuerunt ineffabilem hanc generationem explicare, ut putabant ex illâ definitione Peripateticorum, quo certè dignitati mysterii detrahebant.

Hanc Peripateticorum doctrinam probare non possum: nam anima substantia est apud Peripateticos; porro substantia malè explicatur per actum.

At, inquires, anima dicitur actus ab Aristotele.

Ità certè, sed Aristoteles animam non putabat substantiam; itaque voces illæ in errorem inducunt.

Deinde per illas voces derogatur animæ præsertim rationali, si dicatur actus corporis; licet enim commercium sit inter corpus & animam rationalem, non

est tamen ità arctissimum ut anima rationalis non possit existere seorsim à corpore : videtur autem primâ fronte actum corporis non posse separari à corpore.

3^o. Nulla vox in totâ Philosophiâ magis æquivoca est quàm vox *vita* : unde ipse Magister Barbay fatetur explicari non posse quid sit vita , cùm dicitur de plantis quòd vivant , de belluis , de hominibus , de Angelis , & de Deo : porrò in definitione vox æquivoca admitti non debet , ipso Aristotele præcipiente.

4^o. Facultas attractrix est figmentum ; nam propriè non datur attractio , & omnis motus ex impulsione nascitur.

Epicurei animam admittunt , admittunt & Cartesiani ; sed diverso planè sensu : quid sentiam patebit ex dicendis.

DE PLANTIS.

Cùm sint infinitæ plantarum species , quarum virtutes sunt innumeræ , amplius disputationis campus proponitur , qui ne per mille sæcula quidem posset absolvi , si singularum plantarum species & virtutes vellem recensere : mirum ergo nemini videatur si omittantur plurima.

Quid sint Plantæ.

Dum primò conspiciuntur plantæ, excitantur in nobis variæ impressiones configurationum, coloris, odoris, saporis &c. Ex illis sensationibus judicatur plantas esse materiam certo modo dispositam & configuratam, verùm observatur postea quosdam esse motus speciales quibus v. g. crescunt, quibus modò dant folia, modò flores, modò fructus, modò semina: hi porrò motus in causâ fuerunt cur pluriimi existimaverunt inesse plantis præter materiam certo modo dispositam & organisatam quamdam substantiam quæ foret principium intrinsecum hujusce motûs; hanc verò substantiam modò dicunt naturam plantarum, modò animam vegetantem, modò formam substantialem: imò addiderunt nonnulli ipsis inesse animam quæ cogitet: hæc omnia negat Cartesius, quem sequimur. Sit itaque

P R O P O S I T I O.

Nulla est in plantis substantia præter materiam.

Pr. Nam ad hoc satis est quòd omnia phænomena quæ ad plantas pertinent ex-

plīcari possint per affectiones mechanicas: atqui omnia phœnomena quæ ad plantas pertinent explicari possunt per dispositiones mechanicas, scilicet plantarum ortus, conformatio, nutritio, conservatio, medicatæ vires, ut videbitur postea; unde hæc eadem vel in ipsis hominibus non probant existere substantiam à materiâ diversam.

Quamobrem plantæ improprie dicuntur animatæ, improprie dicuntur vivere & mori: eo duntaxat sensu plantæ vivunt quatenus juxta leges ab Auctore naturæ positas admittunt quosdam succos sibi accommodatos per diversos meatus & canales, qui succi diversimodè attriti, percolati & expurgati per certas matrices convertuntur in varias plantæ partes, quæ quidem omnia à sapientissimo artifice Deo primum fabrefacta sunt: eo sensu dicuntur mori quatenus per easdem naturæ leges fit dissociatio partium, divaricantur meatus, consolidantur fibræ, quæ tandem humore destitutæ arescunt; hinc anima plantarum non est nisi certa partium mechanicarum suppellex proximè delineanda, quâ oriuntur, formantur, nutriuntur, feruntque semina juxta suam speciem, quæ quidem à diversitate succorum vires habent varias & multiplices.

Et verò non debet admitti in plantis substantia præter materiam si nulla sit in

plantis cogitatio : atqui nulla est in plantis cogitatio , nullus est sensus , ut fateri debent omnes bene cordati : nam eatenus admittitur sensus in aliis hominibus quatenus in iis video organa sensationum & omnes motus qui in me consequi solent meas impressiones , propensiones & judicia : porro non videmus in plantis organa sensationum , non videmus in ipsis motus qui consequi solent sensationes : ergo nihil est cur judicemus cogitare plantas & sentire : ergo non debet admitti in ipsis substantia à materiâ diversa.

OBJECTIONUM SOLUTIO.

Objicies 1^o. cum Clarissimo *Tournefort* : Sunt in ipsis plantis sensationum specimina , sunt & motus qui solent in nobis consequi impressiones ; v. g. planta est quæ sole oriente respicit ipsum , quæ versus ipsum inclinatur ; imò planta est quæ vocatur sensitiva , quæ fugit si manum approximes : sunt aliæ quæ tristes sunt & marcescunt , si in eodem solo aliis approximentur , quæ quidem latè patulis foliis luxuriantur , si aliæ plantæ approximentur ; unde rustici diligenter inquirunt propensiones , inimicitias & odia plantarum ; quapropter vites suas non maritant cum quibuscumque arboribus nec

inter ipsas patiuntur quassibet herbas : ergo debemus judicare sentire plantas.

N. ant. Et dico nullas plantas dare sensationum specimina , aut alioqui debet admitti sensatio in magnete dum versùs mundi polos convertitur , dum attrahit ferrum uno polo quod altero repudiat ; debet admitti sensatio in lapillis qui in aceto repetunt & subsultant , debet admitti sensatio in lapidibus , qui ad certam distantiam descendunt ; quæ quidem omnia, licèt admittantur ab aliquibus , quàm absurda sint judicet prudens lector : enimverò cui bono sensationes ex illis phœnomenis arguantur, si modò possint explicari per dispositionem mechanicam partium ? 10. inclinatio cliotropi versùs solem non arguit sensationem, sed à solâ dispositione mechanicâ proficiscitur : enimverò partes plantæ radiis solaribus objectæ exsiccantur, non verò partes oppositæ : porrò partes quæ exsiccantur semetipsas sustinere non possunt ; ergo inclinari debent : hinc est quòd incalescente aëre , dum succi nutritii citiùs abrepti non retinentur in plantis , dum humores volatiles facti abeunt, truncus plantarum & caulis inclinantur. Hinc agricola prudens terram aquis aspergit , ut succorum motum retardet : hinc manè frigescente aëre caulis planta erecta est ,

Z vj

erecta sunt florum folia, calicem occlusum habent qui desinat in apicem, modò radiis aperiendum solaribus, in quantum suis humoribus manebant destituti flores, & idè languidi & flaccidi videbantur.

Deinde herba, quam sensitivam dicunt dum quosdam tactus fugit, non arguit in se sensationem.

Magnes aliquandò fugit ferrum, globus cereus fugit vitreum, dum aquis innatant, liquores pingues vix ac ne vix quidem possunt simul misceri, & tandem variis agitationibus permixti pingues separantur à macris & in unum corpus coeunt. Hæc omnia certè sine sensatione sunt; quidni fuga hæc plantæ possit explicari sine sensatione: tot fluunt corpuscula ab uno corpore invisibiliter agentia, ut mirer adversarios recurrere ad sensationes quibus id phænomenon explicent. Hæc corpuscula sunt tot modis configurata ut & repellere & transmutare & corrumpere & perficere valeant: quidni à ferro fluant corpuscula quibus repellatur planta, certè in eo nihil video quod infinitis propè experimentis non possit comprobari.

Denique quòd quædam plantæ vicinæ aliis sint tristes, aliæ sint lætæ, illud non probat sensationes inesse plantis: quippè sunt viæ mechanicæ quibus natura possit

istud assequi: forsan ex foliis, floribus, trunco plantarum illarum emanant plurima corpuscula quæ dispositionem mechanicam partium plantæ vicinæ labefaciunt: forsan illæ plantæ habent in radicibus plurima ostia & orificia quibus nimis voraces recipiunt in se succos omnes aptos nutritioni plantarum vicinarum, & sic de cæteris: constat enim plantas aliquas esse magis voraces, quæ omnes terrarum succos in se colligunt, unde terræ postea manent steriles: ergo hæc omnia non probant inesse plantis sensationes.

Quapropter si colligam sensationes esse in belluis & in aliis hominibus, illud à me non colligitur ex iis præcisè, sed ex aliis adjunctis sine quibus nunquam crederem sentire belluas & ipsos homines cogitare.

Objicies 2º. cum eodem; idè in hominibus aliis à nobis sensationem unusquisque admittit, quia videt in illis organa quæ sunt in nobis, quia videntur esse os, esophagus, ventriculus, vasa spiralia, tracheæ &c. Atqui hæc in plantis reperiuntur: habent ora plurima, putà orificia in radicibus quibus cibos admittant: habent æsophagum, nempè canaliculos quibus succi alimentitii perducuntur, habent plures tracheas quibus aër admittitur: ventriculos habent plurimos,

quibus iidem succi atterantur & percolentur; habent aliquid maximè analogum sanguini nostro, putà liquorem qui convertitur in varias plantæ partes; habent nervos, musculos & medullam; habent suos morbos; sunt remedia quibus sanari possint: ergo sunt in plantis organa quæ sunt in nobis: ergo debemus judicare sentire plantas, proindeque debet in plantis admitti substantia præter materiam.

Dist. maj. Quia videt esse in aliis hominibus organa apta solis sensationibus, C. apta alteri functioni quàm sensationi, N:

Porro in plantis unusquisque deprehendit organa quædam quæ certè in hominibus sensationi inserviunt, sed præterea inserviunt alteri functioni: jam verò non judico alios homines sentire præcisè, quia habent illa organa quæ alteri functioni quàm sensationi possunt inservire; v. g. non judico sentire paulùm præcisè, quia habet os, ventriculum, sanguinem &c. hæc enim vegetationi primùm inserviunt; sed judico alios homines sentire, quia in illis deprehendo organa quæ solis inserviunt sensationibus, putà oculos, aures, nasum, linguam, & in ipsis video motus speciales qui solent in me consequi meas sensationes.

Et verò si hæc organa, quæ primùm inserviunt conformationi plantarum, conser-

vationi & productioni seminis, sufficerent ut judicaremus inesse plantis sensationem, hæc sensatio deberet admitti pariter in lapidibus & metallis, videlicet habent illa suas matrices in quibus primò formantur, canaliculos habent quibus succum accipiant, percolent & dirigant, poros habent quibus transsudent, quibus materiam alienam repudient: quis tamen dicat sine risu lapidibus & metallis inesse sensationes, propensiones, tristitiam, gaudium &c. ? nemo certè, si philosophari velit, id est, ea dicere quæ aliquo motivo persuadentur.

Quamobrem quæ deinceps à nobis dicenda sunt de plantis, hæc omnia à dispositione partium mechanicâ repetemus, nihilque adscribetur animæ vegetanti & facultatibus peripateticis: quanquam unum est de quo vos monitos velim; aliquandò Physicos & Scriptores aptè uti nomine facultatum, dummodò nihil aliud intelligant præter quamdam partium mechanicarum collectionem requisitam ut tale phænomenon habeant, præsertim si hæc dispositionum mechanicarum collectio fuerit antea explicata: v. g. si explicuerim quomodò digestio in ventriculo facta fuerit, si agendum sit postea de ratione quâ chylus per ostiola lactearum ingressus fuerit ad receptaculum, poterit quis dicere ali-

menta à facultate concoctrice digesta fuisse; nec enim necesse est ut resumam omnem partium suppellectilem prius exhibitam, illud enim multiloquium Philosophia non patitur, quæ brevitati consulere debet: hinc est quòd Auctores plurimi usi fuerint nomine facultatis attractricis, retentricis, concoctricis, qui tamen non existimant cum Peripateticis inesse plantis substantiam à materiâ diversam, qui omnia exponunt per dispositiones mechanicas; quod diligenter observandum est, ut celeberrimorum Medicorum & Philosophiæ Doctorum scripta possitis inoffenso pedere rite interpretari.

De Plantarum Ortu & Conformatione.

Plantæ habent principia primùm insensilia oculis, adeò tenuia & infirma ut mirum sit quomodò ex illis natura assurgat ad opera tam firma & tam solidè constructa.

Quidam inter Recentiores existimant plantas omnes esse actu formatas in semine; sic Auctor libri de Inquisitione Veritatis, ità ut quodvis semen actu contineat plantam omnibus suis partibus organicis delineatam; v. g. est, inquit, in glande quercus ipsa cum radice suâ, trunco, ramis suis ornata foliis, suo ferax semine, & in quocumque semine est

alia quercus iisdem instructa organis & partibus integrantibus; quamobrem de novo non generantur plantæ, sed duntaxat explicantur successu temporum novâ materiæ additione; quæ quidem opinio incredibilis videri non debet iis qui admittunt partes actu infinitas in continuo: videlicet possunt illi admittere terram aliquam cujus magnitudo non superet magnitudinem grani millii, quam incolant homines cum suis urbibus, agris, bobus, equis &c. quorum omnium magnitudo foret ad magnitudinem illius terræ ut magnitudo eorundem quæ jam sunt est ad magnitudinem terræ quam calcamus: ex illis hominibus & animalibus prodirent foetus, quemadmodum jam ex animalibus prodeunt: sed ista minùs metaphysica sunt, itaque argumentum præsens physicè tracto & ab ipso semine incrementa plantarum prosequor.

10. Planta quævis materiam habet spermaticam ex quâ nascitur; hæc terræ gremio excipitur ut in matrice suâ: ibi emollitur, & fit instar lactis liquidior: tunc fibrillæ deorsum ex quibus radix & fibrillæ fursum diriguntur, ex quibus truncus in arboribus, culmus in frumentis, caulis in herbis, calamus in fistulosis, scapus in leguminibus formantur.

Hanc efformationem juvat intueri in

aliquâ plantâ, v. g. in fabâ. Semen quod faba dicitur duabus obtegatur tunicis. Extiina est penè cartilaginea, quam excipit tenuior quæ est matricis instar: hæc in viridi fabâ spongiosa est & facilè separari potest: quòd si faba exsiccata fuerit, vix potest divelli ab aliâ tunicâ: præter duas illas tunicas est alia cuticula pellucida, quæ ægrè divellitur à semine. Corpus fabæ sæpiùs in duos veluti lobos dividitur: seminis sunt duæ partes, una oblongior & rotunda, quæ cum sit radicis primordium, radícula dicitur: alia brevior, priori conjuncta, quæ intrâ lobos insinuat se & jam in ramos ac folia conformatur: in quibusdam plantis plures sunt globi quàm duo, ut in aquatico nascuntio; in aliis nulli sunt, ut in tritico.

Detractâ fabæ cuticulâ, videtur grâni pars intima, quod microscopio conspiciatur quasi medulla succo turgida: per illud fibræ innumeræ tanquàm radices seminales diffunduntur, quæ tandem confluent inter truncum & radiculam: si faba transversim secetur, videbuntur plura puncta quæ sunt extrema illarum fibrarum: hæ fibræ, licèt esse debeant in omnibus seminibus, cum sint canaliculi per quos succi nutritii in semine contenti deferuntur ad germen, non cernuntur tamen in multis seminibus, aut quia sunt

exiliores, aut quia sunt ejusdem coloris cum parenchymate: porro parenchyma est instar terræ continens succos nutritios qui facti fluidiores & molliores ducuntur ad punctum medium inter radiculam & truncum.

His expositis, si faba terræ committatur, liquet humorem transire per membranas, atque per poros ingredi, ideòque fabam intumescere: nam admissus humor ibi fermentescit & filtratur, quod experietur qui voluerit fabam aquæ diutius immergi, tunc enim extractam ab aquâ digito premat, per foramen in basi aptatum erumpent bullulæ: humor ille fermentatione succos facit tenuiores, qui in fibrillas insinuatæ perducuntur ad illud punctum medium inter radiculam & truncum, sicque pars illa succo uberiore turgida dirigit succos in radiculam quæ abit in radicem perfectam; & quia novus succus tum è terrâ pervenit ad poros radices, cum ad illud medium pars succi subtilior spiritibus magis fœta dilatata calore sursum nititur, in omnibus ferè seminibus duo emergunt globi è terrâ diducti in folia crassiora & magis spongiosa aliis dissimilia, quæ non multò post decidunt.

In plantis hæc debent spectari partes, radix, truncus, folia, flores, fructus, semina atque nebula per totam plantam diffusa.

Ex semine quod ferè semper ultimum venit origo tamen plantæ ducitur. In eo duæ partes, putà parenchyma seu caro seminis & fibræ dispersæ in parenchymate. Semen quatuor involucris tegitur: 1^{um}. dicitur capsula in plerisque, aliter siliqua, ut in glande, fabâ &c. Infrà capsulam duæ sunt pelliculæ, exterior quæ semper perforatur aliquâ suâ parte, ut corpuscula per hanc aperturam subire possint: interior pro variis plantis varia est, ex quâ duæ fibræ quasi vasa umbilicalia diffunduntur propè basim in utrumque seminis lobum.

Medulla spongiosa est, innumeris velut bullis composita cujus ampli pori cum aliis angustioribus microscopio detectis: in arboribus parcius est medulla quàm in aliis omnibus ferè plantis.

Radices plantarum sunt magis fibrosæ: plantæ quædam ipsas habent in summo suâ fastigio, ut vannus; fragariæ: quædam emittunt radices, sed vel rectâ descendunt, ut in mentâ, vel ad angulos rectos, ut in hederâ, in vite virgineâ. Quo in loco mirere summam Artificis providentiam: nam succus nutritius sursum pervenire non posset, nec debiles rami sustineri possent, nisi radices infixæ parietibus plantas illas alerent: quâ providentiâ factum etiam est ut vitis inniteretur

capreolis: ideò in trunco cucumeris & fragariæ prorumpunt radices.

Plantæ quædam ramos habent radici proximis, ut cupressus; quædam longius distantes, ut quercus: ramuli qui nascuntur vertice amputato vocantur furculi; cum furculus nondum est explicatus, primordium ejus dicitur gemma & oculus.

Cortex habet fibras: in fasciculos congeruntur, efficiunt rectiforme, & ideò relinquunt vacuola quæ globulis implent: globuli verò sunt quasi vesiculæ in orbem dispositæ: succus in fibris paulatim attollitur, & inde exundat in vesiculas: ideò cortex est magis oleosus.

Truncus constat iisdem partibus quibus cortex: fibræ in eo non sunt nisi corpus lignosum, de quo jam dictum est: vesiculæ horisontales non sunt nisi insertiones: præter eas trunci partes sunt alia vasa satis ampla quæ constant lamellis squammatim dispositis aut in spiræ modum. Vocantur à Malphigio Tracheæ, quia & distendi & premi & flecti facile possunt: ab eodem vocantur vasa spiralia, quia per ea plantarum respirationem fieri existimat: enimverò replentur aëre: quippè respiratio convenit pluribus rebus quàm vulgò existimatur, v. g. pulmones octodecim deprehenduntur in popilionibus: sed de respiratione postea dicetur.

quasi conchas in quibus continetur mel-
leus liquor , ut in ranunculo , cherefolio.

Stilus occupat centrum floris : semen
recondit cavitate suâ, instar uteri : stilo ca-
rent infœcundi flores; stilus plerumque or-
natur in quibus excrementum succi con-
ditur: cùm flores marcescunt, stili pars in-
ferior crescit; id demonstrat Malpighius
in amigdalibus quarum flos includit duas
vesiculas in cavitate suâ; utraque saccu-
lum continet : sacculi replentur succo con-
crescente , cùm ex eorum medio erumpit
vas umbilicale, quo planta eo penè modo
formatur in semine , quo pullus in ovo.

• Fructus coalescit ex membranâ , paren-
chymate, & partibus lignosis; in pomo nu-
merant fibras majores novemdecim, qua-
rum decem per culpam diffusæ desinunt
in oculum , reliquæ feruntur rectâ è pe-
dunculo in oculum , licet in itinere variæ
cum aliis commisceantur.

In pyris est pars petrosa eò durior quò
propior est oculo; resultat illa à variis
partibus succi nutritii præcipitatis & tar-
tareis; resultat à pluribus partibus salinis
eò ferè modo quo testa concrescit in pru-
nis , aut nucleus in malis persicis.

Succus fructuum sæpius est suavis, &
quò rotundiores sunt fructus, eò gratiores
sunt, ut in uvis.

Hæc de ortu & conformatione plan-

tarum breviter dicta sunt totius botanices fundamenta.

De Nutritione Plantarum.

Plantarum accretio primò pendet ab ipsis radicibus, quæ per terras diffusæ succos excipiunt : cum enim neque famis neque sitis motibus premantur plantæ, adeoque cum non possint accedere alimenta, natura prudens voluit plantas esse terræ infixas & habere radices sic diffusas : porro in radicibus plurima sunt ostiola, foraminula, pori, quæ sunt initia meatuum & ductuum insensilium qui sunt à radicibus ad plantarum extremitates diversimodè circumducti ; ostiola hæc non sunt in omnibus plantis ejusdem capacitatis & ejusdem configurationis, non modò in omnibus plantis, verùm etiam in eadem plantâ : plus dicam, unus & idem canalis ejusdem plantæ non est ubique eodem modo configuratus & ejusdem capacitatis : sic in animalibus intestina, ventriculus & œsophagus, sunt idem canalis, sed non ejusdem ubique configurationis & amplitudinis ; ambiuntur illi canales à partibus externis plantæ, quæ ipsos diversimodè premunt, diversimodè afficiunt.

Sunt inter canales commercia per insertiones : imò sunt in ipso trunco & ramis

formati canales qui originem ducunt, non à radicibus, sed à partibus trunci & ramorum : sic vasa excretoria , sic ductus quidam lymphatici à partibus glandulosis.

Præterea sunt in ipsâ terrâ spongiosâ plurimi succi plantarum nutritii & alimentitii facilè mobiles , diversarum configurationum diversarumque molecularum : porro his præsuppositis quæ certè à nemine negari possunt , dum radii solares minùs obliqui terras illustrent , tunc altius ipsas penetrant atque proinde succos commovent : qui huc & illuc feruntur per interiora terræ spongiosæ , succi offendunt in radices , & qui nanciscuntur poros sibi accomodatos, & suæ configurationi proportionatos , illi subeunt per ostiola radicum , atque per canales ascendunt ; quomodo ascendant dicetur postea.

Hinc in Physicâ generali cùm de accretione loquebar , dicebam plantas quarum pori sunt laxiores necnon meatus magis recti, faciliùs & citiùs virescere quàm plantas quarum pori sunt strictiores & magis impediti , quia nimirum vel minima agitatio sufficit in succis ut plantæ primi generis ipsos admittant ; requiritur autem vehementior impetus in succis ut per poros & meatus angustiores plantarum secundi generis perveniant ad extremitates , quia præterea succos crassiores priùs agi-

tat radius quàm magis insensiles : hi quippe paucioribus obijciuntur radiis , illi verò pluribus.

Hinc 2°. si succi non accomodati poris perveniant ad radices, repelluntur; aut si vehementiùs agitentur & irruentes vim faciant viamque sibi aperiant, tunc partium œconomiam turbant, atque inde destructio plerumque plantæ: quemadmodum si in ventriculo forent partes nec satis digestæ & percolatæ, nec accomodatæ ostiolis lactearum, quæ vim facerent in ostiola & viam sibi aperirent, certè turbarent illæ œconomiam partium organicarum quæ nutritioni inserviunt.

Hinc 3°. si succi sint vel exiliores, vel agitati vehementiùs, subeunt quidem poros & meatus, sed volatiles nimis vix in plantâ retinentur, unde aquis aspergitur terra circà juniores plantas & herbas, ut retardetur impetus succorum, ut conglutinentur & cohæſionem aliquam inter se teneant.

Hinc 4°. si plantæ sint in terris in quibus non sunt succi proportionati ad formandas plantæ partes, sive truncum, sive ramos, sive folia, sive fructus, in quibus sunt succi aut tardiùs, aut vehementiùs agitati, plantæ latæ non sunt, non sunt feraces, florigeræ, neque maturi sunt fructus: quapropter unaquæque ter-

ra suas habet plantas sibi proprias, suos flores, suos fructus; nec enim fert omnia tellus eadem.

Difficultas est quomodo ascendant succi in plantis.

Plures sunt mechanicæ rationes quibus perficiatur ascensus ille; hæc verò si seorsim spectatæ non sufficiant, conjunctæ simul hoc effectum consequentur.

1^a. Ratio hæc est: pars plantæ eò medullosior est quò propior est apici: quò medullosior est, eò pori sunt ampliores & capaciores: igitur succus semel agitato & ingressus per ostiola radicum moveri debet versùs illam partem quâ minor est resistentiâ, ubi pori sunt ampliores & capaciores: ergo succus debet ascendere.

2^a. Sic habet: calore solis per diem rarefit aër, qui multus est in extremitatibus plantæ: porro aëre rarefacto, debet fieri motus succorum in partem superiorem, ut patet exemplo maximè accommodato: accipe canalem vitreum plusquàm capillarem, in cujus extremo globulus est vitreus, concavus, communicans cùm canali: intrâ manus calidiores pone globum, ut rarefiat aër, tuncque canalem aquis immerge, aqua ascendet usque ad globum: quo certè persuadetur, aëre rarefacto in fructibus, foliis, gemmis, ramis, trunco, succos nutritios debere ascendere à radicibus,

A a iij

quia non ità comprimuntur in illis partibus quàm in radicibus, in quibus aër inclusus, tum in fibris, tum in vesiculis prope radices elaterio suo hunc ascensum urget.

3^a. Est quia fibræ lignæ turgescunt succis, sicque comprimunt eos qui in canalibus positi sunt à parte inferiori, atque faciunt ut succi in ventriculos seu vesiculas refluant.

Quæstio est utrùm succus in plantis circulet sicut sanguis cum humoribus circulat in animalibus.

Recentiores non modò succorum circuitum in animalibus probant, sed etiam in plantis esse contendunt: tum quia propter analogiam partium organicarum nutritioni inservientium tam in plantis quàm in animalibus id evincere se putant: nam, ut antea vidimus, sunt canales succorum, sunt receptacula, sunt ventriculi, vesiculæ, sunt canalium insertiores, id est, sunt canales qui deferant ab uno in alium: sunt glandulæ ad quas canales deferunt & succos & excrementa, sunt ductus excretorii ut excrementa purgentur, sunt tracheæ, vasa spiralia, in quibus est aër qui aliquando dilatatur; unde canales comprimuntur; qui aliquando comprimitur, ita ut respiratio sit in plantis, nam à vasibus illis spirabilibus inspiratur aër & expiratur: ergo circuit in plantis succus.

Et certè succus debet dissolvi, misceri, percolari; requiritur verò circulatio ut melius dissolvatur, percoletur; debent esse lymphatici ductus qui succos fluidiores faciant & benè temperent.

Denique si non esset necessaria circulatio, planta avulsa citò non exsiccaretur, & tabesceret: sunt enim plurima succorum receptacula in ipsius poris; tamen tabescit citò, ex eo videlicet quòd succus non sit rectè paratus & percolatus: ergo debet admitti succorum circuitus in plantis, ut datur sanguinis circuitus in animalibus.

Quanquam hoc non ità certò in plantis constat quàm in animalibus, neque audem asserere circuitum hunc esse omninò similem, fieri v. g. ab apice plantæ ad apicem; neque ullâ ratione physicâ, ullo experimento demonstrare possem sic absolvi circuitum hunc; sit fortè ab unâ parte ad aliam: quod certum est in hac occasione & extra difficultatem positum illud est, succum magis defæcatum fieri & purum dum sic transit à radicibus ad caput: hinc si decorticetur arbor, vix fiet nutritio: hinc si plantas foliis nudaveris, v. g. vitem, nunquam uvæ maturescunt: ideò folia ipsa sunt vasa in quibus præparantur succi, sunt quasi plantarum ventriculi in quibus excoquantur succi, sunt quasi pulmones in quibus refrigerantur rore, pluviis.

A a iv

Dices : Ut possit perfici circuitus succorum in animalibus, sunt in venis valvulae permittentes sanguini liberum transitum à partibus ad cor, & impediens ne sanguis remeet aut refluat versùs partes : sed eadem valvulae non sunt in plantis, ergo impossibilis est succorum circuitus.

Concessâ Majore, dist. Min. & est aliquid quod suppleat valvularum vices, C. & nihil est quod suppleat vices valvularum, N. scilicet ipsa fibrarum dispositio facit ut canales diversimodè comprimantur, adeoque fibrae possunt promoveri modò descensu, modò assensu succorum.

De Viribus Plantarum.

Argumentum istud ad Medicos præsertim pertinet, & in eo excolendo & versando diligentius debent incumbere ; sunt enim in plantis, vires mirabiles, tum ad recuperandam, tum ad conservandam sanitatem, ut omnes fatentur.

Sunt aliquando formaliter actu in ipsis plantis corpora quibus agunt ; v. g. oleum est actu in plerisque, in plerisque est resina ; &c. Plantæ quædam præparari debent ut suas exerant vires, nimirum aut attritu partium, aut fermentatione, aut infusione aut commixtione, vel cum aliis plantis, vel cum corporibus : hinc granum Kermes

mixtum aquæ forti diu & sensibilibiter tumultuatur.

Ex plantis quædam calefaciunt & extenuant, præsertim illæ quæ sulphura continent; quædam refrigerant, ut lactuca, cichorium, &c.

De Morbis & Interitu Plantarum.

Est rubigo quædam in leguminibus, frugibus, vitibus, & præsertim in frumentis, quæ oritur à roscido quodam & acri humore qui fibras divellit & interiorem substantiam plantarum corrumpit.

Est morbus alter qui dicitur roratio; fit dum nimia imbris copia vitium flores excutuntur.

Est uredo seu ustilago, sive carbunculario: carbunculare, inquit Plinius, vites dicuntur, ut quodam uredinis carbone exustæ: porro vites exuri creduntur cum humor roscidus gelidâ nocte in vitis gemmâ constringitur, vel cum nimio solis ardore racemorum fibræ tenuiores torrentur.

Est vermiculatio, infesta nimirum in arbores vermiculorum irruptio: huic præsertim subjacent arbores quæ suaves fructus gerunt, ut pyrus, malus, nam acres fructus, si oleam exceperis, huic malo non sunt obnoxii.

Est plantarum scabies, est impetigo, est defluvium, est decoctio. Hi verò morbi variis modis sanati possunt, de quibus lege Botanicos.

DE BRUTIS ANIMANTIBUS.

Vastissimum est istud disputationis argumentum de belluis; tot enim sunt belluarum species ut superent numero individua humana: quomodò ergo exponi posset physicè quòd nequidem numerari potest: quamobrem generaliora duntaxat attingam, ex quibus vel ingeniosus possit respondere quæstionibus specialibus quæ proponi possunt: præterea proportio quædam est inter corpus humanum & corpus belluinum: sunt enim membra quædam homogenea; poterit idem homo, factâ comparatione, quæ sunt unius ad alterum transferre. Itaque non describam eò loci mechanicam structuram corporis belluini; sufficiat humanam descripsisse.

Quid sint Bellua.

Omnes ad unum Philosophi animam belluis inesse docent; imò vel ipsi Cartesiani dicunt videre belluas, audire &c. dicunt ipsas esse tristes, lætas &c. neque tamen existimes Philosophos illos ad-

mittere in belluis ipsos sensus intimos, qui sunt in nobis. Tanta est æquivocatio in hâc voce *anima*, ut, licet vocibus sint concordēs, opinionibus tamen toto cœlo differant.

Gassendus & Cartesius, Recentiorum Duces, contendunt nullam esse in belluis substantiam præter materiam certo modo configuratam; sed Cartesius negat belluas propriè sentire & vivere, docet ipsas non esse nisi machinas naturales & automata à Deo, sapientissimo Conditore, fabrefacta; Gassendus autem vult belluas propriè sentire, imò vult eas ratione saltem imperfectâ esse præditas.

Peripatetici docebant pariter cum Gassendo sentire belluas; sed præter materiam organifatam postulabant formam substantialem seu animam sentientem, quæ neque erat corpus, neque spiritus, neque modificatio utriusque, sed erat substantia media inter corpus & spiritum: hanc definiere nunquam, de hâc tamen plurimas instituere quæstiones.

Sententia Cartesii ortum duxit ex principiis quæ proposuerat in *Metaphysicâ* suâ: extensio corpus est, cogitatio spiritus est: igitur substantia cogitans est spiritus: substantia sentiens est substantia cogitans: ergo est spiritus; spiritus autem immortalis est, libertatis capax, proin-

deque virtutis & vitii, meriti & demeriti, adeoque beatitudinis æternæ: Hæc Cartesius; sed quid tum? ergo vel belluæ sunt automata quæ sensationibus & cogitationibus quibuscumque destituta sunt, vel anima belluarum immortalis est capax Dei cognoscendi & amandi, capax beatitudinis. Repugnabat fidei membrum istud, noluit ipsum admittere Cartesius: maluit igitur primum assumere, sicque crudeliori calamo belluas omnes vitâ sensuque orbatas esse iussit.

Dum primum audita est hæc doctrina, non modò mulierculæ animalium domesticorum assiduæ cultrices, non modò pastores ovium, Coqui & alii homines infurrexerunt adversus illam, sed omnes ferè Philosophi, imò timuerunt ne tandem foret periculosa in fide, ne homines attendentes ad hæc belluarum opera quæ sine animâ fieri possunt, crederent & sua fieri posse sine animâ: sed, ut fatear quod res est, nihil est timendum à Cartesii doctrinâ contrâ fidem: ipse, ut fidei consuleret, in hanc sententiam descendit, & ex aliâ parte constantissimè docet cogitationem arguere essentialiter spiritum: quilibet autem homo intimo conscientiæ sensu experitur se cogitare; ergo se habere spiritum existimabit, si Cartesii doctrinam sequatur, quidquid aliud deprehendat in belluis. His positis, sit

PRIMA PROPOSITIO.

Si nihil sit in belluis præter materiam certo modo organisatam, belluæ nullatenus cogitant, non sunt nisi machinæ naturales & automata.

Hæc propositio est contrà omnes Epicureos, qui existimant cogitationem non arguere substantiam à materiâ diversam: porrò probatum est in *Metaphysicâ* cogitationem esse non posse à materiâ quibilibet modificationibus affectâ: ergo si in belluis nihil sit præter materiam organisatam, belluæ non cogitant & rectè dicuntur machinæ naturales.

SECUNDA PROPOSITIO.

Deus potuit & potest facere ut belluæ quæ jam sunt non sint nisi mera automata.

Pr. Ea enim est potentia Conditoris sapientissimi ut belluas eâ arte confecerit, eâ mechanicâ structurâ ornaverit quæ absolute sufficiat, si voluerit ipse ad explicandas omnes & singulas functiones exteriores & sensiles belluarum, v. g. quòd oculos aperiant, moveant, aures arrigant, cibos dentibus conterant, modò

fugiant, modò accedant, clamitent, alias producant belluas: nam ad hoc satis est quòd omnes illæ functiones exteriores non sint nili motus cum partibus certo modo configuratis conjuncti. Verum consequens: hinc quemadmodum plantæ suas functiones habent ex solâ mechanicâ structurâ suarum partium, ità absolutè belluæ possunt habere suas functiones ex organicâ suppellectile. Quamobrem formatò humano corpore à Deo, si non insufflasset Deus in faciem ejus spiritum vitæ, id est, si non illi univisset animam, corpus illud habuisset functiones exteriores illas: v. g. fuisset in corde motus, in pulmonibus respiratio, per venas & arterias circuitus sanguinis, fuisset motus oculorum, pedum, manuum, fuisset vita vegetans, fuisset & sentiens quoad functiones exteriores quamdiu fuisset pabulum refarciens quod transpiratione deperditur: igitur belluæ divinitus possunt esse mera automata.

TERTIA PROPOSITIO.

Probabilius est belluas sentire, v. g. fame & siti urgeri, gaudio & tristitiâ affici, videre, audire &c. quàm esse meras machinas & automata.

Pr. Nam hoc probabilius est si sint in belluis ipsis ea motiva quibus unus-

quisque homo ductus judicat alios à se homines sentire: atqui sunt in belluis præsertim perfectis eadem motiva quibus unusquisque homo ductus judicat alios à se homines sentire: nam eatenus v. g. judico alios à me homines sentire, quatenus in aliis hominibus deprehendo eadem sensationum organa quæ in me sunt, quatenus in aliis hominibus video motus illos qui solent in me & prævenire & subsequi meas sensationes: atqui video in belluis eadem sensationum organa, aures, oculos, nasum, linguam, cor, cerebrum aliasque partes organicas mearum sensationum. Deinde video in illis motus qui solent & prævenire & subsequi meas sensationes. Video eadem & majora forsan sensationum indicia, ut fateri debent omnes homines: quapropter & ipsi qui in musæo vel in scholâ suâ multas adduxere rationes ut & sibi & aliis persuaderent non sentire belluas, in societatem reversi, ex solo felis, canis, phisaci, simiæ, intuitu, aliter judicant nec possunt dissentire à communi hominum sententiâ. Quis dum videt canem præ gaudio exultantem, variis blanditiis hero gratulantem, jam spectat ipsum ut meram machinam quæ nullo sensu tangatur? Quin ausim dicere esse sensationum meliora specimina in belluis quàm in nonnullis hominibus.

Unde asserere non dubito efficaciores in ipsis sensus esse quàm in nobis, cujus asserti ratio proponetur infrà, in quantum sensus in nobis debilitantur & franguntur attentione, reflexione, perceptionibus &c.

Et certè, maximè probabile est belluas fame & siti urgeri: nam hoc est discrimen inter plantas ex unâ parte, & animalia ex alterâ, quòd alimenta accedant ad plantas: unde quia fame & siti carebant, nec proinde poterant ad alimenta accedere, ideò providus Auctor naturæ statuit fore ut plantæ haberent radices in quibus ostiola meatuum & canalium nutritioni servientium, radices, inquam, dispersas per terræ viscera: at animalia ad alimenta accedunt, nec succi nutritii sponte veniunt in os & stomachum: hinc vel in aëre medio volitant, vel in aquis natant, vel gradiuntur variis modis super terram ut venentur, rapiant & conquirant alimenta. Porro si non sit in belluis sensus famis & sitis, non satis facilè explicatur quomodò tam opportunè ad alimenta accedant; hoc verò posito sensu, admonitæ belluæ commodè convertuntur ad alimenta sua, quibus vita vegetativa perficitur, id est, nutritio, accretio, generatio absolvuntur: ergo maximè probabile est sentire belluas.

QUARTA PROPOSITIO.

Est igitur in belluis substantia præter materiam quæ sit sentiens, & dici potest belluarum anima.

Pr. Nam ad hoc satis est quòd sensatio non possit venire à materiâ quibuscumque modificationibus instructâ: atqui sensatio venire non potest à materiâ quibuscumque instructâ modificationibus, id est, donatâ quâcumque partium configuratione, texturâ, situ, quâcumque quantitate motûs & determinatione agitâtâ: nam ad hoc satis est quòd materia non habeat à se & motus illos & configurationes: atqui materia à se non habet motus illos & configurationes: ergo est in belluis substantia aliqua à materiâ diversa.

OBJECTIONUM SOLUTIO.

Objicies 1^o. Ex Scripturâ Sacrà, anima belluæ sanguis ejus: hinc Judæis erat lege interdictum ne manducarent suffocatum, ne manducarent sanguinem belluarum, ne videlicet manducarent ipsam animam.

Explico verba Scripturæ: anima belluæ sanguis ejus eo, sensu quòd sanguis belluæ sit præcipuum organum quo vita conser-

vatur, C. quasi reverà nihil sit præter materiam certo modo dispositam, N. quamobrem lege interdictum erat Judæis ne manducarent sanguinem belluarum, ne videlicet primi homines ferociores fierent, forentque sanguinis nimis avidi potatores: sanguis enim sic potus argumentum est crudelitatis & ferociæ: hinc ut mitesceret homo lex facta fuerat: hinc vel nostris temporibus, qui vorant carnes, quarum sanguis adhuc est crudus, nec recoctus, videntur nobis temperamenti esse ferocioris & quasi antropophagi: nimirum sanguis ille cum nostro maximè analogus est, atque discrimen ferè nullum: hinc belluæ aliarum voraces spectantur à nobis ut crudeliiores, eas odio persequimur, & illæ ipsæ nostræ vitæ plerumque insidiantur.

Objicies 2°. Si belluæ sentiant, crudelitas est in hominibus dum illas malè habent & infontes necant: nam quâ justitiâ, quæso, dolor & tristitia excitantur in illis animalibus nullo crimine fontibus.

Dist. Si belluæ non sint in nostros usus, si dominium à Deo non acceperimus in ipsas, C. At factæ sunt ad nostros usus, dominium in ipsas accepimus; non est ergo crudelitas quòd ad eosdem usus convertantur: enimverò, ut dicetur postea, belluæ non percipiunt, non sunt proinde

liberæ, non sunt capaces finis superioris, neque distrahuntur à finibus suis. Porro hoc posito, crudelitas non est si interficiantur à nobis; crudelitas foret si esse possent alterius finis capaces, si possent aliquandò assurgere ad perceptiones, ut infantes, qui licet merè sentiant in pueritiâ suâ tamen assurgunt sensim ad functiones nobiliores.

Quid sit Anima belluarum.

Non sufficit dixisse ipsam esse substantiam à corpore diversam; sed præterea statui debet quid reverà sit.

Peripatetici eam dicunt formam substantialem materialem, quæ neque materia sit, neque spiritus.

Alii hanc dicunt spiritum imminutum qui reverà non sit ejusdem perfectionis cum humano spiritu, sed tamen propiùs ad ipsum accedat.

Postea disputant inter se de ipsius origine & interitu.

Nonnulli solâ creatione produci posse & solâ annihilatione destrui existimant: plures contendunt ipsam præexistere in sinu materiæ, non quidem actu, sed potentiâ: atque proinde ex eo sinu educi posse educatione, non quidem locali, sed productivâ; atque interire ut primum orga-

na sensationibus inservire non possunt.

In hisce omnibus, de nominibus præfertim disputant, nec post tam longas dissertationes adhuc constat quid sit præcisè hæc anima belluarum: ego verò id unum assequi conabor ut clarè innotescat ipsius essentia; quo verò nomine vocari debeat parùm curabo.

Quia substantia est, ex hoc solâ creatione potest produci, & solâ annihilatione potest destitui: illa est à corpore diversa, est entitativè una, id est, caret partibus quæ substantiæ sint; proindeque est indivisibilis, est substantialiter tota ubi est tota in singulis cui respondet loci partibus, habetque partes extensionis extrâ partes extensionis. Denique cum sint in nobis tum intimi sensus tum perceptiones, hæc substantia non habet potentiam percipiendi, sed habet duntaxat potentiam sentiendi, quas sensationes non patitur nisi virtute unionis substantialis quæ est inter ipsam & corpus belluinum: ex eo quòd careat perceptionibus, non est capax libertatis, Religionis &c. Quæ ut demonstrentur, sit

PRIMA PROPOSITIO.

Anima belluarum solâ creatione produci potest & solâ annihilatione destrui.

Pr. Nam anima belluarum substantia est: porro substantia producibilis solâ creatione produci potest, & solâ annihilatione destrui: enimverò productio vel est rei vel modi, seu vel est substantiæ vel accidentis: productio rei dicitur creatio, productio modi è subiecto præexistente dicitureductio: ergo anima belluarum solâ creatione produci potest, & solâ annihilatione destrui.

Itaque à solo Deo producitur & à solo Deo destruitur, quia solus Deus creare potest.

Difficultas est utrùm omnes animæ belluarum creatæ fuerint à Deo in primâ mundi genesi, & utrùm infusæ fuerint in primo individuo, vel utrùm in tempore à Deo creentur ad talem dispositionem mechanicam quæ de novo accidit; quam difficultatem nullâ ratione metaphysicâ tollere valeo: non desunt qui asserant sibi probabile videri primùm à Deo productas fuisse omnes animas quæ jam sunt in brutis animantibus; unde cum destruitur corpus belluæ, putà canis,

anima ipsius non ideò, secundum ipsos, annihilatur, sed unitur substantialiter alteri corpori organifato: hinc crudelitas non est, inquiunt, dum interficitur bellua: quapropter metempsychosim quam damnant dum agitur de hominibus, sumunt dum agitur de brutis animantibus, sicque manere arbitrantur in animabus illis aliquam perennitatem conservationis, animamque canis in hoc vortice posse fieri animam alterius canis, sive in eodem vortice, sive in lunari, sive in alio. Sed hæc omnia gravis supposita sunt.

OBJECTIONUM SOLUTIO.

Objicies 10. Illud non est substantia quod non potest existere seorsim ab alio, nam substantia est ens per se subsistens: atqui anima belluarum non potest seorsim existere à corpore belluino: ergo &c.

Dist. maj. Seorsim ab alio tanquam subiecto inhæfionis, C. tanquam à comparte essentialiter requisitâ ut habeat functiones sine quibus existere nequit, N. Porro anima belluarum non potest quidem existere seorsim à corpore belluino, quia corpus belluinum est compars requisita essentialiter ut suas habeat functiones sine quibus existere nequit: nam ex hypothesi quod existat, cogitare debet; cogitationes

ipsius sunt sensationes, sunt animi affectus: porro functiones illas habere nequit si non sint organa corporea: ergo illis destructis, aut aliis uniri debet, aut debet annihilari: at non requirit corpus belluinum tanquam subjectum inhæſionis, tanquam modus rem, sed tanquam substantia substantiam.

Obicies 20. in cap. 10. Geneseos non videtur creatam à Deo fuisse animam belluarum; ipsarum productio aquæ, aëri, terræ tribuitur, quorum corporum partes hâc vel illâ determinatione motûs agitatæ possunt exprimere belluam: at verò ubi de homine agitur, fit mentio creationis animæ: ergo signum est animas belluarum non esse nisi materiæ partes certo modo dispositas, quomodo lux & alia corpora certo modo disposita sunt.

Fateor in Scripturâ Sacrà mentionem non fieri animæ belluarum, & Moyſen loqui de solâ animæ rationalis creatione, nec inde tamen probatur animam belluarum non fuisse creatam: videlicet necesse non fuit creationem istam recitare; non potuit Moyſes Deum sic loquentem inducere: faciamus belluam ad imaginem nostram, quia per hanc animam belluæ non sunt ad imaginem & similitudinem Dei; per hanc animam neque cognoscere Deum, neque amare possunt; non sunt superio-

res re quavis creatâ , ut probabitur ; nec etiam homo ratione suarum sensationum, quibus assimilatus est jumentis , sed ratione suarum perceptionum, quibus solo Deo minor est ; re quâvis creatâ superior est : ergo ex illo silentio concludi non debet animam belluarum non fuisse creatam : punctum hoc reliquit Deus disputationibus hominum , neque enim curiosa, sed utilia docet in suis scripturis.

SECUNDA PROPOSITIO.

Anima belluarum est entitativè una, id est, caret partibus quæ substantia sint.

Pr. Nam differt à materiâ : porro gradus differentialis materiæ est pluralitas partium quæ substantiæ sint : ergo , &c.

At , inquires , est ergo spiritus.

Ipsam appella ut volueris : dummodò constet de re , non disputabo de nomine : ipsam appellabo cum Peripateticis formam substantialem materialem, modò non sit ipsa materia , modò dicatur materialis eo sensu quòd non possit existere quin uniatur substantialiter corpori organifato : dicetur cum alijs spiritus, si modò fateri velint spiritus illos à corporibus diversos non posse tamen existere sine corporibus , dummodò agnoscant spiritus illos non esse
capaces

capaces perceptionis , reflexionis , attentionis , capaces examinis , iudicii , ratiocinii , methodi & aliarum functionum quæ sunt partis superioris , proindeque non esse capaces liberi arbitrii , virtutis & vitii , meriti & demeriti , & æternæ beatitudinis ; hæc, inquam , si admittantur , de nominibus parum sollicitus, aliorum voces assumam.

Dices : anima vermis , viperæ , anguillæ , divisibilis est : ergo partes habet plures quæ substantiæ sint.

10. Non ità certò pronuntio animam esse in vermibus & in illis insectis in quibus non deprehenduntur organa propria sensationum, putà oculi, aures, nasus, quàm illud pronuntio in aliis.

20. Ex hypothesi quòd sit anima in vermibus , dici potest quod sint totidem animæ quot sunt nodi, proindeque anima non dividitur.

30. Dici potest unicam esse animam in quolibet illorum animalium, sed contendere potest motum superstitem divisioni esse à spiritibus animalibus qui discurrunt per canales apertos.

TERTIA PROPOSITIO.

Anima belluarum non est capax representationum.

Pr. Nam anima belluarum specie differt ab anima rationali : porro spiritus specie non differunt nisi quatenus unus habet quandam cogitandi potentiam, quæ caret alter : porro si in belluis foret capacitas representationum, nulla esset potentia in animâ rationali quæ in ipsis non foret, & nulla foret in ipsis quæ non esset in animâ rationali : ergo non differunt specie.

Et certè si foret in animâ belluarum potentia capax representationum, anima belluarum posset ipsa insensilia & metaphysica cognoscere, ipsum Deum, ipsum amare, ipsi servire, capaces forent belluæ Religionis, libertatis, meriti, & demeriti, beatitudinis, animæ belluarum possent existere seorsim à corporibus : nam toties substantia cogitans potest existere seorsim à corporibus, quoties potest habere functiones aliquas quæ possunt esse independentes ab organis corporeis : atqui perceptiones possunt esse independentes ab organis corporeis : ergo si anima belluarum capax esset representationum, posset existere seor-

sím à corporibus. Hæc consequentia sunt contra fidem & rationem : ergo belluæ non sunt repræsentationum capaces.

Denique non debet admitti in belluis potentia functionum quarum belluæ nulla dant specimina : atqui belluæ nulla dant specimina repræsentationum , sed tantum sensationum : nec enim ex belluarum functionibus possumus colligere ab ipsis concipi quid sit finis, quid sint media, quid sit proportio mediorum ad finem, uno verbo, quid sint entia Metaphysicæ : ergo non est in belluis repræsentationum capacitas.

OBJECTIONUM SOLUTIO.

Objicies 10. Grátis fingitur substantia capax sensationum , quæ non sit capax repræsentationum.

Pr. ant. Nam spiritus possunt inter se specie differre : atqui non possunt specie differre inter se nisi quatenus illis convenit potentia specialis cogitandi quæ aliis non convenit : igitur potest supponi substantia sentiens quæ non sit capax repræsentationum.

Et certè tam supponi potest substantia sensationum capax quæ non sit capax repræsentationum & idearum , quàm datur substantia capax repræsentationum & idearum quæ non est capax motuum appetitûs utriusque tum naturalis tum sentientis ,

B b ij

capax sensationum de qualitatibus patheticis: atqui datur reverà substantia capax representationum & idearum, quæ non est capax motuum appetitûs utriusque tum naturalis, tum sentientis putà, famis, sitis, doloris, tristitiæ, motûs, &c. quæ non est capax sensationum, v.g. de coloribus, sonis, odoribus, putà Deus ipse: ergo quidni detur substantia sentiens quæ non sit capax representationum & idearum?

Denique illud gratis non fingitur quod phœnomona persuadent: atqui phœnomena persuadent animam belluarum esse sensationum capacem, nec esse capacem representationum & idearum: videntur enim belluæ agere ex necessitate, ut postea demonstrabitur: ergo, &c.

Objicies 20. Belluæ deliberant, ut probatur exemplo canis, qui positus in trivio videtur hærere dubius quam viam assumat ut herum insequatur: ergo belluæ sunt capaces idearum.

N. ant. Videlicet nullatenùs deliberant belluæ, nullatenùs deliberat canis cùm ex motu merè machinali hæret veluti dubius in trivio quam assumat viam; enimverò de solâ sensatione agitur, in hâc occasione: neque enim istud tam certissimè assequeretur & tam infallibiliter si ex ratiocinio ageret: scilicet in illis occasionibus, perceptio & deliberatio plus nocerent quàm adjurarent; quod ut intelligatur,

Observandum est in nobis esse impressiones quæ sunt intimi sensus, putà motus appetitus utriusque, putà sensationes & impressiones alias quæ sunt repræsentationes: his anima nostra attingit objecta metaphysica & insensilia; illis sensilia & materialia: inde propensiones oppositæ in nobis, inde diversè rapimur & trahimur, mens aliud suadet, aliud cupido: inde opposita judicia, inde inconstantia & vacillatio: inde sensatio debilitat ideas, ideæ debilitant sensationes: inde non agimus semper eodem modo, neque constanti tenore; inde varii fines, inde viæ diversæ assumuntur ad fines consequendos: at in nostro systemate belluæ capaces non sunt idearum, sed duntaxat impressionum quæ sunt intimi sensus: inde rapiuntur belluæ semper sine ullâ oppositione, eodem tenore aguntur, eodem ordine constantissimo: inde assumunt easdem vias & eosdem assequuntur fines; hinc v. g. hirundines nidos suos conficiunt eodem modo in iisdem locis, in iisdem temporibus: inde nutritioni, generationi dant operam definitis temporum interval-
lis, quæ quidem non evenirent si ex cognitione agerent: enimverò si hæc in bel-
luis ortum ducerent ex deliberatione & attentione, perfectior foret sanè in ipsis cognitio, perfectior foret rationis usus

quàm in hominibus : hinc quæ vitia sunt in nobis, arguunt tamen perfectiorem & capaciorem esse animam rationalem quàm sit anima belluarum.

Itaque eaténus canis hæret veluti dubius, quia cùm nares ejus afficiantur indiscriminatim corpusculis ab hero relictis, tunc non est sensatio, non est relatio quæ ipsum determinet ad hanc viam potius quàm ad illam, donec tandem excitatâ sensatione cum relatione rapiatur versùs talem viam : & hinc est quòd vix à scopo aberrat ; cùm autem aberrat à scopo, indè est quia nares ejus afficiuntur corpusculis eodem modo configuratis, motis & dispositis quæ sunt corpuscula ab hero manantia : sic canes venatici, feles, araneæ prædas suas insequuntur, determinantur quippe à corpusculis excitantibus sensationes quas consequuntur eadem propensiones & relationes quibus propensionibus determinantur partes sanguinis versùs hæc vel illa organa, ad eliciendos hos vel illos motus.

Mira igitur phænomena quæprehenduntur in belluis, arguunt ipsa proficisci ex eo quòd sentiant non verò cognoscant : nam cùm ex solis sensationibus agant, tutius & certiùs suos assequuntur fines, ex eo sensationes sunt fortiores & vividiores : hinc tutius redeunt ad suos nidos, etiam cùm longissimè absunt ab illis

aves; sic palumbes repetunt loca plusquam 50 leucis dissita : sic corvi ex locis remotissimis accurrunt ad cadavera, unde afficiuntur bruta his objectis quæ in nobis nullas excitant sensationes, quia nos variis impressionibus distrahimur & occupamur.

Objicies 3°. Illa percipiunt quæ assument media utiliora; atqui belluæ assument media utiliora, ut omnibus ferè experientis patet.

1°. N. Maj. quippe quòd assumantur media utiliora non est argumentum certissimum perceptionis & deliberationis in his quæ assument, sed illud sæpius est argumentum sapientiæ Conditoris, qui providas tulit leges quibus consuleret cujuslibet entis conservationi : sic arbores assument media utiliora, sic mineralia, sic metalia, ut nutrantur, conserventur : nemo tamen prudens dicat mineralibus, metallis & arboribus inesse vim quâ percipiant & deliberent.

2°. Dist. Maj. quæ assument utiliora media quorum utilitatem percipiunt, C. quia magis delectant, N. porro belluæ assument quidem media utiliora, sed eorum utilitatem non percipiunt, neque proportionem, neque finem, non ducuntur aut honestate, aut utilitate, eatenus assument illa quatenus magis delectant, atque ideò

solâ cupiditate, jucunditate, & impetu cæco feruntur & aguntur.

Hinc castor quem venatores insequuntur, sibi testes amputat, quod utile sibi est, scilicet ob id unum tanto ardore eum insequebatur olim venator, sed utilitatem hanc non cognovit : fit istud à castore, quia certo pruritu agitatæ partes sunt occasio sensationis, qualem experitur homo scabiosus, qui nullâ utilitate ductus laniat se ad sanguinem : sic hirundo dum conficit nidum suis pullis educandis, utilitate non ducitur ; voluit naturæ Auctor ut hoc tempore objecta illa delectarent hirundinem : igitur solâ jucunditate ducuntur belluæ, nec utilitatem percipiunt, licet assumant media utiliora.

Et certè si sensationes & relationes animæ sufficiant ut illa media utiliora assumantur, certè non debet inde colligi percipere belluas & deliberare : atqui motus utriusque appetitûs, sensationes, nec-non relationes sufficiunt ut assumantur media utiliora, imò certius assumuntur quàm si adessent perceptiones & deliberationes : v. g. Si quis inter dormiendum pulice pungatur, manum admovet ex solâ sensatione & relatione certius quàm si somno experrectus deliberaret ; inde somniantes ex solis sensationibus quædam præstant certius : ergo inde non sequitur percipere

belluas , quia tutius & certius aguntur.

Quapropter nec Deum cognoscere, nec amare possunt ipsique servire ; non sunt liberæ , non capaces virtutis & vitii : enimverò eatenus sumus nos superiores re quavis creatâ proindeque liberi : eatenus cognoscimus Deum & amamus, non quatenus sunt in nobis motus utriusque appetitus sensationes & relationes : videlicet per illas functiones rebus creatis adhæremus serviliter , cæco & brutali impetu regimur , sed quatenus sumus capaces perceptionis , quatenus sunt propensiones in nobis quæ consequuntur perceptiones : videlicet ratione perceptionum facti sumus ad imaginem & similitudinem Dei. Deus spiritus est & in spiritu adorandus est : ratione verò motuum utriusque appetitus & sensationum assimilamur jumentis , inde pars in homine duplex , superior seu rationalis, & inferior seu animalis.

QUARTA PROPOSITIO.

Sensus intimi & relationes in animâ belluarum sunt virtute unionis substantialis cum corpore belluino.

Pr. Nam ad hoc satis est quòd motus in partibus organicis belluini corporis sint

B b v

occasiones illorum sensuum & relationum, atque vicissim quod sensus & relationes sint occasiones cur motus communicentur, & mutantur determinationes in partibus organicis corporis belluini: atqui verum est consequens; neque enim aliter explicari posset quomodo anima belluarum agat in corpus belluinum, & vicissim quomodo corpus belluinum agat in animam belluarum; quod quidem magis planum fiet ex illis quæ dicta sunt à nobis de unione animæ quæ intercedit inter corpus nostrum & animam rationalem: ergo &c.

Quotuplex sit Anima belluarum.

Communis est apud Philosophos confessio varias belluarum esse species, canes, oves, asinos, equos, apros, corvos &c. Imò plurimi volunt varias esse equorum, asinorum, canum &c. unde animal irrationale seu brutum agnoscit infra se species varias. Hinc summâ diligentiam afferunt differentias divisivas animalis irrationalis & constitutivas illarum specierum: v. g. inquit, mugitivum constituit bovem, frindens constituit aprum, stridens constituit asinum, latrativum constituit canem, coaxans constituit ranam: sed hæc forsan minus accuratè dicta sunt;

nam, ut observatum est, corpora quatenus corpora inter se non differunt specie, si rigorosè & philosophicè loqui velimus: nempè species sunt essentia, essentia verò sunt immutabiles, neque una potest in aliam converti: substantia v. g. non potest fieri accidens, nec accidens substantia; spiritus non potest fieri corpus, nec corpus spiritus, & sic de aliis: at corpus potest in aliud converti, & hæc conversio quotidiana est: ergo, rigorosè & philosophicè loquendo, corpora inter se specie non differunt, proindeque si bellux specie differant non idè præcisè quia illarum corpora diversa sunt, quia alia sunt monocula, alia cornuta, alia alata, alia quadrupedalia, alia bipedalia &c.

Hinc ergo specie non differunt nisi sint in ipsis animæ quæ habeant partes sentiendi speciales quibus carent aliæ animæ: v. g. asinus specie non differt à bove nisi sit in asino potentia sentiendi quæ caret bos, vel nisi sit in bove potentia sentiendi quæ caret asinus, & sic de aliis.

Hinc mugitivum non est differentia constitutiva bovis tanquam speciei, & latrativum non est differentia constitutiva canis tanquam alterius speciei, & sic de cæteris; si duntaxat significantur varii animalium soni, quemadmodum varia hominum idiomata non inducunt species

hominum diversas: ergo neque illæ præcisè inducunt varias brutorum species.

Quapropter hæc omnia quæ afferuntur ab illis Philosophis non sunt differentiæ constitutivæ specierum, unde hoc unum quæri potest, utrùm diversa harmonia partium in corporibus belluinis indicet & denotet diversitatem specierum, utrùm indicet in brutis animantibus esse potentias sentiendi diversas.

Hoc æertum mihi videtur harmoniam hanc diversam non posse infallibiliter denotare diversitatem specierum in brutis, quia absolutè possunt esse eadem potentia sentiendi cum diversis illis organis, seu potius cum organis diversimodè configuratis; solus naturæ Conditor potest hæc intelligere, quia nemo fuit consiliarius ejus, nemo ingressus est in ipsius potentias: hoc unum ergo inquire potest, utrùm probabiliter indicent specierum diversitatem harmoniæ diversæ in belluis.

Huic quæstioni ut respondeam, illud certum supponitur, corpus nostrum indicare ipsius animæ excellentiam & præstantiam: sic factum videlicet ut os homini sublime dederit, cælumque tueri jussert Creator & arrectos ad sydera tollere vultus, sic factum ut faciliùs possit semetipsum juvare & animalia cætera superare.

His positis, duplex distingui potest brutorum species. Alia quippè habent omnia sensationum organa quæ in nobis sunt, alia verò carent hisce organis ut vermes: porrò existimo alias esse potentias sentiendi in iis qui carent suis organis perfectis, alias in iis quæ iisdem organis prædita sunt.

Anatomica partium dispositio constabit in animalibus perfectis ex humanâ.

Inter animalia quædam sunt minora & vix sensilia, ideò vulgò dicuntur insecta: porrò ex insectis quædam sunt animalia perfecta, id est, quædam sunt quæ habent omnia organa ad sensationes nostras requisita: porrò agendum de insectis.

DE INSECTIS.

Physicus illorum animalculorum considerationem non aspernatur. Excitabitur quippè ad omnipotentis Conditoris vim & industriam totis viribus laudandam, cum tam multiplices mechanicæ vias in exiguitate partium adeò magnificas mirabitur: porrò ut illam partium conformationem explicet & varias metamorphoses exponat, debet insecta in quatuor veluti classes distinguere. In primâ classe sunt animalcula quæ perfecta excluduntur ex ovo materno: in secundâ quæ ex ovis

nascuntur imperfecta, ut vermiculi, sed in progressu magis ac magis expoliuntur donec in Nymphas abeunt: in tertiâ sunt ea quorum vermiculi ita ovis excluduntur imperfecti ut pedes aut crura non appareant: in quartâ denique bombyx collocatur.

De primâ Insectorum Classe.

In eo genere sunt araneæ, quarum variae sunt species: una est quæ dicitur longipes, cujus effigies reperitur in Micrographiâ Domini *Hook*; hic duos habet oculos cæruleos, quorum cornea tunica est prominula, pupilla nigricat, oculi huc-illuc torquentur, muscas corripit & vulnerat per crurum forcipes.

Est aliud aranearum genus quod uno saltu in prædam involat: hujus in venando artificium lege in Epistolâ Clarissimi *Hevelin* ad Illustrissimum *Hook*, eâ sanè elegantissimâ & plenâ deliciarum; ut autem uno saltu in prædam ruat, hæc aranea uno filo suspenditur, artificium quo utitur adjuvatur oculis octo acutissimis. Aliæ sunt in ædibus domesticis, quæ pariter habent oculos octo, telas pertexunt & involant in muscas cum in casces incidere.

Araneæ quædam ova secum vehunt in-

voluta membranâ quam agglutinant, si divulsa sit.

In eâdem classe occurrunt quædam animalcula dicta gallicè *Mitte*: sunt veluti casei fordes: porro non perspiciuntur nisi ope microscopii: habent ova quæ vix sunt pars hujusce animalculi quadringentesima: jam verò cum vix partem digiti centesimam unumquodque suâ exequet profunditate, millies mille hujus generis animalcula vix implebunt digiti cubici cavitatem: sic Clarissimus *Hook*.

Quædam est in ipsis varietas ratione figuræ & coloris; plerumque tamen caput est oblongum, thorax est angustus, venter major, octo crura, crurum sunt articuli, sunt unguiculi crurum, sunt pili & exiles maculæ in cuti.

In eâdem classe sunt limaces: hi verò excrementa per cervicem egerunt, quo in loco sunt & generationis & respirationis organa. Dentes limacis sunt instar cornu flexiles & continui.

Ad eandem classem revocantur pediculi, pulices, acari: ovum pediculi dicitur lens, in cujus medio conspicitur microscopio punctum diaphanum, quod agitur motu diaстоles & sistoles, instar cordis; in illo puncto jacet animal. Caput pediculi in conicam penè formam tornatur, tamen aliquantulum ex utrâque parte

comprimitur, penè instar follium; ex ore egreditur corpus aculeatum quo lacerat cutim & sanguinem fugit: duos habet oculos ciliis ornatos qui eminent in summâ parte capitis, duo prælonga cornua, distincta variis articulationibus: corpus totum pellucet, venæ omnes candicant si sanguine sint destitutæ recens exsucto; at sanguis ille in ventrem demissus motu undulationis fluctuat; sex habet pedes: extrema desinunt in unguiculos, quibus velut digitis capillos arctè complectitur pectoris involucrum est veluti corneum, ventris autem est similis cuti: si satur sit vasa videntur numerosa & motus intestinorum observatur, præcipuè si sanguinem hauserit humanum, ex quo fit digestio citissimè, tuncque nigra excrementa citò ejicit; at verò si sit jejunos & famelicus, ex illis vasibus nihil observatur.

Structura pulicis diversa est: habet longa crura, quæ quidem complicat & subito distendit, hinc saltus magnus; duos habet oculos non invenustos, duo cornua, olfactus organum, articulationibus quatuor distincta. Inter cornua extat proboscis quâ cutim lacerat, venulas & arteriolas pertundit, ut sanguinem humanum exfugat. Os pulicis instar oris formicæ tornatum est, id est, instar forcipis.

Alia sunt in eâdem classe animalia, v. g.

ricini, qui vaccas & canes infestant : sunt canes aquatici ; eorum verò aliquandò tanta est in aquis stagnantibus copia, ut aqua in sanguinem versa videatur. *

De secundâ Insectorum Classe.

Illà ex ovis imperfecta sicut vermiculi nascuntur ; in exemplum sint perlæ, gallicæ (*des demoiselles*) ; earum species septemdecim numerantur : ova non sunt ovis piscium absimilia, disposita ex utrâque parte ventris infimi, effunduntur itidem in aquâ, ex iis scaturiunt vermiculi : ii paulatim adolescunt, donantur oculo duplici pro mole corporis amplo : instructi sunt sextuplici crure ; crus unumquodque dividitur in sex partes, extrema pedum desinunt in acutos unguiculos quibus instar forcipum arctè constringunt : venter distinctus est in decem annulos : tandem quâ parte pectus cum ventre conjungitur, quatuor erumpunt globuli alarum primordia in quibus alæ convolutæ sunt ut folia florum in gemmis : tum vermis egrêditur ex aquâ, repit in terram, pellem exuit, alas explicat, sicque ex vermiculo natante fit animal volatile quatuor alis magnâ celeritate penè ut hirundines huc illuc volitans ; vivit ex prædâ, dente duplici munitur, acriore morfu vulnerat.

In eâdem classe ponuntur à Domino *Hook* culices tum terrestres, tum aquatiles, ambo volantes, qui ore patulo alimentum in aquâ sumunt: quos idem Auctor servavit per tres hebdomadas in vase vitreo, cui aqua pluvialis affusa fuerat, & abiêre in culices.

In eâdem classè poni potest musca aquatilis quæ ephemera dicitur; viderur per solstitium æstivum vix per horas quinque; vivit tamen sub vermiculi formâ per triennium, antè delituit in fluminum ripis, ubi quoddam sibi accommodatum in limo apertavit foramen eò altius quò aqua depressior est. Ephemera moritur ubi ova sua profudit.

In eâdem classe poni possunt locustæ: earum alæ primò latent in quatuor veluti gemmis, sed postea in uno extremo expansæ, in alio complicatæ; denique expansæ omnes quarum agitatione sonum efficiunt stridulum; tres habent ventriculos; inde facilis digestio, proindeque voracitas.

* Huc revocari possunt grilli sylvestres & domestici, grillo talpæ, cicadæ, scarabei, aranæ aquatiles.

De tertiâ Insectorum Classe.

Complectitur animalia quorum vermiculi ovis excluduntur, ita imperfecti ut pedes aut crura non appareant: hæc autem ubi è gemmis uti teneri flores emergere, disrumpunt pellem, destituta motu nisi in caudâ: crura, alæ, antennæ postea augentur: in hac classe poni debent omnia apum genera: in domesticis apibus fœmina quæ rex est, habet ova & partes procreationi destinatas quibus unoquoque anno sex ovorum millia aut circiter profundit: inter eas sunt fuei, iners animalium genus, qui postquam propagationi suæ speciei servierunt ab ipsis apibus discernuntur: sunt præterea apes operariæ quæ mei conficiunt: earum rempublicam egregiè descripsit Ovidius, quæ physicè expendit doctissimus Svvamerdam.

Sunt proinde in eadem classe apes marinæ, sunt & innumeræ muscarum species: quædam vocantur carnivoræ, quia carnibus solent insidere circa quas vermiculos profundunt; quædam florilegæ, quia flores depascuntur, papillionium æmulæ: quædam sunt scorpionum similes.

In eadem classe varia vesparum genera, quorum aliqua nidos construunt ex arenâ, argillâ & glareâ: alia condunt alvearia

sua in terrâ : ex illis quædam suis aculeis occidunt araneas, alia dentibus excerpunt, unde vespæ dicuntur lupi.

Quidni possent in eadem classe poni scarabei, quos antea reponebant in secundâ classe : eorum à magnâ varietate cornuum variæ sunt species ; est scarabeus unicornis cujus cornu naso imminet, alter cujus cornu ad dorsum usque inflectitur, quæ scarabei species formatur ex verme crassiori qui in ligno nascitur ; collum vocitant : albi sunt & sex pedibus rubris instructi, aptatis, non ad gressum, sed ad fodiendum.

Quidam scarabei dicuntur cervi volantes ; eorum alæ conduntur in squamosâ pelle velut in vaginâ, sed squammæ explicantur fixæ : in quo statim permanent cum animal volitat, postea complicantur alæ : sumunt alimentum, nempe liquorem melleum qui manat ex quercubus.

Alii sunt capræ volantes, alii porcelli volatiles, ob cornuum aut narium similitudinem : alii sunt muscæ, inter quas muscas sunt scarabei virides & aurati, sed foetidi, ut cantharides ; alii locustarum instar exiliunt diversimodè quidam capite & pectore in unum adductis, infixi nimirum terræ, supra dorsum producto corpore exiliunt repente in aëra : quidam insistentes prioribus cruribus, infra quæ

adducunt caput; hi molestum efficiunt sonum & nidulantur in rudèrum foraminibus; alii stridorem emittunt dum caput affricant pectori, aut caudam alis squammosis: denique alii aculeum in caudâ gerunt: nascuntur illi ex vermiculis qui involvuntur pelliculâ quâ salicum folia vestiuntur: eorum infinita sunt genera, incredibilis varietas, partium conformatio mirabilis, metamorphoses benè ordinatæ, artem omnipotentis Opificis commendant.

Ad eandem classẽ revoca formicas; cùm vermis ad justam magnitudinem crevit, partes omnes videntur formatæ sub pelle, pellis exuitur, partes sunt fluidæ instar aquæ; sed pellis intrâ paucos dies fit cornea, rostrum munitur duobus dentibus, qui variis incisuris dividuntur; quæ formicæ laboriosæ sunt, nullum habent sexûs discrimen: mas enim non fit à instructus nisi cùm generationis ætus deferbuit; fœmina verò fit ventre turgido innumeris ovis fœta.

Ad eandem classẽ revoca erucas & papiliones, quorum sunt infinitæ species; quidam de nocte volitant & ex illis pluriimi nascuntur ex vermiculis qui pannos & chartas exedunt; dicuntur illi vermiculi tineæ, quos inter quidam domunculas suas instar testudinum secum vo-

hunt : papilionem ex tineâ formatum descripsit *Hook.* : albo colore nitet, hinc dicitur tinea argentina : habet quatuor alas : duæ priores sunt latiores & alis anserinis similes, quia calamus in medio positus veluti pilos sursum & deorsum emittit : pili digitos tangentium inficiunt.

Alii papiliones de die volitant : in eorum alis pulcherrimi depinguntur colores, quales exprimuntur in flabellis quibus tempore æstivo utuntur mulieres : alii celeri & citato motu, alii lento feruntur : uni incumbunt generationi cum ad illam pervenerunt ætatem in quâ species possunt propagari.

De quartâ Insectorum Classe.

In hac classè sunt muscæ, tum quæ in latrinis nascuntur, tum quæ ex carniû putredine gignuntur, quorum semina sunt vermiculi : sic v. g. rabani muscæ equis & bobus molestæ procreantur ex vermiculis qui in fluviis passim repunt.


In eadem classè reperitur animalculum unde humana superbia vires sumpsit, putâ bombix.


Bombix magnâ ex parte erucæ similis est quoad partes exteriores : alitur, si fieri potest, ex mori albi foliis : sunt enim teneriora quàm folia nigræ, unde denti-

bus animalis faciliùs corrodi possunt: intrà paucos dies somno corripitur, quo jacet mortuo similis, veluti conditus in sepulchro: excusso somno, senectam deponit & indumenta quæ inter mori folia conspiciuntur: tum novum cranium priori longè majus exerit: deinde quatuor dies in somno agit & somno iterùm per triginta sex horas aut circiter corripitur; corpus habet oblongum. Qui de hoc argumento plura scire voluerit, legat Malpighium, qui disertissimè illud tractavit.

FINIS PHYSICÆ PARTICULARIS.







20th 6/10

3

